


〔重刊訂正本〕

中國醫學大成

錢若利題



【三十一六】

〔重刊訂正本〕

中國醫學大成

〔三六〕

上海科學技術出版社

期

末

中國醫學大成 (全套共五十冊)

上海科學技術出版社出版

(上海瑞金二路四五〇號)

新華書店上海發行所發行

上海市印刷十廠印刷

開本七八七×一〇九二

三十二開

精裝

總字數二一,七九〇,〇〇〇

總印張八六二

一九九〇年六月第一版 一九九〇年六月第一次印刷



C0159019

孫文垣醫案

〔明〕孫泰來

孫文來 同編

三家醫案合刻

〔清〕葉天士

繆宜亭 著

薛生白

張畹香醫案

〔清〕張畹香 原著

原 編 曹炳章

總審定 裘沛然

總審閱 蕭敏材 朱邦賢 沈麗君

重刊訂正《中國醫學大成》序

《中國醫學大成》一書，我鄉先輩四明曹炳章先生所輯集，爲發揚中醫學，保存古醫籍，以饗同道並惠後學作也。曹氏纂集是書時，正值西學東漸，國內淺見倖進之徒，競尙浮華，大肆鞭撻我國文化固有之精英，如民族醫學，悉在消滅之列，中醫學不絕如縷。而先生乃在此時從事中醫叢書巨著之編輯，姑不論其學術價值，獨其保存民族文化精粹之苦心孤詣令人可敬，其卓識遠見，又何其可欽也。

楊志一在原書序中有說：『大凡學術之成立，歷久而不敗者，必有其真實之價值在。』善哉言乎！中華民族立國數千年而得以生存繁衍，如無優秀之文化及可貴之醫學，則亦何逃於優勝劣敗之例。尤

其在科學迅猛發展之今日，百技更新，而古老之中醫藥學日益引起國內外有識之士之重視。各類中醫藥研究所之建立，亦爲保護人民健康之需要，順應世界醫學發展之潮流而設。凡此種種，夫豈偶然。

惟中醫學歷史悠久，濫觴於炎黃，昌盛於漢唐，歷代醫家多有創見，其學術經驗載於文獻者浩如煙海，遺佚者可弗論，僅就先生纂集之時，存書尙達萬種，學者既不能盡讀，又無力購置，且諸書精粗雜糅，版本文字舛誤殊多，使學習中醫者常興望洋之嘆。先生乃爲之博採精選，上自先秦，下迄近代，凡理論、方藥、臨床各科咸備，別爲十三類，書計三百六十五種，分醫經、藥物、診斷、方劑、通治、外感病、內科、外科、婦科、兒科、針灸、醫案及外集雜著各類。其中傷科、眼科及五官病歸入外科，推拿、手術歸入針灸，醫論、醫話、醫史歸入雜著。所收各書，皆中醫要籍，大都內

容精粹，切合實用，版本亦從精選，並加句斷。各書之首，皆列著作校刊略歷及內容提要，以便讀者入門粗知梗之助。

中醫學歷來叢書頗少，是書搜羅廣而選擇精，洵爲前所未有之巨著。惜全書印刊未半而抗戰軍興，烽煙迷漫，醫籍出版被迫中輟。而已印行之一百三十六種，今亦散佚不全。上海科學技術出版社爲應學者需求，重爲付梓，並影印以存原貌。書中明顯錯訛者，由我院及中醫文獻研究所等有關單位專業人員校勘改正，使之益臻完善。

夫文以載道，中醫學爲我國醫學之重要財富，文獻則是寶庫中之重要內容。故有志斯道者，務求先通中醫之理論法則、方藥效用和臨床處置，使對中醫學有全面之理解，更須驗之臨床，以汲取其理論精華與豐富經驗。學問之事，原恃艱苦以求而非獵取可得。昔張仲景勤求古訓，博採衆方；孫思邈青衿之歲，高尚是典，白首之

年，未嘗釋卷；葉香岩以不讀破萬卷，不敢輕言醫。茲三人者，皆由勤奮好學而成一代高醫，故學習中醫宜下一番札實工夫。在此基礎上運用現代科學技術研究和整理中醫學，才有闡明和提高希望。中西醫結合，亦將另具特色。以務實精神，走中醫現代化循序而進之道路，勇於繼承，敢於創新，使傳統醫學有所發現與創造。苟能如此，不僅爲祖國爭光，並將爲人類造福。

本叢書一百三十六種，分爲五十冊；每冊後並皆附有全部書目。它的出版，爲中醫和愛好中醫者提供珍貴之醫學文獻，讀者勤習而深研之，必能奠定中醫學根柢，大有助於中醫事業之繼承與發展。

裘沛然

一九八八年六月作於
上海中醫學院

〔明〕

孫泰來
孫文來

同編

孫文垣醫案

中國醫學大成

孫文垣醫案提要

明孫泰來孫明來同編。休寧人。孫一奎爲文垣之子。是編卽所輯一奎醫案也。有三吳醫案二卷。計九十六症。新都醫案二卷。一百十四症。宜興醫案一卷。四十一症。是編不分證而分地。蓋以治之先後爲次序。一奎深究醫理。是篇要旨。具載赤水玄珠。醫旨緒餘二書之中。旁文多於正論。大意主於標榜醫名。而不主於揮發醫理。惟辨症用藥尙合。來源多可師法。故魏之琇續名醫類案亦多採之。

孫序

蓋士君子有濟世之心者。必託經世之術以運之。遇不遇無論也。何也。得時而駕。則宇內之休戚利害。隱然共之。視其患。若切於身之疾痛疴癢。不措之。安全不止。此士君子之心得位以行之者也。不幸不獲遇。澤不及物。而心不得施。有志君子。往往懷其道而隱於醫。故是昔人謂濟人利物。無位者不能。惟醫以救死扶生爲功。故業之者。可以推不忍之心及於物。而於道有益。有味乎其言之也。然醫豈易言哉。吾聞其宗旨。自內經本草以來。書之藏於有司者。一百七十九家。非博通鉅儒。超悟上哲。顓攻其業。何能探討洞明。其陰陽寒熱靜躁虛實。消息盈縮之奧。而措之行事。夫人之待命於醫。生死攸係。迺以未諳淺薄者嘗試之。其不賊人之命者。幾希。醫以濟人。至於賊人。可不畏耶。此醫之所以難言也。余頃多病。謁告山居。嘗嘆濟物之衷。未措於用。顧思延醫以求濟其身。然而醫之良者。苦不一遇也。迺壬申仲秋。吳君柳溪。譚新安海陽。有孫君東宿者。醫可謂稱良矣。余亟請而相印證之耳。其論瀕瀕乎素難之旨。而表裏夫張劉孫李丹溪伯仁諸家。其視余疾也。

未投藥。先譚余之經絡色脈機能。與受病之自。卽勿藥而余病爽然若失。及詳察其端方之度。沉著之思。淵淵之閫奧。則杳焉莫竟其涯。非所謂深於道而隱於醫者耶。余因詰之曰。神農嘗百草。先天而命之藥。黃帝岐伯後天而著之經。此天以神授聖以神符。不可及矣。嗣後若和扁華佗。淳于意仲景。邈河間東垣朱滑。莫不筮弄化機。制人命於掌上。術亦神也。何今之事是業者。不能踵其芳躅耶。抑世代之不同也。孫君勃然曰。古今人非不相及。用心殊爾。宋儒有言。古之仕者爲人。今之仕者爲己。不佞亦謂古之醫者爲人。今之醫者爲己。道不同而受病一也。夫士君子之視天下與吾身血脈相流通。天下病若痼瘵之切身。天下安則愜然而無恨。雖以道爲藥石者。其濟廣。以醫爲道術者。其濟狹。其心一也。故古之醫也。以救死扶生爲心。其業專而用方也慎。專則精。而造詣入室。慎則審。而投藥奏功。此和扁諸名家所以悉臻秘妙。稱神奇。今之醫則異是也。將以市利。非以濟人。黃岐以來諸書。非不剽竊以資口說。迺其心則實胡越一膜。視天下率以利之。盈詘爲心之重輕。人之濟與否。若與吾術不相關。此何以比古人而接其芳躅哉。不佞奎何能造古賢哲之閫奧。第無愧於此心爾。余聞而喟然嘆曰。孫君充是心而行是

術。其將大有裨於時矣。雖隱而亦顯也。因次其語而歸之。爰以訂夫業是術者是。爲序時。

萬歷癸酉中秋日吳江孫質庵從龍敬書於符丸草堂

孫文垣醫案目錄

卷一 二 吳治驗

萬歷龍飛二年吳小峰小川目疾	一
萬歷甲戌沈中丞案	三
張孝廉後渠大頭疫	三
吳江孫行人痛風	四
鄭都諫公子痘	五
張文學子心病虛弱	七
大宗伯董潯陽翁脾胃疾	九
董龍山夫人便血	一〇
馬廚瘡痢併發	一一
吳肖峰令政腹痛	一三

大光祿龐太夫人寒熱頭痛飽悶	一五
光祿公痰火脇痛	一六
張思軒夫人心痺	一七
馬迪庵公內傷腹脹大小便不利	一八
潘大司馬腸風	二一
馬鳳林內子隱疾	二一
舜田臧公氣虛中滿	二二
金谿令君臧老夫人頭疫	二三
潘見所公半身不遂	二三
見所公白濁	二五
凌夫人孕	二六
金元岩令眷產後痢	二七
沈別駕夫人產後發熱	二七
吳太夫人白帶	二八

吳北海令政經行四肢暴發塊紅紫	二九
周芻玉白濁	二九
竹匠婦妊娠吐血胸腹脹痛	三〇
李妓夢遺咳嗽	三一
金妓時疫	三二
曹鏗胸膈不暢	三二
李雙痛風	三三
沈別駕門下老僕三陽合病	三四
蔡中林內人陽明少陽合病	三四
吳九宜先生早晨泄瀉	三五
沈大官左膝腫痛不能起止	三五
沈繼庵下痢脫肛 內人乾霍亂	三六
沈晴岳先生五更耳鳴	三六
潘景宇內人頭痛作瀉	三七

臧六老上吐血下瀉血	三七
臧氏婦臍邊痛下痢紅白	三八
丁耀川令堂吐血左胯肛門互換作痛	三九
丁文學令姊暈厥	四〇
金良美咳嗽吐紅潮熱右脇不能臥	四〇
倪五娘子口眼歪邪	四二
王祖泉令政頭痛惡寒汗出如雨	四二
溫巽橋子婦帶下	四三
溫一渠內人血虛咳嗽	四四
溫巽橋二令媳產後右脇脹痛白帶如膿	四四
溫天衢病目吐血	四四
張二娘子孕七月嘔吐不止	四五
王敬泉內眷痰嗽腹脹	四五
溫南溪內人大便秘結	四五

陳春野公令愛丁奚疳症·····	四六
潘敬齋令媳血下筋膜如手大者一二桶·····	四六
張懷赤公早晨洩瀉下元虛寒·····	四七
臧七房二老夫人痢·····	四七
蔡樂川令眷頭痛如破·····	四八
周蘆汀迺眷胃脘痛·····	四八

卷二 吳治驗

王文川令郎內傷發黃·····	一
施涇陽先生內人痰火·····	二
屠侍軒尊眷產昏憤不知人事·····	二
屠學恆乃眷產後作瀉·····	三
周鑑泉令政傷寒譫語·····	三
臧顧渚老先生兩耳掀痒·····	三

王南崗咳嗽氣湧	三
張桃津乃政小產後臍下痛	四
陳光祿五更胸膈飽脹	四
溧水令君夫人五更倒飽洩漏	五
李悅齋夫人腹痛譫語如狂鼻衄	五
吳仲峰脾洩	六
張後溪令孫瘡疥發腫	七
張五橋夫人喘嗽	七
方東埜脊骨痛牽引胸腹皆痛	七
張淨宇發熱腹痛洩瀉嘔吐	八
張近川胃脘痛	八
閔文川公肛生一毒膿潰不收口	八
李古愚胸膈飽悶大便澹泄	九
姚惠齋夜多洩瀉	九

姚老夫人右手疼·····	一〇
一僕時疫頭痛發熱·····	一〇
一僕時疫頭痛如破·····	一〇
一僕時疫嘔吐煩躁口渴·····	一
馬鳳陽咳嗽內熱·····	一
倪二南內人小水不禁·····	一二
嚴柱史令媳腹中有塊疼痛·····	一二
陳鹿塘脹風臟毒大便燥結·····	一二
張道南內人腹痛·····	一三
張道南尊堂鬲上痰痞而惡心·····	一四
馬迪庵內人奇痰症·····	一四
董老夫人眩暈·····	一四
張裕齋惡寒發呃·····	一五
嚴老夫人胸膈痞悶·····	一五

王谷泉頭眩洩瀉汗出不止	一六
方東埜兩脇痛	一六
一婦懷孕內熱咳嗽	一六
一婦心痛唇紅蟲痛症	一六
倪二南內人小產後小腹痛暈厥	一七
倪少南右頰車浮腫疼痛	一七
倪少南內人經行如崩頭暈	一七
高仰山內人痔血裏急後重	一七
姚娘子小腹疼	一八
張五橋先生令政痰喘咳嗽	一八
徐文學三泉令郎右脇脹痛	一八
王祖泉乃眷遍身痛	一九
費少垣乃眷孕痰喘胎逆	一九
費一吾令政孕子淋	一九

六娘子遍身痛汗大出昏昏如醉	二〇
八娘子頭痛咳嗽痰多有血	二〇
姚弁山內人胸脇痛	二〇
李坦渠令子室咳嗽心痛腰疼	二一
周衡宇咯血痰火作痞	二一
張分守腰膝痠痛	二一
鄭春元頭痛內寒	二二
徐老夫人胸膈痞悶	二二
張麗川咳嗽多痰糞門發癰	二二
陳仰山內人小產二月而血大下	二三
張溪亭乃眷喉中梗梗有肉如炙轡	二三
張溪亭令媳夢亡過祖母打其背	二三
陳茂之勞倦色慾傷寒	二四
陳五山胃脘痛	二四

吳小峰酒積作痛·····	二五
沈大參痰飲痞滿·····	二五
王敬泉胸膈飽悶頭暈作吐·····	二六
張二官傷寒·····	二六
大司馬令媳產後暈厥發狂·····	二七
孝廉臧荅泉瘧後作痢·····	二八
包繼可先生令眷孕而發瘧·····	二九
張氏婦胎異·····	二九
吳比部公子病眼·····	三〇
丘太守令姪筋痿·····	三二
一書辦下消·····	三三
韓僉憲令媳怒後夜臥不安·····	三四
韓老夫人夜來臍腹痛甚·····	三四
丁春元令郎瘧母·····	三五

孫令君令媳產後譫語發熱洩瀉	三五
吳東星先生楊梅風毒	三七
潘見所老先生小盛價疳積	三九
凌繹翁痰火吐紅喘嗽	四〇
周鳳亭濕熱壅滯發熱煩躁	四一
周采石濕熱生痰痞悶	四二
又令孫女龜背	四三
閔蜃樓虛損咳嗽令脊痛風奇疾	四三
金寄閒令堂痢而胸膈膨脹	四五
徐中宇之婦汗出如雨昏憤又胸膈要人足踣	四六
金達泉令政孕三月而痢赤白	四六
金元岩赤白痢	四七
金達泉瘧痢交作	四八
金寄閒少陽陽明合病爲瘧	四八

淮陰胡少泉令郎夢遺令愛發熱嗽咳又友人奇疾·····	四九
吳氏婦隱疾·····	五〇
染匠之婦腸癰·····	五一
王祖泉臟毒下血·····	五二
南都大司馬洪溪洩瀉·····	五三
崔百原公溼痰風熱病·····	五四

卷二 新都治驗

瓊兄內傷飲食外感風邪·····	一
程龍邱翁每行動卽作熱發渴嘔惡腰與環跳穴常痛·····	二
汪松崗原傷於酒夜分發熱咳嗽咯血·····	二
族妹經不行者八十日每飲食入腹卽疼痛吐出迺止·····	三
孫華野喉痛頰車腫·····	三
顯兄每辛苦及酒多則咯血數口·····	三

吳遂兄濕發黃	四
族姪明之痰火上逆大吐痰沫因而嘔血一涌數碗	四
族嫂程氏肺癰	五
姪煥葉氏身面四肢浮腫	六
族姪孫伍仲善飲好內便小血淋疼痛	六
令眷吐紅發熱	七
亮卿令愛右目紅腫	七
太學少竹眼紅腫脹	七
一僕婦產後惡露不盡腹中作痛	七
程好吾令孫右耳後生毒腫痛	七
華岳令堂右手臂肢節脹痛	八
程兩峰令眷血痢	八
程七護兄臍腹右邊疼痛小水不利嘔吐不進食	八
程社貴兄醉後御色次早胃脘痛極	九

汪松崗令眷左脇痛咳嗽內熱	九
贊皇令堂產後左脇痛甚	九
許少峰中風先兆	九
朱宅女眷熱入血室	一〇
孫熙宇肢節腫痛痰多嘔惡病多夢鬼	一〇
愛泉傷風咳嗽聲啞右邊不能貼席	一一
姪婦戴氏有妊五月忽血大下午後發熱	一一
靈岳乃眷胃脘疼頭痛暈舌麻	一二
吳人峰先生內人兩脇脹急痛拒胃脘	一二
陳鐵兄內人產後腹痛發熱下痢膿血	一三
程石洲乃眷因產難子死憂悶小腹有塊作痛復因多食圓眼腹益	一三
大脹堅如石大如斗氣促不安	一四
程嫗年八旬頭暈脚軟大便洩小水淋瀝	一四
程道吾先生令政覺而驚時常暈厥	一五

一僕婦瘟疫以勞食復作	一六
程方塘年六十四風癱不能步者三載腿肉盡消	一六
汪省吾瘧三日一發發於夜	一七
汪東之丈七月初旬虛陽口瘡	一八
汪東之令眷姪中咳嗽	一九
吳東渠瘧後虛憊	二〇
吳西源令眷以艱子多鬱思肌肉盡削皮膚燥揭遍身生瘡體如火燎	二〇
族嫂程氏環跳穴邊腫痛寒熱并發不能動止	二〇
垣宇瘡後遭跌環跳脫出不能復收	二一
姪孫女周歲發慢驚	二一
程少湖以飲生酒面浮胸脹	二二
吳斗一原有腸風又感風邪發熱多痰腹痛下痢	二二
姪孫二水體甚肥胖患溫瘧疾	二三

堪輿張錫泉先生左脇皮裏膜外疼痛·····	二四
族姪雲岳偏墜臍腹腰俞脹痛·····	二四
一婦妙齡感風寒致成鼻淵·····	二四
程兩峰瘀血發黃吐出穢惡如爛猪肺狀大便色如墨·····	二四
予表嫂小產後腹痛暈厥·····	二六
陳士美傷寒熱症漏底·····	二六
程松逸兄酒疸·····	二七
仲諫患跨馬癱·····	二七
一婦咳嗽痰中有紅·····	二九
族姪春溫鼻衄寒戰·····	二九
汪氏婦腹脹如斗·····	二九
仲登陽症作陰·····	三〇
汪希明性躁痰火咳嗽吐紅·····	三二
祝弘吾潮熱咳嗽汗流不止·····	三二

汪宥翁老年勞倦感冒胸膈大熱而痞	三三
汪鍊兄內人經水紫黑血塊不止	三三
程相如令政姪發寒熱	三四
余文台壯年咳嗽吐紅	三四
邵伯成女經行而浴感冒大發寒熱嘔吐煩躁	三五
金氏婦血崩後四肢浮腫	三五
張雲門令郎囊癰	三六
朱宅內眷懷妊受驚而成子懸	三七
胡隣泉女吐血潮熱	三七
汪思石令堂怒後暈厥	三八
姪孫君實遍身筋骨疼狀如虎噬	三八
葉子黑內人疫後虛憊	三九
孫如亭令政右眼眥突生白泡二寸餘嘔吐眩暈	四〇
吳勉齋腹痛欲死	四〇

黃熙齋內子產未彌月醉犯房事血來如崩	四二
程心章兄頰腮紅腫	四二
程六十喘後發腫	四二
程七護丈發熱痛伏梁積塊下痢紅白	四三
程孺人黃氏春溫過時熱病	四三
程有望孺人月汛當止不止	四四
上舍近洲胸脇脹痛	四四
黃源金先生內人吐血洩瀉發喘	四五
族姪合溪八旬而發寒熱咳嗽汗出不止飢飢連聲	四九
孝廉方叔度令嫂江氏脹滿	五〇
吳天威丈便癰	五一
文貴時疫漏底發寒譫語	五二
鍾澤程夢奎孺人哭子過傷因發寒熱	五四
歛潛口汪召南丈令郎蠱脹	五六

岩鎮鄭景南丈痰飲積塊跳動不止……………五七

卷四 新都治驗

孫子元瘡後沐浴鼻出紅涕面足浮腫……………	一
一婦食積痰飲瘀血流於下部左跨臍腹脹痛……………	一
恒宇令堂右肩筋搐腫痛……………	二
孫君錫頭痛胸背脹飲食作吐咳嗽……………	二
孫爾嘉內人三姪而三小產……………	三
孫薇垣內人咳唾紅痰……………	三
戴萬奇丈中痰後兩手足不能動……………	三
亮卿內眷頭痛玉戶撮急肛門逼迫遍身皆疼……………	四
梓林兄內眷右手痛風小水頻迫……………	四
一婦經閉三月洩瀉嘈雜吐酸……………	四
程氏婦下午喉痛痰多暈厥……………	五

江鏗兄時疫熱病汗出不止	五
何明吾時疫食復不省人事循衣摸床	五
孫元素春溫飲復發斑	六
孫安空飢勞感疫食復發斑	六
一人喉痛夜臥氣壅面足浮腫	七
何洗心虛寒腎洩	七
程湘孺人鼻衄後眩暈嘈雜嘔吐清水	八
孫君孝春溫誤作陰虛治	八
一僕婦頭疼喉痛咳嗽嘔惡胸膈作脹	九
族姪婦范氏乳癰	九
表姪女黃氏姪七月患血痢	九
程氏婦小產後患赤痢	一〇
孫竹埜受暑作吐又傷酒麵身黃成疸	一〇
程菊泉暑月喘嗽	一一

程應禎兄咳吐紅痰胸背脹痛眩暈	一一
虛山內人胸脇脹痛五更嘈雜	一二
一婦暑月小便不利玉戶腫大便血	一二
弟婦戴氏臍腹痛白帶如注裏急後重下痢赤白	一三
族弟應章胃脘當心而痛	一三
弟淑南三陽合病暑症	一三
一富婦轉脬	一四
文約孺人年八十三胃脘疼痛	一四
應章弟三陽瘧	一五
程好吾春溫	一五
程氏婦屁從子戶出	一五
族子應章之弟十月發三陰瘧	一六
吳中岳孺人疫後壞症	一六
鮑子五保時疫耳聾洩瀉	一七

僕子孫守中麻後咳嗽無痰唇厚聲啞	一七
僕子得貴春溫頭痛	一七
元素侄令政春溫後經水適止	一八
朱氏子天送時疾頭疼身若燎炭	一八
朱桃源內人胃脘痛常苦夢遺經水一月兩至	一八
桂亭大兄痰積瘀血作痛	一九
熊二官疫後食復	二〇
堂弟東里內子咳嗽吐紅	二〇
程竹坡內人年六十瘟疫昏憤	二一
程內眷新寡七日染疫適值夢洩神昏譫語	二一
太學從明滯下純血	二二
查少川喘後腫脹	二四
夏益吾肢節腫痛手足灣痛腫尤甚	二七
初陽姪內人肺癰	二七

仲木內人氣喘作脹·····	二八
姪孫女十歲大便脫肛鼻中出血·····	二八
唐岩祈患痢赤白腹脹氣喘四肢冷陰囊腫·····	二九
姪壻程東山患休息痢下皆紫血·····	二九
陳氏婦腸鳴腹痛合目汗出下午潮熱·····	三〇
九德姪耳鳴·····	三〇
陳覺宇上盛下虛合目亂語痰火吼喘·····	三一
程紹溪中年患鶴膝風·····	三一
堂嫂程氏喉間有物如嚮咯之不出嚥之不下·····	三二
一婦產後咳嗽發熱咳出之痰色黑而臭·····	三三
表嫂孀居二十年右癱不能舉動神情恍惚亂言多悲泣·····	三三
桂亭大兄墜轎後腰脇脹痛·····	三三
堂嫂王氏吐紫黑血塊足跟掀腫痛痒·····	三四
堂婦程氏姪五月痢下膿血·····	三四

嫂汪氏頭痛遍身痛痢下赤白	三五
仲閻氣虛中滿	三五
朱懷竹楊梅毒氣內攻上迫於肺將成肺癰下流陰囊囊潰見子	三六
查良本兄令眷每飲食悉從背後而下	三八
後溪大兄孺人戴氏患血痢	三九
邵敬圃令眷胃脘痛	四一
蘇望臺患瘧	四一
汪氏嫗寒痰壅滯	四三
徐客兄子筋痿風	四三
邵老封君手足麻而無力	四四
程巢父廼郎痢後風	四四
葉潤齋心膈嘈噤好啖肉尤好鷄腹大痛蟲症也	四五
程相如令政孕七月患痢	四六
程曉山中風先兆	四六

迺郎麻後疳症·····	四七
一婦疫後虛寒·····	四八
從獻長郎七歲患痢痢後成疳·····	四八
姪孫子忠痢下紅膿如爛魚腸腹大痛日夜百次·····	四九
元素內人雙胎難產·····	五一
邵馬兄患嘔吐所出皆如爛猪肺·····	五一
許卓峰上吐血下溲血咳嗽聲啞·····	五二
族嫂鈞儒人患痢赤白嘔吐痰涎粒米不入口者兩月·····	五三
邵來儀丈令眷咳桃紅痰如桃花膿色·····	五三
程玄祖兄春溫食復僵寢如屍·····	五四
汪郎兄蟲痛·····	五四
查景川氣虛瘡疥·····	五五
程玉吾內人孕七月內吹·····	五五
一黃氏婦受身足月發癰·····	五五

吳見南令郎心脾痛·····	五六
又令郎八歲疳積蟲痛·····	五六
姪女八歲腹高於胸咳嗽嘔吐甚則噴血·····	五六
從兄鎔年五旬左脇痛手足抽搐不能履步·····	五六
小童上達脾虛發腫·····	五七
族姪良詮血痢腹痛·····	五八
一婦胸膈有痰大便洩瀉大發寒熱·····	五九
從弟婦程氏右脇痛不能睡背心疼胸膈作梗痰中有血·····	五九
黃懷虛原患吐血又咳嗽嘔吐左脇不能着席·····	五九
一族姊年六十咳嗽口渴常吐虬蟲·····	六〇
姪婦戴氏心痛徹背背痛徹心一發必七日·····	六〇
老僕來興痰火上壅胸脇背心脹痛·····	六〇
一婦生女不生子多思多鬱小便秘而不通轉脬症也·····	六〇
崑池太學內人牙痛一晚暈厥三次·····	六一

一僕婦產難子宮墜出戶外半月不收	六一
姪孫媳程氏體肥經閉者八年	六二
熊成入官早起行路眼見邪火二團滾來大被驚駭	六三
從姪食從鼻出	六四
程達菴四媳戴氏產後腿疼	六五

卷五 宜興治驗

徐檢老患腸風下血數桶	一
吳儀制主政尙卿先生患肺經痰火症更兼鼻衄	四
宜興令君宋太夫人病胸腋脹痛予診左部俱散亂無緒兩尺無神	四
預斷不治	四
吳宮詹少溪先生以酒積致胃脘疼又加腰眼足跟肢節皆疼	五
宜興令君胡太夫人年七十二脾洩十五年不愈又加吐紅咳嗽多痰痰不易出	五

曹同府東崗先生患右脇痛予以脈知其傷風傷食所致	六
宜興令君胡鏡陽公上焦浮熱胃中食積痰飲又因勞心動火頭面	
瘡癰作疼	七
吳鵠源先生咳嗽口乾腹中如火滾動不思飲食右脇痛	七
吳鶴洲先生太夫人八十六原有痰火大便日三四行夜兩起腸鳴	
臍腹膨脹脈三四至一止七八至一止人皆不治予獨起之	七
吳鶴洲如夫人胃脘痛百治不效目爲怪疾予作肝脾相勝之症治	
之而愈	八
曹宜崗常夢遺予語以神志不足又疝氣嘈雜食硬喉中作梗	八
吳荆樵文學疝氣半年兩跨結核硬痛	九
吳鶴洲先生中焦有痰肺氣不足發瘧熱多寒少口渴小水不利體	
倦頭痛	九
吳雪舫先生左脇下紅塊大如雞子傍有小菩蕾作疼予作肝膽二	
經有熱毒治而愈	九

吳孝廉球泉先生心血不足胃中有痰下元陽氣不充	一〇
李思椿胸膈脹痛痰有紫色瘀血	一〇
吳雙泉公病陽亢陰微之候上盛下虛	一一
李寅齋先生患血淋小水艱澀難出竅痛不可言二年不愈	一一
徐熙宇文學內眷前後心痛耳鳴眩暈吐逆吐酸四肢痠軟	一二
湯簡庵封君素善飲致發腸風且心腎不交	一二
吳仰玄先生患胃脘痛痛徹於背痛時冷汗如雨	一二
杭芝崗文學酒後近內行採戰之法致成血淋	一二
吳中翰漢源先生腸風下血腹中微痛	一三
吳大柱史安節公脾肺二經有痰火中焦有濕熱流於膀胱爲淋濁	一三
吳宮詹少溪翁有酒積而頻傷怒致右脇之火衝上作痛耳鳴眩暈	一三
大便艱澀	一四
吳孝廉球泉公內人痢疾後感寒而經至發熱口渴遍身疼等症	一四
吳西雲先生庶母筋骨無力不能起止將成痿症	一五

蔣近思令郎脇痛氣促胸滿喉疼痰有血屑下午潮熱	一五
徐學士檢老正月食新蒜炒肉而又冒風寒咳嗽喉疼聲啞	一五
萬肅庵先生令郎發熱旬日口渴舌乾色如沉香	一六
大宗伯黃履庵老夫人右脇痛咳嗽喉乾間吐紅腸鳴洩瀉	一七
白雲仰令眷觸怒暈厥手足冷汗如雨氣息微合目靜坐一時始定	一七
吳心逸先生之使患勞倦傷寒	一八
吳文學霽陽先生以積學勞心而心肺之神不足	一八
宜興令君胡鏡陽公夫人患陰虛陽搏之候	一八
太史徐檢老向苦癩疔而妨生育	一九
吳宮詹少溪翁以長君秋捷受賀過勞而傷飲食	二一
吳別駕勉齋翁體豐腴連跌而口眼歪邪左手足不能動	二二
少冢宰徐檢老以賀壽而腎生痔癰	二三
宮詹吳少翁患痢赤白兼下裏急後重	二五
臧少庚年五十七飲食不順利喉管中梗而難下	二六

孫文垣醫案

明 新安 孫一奎 文垣甫輯

鄞縣 曹赤電 炳章圈點

卷一

二 吳治驗

萬歷龍飛二年小春月。予始遊苕之東雙林。於時族兄吉泉之友吳小峰。與其弟小川俱病目。專科者愈治愈重。其自始紅腫。次加太陽痛。繼則白星翳疊出。予不以目科名而識者。予稱大方。因謀於吉泉曰。醫以通變爲良。昔秦越人過邯鄲。聞貴婦人。則爲帶下醫。過雒陽。聞周人愛老人。則爲耳目痺醫。聞東宿君國手也。必能隨俗爲變。願一言去吾兄弟目疾。吉泉邀予。予曰。嘉靖間論醫者。必首西吳。如周仲仁氏。凌漢章氏。王賓湖氏者。皆擅一時名。其家世必有傳也。何需於予。吉泉曰。渠家慕弟久矣。且其尊人受博士易。爲西吳名家。弟好易。幸一

往。藉此爲談易地。毋遜。診其脈。小峰之脈。濡而緩大。兩目血縷直貫瞳人。薄暮則疼。小川之脈。皆洪大鼓指。黑珠有浮翳。癢隱難開。大小便皆不利。故於小峰用補。先以清肝散與之。夏枯草五錢。香附四錢。甘草一錢五分。細茶五分。以徹其痛。藥兩進而痛止。繼用人參、白茯苓、熟地黃、枸杞子、桂心、牛膝、破故紙、白蒺藜、牡丹皮。服八日而愈。於小川用瀉。內用瀉肝湯。及當歸龍會丸。外用象牙、冰片爲末點之。七日全愈。其尊君我峰翁喜詣予曰。二目均病。年同齒。染同時。諸醫同治而同不愈。先生一補一瀉。而二病均愈。何哉。予曰。此陰陽虛實之辨也。經云。實者正治。虛者從治。令姪之症。惟厥陰肝火熾盛。肝嘗有餘。有餘者瀉之。正治也。即君下虛。又爲怒所激。怒則火起於肝。肝爲藏血之地。故血絲貫瞳人。而薄暮作痛。方用夏枯草、香附爲君。疏其肝氣。經云。肝苦急。急食甘以緩之。故用甘草爲臣。茶能清頭目。用以爲使。先爲去此痛。經又云。水流溼。火就燥。故復用甘溫補其下元之虛。俾火得歸原。此從治也。若用苦寒降火之劑。不惟血凝而痛加。抑且激其火而使愈熾矣。我峰聞之語人曰。孫君本陰陽而治寒熱。是用易爲醫也。故補者補効。攻者攻効。語曰。不知易者。不可以爲太醫。孫君神

於易而於醫乎何有。願於吾茗懸一壺也。予哂之。謂昔韓伯休且不欲人間知其名。予又何壺之可懸哉。

萬歷甲戌。其年自仲秋徂冬。瘖子盛行。三月內。予所治男婦嬰孩共七十二人。茗之望族沈最著。大中丞觀頤公當考功時。幼君瘖喘嗽不寧。聲啞發熱洩瀉。斑紫不斂。予以小無比散愈之。夫人妊腹痛昏厥者五日。名醫如高陳二公者。沈姻婭無巨細。悉任之。亦不能措手。予至診之。兩手脈皆洪大。法當下。衆僉以妊難之。予曰。經云。有故無殞。亦無殞也。妊已九月將解。卽胎動奚傷。若當下不下。不獨其痛難忍。而變且不測。考功是予言而請藥。予卽用小承氣湯。加蘇梗。砂仁下之而安。考功偶冒風。頭痛倦怠。發寒熱如瘧。脈浮絃而數。予曰。此小柴胡湯症也。一劑而瘥。考功請告家居者二十年。篤好方書。予初之茗。茗人未知予。考功聞予。亟欲識之。謂予治病甚奇。又與予論傷寒痘疹胎產皆中窾。深然之。語人曰。良相良醫等爾。如孫君所詣。卽千金不足爲其重。特譔醫說書於冊。以不朽。孫君云。

張孝廉後渠丁年。患大頭疫。頭大如斗。不見項。唇垂及乳。色如紫肝。昏憤不知人。

事見者駭而走。其年疫甚癘。人畏傳染。至廢弔慶。張與考功公子同受春秋於會稽陶春源所。陶邀予診之。其脈皆浮絃而數。初以柴胡一兩。黃芩。玄參各三錢。薄荷。連翹。葛根各二錢。甘草一錢。服三劑。寒熱退。絃脈減。但洪大。予知其傳於陽明也。改以貫衆一兩。葛根。天花粉各三錢。甘草一錢。黑豆四十九粒。一劑腫消其半。再劑全消。漿粒不入口者二十一日。再與小柴胡湯兩劑。服之。始納乾糕如指者兩條。次日進粥而漸平矣。丁酉秋聞報捷。

吳江孫質庵老先生行人時患痛瘋。兩手自肩顛及曲池。以至手梢。兩足自膝及跟尻。腫痛更甚。痛處熱。飲食少。請告南還。而伏尊者三年。里有吳君九宜者。沈考功西席也。見予起後渠疾。因語行人逆予。診其脈。皆絃細而數。面青肌瘦。大小腿肉皆削。予與言此病得之稟氣弱。下虛多內。以傷其陰也。在燕地又多寒。經云。氣主煦之。血主濡之。今陰血虛則筋失養。故營不營於中。氣爲寒束。百骸拘攣。故衛不衛於外。營衛不行。故肢節腫而痛。痛而熱。病名周痺是也。治當養血舒筋。疏濕潤燥。使經絡通暢。則腫消熱退。而痛止矣。痛止。卽以大補陰血之劑實其下元。則腿肉復生。稍愈之後。願加珍重。年餘始可出戶。行人聞而喜曰。

果如公言。是起白骨而肉之也。吾卽未藥。病似半去。惟公命劑。予先以五加皮、蒼朮、黃柏、蒼耳子、當歸、紅花、苡仁、羌活、防風、秦艽、紫荊皮服之。二十劑而筋漸舒。腫漸消。痛減大半。更以生地、龜板、牛膝、蒼朮、黃柏、晚蠶沙、蒼耳子、苡仁、海桐皮、當歸、秦艽。三十劑而腫痛全減。行人公益喜。予曰。病加於小愈。公下元虛憊。非歲月不能充實。古取難足而易敗者。陰也。須痛戒酒色。自培本根。斯飲藥有効。而沉疴可除。據公六脈輕流利。官必腰金。願葆真以竣之。萬毋自輕。來春氣和。可北上也。乃用僊茅爲君。枸杞子、牛膝、鹿角膠、虎骨、人參爲臣。熟地、黃黃柏、晚蠶沙、茯苓、蒼耳子爲佐。桂心、秦艽、澤瀉爲使。密丸服。百日腿肉長完。精神復舊。又喜語予曰。貧官何以稱報。譔次公濟人澤物盛德於沈考功冊後。以彰盛美云。後十年。行人官至江西副憲。

鄭都諫春實公長君四歲。患痘稠密煩躁。醫者星羅。皆以爲熱盛不退。形枯色紫。頂有焦勢。症逆。必不可爲。將辭去。予至細觀之。見兩太陽圓淨。神氣蒼厚。謂當急爲涼血解毒。用赤芍藥、生地黃各三錢。紫草二錢。連翹、黃芩、貝母、山查、木通各一錢。蟬退、甘草各五分。藥成劑而衆止之。曰。麻要清涼。痘要溫。故博愛心鑑。

以保元湯爲良。吾儕將劑而進之。乃公獨主寒涼。保元之謂何。予曰。用藥貴對症。保元湯良矣。必血活熱清而後可用。今血熱毒盛而用溫劑。是火熾添油也。衆曰。若慮毒未解。吾茗醇法甚佳。用桑蟲鷄冠血酒調服之。痘卽立起。而慎氏王氏茅氏皆茗上專門名家。亦以爲言。予曰。此法亦可用於清解之後。經曰。諸痛瘡瘍皆屬心火。火未退而用是。以毒攻毒。其勢愈熾。予故欲先清解而後保元也。惟楚銅壁山人黃桂峰者。治痘高手也。獨語鄭公曰。孫公之劑實與症對。衆論皆膠固不達變者。第恐清解之劑用遲一日爾。試煎服之。以觀其後。鄭公命僕速煎。衆猶持議曰。如必服此劑。亦當揀去貝母。山查。鄭公聽其減去。至夜予始聞。隨語桂峰曰。減去二味。恐七八日後不能無它症。桂峰曰。何以故。予曰。此痘內傷外感俱未清楚。今帶熱而出。故其腹猶膨脹。去貝母恐搶喉。去山查恐洩瀉。七八日痘毒出盡。腹內空虛。變從虛出。諸君素以痘專科。何不慮及此。其夜服藥後。卽嗒然而睡。天明痘色明潤。焦頂盡退。血亦漸活。惟嘔噦搶喉。衆又以昨日之劑太寒所致。予曰。此火毒未盡徹也。宜進竹茹湯。而慎雲峰怫然曰。吾家世世業痘。年亦七十有五。曾未見治痘用竹茹者。春寰公令弟樂津公。

檢痘疹全書用竹茹者以正。慎語塞。悻然而去。藥進而嘔止。至八日。果洩瀉發。痒。予以保元湯加白朮以治瀉。大加何首烏以止痒。一帖而痒止。至十四日。天庭兩顴皆同漿作靨。惟兩頤漿未回。洩瀉不止。予因偶出北門。半日歸。見其口開項軟。手足痘氣盡癰。腹又作脹。已成內攻。舉家啼泣。予亦茫然。不遑爲計。嘆息出門。樂津公把而送之。少間揖別。而聞衣間痘臭。語樂津曰。公聞臭乎。曰聞。予曰。似有生意。亟還起之。予思兩頤乃腎經部位。獨不同漿者。腎元虛也。峻補腎元。庶可使活。先以紫河車一錢。用酒漿調服。固其元氣。服後卽睡。繼以人參一兩。黃耆。兔絲子各三錢。作大劑服之。一日夜服人參一兩八錢。黃桂峰是夜自松江還。時已四鼓。亟叩門而入。鄭語之變。且告之服藥。黃曰。唉。吾看作何狀。見其結靨之下。腹灌一線黃漿。贈痘盡起。桂峰也。萬全矣。非孫公不能起此病。桂峰由此益昵予。出必聯舟。歸則同榻。相印正者三年。鄭公感予而作序以贈親書。孫憲副公冊後。識不忘也。

張文學子心二尹。可泉公長君也。自知醫。弱冠病。吳下名醫皆診之。僉曰。瘵。治久不効。子心亦自分必死。督家人具祕器。已沐浴。衣襪衣而臥。正寢。斷粒絕藥者

二日。可泉聞予治高第張星岳之燔奇。因訪予曰。病心痺而尸寢。挾旬者。能起之。誰不嘖嘖稱公高手。吾子病且革。幸憐而診之。予至診其脈。左寸短弱。右關略絃。餘皆洪大。其症咳嗽。下午熱從兩足心起。漸至頭面。夜半乃退。面色青。形羸氣促。多夢遺交睫。臥床褥奄奄一息耳。時則七月初旬也。診畢。語可泉公曰。郎君病可治。不宜豫凶器也。可泉公曰。諸醫僉謂火起九泉者。十不救一。大肉盡削者死。咳嗽加汗者死。脈不爲汗衰者死。又當苾鑠石流金之候。又恐肺金將絕。豚子亦自謂無生理。先生何言可治也。予曰。汗多者。孤陽幾於飛越也。可泉公曰。飛越亦死候也。予曰。幾者。將成未成之辭也。症雖危。其色其聲音其脈。尙有生意。終不可以一凶而廢三善。兩顴不赤。心火未焚也。聲音不啞。肺金未痿也。耳輪不焦。腎水未涸也。相書云。面青者。憂疑不決。左寸短者。心神不足。關略絃者。謀爲不遂。夫心者。萬事萬化之主。內經曰。主明則下安。主不明則十二官危。又肝主謀爲。膽主決斷。謀爲不決。故色青。症與色與脈皆非瘵也。蓋郎君志願高而不遂其欲。殆心病非腎病也。經曰。色脈相得者生。予故謂郎君之病可起也。病者聞言。明目語其父曰。吾今猶寐者。初寤矣。從來未有此論。心吾心

脾也。吾病由星士許決科於癸酉。是年予落第。而同窗者中。故快快至此。先生得吾心於色脈神矣。此言可當藥石。謹拜命予爲定方。煎方名調肝益神湯。以人參、酸棗仁、龍骨爲君。丹參、石斛、貝母、麥冬、五味子爲臣。山梔、香附爲佐。服二十帖而病起。丸方則大龜板、熟地黃、枸杞子、人參、麥冬、五味、茯苓蜜丸。服三月而精神健。肌肉完。次年生女。可泉公荅中名士奇予治。而延譽聞於大宗伯董潯陽公。宗伯交驩余者。由可泉公始也。

大宗伯董潯老年六十七。有脾胃疾。翁以過啖瓜果。而胸膈脹痛。時當處暑也。延予治。診其脈寸關絃緊。觀其色神藏氣固。翁門下蔣虹橋沈樂閒者。多藝人也。翁素親信。二公詰予曰。症脈何如。予曰。症脈雖胸腹脹痛。然易瘳也。二公曰。翁生平不能素食。食輟瀉。今不茹葷者半月。燕居好奕。好看書。好作詩文。卽盛夏亦手一編。不言倦。日永亦不瞌。今不親筆硯者月餘。不櫛沐者七日。它一切無所事事。倦極矣。諸名家如沈竹亭、沈春宇、金樗丘者。劑備嘗之。無益也。而公何言易。予曰。諸公不過用二陳平胃。加山查、麥芽等消導劑耳。與症何涉。蓋翁傷於瓜果。而爲寒濕淫勝。經云。寒淫所勝。治以辛溫。然瓜果非麝香、肉桂不能消。

此諸公所以不能愈翁疾也。予以高良薑、香附各一兩爲君，肉桂五錢爲臣，麝香一錢爲佐。每服二錢，酒調下之。藥入腹，胸次便寬。再而知餓，三服而巾櫛交接，賓客如未病者。翁語沈蔣曰：孫君所見所養，度越諸人。若是往聞治張氏子，氣絕兩日而能活之。今於活吾病，益信誠臨菑虢國之遺。特書一軸以彰其高，因以紀一時之良遇云。

大宗伯郎君董龍山公夫人爲憲副茅鹿門公女。年三十五而病便血，日二三下，腹不疼。諸醫診治者三年不効。予診之，左脈沉澹，右脈漏出關外。診不應病，予竊謂血既久下，且當益其氣而升提之，以探其症。迺用補中益氣湯，加阿膠、地榆、側柏葉，服八劑。血不下者半月，彼自喜病愈矣。偶因勞而血復下，因索前藥。予語龍山公曰：夫人之病，必有瘀血積於經隧。前藥因右脈漏關難憑，故以升提兼補兼澀者，以探虛實耳。今得病情，法當下而除其根也。龍山公曰：三年間便血，雖一日二三下，而月汛之期不爽，每行且五日。如此尙有瘀血停蓄耶？予曰：此予因其日下月至而知其必有瘀血停蓄也。經云：不塞不流，不行不止。今之瘀實由塞之行也，不可再澀。古人治痢，必先下之，亦此意也。公曰：明日試卜。

之。予曰。卜以決疑。不疑何卜。公隨以語夫人。夫人曰。孫先生非誤人者。識見往往出尋常。宜惟命。蓋夫人讀書能文。聰明謀斷。不啻丈夫。故言下便能了悟。卽用桃仁承氣湯。加丹參。五靈脂。荷葉蒂。水煎。夜服之。五更下黑瘀血半桶。其日血竟不來。復令人索下藥。予曰。姑以理脾藥養之。病根已動。俟五日而再下。未晚也。至期。復用下劑。又下黑瘀如前者半。繼以補中益氣湯。參苓白朮散。調理全愈。

大宗伯董潯老門下有馬廚者。七月初旬患病二十餘日。愈劇而勢甚獷。時宗伯對余奕正酣。而蔣虹橋沈樂閒報曰。馬廚危在旦夕。宗伯聞之。推枰嘆息曰。吾命吾命。予叩其故。語曰。能廚者不下二十人。獨此廚適吾意。實恃之以怡晚節。今病不可起。奈何。予詰何病。翁顧蔣與沈曰。第詳道其狀。蔣沈述其症。大發寒熱。寒至不憚入灶。熱至不憚下井。痢兼紅白。日夜八十餘行。腹痛惡心。汗多神氣倦甚。究其脈曰。脈不吉。下痢脈洪大者死。細微者生。今洪大逆也。予曰。痢固忌洪大。寒熱亦非細微所宜。其中必有故。二公曰。幸一往決之。潯翁不可謂何。可以細人而勞長者。予曰。醫寄人生死。何論巨細。矧事翁之人。猶不可坐視不

救也。潯翁欣然握余手偕行至宅後橋。余入門。同居數十家皆執香拱立以伺。診其脈。察其症。果如蔣沈所言。其面色微紅。汗淋淋下。予究病所由起。渠謂過客衆。廚間燥熱。食瓜果菱藕過多。晚又過飲御內。而寢於樓簷之下。次日即寒熱腹痛。因而下痢。雖得其病情。尙未融通一治法。因沉思之。不覺行至橋。而潯老猶立而俟予。見予無齷容。知病重。遂置之。因如前握余手而回。蔣沈謂予可治否。予曰。微幸。先生寵靈。偶有一得。迺背水陣也。人參、白朮、石膏、滑石各五錢。知母、炮薑各三錢。大附子、炙甘草各二錢。作一大劑煎之。蔣沈將問予。潯翁卽命近侍煎於其側。不欲蔣沈問也。熟則付飲之。飲訖卽睡。老先生曰。服後何狀。爲佳。予曰。倘得一睡。則陰陽始和。和則汗可斂。而寒熱嘔惡可止也。蔣沈曰。聞已睡矣。明日已刻。二公鼓掌來言。夜來痢減半。汗吐全無。脈亦斂矣。再用人參、石膏、白朮、白芍藥、滑石各三錢。炮薑、肉桂、知母各二錢。炙甘草、附子各一錢。服後瘧止。痢又減半。飲食漸進。神氣漸轉。改用白芍藥、酒炒五錢。人參、白朮、滑石各二錢。甘草、陳皮、炮薑、肉桂各一錢。三劑而痢全止。飲食加。漸就安矣。蔣沈問曰。公寒熱均投。此爲何症。而劑何名也。予笑曰。此潯公所謂混沌湯也。潯老又

問予對曰。經云。夏傷於暑。秋必瘧痢。白虎湯。益元散。皆解暑之劑。瓜果寒涼傷其中氣。酒後御色。損其下元。附子理中湯。正所以溫中補下者。內經文云。實者邪氣實也。故以白虎湯。益元散。應之。虛者正氣虛也。故以理中湯。應之。若以寒熱均用爲疑。而張仲景附子甘草瀉心湯。既用大黃黃連。又用乾薑附子。此何說哉。蓋假對假。真對真也。潯翁躍然喜曰。先生惟是。故能起垂斃之人而生之。余詩冊中臨舊號國之談。非虛語矣。

吳江吳太僕長君肖峰令政。大宗伯董潯老次女也。患咳嗽體倦。多汗腹痛。呻吟不絕口者半月。吳江之醫不効。訪遠近名最著者。如姑蘇盛氏後湖。王氏后山。震澤沈氏竹亭。先後遞治之。而痛愈加。予適寓苕城。龍山公邀予乘快舡兼程而進。至則診其脈。左手三五不調。右手沉絃。面色青而息甚微。腹中漉漉有聲。予因問上年夏月曾病否。肖峰曰。曾頭痛體倦多汗。動止無力。不能親事。但不咳嗽。不腹痛。今五月初病如上年。而市醫謂傷風所致。用參蘇飲表之。始咳嗽。沈爲其清嗽。則加腹痛。王與盛謂通則不痛。以沉香滾痰丸下之。則勢憊而不可支。予方殫思。謂此迺注夏病。仲景謂春夏劇。秋冬瘥者是也。而龍山公詰問。

注夏何爲咳嗽。予曰。原不咳嗽。由參蘇飲而咳嗽也。汗多又重發汗。肺金受傷。故燥而嗽。何爲腹痛。予曰。原不腹痛。因治嗽而寒其中氣。腹故痛也。後事者。又不究其因寒而痛。乃謂通則不痛。而用寒涼滾痰之劑。重傷其中氣。不思五月六陽之氣。皆散於外。汗而又汗。汗多則亡陽。夏至一陰將萌。腹中尙虛。虛而復下。下多則亡陰。陰陽俱亡。不憊何待。予欲酌一方以起之。恐從事者。又將議其後。龍山促之。乃用酒炒白芍藥五錢。甘草黃耆各三錢。桂枝二錢。大棗二枚。水煎。臨服加飴糖一合。吳下諸公。果羣然又辯。龍山公曰。不必辯。病者望此以甦。其生速煎飲之。飲訖而睡。自己至申不醒。先事者皆搖首。命僕急攜藥囊將去。且語龍山公曰。奪令妹之速者。孫君也。本草云。夏不用桂。伐天和也。諸痛不補。助邪氣也。故一飲而不醒。吾儕行矣。龍山公以其言語余。因詰病者之熟睡。予曰。所喜者。以其睡也。睡則陰氣生。陰生則汗可斂。痛可止也。假令藥不對症。安得有此。又詰所投之劑何名。予曰。此仲景小建中湯也。出金匱要略。蓋建者。立也。中者。陽明所主。今腹痛如縛。帶脈急縮也。東垣治例。腹痛以芍藥爲君。惡寒而痛。加桂。甘草緩帶脈之急。縮用以爲臣。經曰。急者緩之。面青脈絃。肝氣盛也。

肝屬木。木盛則脾土受制。而又誤下。因傷之極。故痛之猛也。經云。木得桂而枯。佐以黃耆。伐肝補脾。又能斂汗止痛。此建中之所由名也。語未竟。內報病者醒而索粥。予曰。與之。穀氣進則有本矣。粥後又睡。至天明。腹全不痛。惟稍咳嗽。加五味子。麥門冬。兼治注夏而全瘳焉。龍山公述病之始末。劑之藥味。報大宗伯。宗伯公致書於予曰。足下以四味之常藥。振不起之危疴。名震三吳。聲溢兩浙。昔宋景濂爲朱丹溪立傳。吾固不敏。幸先生以所治節條付之。俾序以傳於後。俾工是術者有所藉乎。予憮然語龍山公曰。何修而得老先生寵幸之深也。第令妹被尅伐太過。陰陽俱亡。今病雖愈。而脈絃不退。猶可爲慮。幸叮寧戒暴怒。節飲食。謝去人事。恬澹多補。庶可永年。不然亥月陰極陽生。恐不能保無患也。慎之慎之。後至期。與肖峰齟齬。怒而絕藥。果以凶聞。若人多予之直。與先見云。大光祿龐公子遠。吳江人也。其太夫人病頭痛惡寒。胸膈懣且痛。時發寒熱。吳醫王后山者。有時名。吳人最所篤信。延治五日不瘥。聞予居吳。禮致爲治。診其脈。右滑大。左浮絃而數。問服何劑。光祿公曰。不識而有藥在。予視之。偶失言曰。左矣。時有西席項姓者。聞言而厲聲曰。此三吳最名士也。渠發劑而有議者。輒面

唾之。幸不在爾。予笑曰。渠是而議者非。則當唾人。渠非而議者是。自唾且不暇。何暇唾人。四物湯。玄胡索。牡丹皮。香附子。養血調經劑也。太夫人七十餘矣。而有經可調哉。投劑之左。由生平守常套。而不知因人因症隨俗爲變也。項子曰。此何症。予曰。仲景有云。頭痛惡寒。外感病也。浮絃而數。胸膈懣痛。少陽脈症具在。右脈滑。飲食滯而爲痰。彼用當歸。地黃。芍藥。皆滯痰閉氣之味。內傷何由得消。外感何由得出。此症只宜用柴胡湯。合平胃散。一二帖可瘳也。項猶有言。光祿公曰。勿辯。飲藥而涇渭明矣。一飲而寒熱除。再飲而胸膈泰。光祿喜曰。奇公名不虛附矣。予私問項子何極譽王。光祿曰。項初受業於王。未睹大方。而獨是其師說。多見其識之不廣也。

光祿公後有事於莊所。值中秋乘酒步月。失足一跌。扶起便脅痛不能立。晝夜不寧。行血散血活血之劑。一日三進。閱三月服二百餘帖。痛不多減。因迎予治診之。脈左絃右滑數。予曰。此痰火症也。公曰。否。賤軀雖肥。生平未嘗有痰。徒以遭跌。積瘀血於脅間。作痛爾。予曰。據脈實痰火也。痰在經絡間不在肺。故不咳嗽而亦不上出。脈書云。滑爲痰。絃爲飲。予據脈而認痰火。如瘀血。脈必沉伏。或訖

或瀉也。面色亦必帶黃。前諸君以瘀血治者。皆徇公言。不以色脈爲據。且多服峻厲。尅伐破堅之劑。無効。此非瘀血之積明矣。公欣然請藥。即用大瓜蒌帶殼者二枚。重二兩。研碎。枳實甘草前胡各一錢。貝母二錢。與四帖。公以爲少。予曰。愚見猶以爲多。此症服此一二劑可瘳。又即報我。爲製補益之藥可也。公得藥一更矣。仍前服。五更腹中漉漉有聲。天明大瀉一二次。皆痰無血。痛減大半。再服。又下痰數碗許。痛全止。隨能挺立。三服。腹中不復有聲。亦不瀉。蓋前由痰積瀉也。今無痰。故不瀉。公曰。望聞問切四者。醫之要務。人人皆著之口吻。有先生獨見之行事。即予母子之疾。先有事者。皆吳之名流。微先生吾殆撞壁矣。何能還轍而生哉。吾於是益服先生之高。

進賢三尹張思軒公。與潘少保印川公。皆受室於施氏。稱聯襟云。施故富家。而張公夫人賢慧。治家勤篤。爲人精潔周致。以產多而氣血憊。又以婚嫁繁而費用不支。積憂年將五十。因病心痺。發則暈厥。小水短澀。胸膈痛不可忍。煩躁乾嘔。惡內蒸熱氣。臍又上騰。肌削骨立。月汛不止。茗城時輩有認爲氣怯者。有認爲鬲食者。皆束手無措。尸寢浹旬。漿粒不入口者五日。凶具備而待斃。舉家計無

所之。惟神是禱。予適在潘府。逆予診之。脈左絃大。右滑大而數。診畢。予曰。可生也。病機云。諸逆吐酸。皆屬於火。諸風掉眩。皆屬於木。法當調肝清熱。開鬱安神。諸醫羣然目攝而背謔曰。書云。骨蒸肉脫者死。形瘦脈大。胸中多氣者死。絕穀食者死。孫君獨許其生。果藥王再世哉。予若不聞。而檢藥以進。竹茹。滑石。各三錢。白芫。薤仁。七分。半夏。麴。橘紅。薑。連。茯苓。各一錢。甘草。五分。水煎。令一口口嚥之。服畢。噦止。暈定。次日用溫膽湯。調辰砂。益元散。三錢服之。胸膈頓開。漸進飲食。小水通長。煩躁盡滅。駸駸然安若無事。後用遙逍散。六君子湯。加黃連。香附。三越月而肌肉全。精神如舊。茗人駭然曰。能起此病。信藥王矣。

馬二尹迪庵公。年五十五。以掃墓而過。食鰻肉捲餅。心腹脹痛。市醫不知用吐。而遽用硝黃下之。大便不行。脹痛愈增。繼至者。以用木香。枳榔丸。繼又有下以小承氣湯者。有下以大承氣湯者。十日多脹痛益甚。飲食粒不能進。大便並不行。小水亦僅點滴。後醫又以大黃。芒硝多服不行。謂非白餅子不可。服五日而脹痛尤加。又謂非備急丸不可。服三日。脹痛益不可當。又用甘遂。芫花。大戟。牽牛之屬。服三日。不惟大便不行。并小便點滴亦無矣。脹不可言。衆醫大叫稱怪。自

三月初二日起。至是念二日矣。有名士王南野者。用灸法灸中脘三十餘壯。毫不爲動。因斷其越三日爲念五戌時。當棄人間。迪老四子皆逢掖。聞言涕泗。時有張太學懷赤者。迪老甥也。見予起。張思軒夫人疾喻。亟請予。予至。觀其色蒼黑。神藏不露。聲音亮。惟腹大如覆箕。不能反側。診其脈。兩手皆滑大。兩尺尤有力。究其受病之源。查其歷服之藥。予駭然以爲未聞且見也。因思一治法。先用六君子湯。加木香、砂仁、參朮。俱用二錢。乃傍有錢小松者。自稱家世受醫。見劑爭之。予曰。非若所知也。彼猶喋喋詰予。謂人言中滿者。瀉之於內。大小便不利者。當先利大小便。然歟。予曰。非人言。素問云云也。又云。諸痛不得用參朮。蒼黑之人尤忌。先生既知素問。奈何不用通而用塞也。予愀然不答。顧迪老諸子言曰。錢君拘儒常見。何能起尊君病。尊君非中滿鼓脹症。內傷症也。當始傷時。猶在上脘。法當用吐。素問云。在上者。因而越之是也。不用吐而用下藥。以傷其脾。脾氣傷則失運動之職。是以急下愈傷。愈傷愈脹。不思脾氣傷而神不爲用。藥不能行。茲以峻厲之味。益下之。是遵何說也。予因脾傷。故用六君子湯以醒其脾。木香、砂仁助其運動。再用吐法。吐出前藥。予劑非治尊君之病。治諸君藥也。

予初欲爲諸君諱。何錢君激予而使暴其短哉。且予不慮大便不行。獨慮行之不止也。錢又謬言急則治標。今法用盡不能使一行。何以不止爲慮。予曰。君試思常人能服硝黃幾何。服芫花。白餅子幾何。今硝黃服過五斤。芫花。白餅子之屬服過五六兩。又加甘遂。牽牛。芫花。大戟。至悍至急之劑。幸而大便未行。藥性未動。尙可爲計。若一行而諸藥性動。譬瓶水底漏。其中能蓄點滴哉。危矣。錢又詰迪老多服下藥而大便不行何也。予曰。此易知之。始爲食傷。繼爲藥傷。所傷在上中二焦。下元未損。故兩尺脈尙有神氣。難經曰。人有兩尺如樹之有根也。內經曰。腎者胃之關。蓋腎主大便。觀其色蒼黑。神藏氣固。皆由根本未動。賴此猶可爲也。服藥後腹中大痛。予知其藥力已動。改用人參。蘆。防風。蘆。升麻。桔梗。各三錢。水煎服之。少頃。用鵝翎探喉中。令吐之前服藥物。一湧而出。十數碗。病者以手加額曰。目前光矣。此已時也。予曰。酉時大便必行。可預買人參數斤。以備不虞。至午。進至寶丹一帖。以溫中氣。未申間。腹中汨汨有聲。濁氣下滾。頃刻間腹寬數寸。至晚。大便行一次。小水略通。予卽用人參。白朮各五錢。炮薑三錢。茯苓二錢。木香。甘草各五分。陳皮一錢。令急煎服。四鼓。又大便一次。小水繼至。脹

痛漸減。次日大便瀉十次餘。因以前理中湯劑爲丸。與煎劑兼補。腹脹全消。飲食漸進。共瀉七十二日。服人參二斤餘。若人聞以補收功。羣然異之。而錢小松始帖然心服。曰。奇哉。奇哉。人多用攻。孫君獨用補。人多用下。孫君獨用吐。由見之真。而所投者確也。醫可易言哉。今而後。知孫君之高矣。

潘大司馬公。嘗有腸風之疾。八月丁祭。學博饒鹿血食之。而血暴下。致予治。用槐角子五錢。黃連、枳殼、地榆。貫衆各三錢。一服而止。大司馬善其方。書之。粘壁間。遇有便血者。輒依方藥之。無不立愈。喜甚。鼓腹謂諸子曰。往而姨之疾。族醫無不言必死。孫君獨能生之。神哉。進乎技矣。予曰。昔扁鵲有言。予非能生死人也。此當自生者。越人使之起耳。予何能。亦張安人當自生也。大司馬公由是益重予。病無巨細。悉任之。而予亦得盡其術云。

迪老之子鳳林。見予起。乃翕疾。乘間語曰。內子包有隱疾。每月汛行。子戶傍輟生一腫毒。脹而不痛。過三五日。以銀簪燒紅。針破出白膿。盡餘而消。不必貼膏藥。而生肉無疤痕。初間用針刺。近只以指搯之。膿卽出。但汛行卽發。或上下左右而無定所。第不離子戶也。於今八年。內外科歷治不効。且致不孕。先生學博而

思超。幸爲籌之。予沉思兩日而悟曰。此中焦濕痰。隨經水下流。壅於子戶也。經下而痰凝。故化爲膿。以原非毒。故不痛。用白螺螄殼火煨存性爲君。南星半夏爲臣。柴胡甘草爲佐。麵糊爲丸。令早夜晚服之。未終劑而汛行不腫。次年生女。舜田臧公。吳車駕湧瀾公岳也。年將六旬。爲人多怒多慾。胸膈否脹。飲食少。時醫治以平胃散。枳朮丸。香砂丸。不効。復以檳榔三稜。莪朮之類。日消之。而大便溏瀉。兩足跟踝皆浮腫。漸及兩手背。醫又以其手足浮腫。而認爲黃胖者。以針砂丸與之。腫益加。面色黃且黑。自二月醫至八月。身重不能動止。又有以水腫治者。車駕公雅善予。因延診之。脈沉而濡弱。予曰。此氣虛中滿病也。法當溫補兼升提。庶清陽升則大便可實。濁陰降則胸膈自寬。以人參白朮各三錢。炮薑同陽。陳皮各一錢。茯苓黃耆各二錢。澤瀉升麻肉桂蒼朮防風各七分。三十帖而安。客有疑而詰予曰。此症諸家非消導則淡滲。而先生獨以溫補收功。腹生積而爲滿。爲腫者。從何道而去也。予曰。脹滿非腫滿比也。故治不同。腫滿由脾虛不能攝水。水滲皮膚。遍身光腫。今脹滿者。先因中虛。以致皮腫。外堅中空。腹皮脹緊象鼓。故俗名鼓脹。蓋由氣虛以成中滿。若氣不虛。何中滿之有。氣虛爲本。

中滿爲標。是以治先溫補。使脾氣健運。則清濁始分。清濁分而脹斯愈也。

金谿令淨涵臧公尊堂太夫人。以季春眉壽。連看戲文二十餘本。且多食魚腥蝦蟹。偶發寒熱。三日不退。第四日。左耳前後及頰車皆紅腫。第五日。右邊亦腫。第六日。腫及滿頭。紅大如斗。眼合無縫。昏憤不知人事。譫語。若有邪祟。粒米不進者。八日。舉家驚惶。逆予爲治。診其脈六部皆洪長而數。予曰。此大頭疫也。卽以貫衆、石膏各六錢。柴胡、葛根各三錢。赤芍藥、天花粉各二錢。甘草一錢。黑豆四十九粒。煎服之。日進二帖。脈始減半。第九日。方進粥飲半盂。前藥除石膏。又四帖而安。是役也。人皆爲予危。且以八十之尊年。八日之絕粒。頭大如斗。體熱如燔炭。昏憤譫語。乃不去而治。何冥行不知止如此。而其婿閔懷海亦言病勢如此。吾心亦危疑。見先生安閑而甘寢食。賴以少慰。予曰。此疾爲陽明少陽二經熱壅而然。夫陽明多氣多血之經也。以高年故不敢用硝黃。惟投以輕清解散之劑。使因微汗而解。症脈相對。雖重可生。假如人言以高年病危而棄不治。豈惟非醫之存心。於病家相托之意亦孤矣。可乎哉。

丙申夏。見所潘公謁予於海陽邑邸。時霍浹旬。邑市水漲。公至。予驚問曰。公貴倨

也者。何堪此。公曰。與君間者闊矣。且先君服闋。秋當北上。不卜補任南北。謁求一診。他何計。予究何疾。公曰。無。第年甫踰疆。微覺陽痿。次早診畢。語其隨行俞金二子曰。公脈上盛下虛。上盛爲痰與火。下虛爲精元弱。切宜戒色慎怒。劑宜清上補下。不然。三年內恐中風不免。蓋由痰生熱。熱生風也。謹之識之。乃爲立方。別去。公亦未暇製服。公次年八月。往返武林。不無勞怒。又屈中秋。連宵酒色。平常色後。輟用鹿角膠三錢。人參一錢。酒送下。以連宵有犯。乃用鹿角膠五錢。人參三錢。空心服之。十七日薄暮。偶與社友談詩筵間。左手陡然顫動。把捉不住。隨歸房。左手重不能舉。十八日早。左邊半體手足皆不爲用矣。亟令人逆予。予適在前坵吳宅。及至。公驚喜交集曰。君何先見若此也。先少保患在左體不遂者。三年而歿。不佞今亦左體。其風水致然歟。第先少保年七十餘。不佞四十有七。先少保不能遇先生。不佞賴有先生。或可企無恙也。予始觀面色赤。口微喎。向右。脣麻。手足蟬拽。已成癱瘓。診其脈。左絃大。右滑大。先用烏藥順氣散一帖。服後昏睡半日。醒覺面更加赤。喎亦稍加。知痰盛使然。卽以二陳湯加全蝎、殭蠶、天麻、黃芩、石菖蒲、紅花、秦艽。水煎。臨服加竹瀝一小酒盃。生薑汁五茶匙。

一日兩進。晚更與活絡丹。服至第六日。手指梢頭略能運動。足可倚棹而立。予喜曰。機動矣。改用歸芍六君子湯。加紅花、鉤藤、天麻、竹瀝、薑汁。服二十帖。行可二十步矣。手指先麻木不知痛痒。至是能執物。繼用天麻丸。兼服全鹿丸。調理百日。病去十之九。次年二月北上補任。永清公以病後能戒色斷酒。自知培養。故藥功獲奏。此症予歷治歷効者。良由先爲疏通經絡。活血調氣。然後以補劑收功。惟經絡疏通。宿痰磨去。新痰不生。何疾不瘳。此治類中風之法也。

見所公弱冠。隨尊君大司馬印老治河居北。患白濁。精淫淫下。自北地山東淮揚鎮江及江右三吳諸名家醫藥三年不效。癸酉冬。禮予診之。其脈兩寸短弱。兩關滑。兩尺洪滑。觀其人襟期瀟灑。出塵而神色閒雅。真翩翩佳公子也。一接見。便就暱。而信余請藥。予曰。公疾易愈。第待來春之仲。一劑可瘳。而今時不可。公固請曰。先生大方而善拯人之急。以大醫而治小疾。試可力效。何待來年。予曰。非秘其術不售也。素問有云。升降浮沉必順之。又曰。天時不可伐。公脈爲濕痰下流症也。經曰。治痰必先理氣。而脈書亦謂洪大而見於尺部者。陽乘於陰也。法當從陰引陽。今冬令爲閉藏之候。冬之閉藏。實爲來春發生根本。天人一理。

若不顧天時而強用升提之法。是逆天時而洩元氣。根本既竭。來春何以發生。故素問曰。必先歲氣。毋伐天和。必養必和。待其來復。公疾本小。而歷治三年不效者。良由諸醫不知脈。不識病。不按時也。公聞言唯唯。乃尊君所遣之醫踵接。治竟無效。至春分而逆予。以白螺獅殼火煨四兩爲君。牡蠣二兩爲臣。半夏葛根。柴胡。苦參各一兩爲佐。黃柏一兩爲使。麵糊爲丸。名曰端本丸。令早晚服之。不終劑而全愈。公復書曰。賤疾果如先生言。今勿藥也。何歷治三年不效。竊謂天下無藥。服端本丸而愈。又信天下有藥矣。

少司空凌繹老夫人蔣適繹老無幾。腹脹痛發熱。經過期不行者五日。諸醫皆以經期作痛。爲調經不效。而繹老召予診。左寸洪滑。兩尺皆滑數。左尺之外更有神氣。予喜而語繹老曰。經閉非病。孕也。產必男。繹老雅信予。因究其說。予曰。滑非經閉之脈。左尺尤有神氣。是以知產必男也。繹老謂果孕矣。奈發熱腹痛。何。予曰。何傷。氣虛血熱耳。以安胎。飲加減調理。卽安也。用人參。白朮。白芍藥爲君。川芎。當歸爲臣。香附。柴胡。蘇梗。條芩。甘草爲佐。四帖。腹痛減熱除。至期果生子。繹老德予而多推轂云。

金文學元岩之眷。產後兩日腹痛。下痢純紅。脹鳴三越月。時當孟秋。而脈皆軟弱。用佛手散加減以治。川芎三錢。當歸五錢。艾葉。炮薑各一錢。桂心五分。酒炒白芍藥二錢。連進三帖。而疾減半。後因食新菱新栗。又連為怒氣所激。日晡暈厥。以生薑湯灌甦。腹脅大痛。手不可近。用二陳湯加香附。砂仁。桂皮。炮薑與之。痛亦不減。且胸膈脹甚。自以手探喉中。吐出菱栗。痛稍定。少頃復痛。又用手探吐。吐後瀉三四次。而元氣脫矣。脈皆散亂如解索狀。神氣憊而恍惚。循衣摸床。病勢危急。用人參。白朮各五錢。酒炒白芍藥二錢。砂仁。炮薑。肉桂。甘草各一錢。急煎進之。痛乃稍定。精神清。仍瀉二次。次日復進前藥。痛減瀉止。加白朮。又四帖。而飲食進。精神勃勃興起矣。此因初痢時。醫者不以產後為重。徒以治痢苦寒之劑傷其中氣。又為菱栗生冷所損。中氣益壞然也。治可不慎哉。

沈三石別駕公夫人嚴。產三日而腹不暢。南潯女科陳姓者為下之。大瀉五六次。遂發熱惡心。又用溫膽湯止吐。小柴胡退熱。服四日。熱吐四日。粒米不進亦四日。又進八珍湯加童便。服後昏憤耳聾。眼合口渴。腸鳴。眼胞上下及手足背皆有虛浮。因逆予治。診其六脈皆數。時五月初二日也。予曰。脈書云。數脈所主。其

邪爲熱。其症爲虛。法當以十全大補湯。加炮薑進之。夜半稍清爽。進粥一盂。始開目言語。次日午時。以承值者倦而藥不相接。且言語太多。復昏昧不知人事。初四日。以人參、白朮各三錢。炮薑、茯苓、陳皮各一錢。甘草五分。煎服訖。體微汗。遍身痲痺。熱退而神爽。下午又藥不接。又動怒。昏昧復如前。六脈散亂無倫。狀如解索。痲痺沒而虛極矣。亟以人參、白朮各五錢。炙甘草、炮薑、大附子各一錢。連進二帖。是夜熟寢。唯呼吸之息尙促。初六日。脈又數。下午發熱不退。環跳穴邊發一毒如碗大。紅腫微痛。夫人父嚴翁。與陳女科交譖之。曰。向之發熱惡心。皆此所致。由附子、乾薑溫補誤也。須急用寒涼解毒之劑。予正色而諭以理。曰。此乃胃中虛火遊行無制。大虛之症。非毒也。若作毒治而用寒涼。速其死爾。內經云。壯者氣行則愈。怯者着而成病。惟大補庶可萬全。三石翁然予言。急煎附子理中湯進之。日夕兩帖。參朮皆用七錢服。熱痲痺復出。毒散無蹤。熱亦退。沾沾喜矣。復以參苓白朮散調理而全安。皆由產後誤用下藥。致變百出。噫。唏。彼不達變之專科。其可任哉。

誥封吳太夫人者。車駕湧瀾公母也。年餘六十。久患白帶。歷治不效。變爲白崩。逆

予治之。診得右寸滑。左寸短弱。兩關濡。兩尺皆軟弱。予曰。據脈心腎俱不足。而中焦有濕。脈經云。崩中日久爲白帶。漏下多時骨未枯。今白物下多。氣血日敗。法當燥脾兼補心腎。以既濟丹補其心腎。以斷下丸燥中宮之濕。則萬全矣。服果不終劑而愈。既濟丹方。鹿角霜、當歸、白茯苓各二兩。石菖蒲、遠志各一兩。五錢。龍骨、白石脂各一兩。益智仁五錢。乾山藥打糊爲丸。梧桐子大。空心白湯下七八十丸。斷下丸方。頭二蠶沙炒三兩。黃荊子炒二兩。海螵蛸磨去黑甲。樗根白皮各一兩。麵糊爲丸。下午白湯送下六十丸。

吳北海太學令政。每月經行期之前。四肢纍纍發塊。紅紫脹痛。不思飲食。胃脘亦常痛。經水多不及期。診其脈兩手皆駛。以症脈參之。肝脾二經有鬱火也。蓋肝主怒。脾主思。多思多怒。隱而不發。鬱滯於中。故臨經纍纍發紅腫於四肢也。以柴胡、川芎、香附、烏藥、白芍藥、青皮、丹參、玄胡索、鬱金酒炒、黃連、山梔子治之而愈。

吳之清客周芻玉者。豪放不拘。人言有晉人風。酒後益恣。而好男色。因患白濁。吳醫有以補中益氣湯升提者。有以六味地黃丸補陰者。有以五苓散、六一散滲

利者。有爲降火者。有爲溫補者。不效。又以草頭藥亂進之。肌瘦如削。膝軟如痿。患有年所矣。因紹介吳太學北海而謁余。懇爲治之。診其脈。右寸關皆數。予曰。皆由酒後不檢所致也。中宮多濕多痰。積而爲熱。流於下部。故濁物淫淫而下。久不愈矣。與以加味端本丸。服之而瘥。白螺獅殼四兩。牡蠣、苦參、葛根、黃柏各二兩。陳皮、半夏、茯苓各一兩。甘草五錢。麵糊爲丸。令早晚白湯下三錢。

丁酉夏。予寓雉城顧鄉宦宅。其門下竹匠婦懷妊五月而患心痛。究其所由起。謂由失足墜樓也。始教飲韭菜汁一盞。而痛隨止。其夫又從它醫贖藥二帖歸。令煎服。服既。心復痛。吐鮮血盈盆。胸間冲冲上抵。疼不可言。危在頃刻。竹匠告急。予僕孫安安憐之。懇予診治。六脈皆洪大。汗出如雨。喘息不相續。其婦樓居低小。予令亟移居樓下。隨與益元散五錢。令用紫蘇湯調服。又囑之曰。今夜若睡。聽其自醒。切勿驚動。汗止即甦也。服後果睡至曉。汗斂而胸膈不痛。喘息亦定。再與固胎飲一帖。煎服而全安矣。先是鄰醫診其脈。謂吐血之脈宜沉細。今反洪大。而汗出。喘息不休。危在今夜。及病起來。詢余曰。妊婦不得汗。不得下。不得利小便。是謂三禁。昨日之劑悉犯之。而反獲效。何哉。予曰。醫貴審症。蓋婦之患

非由病汗。以樓居低小。常酷暑而熱逼故也。汗血去而胎失養。故忡忡上抃。喘息不續。移居樓下。以避暑氣。益元散爲解暑之聖藥。而紫蘇又安胎下氣之妙品。氣下則血歸原。而病痊矣。此對症之藥法。出王海藏醫壘元戎中。四血飲是也。特諸君檢閱不徧。卽檢閱亦不知爲胎產之治。余何能。不過融會前人之法。用之而不膠焉耳。隣醫俛首唯唯而退。

壬申秋仲。予東遊橋李。而王松泉吳小峰偕行。小峰語予中秋至矣。此間一妓李姓者。行第七。殊可人意。須訪之。晚令佐酒。至則見其態度果澹雅風致。坐少頃。連咳兩聲。小峰究其病。曰。偶耳。小峰謂毋誑。孫公知人生死。不啻扁鵲。可求一診。診之。兩寸短瀋。兩尺洪滑。關絃。予未語。而小峰問脈。予曰。脈甚怪。公可問經行否。曰。行僅一日。亦僅點滴。予曰。此脈在良家主夢遺。若不宜有也。妓曰。良然。卽御客時。亦或遺。遺則冷汗淫淫。體倦而不能支。小峰爲請藥。予曰。故置之。小峰問何故。予曰。金木相勝。心神無主。法當不治。小峰謂人尙無恙。何得便至於此。予曰。絃爲春令。當金旺之時。猶然猖獗。設在卯月。木旺火相。肺金枯痿。水之上源已竭。且腎脈洪滑。妓以慾勝。陰血旣虧。淫火愈熾。書云。陰虛則病。陰絕則

死。今已咳嗽。其兆見矣。可治乎。次年二月果死。

有老妓金姓者。其嫂三月患頭痛身熱口渴。水瀉不止。身重不能反側。日漸昏沉耳聾。眼合夢多亂語。嘉秀醫者歷試不效。視爲必死。予適吳江歸。便道過橋李。訪南溪吉泉二兄。吉泉兄以是症見詢。且言諸醫有以補中益氣湯進者。有以附子理中湯進者。二藥已煎成未服。幸弟至。乞爲診之。六脈洪大。觀其色內紅外黑。口脣乾燥。舌心黑胎。不知人事。予曰。此疫症也。法當清解。急以小白湯進之。猶可生也。若附子理中湯。殺之耳。安可用。南溪兄問小白何湯也。予曰。小柴胡白虎湯。合而一之是也。南溪兄謂洩瀉昏沉如此。恐石膏不可用也。予曰。此挾熱下利。但使清陽上升。則瀉止熱退。而神氣自清也。服訖。夜半神氣甦醒。惟小水不利。熱渴不退。予思仲景法。謂渴而身熱不退。小水不利者。當利其小便。乃以辰砂六一散一兩。燈心湯調服之。兩帖而瘳。南溪兄曰。死生信乎命也。弟頃刻不至。必服理中湯。此婦不爲泉下人哉。

有曹姓諱鏗者。九月重陽。以胸膈不舒暢。而謁南溪兄爲治。診未竟。予至。南溪兄起語曹曰。舍弟高手。浼診之。診訖未有言。而南溪私問曰。曹何如脈。予曰。不治。

會易貨者沓至。予亦別去。曹果次年二月死。南溪兄問曰。向曹無它病。而弟見脈卽斷不治。何也。予曰。其脈兩寸洪滑搏指。兩關微絃。兩尺微弱。難經所謂溢脈也。九月深秋。木彫零時也。不宜絃大。大則上盛下虛。至一月木旺。木能生火。火木性皆上升不下。下無直陰以相濟。是有陽無陰。有升無降。內經曰。出入廢則神機化滅。升降息則氣力孤危。是以斷曹子二月當嘔吐而死也。

嘉善之妓李雙。號素琴。體雖肥而性冲澹。態度閒雅端重。歌調倡家推其擅場。與予邑程芹溪處厚。患痛風。自二月起至仲冬。諸治不效。鵠母慳毒。遂視爲痼疾。不爲治。而芹溪固懇予診之。六脈大而無力。手足肢節腫痛。兩跨亦痛。不能起止。肌肉消其半。日僅進粥二碗。月汛兩月一行甚少。予曰。此行痺也。芹溪問病可治否。予笑而應曰。君能娶。予能治之。芹溪曰。嫁娶乃風月中套語。公長者。乃亦此言。予曰。觀此子雖墮風塵。實有良家風度。予故憐之。且君斷絃未續。而彼有心於君。或天緣也。芹溪曰。誠吾素願。恐鵠母高其價而難與言。予謂乘其病而盟之。易與耳。芹溪以予言爲然。乞爲治之。以人參、白朮、苡仁各三錢。當歸、枸杞、杜仲、龜板、蒼耳子各二錢。晚蠶沙、秦艽、防風各一錢。大附子、甘草、桂枝、黃柏

各五分。十帖而痛止腫退。改用歸芍六君子。加苡仁、丹參、紅花、石斛、紫荊皮。三十帖而全愈。芹溪娶之。善持家。舉族稱賢。而亦羨予知人焉。

沈別駕翁有老僕。頭痛。遍身骨節痛。面色黑。發熱口渴。胸膈膨脹。飲食七日不入。復感寒。人皆危之。予診其脈。左絃數。右洪大。以藿香、蒼朮、防風、葛根、白芷、紫蘇、甘草、陳皮、大腹皮、麥芽、枳實。服後胸膈稍寬。熱與痛更甚。改以麻黃、葛根、柴胡各二錢。石膏、滑石各三錢。紫蘇葉、白芷、蒼朮各一錢。甘草五分。薑三片。服後大汗出而熱痛皆除。惟口渴。又以白芍藥、當歸、石膏、知母、柴胡、黃芩、麥冬、葛根、陳皮煎服全愈。別駕翁喜詰予曰。老僕病甚重。無不謂其必死。先生三日起之。此何症。而何湯劑飲之使起也。予曰。此三陽合病。先為飲食所傷。予故先用藿香正氣湯。加消導之劑。治其本。又以六神通解散。加助表之藥。治其標。病雖重。年雖高。喜其色脈相對。故投以對症之藥。易愈也。翁曰。在先生然耳。若它人輕者且重。况重者乎。吾未見其能起也。

蔡中林文學內人。發熱口渴。舌上燥裂。小腹痛嘔吐。藥食不能入者七日。諸醫之技殫矣。皆視為鬲食而不可為。吳我峰翁固邀予診。右寸脈絕不應指。關沉滑。

有力。左手絃數。予曰。此陽明少陽合病。邪熱壅於上焦然也。非鬲食。法當解散。數劑可愈。無恐。以軟柴胡、石膏各五錢、半夏、枳實、黃芩、黃連、葛根、竹茹、人參各二錢。藥三片煎服。藥納而不吐。五更下黑糞數塊。熱痛減半。次日仍與前藥。右寸脈至是亦起。粥始進。改用小柴胡加橘紅、竹茹、葛根。服三帖而全安。

吳九宜先生。每早晨腹痛洩瀉者半年。糞色青。腹膨脹。人皆認為脾腎洩也。為灸關元三十壯。服補脾腎之藥皆不效。自亦知醫。謂其尺寸俱無脈。惟兩關沉滑大。以為憂。以人言洩久而六脈將絕也。予為診之曰。君無憂。此中焦食積痰洩也。積膠於中。故尺寸脈隱伏不見。法當下去其積。諸公用補謬矣。渠謂敢下耶。予曰。何傷。素問云。有故無殞。亦無殞也。若不乘時。久則元氣愈弱。再下難矣。以丹溪保和丸二錢。加備急丸三粒。五更服之。已刻下稠積半桶。脹痛隨愈。次日六脈齊見。再以東垣木香化滯湯調理而安。渠稱謝言曰。人皆謂六脈將絕為虛極。公獨見之真而下之。由公究理深邃。故見之行事。著之談論。皆自理學中來。他人何敢望其後塵。

沈大官左膝腫痛。不能起止者年半。大便瀉一日三次。診其脈絃緊。予曰。此脾虛

有濕熱凝於經絡。流於下部也。古謂腫屬濕。痛屬火。用蒼朮、黃柏、薏苡仁爲君。澤瀉、猪苓、五加皮爲臣。炙甘草、防風、桂枝爲佐。木通爲使。四帖痛減腫消。洩瀉亦止。改用蒼朮、蒼耳子、五加皮、苡仁、當歸、枸杞子、杜仲、丹參、黃柏、烏藥、葉、酒糊爲丸。調理月餘。步履如故。

沈繼庵先生。下痢十二日。腹痛脫肛後重。噯氣不知飢。一友用補中益氣加白芍藥。腹痛愈加。後重亦甚。予脈之。右關滑大搏指。曰。此積滯固結腸胃間。故後重脫肛也。當爲推蕩。以其素弱多鬱。不敢只爲調氣而兼消導。木香、山查、檳榔、枳實、川芎、白芍藥、黃連、黃芩、秦艽。服後稍寬。次日用七傷丸二帖全愈。其內人患發熱頭痛。遍身痛。乾嘔口渴。胸膈脹悶。坐臥不安。醫與以參蘇飲。乾嘔愈甚。又加煩躁。予診之。右手洪大倍於左。左浮數。予曰。乾霍亂症也。與以藿香正氣散。減去白朮、桔梗。加白扁豆、香薷。一帖吐止食進。遍身痛除。惟口渴額痛未除。小水不利。以石膏、香薷、滑石各五錢。橘紅、藿香、葛根各二錢。檳榔、木瓜各一錢。甘草五分。薑三片。一帖而愈。

沈晴岳先生。五更耳鳴。腹不舒暢。稍勞則烘然熱自汗。脈右關滑大有力。左脈和

緩。原爲當風睡臥而得。素來上焦有痰火。午後過勞或受餓。大作眩暈。冷汗津津。再不敢動。稍動則嘔吐。此皆痰火所致。蓋無痰不作暈也。先與藿香正氣散一帖。以去表裏之邪。繼與溫膽湯加天麻。服後眩暈嘔吐皆止。次日診之。右關脈仍滑。此中焦食積痰飲膠固已久。卒難動搖。姑以二陳湯加枳實、黃連、滑石、天花粉、天麻、竹茹調理。後以當歸龍會丸加牛膽、南星、青礞石。凡數帖全愈。潘景宇內人。後半夜不睡。面黃肌瘦。兩太陽及眉稜骨痛。大便溏。稍勞動則體熱。四肢無力。其脈左寸洪滑。自春至秋皆然。此由脾虛。肝心二經火盛然也。先用四君子加酒連、柴胡、白扁豆、澤瀉、滑石調理。夜與錢仲陽安神丸數粒。燈心湯送下。服八日得睡。兩太陽亦不痛。繼用六君子加黃耆、秦艽、柴胡、澤瀉、當歸、白芍藥、黃柏全安。

臧六老。上吐血。下瀉血。胸膈背心皆脹。原從怒觸。又犬肉所傷。故發熱而渴。醫者皆作陰虛火動。而爲滋陰降火。胸背愈脹。血來更多。予診之。兩關俱洪滑有力。謂曰。此肝脾二經有餘症也。作陰虛治左矣。內經曰。怒傷肝。甚則嘔血。并下洩。胸背脹痛。瘀血使然。脾爲犬肉所傷。故不能統血。今誤用地黃、麥冬、黃柏、知母。

等劑。是以脾益傷。而上焦瘀血愈滯也。惟調氣健脾兼之。消導則萬全矣。六老曰。人皆謂勞怯。故發熱吐紅。血上吐。陽絡傷也。血下行。陰絡傷也。陰陽俱傷。法當不治。公獨認非陰虛何也。予曰。脈書云。脈數無力者。陰虛也。今脈固非陰虛。書又曰。凡陰虛之熱。發以申酉戌間。夜半而退。明日猶是。如潮信然。以下午乃陰分主事。故曰。陰虛潮熱也。今熱不分晝夜。而症亦非陰虛。故曰。作陰虛治者。左也。六老聞言大喜曰。公誠見垣一方者。幸惠一七以生之。卽與山查、香附、枳實。調氣消導爲君。丹參、丹皮、桃仁、滑石、茅根。化瘀血爲臣。黃連、蘆根。解犬肉之熱爲佐。四帖。胸背寬。血吐止。惟腹中不舒。仍以前藥同丹溪保和丸與之。四帖。大便下極臭。黑糞半桶。寢食俱安矣。

有臧氏之婦。原以有痰火。服降火之藥過多。至秋痰積因令氣下行而滯於大腸。臍邊有硬塊。按之甚痛。痢下紅白八日。下惟點滴。日夜二十餘行。腹痛潮熱。口渴。小水不利。大便裏急後重。飲食不進。身重不能轉側。予診之。喜左脈皆有神氣。卽從劉守真之法。行血則便膿自愈。調氣則後重自除。治之用白芍藥、滑石、桃仁爲君。當歸爲臣。木香、檳榔、山查、酒芩、酒連、枳殼爲佐。服下大便稍流利。腹

中稍寬舒。次日仍與前藥。則滯下大行。痢減大半。第三日。用芍藥、當歸、滑石、桃仁、炙甘草、酒連、木香與保和丸同服。下午大便秘行。上午所服丸藥隨糞而下。乃知積滯已盡。諸症悉減。惟臍邊痛未全止。以仲景小建中湯加當歸、木香服之而安。

丁耀川文學令堂。年四十四。常患胃脘痛。孀居十五年。日茹蔬素。其年七月。觸於怒。吐血碗許。不數日平矣。九月又怒。而吐血如前。加腹痛。至次年二月。忽裏急後重。肛門大疼。小便短澀。出惟點滴。痛不可言。腰與小腹之熱如滾湯泡者。日惟仰臥不能側。一側則左胯并腿作痛。兩跨原有痛。小便疼。則肛門之痛減。肛門疼。則小便之痛亦減。肛門以痛之故不能坐。遇驚恐則下愈墜而疼。經不行者兩月。往常經來時。腰腹必痛。下紫黑血塊甚多。今又白帶如注。口渴。通宵不寐。不思飲食。多怒。面與手足發虛浮。喉中梗梗有痰。肌肉半消。診之。脈僅四至。兩寸軟弱。右關滑。左關絃。兩尺濇。據脈上焦氣血不足。中焦有痰。下焦氣凝血滯。鬱而爲火。蓋下焦之疾。肝腎所攝。腰跨肝之所經。而二便乃腎之所主也。據症面與手足虛浮。則脾氣甚弱。飲食不思。則胃氣不充。不寐。由過於愁憂思慮。

而心血不足。總爲七情所傷。故爾。內經云。二陽之病發心脾。女子得之則不月。此病近之。且值火令當權之候。誠可慮也。所幸者。脈尙不數。聲音清亮。尤可措手。因先爲開鬱清熱。調達肝氣。保過夏令。後再爲驟補陰血。必戒絕怒氣。使血得循經。而病可痊。不然。則倉扁亦難奏功矣。初投當歸龍會丸。以徹下部之熱。繼以四物湯。龍膽草、黃柏、知母、柴胡、澤蘭葉煎吞滋腎丸。連服四日。腰與小腹之熱始退。後以香薷、石葦、龍膽草、桃仁、滑石、杜牛膝、甘草梢、軟柴胡煎吞滋腎丸。大小便痛全減。

丁文學長令姊。常患暈厥。吐痰碗許。乃甦。一月三五發。後又口渴。五更倒飽。腸鳴腹疼。洩瀉。小水短濇。咳嗽。予脈之。兩寸濡弱。兩關滑大。此中焦痰積所致也。先與二陳湯。加蒼朮、山查、麥芽。以健脾去濕爲臣。以白芍藥止痛爲君。以滑石、澤瀉引濕熱從小便出爲佐。黃芩爲裨佐。十帖。二陰之痛俱止。改以六味地黃丸。加黃柏、知母、牛膝。服之全安。

有金良美者。年十八。患咳嗽吐紅。下午潮熱夢遺。市醫進四物湯。加天麥門冬、黃柏、知母之類。治半年。反加左脇脹疼。不能側臥。聲音漸啞。飲食輒惡心。肌肉大

削六脈俱數。醫告技窮。因就予治。觀其面色白。又隱隱有青氣夾之。兩足痿弱無力。予語之曰。此症氣虛血熱。而肝脈甚絃。絃則木氣太旺。脾土受虧。不能統血。殆始怒氣所觸。繼爲寒涼之劑所傷。以致飲食惡心。肌肉瘦削。書云。脾胃一虛。肺氣先絕。以肺金不足。則肝木愈不能制。濁痰瘀血凝於肺竅。故咳嗽聲啞。滯於肝。故左脇不能貼席而臥。病勢危矣。喜在青年。猶可措手。因急用人參二錢、鱉甲五錢爲君。白朮、白芍、陳皮、茯苓、通草、貝母各一錢爲臣。甘草、牡丹皮各七分爲佐。桔梗五分爲使。二十帖。潮熱止。咳嗽減大半。三十帖。聲音開亮。左脇亦能貼席而臥。後以大造丸調理全安矣。乃囑之曰。病愈雖可喜。而絃脈未退。須切忌怒氣。及勞心勞力之事。庶幾可保無虞。苟不守予言。而勞怒相觸。血來必不能禦。戒之防之。此後精神日旺。肌體豐肥。六年無事。一日遇事拂意。大怒。而又結算勞心。則血如泉湧。頃刻盈盆。上脣黑腫。汗出淋漓。急請予診。脈亂無倫。診畢。渠語近侍欲大解。予曰。此死徵也。陰陽乖離矣。辭而出。未離門而氣絕。父母哭謝予曰。始守翁訓。苟活六年。一旦不戒。遂如翁所料。死生雖命。亦不自慎致之。其爲人也。量窄而緊於財。因記此以戒世之重財輕生者。

倪五娘子。以中風暈厥之後。口眼歪斜。左脚右手不能屈伸。口渴。小水不利。兩頰緊。出語艱澁。問之則期期而對。不問默然。亦不思飲食。行年五十矣。諸醫不效。予治始與涼膈散。加石菖蒲、遠志煎湯。化錢氏安神丸二顆服之。其夜大便四行。次日神氣遂清。口眼半正。惟頰車尙緊。未能開聲。細察形氣似弱也。卽與六君子湯。加麥門冬、滑石、天花粉、石菖蒲、遠志、當歸、薄荷。服後神思大清爽。能自坐。不須人扶。語言亦稍利。改以六君子湯。加麥冬、天花粉、石菖蒲、當歸、五加皮、薏苡仁、紅花、天麻。十帖全愈矣。

王祖泉令政。患頭疼夜熱。洒淅惡寒。汗淋漓如雨。上身熱。下身寒。渴不思飲。遍身疼。腹有一塊。大如拳。硬如石。腸鳴。小水短少。飲食俱廢。脈則右關滑。左絃數。究所由起。謂大怒後卽傷於食。市醫皆以地黃、門冬、芩、連、黃柏之劑治之。熱愈甚。脾氣大虛。予治用平胃散。加山查、麥芽、砂仁、香附、木香、川芎、枳實。連進四帖。中氣稍能運動。而夜熱如前。再與補中益氣湯。寒熱俱退矣。而腹痛裏急後重。予知其積滯將行也。乃與白六神丸。而腹痛後重皆除。改進以參苓白朮散。加香附、烏梅、山查。服之病良已。

溫巽橋子婦。吳車駕湧瀾公長女也。發熱惡心。小腹痛。原爲怒後進食。因而成積。左脚酸痛已十日矣。南潯有陳女科。始作瘟疫療治。嘔噦益加。又作瘧治。粒米不能進。變爲滯下。裏急後重。一日夜三十餘行。陳技窮而辭去。且言曰。非不盡心。犯逆症也。下痢身涼者生。身熱者死。脈沉細者生。脈洪大者死。今身熱脈大。而又噤口。何可爲哉。因請予治。脈之。兩手皆滑大。尺部尤搏指。予曰。症非逆。誤認爲疫爲瘧。治者逆也。雖多日不食。而尺脈搏指。內經云。在下者。引而竭之。法從下可生也。卽與當歸龍會丸一錢五分。服下去。稠積半盆。痛減大半。不食者十四日。至此始進粥一甌。但胸膈仍飽悶。不知餓。又與紅六神丸一錢。胸膈舒而小腹軟。惟兩跨痛。小腹覺冷。用熱磚熨之。子戶中白物綿綿下。小水短濇。改用五苓散。加白芷。小茴香。白雞冠花。柴胡服之。至夜滿腹作疼。亟以五靈脂醋炒爲末。酒糊爲丸三錢。白湯送下。通宵安寢。次日精神清健。飲食大進。小水通利矣。而獨白物仍下。再用香附炒黑存性。枯礬各一兩。麵糊爲丸。每空心益母草煎湯送下二錢。不終劑而白物無。病全愈矣。專科赧然稱奇而服。錄其案驗而去。

溫一渠內人。平素血虛咳嗽。近爲飲食所傷。不知飢餓。專科作陰虛治。而胸膈愈脹。予脈之。右關滑大。左手軟弱。法當先健脾。消去飲食。然後治嗽。若爲滋陰降火。不惟咳嗽無功。恐脾胃轉傷。腹脹瀉洩。變將不測。何也。脾胃喜溫而惡寒也。即以二陳湯加山查、麥芽、枳實、白朮、川芎、香附與之一劑。而胸膈寬。再劑而飲食進。繼用桑白皮、地骨皮、甘草、陳皮、貝母、瓜蒌仁、馬兜鈴、桔梗、紫苑十帖而愈。咳嗽脫然矣。

溫巽橋二令媳。產後五十餘日。右脇脹痛。手不可近。赤白帶多。下如膿。發熱。太便秘結。予曰。此惡露未盡。瘀血化爲膿。治宜急也。嘗見數婦有此病。而不識治。積而成毒。有成腸癰者。有內成腫毒。潰從腰俞出者。皆以不知治法。則瘀血無從出故也。急用澤蘭葉、山查子、五靈脂。消惡露爲君。川芎、當歸、茯苓、白芷爲臣。益母草爲佐。香附、青皮爲使。外與當歸龍會丸。潤大便。使熱從大便去。服後次日。腹脇皆寬。痛亦盡止。又因食葷與雞子。復作疼。但不如前之甚。隨與保和丸。用山查煎湯送下三錢。而痛愈矣。

溫天衢氏。冬月病目。醫爲發散太過。至春間吐血碗餘。及夏。下午潮熱咳嗽。胸膈

脹疼。早晨冷汗淋漓。大便澹。一日二行。飲食少。肌肉消十之七。脈數。據症脈法。在不治里中諸長老。以其素行端厚。羣然懇予措劑。予以衆懇不能辭。乃用瀉白散。加五味子、白芍藥、貝母、馬兜鈴。服下。其夜帖然而臥。不嗽。惟大便澹。前藥加白扁豆、山藥、茯苓。汗亦漸止。復與瀉白散。加石斛、馬兜鈴、貝母、陳皮、薏苡仁、白芍藥、山藥、五味子、桔梗。調理三月而全。

張二娘子。姪七月而嘔吐不止。氣壅咳嗽。胸與兩脇皆脹。不能伏枕。予先與金花丸二服。以止吐。服下立應。繼與大腹皮、陳皮、枳殼、半夏、甘草、竹茹、茯苓、旋覆花、前胡、紫苑、黃芩、生薑。服二帖。氣平嗽止。安然睡矣。

金花丸者。雄黃一錢五分。半夏一兩。檳榔二錢。薑汁浸。蒸餅糊爲丸。是也。

王敬泉內眷。患痰嗽。腹飽脹。洩瀉腸鳴。裏急後重。發熱。口鼻之氣如火。塞以六君子湯。加山查、麥芽、柴胡、秦艽、青蒿、白芍藥、益智仁。與香連丸兼服。兩劑。氣舒嗽減。大便結實。鼻仍塞。前方加川芎。減白芍藥而安。

溫南溪內人。居常大便秘結。面赤。不思飲食。頭時眩暈。診其脈。右關尺滑大有力。此痰火症也。用瓜蒌四錢。爲君。滑石三錢。枳實二錢。半夏一錢半。爲臣。蘿蔔子、

薑黃。各一錢爲佐。兩帖愈矣。又教以或遇大便秘結。每服當歸龍會丸。加牛膽。南星一錢。立應。

陳春野孝廉二令愛。患丁奚疳痢。四肢浮腫。以布袋丸。與大安丸同服。則大瀉。用參苓白朮散。加澤瀉。山查。麥芽。瀉亦不止。神氣大弱。穀粒不入口。小水不利。大便秘。一日仍三五次。積滯未除。改以參苓白朮散。加肉果與服。瀉稍止。食粥一盞。下午因食紅棗數枚。夜分痰忽起。其勢甚危。急與蘇合丸服之而愈。再以參苓白朮散。加石菖蒲。藿香。炮薑。肉果。調理全安。

潘敬齋令媳。原因經水不行。醫投安胎之劑。越七月。經水忽大行。內有血塊。筋膜如手大者一二桶。昏冒困憊爲劇。逆予治。其脈右關洪滑。左寸洪數。兩尺皆洪大。病形夜分咬牙亂語。手心熱。口噤。時手足皆冷。心頭脹悶不快。面色青。始諸醫皆謂難治。予曰。無恐。此濁痰流滯血海。以誤服安胎之劑。益加其滯。夫血去多。故神魂無依。痰迷心竅。故神昏語亂。急爲調氣開痰。安神養血。可生也。卽以溫膽湯。加石菖蒲。酒芩。天麻。酸棗仁。丹參與服。其夜子丑時。咬牙亂語皆減半。次日仍與前藥。每帖加竹茹五錢。臨睡。又與黑虎丹數粒。諸症悉去而愈。敬齋

問曰。藉高手病痊矣。而每發於夜半何也。予曰。此心包絡與膽經有痰熱。故每至其時而發。單治此兩經。痰既消而神魂俱安也。敬齋曰善。上舍張懷赤。每早晨腸鳴瀉一二度。晚間瀉一度。年四十二。且未有子。予診之。尺寸短弱。右關滑大。予謂此中焦有濕痰。君相二火皆不足。故有此症。以六君子湯加破故紙、桂心、益智仁、肉苁蓉煎服。瀉遂減半。又以前藥加杜仲爲丸服之而愈。次年生子。

臧七房二老夫人。年六十八。患痢。痢後過食熟菱與腐湯。以致大便滑洩不固。飲湯水徑直下不停。胸膈否悶。語言無力。舌乾口燥。生瘡。燕津液則喉疼。元氣大虛而熱。皆虛火所致。且長素二十餘年。又當痢後。益知非有餘之症也。脈又尺寸俱弱。兩關滑大。內經云。清氣在下。必生飧洩。濁氣在上。必生膜脹。此之謂也。法當提清降濁。補助元氣。用四君子湯加葛根、白芍藥、黃連清虛熱。止燥渴爲君。桔梗輔佐葛根升提清氣爲臣。陳皮、麥芽降其濁氣。以消胸膈否悶爲佐。加烏梅爲使。上使生津。下使止濁。連服二劑。尺寸之脈稍起。飲食亦得停腹。駸駸然始有生氣。仍以前方加白扁豆、神麴打糊爲丸。調理而安。

蔡樂川令眷患頭痛。痛如物破。髮根稍動。則痛延滿頭。暈倒不省人事。踰半時乃甦。遍身亦作疼。胸膈飽悶。飲湯水停膈間不下。先一日吐清水數次。蛔蟲三條。原爲怒起。今或惡風。或惡熱。口或渴或不渴。大便秘。脈則六部皆滑。大有力。予曰。此痰厥頭痛症也。先以藿香正氣散止其吐。繼以牛黃丸、黑虎丹清其人事。頭仍疼甚。又以天麻、藁本各三錢。半夏二錢。陳皮、白芷、薄荷、麻黃、生薑、葱白煎服。得少汗而頭痛少止。至晚再服之。五更痛止大半。而人事未全清。予謂此中焦痰盛。非下不可。乃用半夏五錢。巴霜一分。麴糊爲丸。每服三十丸。生薑湯送下。下午大便行三次。皆稠粘痰積也。由此飲食少進。餘症差可。惟遍身仍略疼。改用二陳湯。加前胡、石膏、藁本、薄荷、枳殼、黃芩、石菖蒲。調理而安。

周蘆汀乃眷患胃脘痛。手心熱。嘔吐不食者四日。晝夜叫痛不輟聲。脈則兩手皆滑數。予謂當以清熱止痛爲先。故先與清熱止痛末藥二錢令服之。不一飯頃。痛遂止而睡。家人皆色喜。予曰。未也。此火暫息耳。其中痰積甚固。不乘時而下之。勢必再作。因與總管丸三錢。服下腹中微痛。再服二錢。又睡。至天明乃寤。而腹痛亦止。大便下痰積甚多。次日以二陳湯加枳實、薑黃、香附、山梔、黃連與之。

服後胃脘之痛全止。惟小腹略覺膨脹。予謂其痰積未盡也。再與總管丸三錢。夜服之。天明又行一次。痰積之下如前。而胃脘之痛亦絕不發矣。

孫文垣醫案 卷一 三吳治驗

孫文垣醫案

明 新安 孫一奎 文垣甫輯

鄞縣 曹赤電 炳章圈點

卷二

二 吳治驗

王文川令郎。原傷飲食。又傷於冷菱等物。遍身發黃。眼如金色。夜發熱。天明則退。腹痛手不可近。號叫通宵。市醫因其黃而曰胡荳真矣。衆議以草頭藥進。予至急止之。曰。向以草藥幾誤其母。復欲誤其子乎。蓋脾胃喜溫惡寒。且此症乃食積釀成。而黃爲濕熱所致。法當健脾。用溫暖之劑下之。濕熱去而黃自退。草頭藥性多寒。用之是損脾土而益其疾也。可用哉。卽以保和丸一錢。入備急丸五分。作一次服之。少頃瀉一次。又少頃連下三次。積物所下甚多。腹痛盡止。再與調中丸服一月。不但一身之黃盡退。而步履輕捷如飛。其父喜曰。神不誤我。問

其故曰。始議進草頭藥者十九。而孫君獨叱其非。余不能決。而決於神。神允孫君。服果有效。而吳我峰小樓等曰。亦孫君之藥神爾。設無孫君。神雖靈。何所顯哉。衆拊掌而噱。

施涇陽先生內人。年五十八。左脅有痰飲。每升至咽間。卽脹悶。不知人事。遍身皆脹。不能臥。小水赤。診其脈。兩寸關洪滑。六部皆數。予謂此痰火症也。痰生熱。熱生風。故每發。人事不知。爾乃與牛黃清心涼膈丸。同黑虎丹服之。夜遂得睡。人事亦安靜。再以二陳湯加滑石、竹茹、鬱金、薄荷、黃芩、前胡、加燈心、生薑煎服。全安矣。

屠侍軒尊眷。產一日而觸於怒。大便洩瀉。昏憤不省人事。大熱氣促汗多。衆醫謂產後脈不宜大。今脈大而左手且散亂。又汗出喘促。法在不治。予曰。固然。書云。醫而不起者有矣。未有不藥而起者也。且不藥而視其死。與藥而或可圖生者。孰優。予試之。亟與人參五錢。白朮三錢。炙甘草一錢五分。炮薑二錢。肉果六分。五味子七分。煎服。其夜遂稍睡。予竊喜。補而得睡。其陰陽和矣。次早脈果稍收斂。喘促亦緩。大便前半夜瀉三次。五更啜粥半盂。小便通利。大有生意也。再以

人參、阿膠固元氣，定喘爲君。白朮、炮薑補脾爲臣。澤蘭、葉退產後之熱。五味子斂神止汗。肉果止瀉爲佐。甘草和中爲使。五帖而安。

屠學恆先生乃眷。以產後欠補養。而精神疲困。脾胃亦弱。腹中間作痛作瀉。脈兩手皆濡軟無力。以六君子湯加藿香、砂仁、香附、蒼朮、澤瀉調理而安。

周鑑泉令政。病傷寒發熱。譫語口渴。咳嗽。胸膈痛。洩瀉嘔吐。遍身發斑。診之六脈洪滑。予曰。此少陽陽明合病之症。勢亦重矣。急以升麻葛根湯加滑石、五味子進之。服後汗大出。下午卽退涼。而譫語止。晚進柴芩湯加五味子、滑石。其夜瀉止。神思始清。次日左脈已和。右脈亦稍收斂。予喜曰。可無恙也。改用白芍藥爲君。陳皮、柴胡、酒芩、五味子、牡蠣、滑石、茯苓、澤瀉、白朮。服四帖而痊可。

大國博臧顧渚先生。病兩耳掀痒。脣燥舌乾。咳嗽吐濃痰。脈左稍浮弦。右洪滑。此胃中痰火流入肺經。鬱積久而生熱生風也。先以總管丸導其痰。又與黑虎丹祛其風熱。繼以天花粉、薄荷、鬱金、葛根、白藥子、甘草、黃連、連翹、蟬退煎服而安。王南崗咳嗽氣湧。不能伏枕。吐痰不已。下午微熱。胸膈膨脹。不知飽餓。口乾。舌上白胎厚。小水短少。大便裏急後重。間有紫黑血。脈右關洪滑。左手濇。據脈症胃

中有瘀血痰積。而肺氣亦虛也。法當先補而後瀉。以人參、白朮、白芍藥、柴胡、黃連、陳皮、半夏、五味子、桔梗。與三帖後。察其肺脈已旺。乃與總管丸下之。去黑血屑極多。諸症悉減。再與紅六神丸調理而痊。

張桃津乃政。原有小便癃閉之症。又小產後三日。臍下作疼。夜分發熱。口渴。大便澹。日三四度。先與補中益氣湯。加玄胡索、澤蘭葉、牡丹皮服之。連進三帖。大便實矣。惟小便頻數。滴滴不斷。一日夜二十餘次。夜分尤多。精神甚憊。脈雖五至。不甚充指。此血虛有熱。而氣亦滯也。濕熱在氣分。故口中渴。血虛故臍下痛。法當峻補其陰。而淡滲其陽。以熟地黃三錢、黃柏一錢補陰爲君。草薢去濕熱爲臣。瞿麥穗、澤瀉淡滲爲佐。烏藥調氣。甘草爲使。服下。臍痛全止。小便其夜亦不起。連進三帖。病脫然矣。

陳光祿松巒翁。長厚君子也。而存心博愛。常五更胸膈脹疼。三吳名家遍延而治。寒熱溫涼藥味備嘗。竟無一効。禮予診之。右寸軟弱。左平。兩尺亦弱。予曰。此肺腎二經之不足也。補而斂之。可無恙矣。以補骨脂、山茱萸、人參各三兩。鹿角膠、鹿角霜各五兩。杜仲、巴戟、白茯苓、車前子各一兩五錢。乾山藥二兩。鹿角膠酒

化爲丸。空心淡鹽湯送下。又以御米殼去筋膜蜜水炒三兩。訶子麵煨去核一兩。陳皮一兩半。煉蜜爲丸。五更枕上白湯送下一錢。服一月。病不再發。翁由是交予極驩也。及見予玄珠稿。大稱快。語曰。醫家凡得一方。輒自秘以爲高。君獨欲公諸人。是有意於壽蒼生者。亟付剞劂。予當助梓。因手錄予百餘方。製丸散以施。而亦無人德我之望。

漂水令君吳湧瀾公尊夫人。每五更倒飽。必瀉一次。腹常作脹。間亦痛。脈兩手寸關洪滑。兩尺沉伏。予曰。此腸胃中有食積痰飲也。乃與總管丸三錢。生薑湯送下。大便雖行。不甚順利。又以神授香連丸和之。外用滑石、甘草、木香、枳殼、山查、陳皮、白芍藥、酒連調理而安。

李悅齋先生夫人。胸脇大腹作疼。譫語如狂。寅卯辰三時稍輕。午後及夜痛甚。晝夜不睡。飲食不進者十八日。究其故。原有痰火。與頭疼牙疼之疾。又因經行三日。後頭疼發寒熱。醫以瘧治。因大惡熱。三四人交扇之。而兩手浸冷水中。口噙水而不嚥。鼻有微衄。又常自悲自哭。目以多哭而腫痛。時卽壁上亦欲飛去。劇則咬人。小水直下不固。喉梗梗吞藥不下。脈則左絃數。右關洪滑。予曰。此熱入

血室症也。誤服治瘧剛燥之劑。而動痰火。以致標本交作。諸人猶謂熱入血室。當夜間譫語。如狂如見鬼。何至胸脇疼劇咬人也。予曰。仲景云。經水適來適止。得疾。皆作熱入血室治之。治同少陽。而以小柴胡湯為主。加涼血活血之藥。此古人成法可守也。痛極咬人者。乃胃虛蟲行求食而不得。故喉中梗梗然也。卽以小柴胡湯。加桃仁。丹皮。而譫語減。次日以安蛭湯與服。而疼隨止。飲食進。遂驥驥有生意。

吳仲峰先生邀予診時。爲仲秋初二日也。六部皆沉微。而左尤甚。隱隱如珠絲之細。症則原以腸風去血。過服寒涼。致傷脾胃。自春至秋。脾洩不愈。日夜十二三行。面色黃白帶青。兩頤浮腫。四肢亦浮。小水不能獨利。利必與大便並行。腸鳴。四肢冷。口不渴。飲食大減。口脣齮肉皆白。其爲人也多憂思。夫四肢者。脾之所主。清冷爲陽氣不充。兩頤乃腎經部位。浮腫益見腎氣之不足也。脈沉微。與面色黃腫。皆屬於濕。書云。諸濕腫滿。皆屬脾土。合脈症觀之。由脾虛不運。積濕而然。虛寒明矣。病至此。勢亦甚危。第形症相符。色脈相應。又能受補。庶幾可生也。法當大溫補升提。以東垣益胃升陽滲濕湯。加減調理。人參三錢。白朮五錢。黃

耆二錢。茯苓、益智仁、蒼朮、澤瀉各一錢。大附子五分。炮薑、炙甘草、升麻、防風各五分。連服八帖。諸症悉減。乃囑之曰。病雖暫愈。宜戒生冷憂思。庶服藥有效。切勿輕犯。犯之非藥石可回也。翁曰諾。敢不唯命。

張後溪先生令孫。遍身瘡疥。浮腫。腫自足背起。漸腫上大腿。今且至腹。大便洩瀉。發熱不得安寢。此風濕之症。當令與時違之候。治從開鬼門。潔淨府二法。使清陽升則瀉可止。小水利則浮腫可消。上下分去其濕之意也。蒼朮一錢。薏苡仁、桑白皮各三錢。青蒿、防風、升麻、柴胡各五錢。大腹皮、五加皮、赤茯苓、澤瀉各六分。八帖全安。

府佐張五橋先生夫人。患喘嗽。夜分氣壅。不能仰臥。體素弱。脈右滑大。左細弱。每咳嗽必連連數十聲。痰不易出。甚至作吐。以東垣人參平肺散加減治之。四日而愈。人參、桑白皮、地骨皮、青皮、茯苓、五味子、知母、滑石、麥芽、天麻、粳米、甘草水煎服。夜與白丸子。

方東埜患脊骨痛。牽引胸腹皆疼。舌上黃胎甚厚。脈沉滑而數。先與川芎、羌活、炙甘草、蒼朮、薑黃、防風、藁本、枳殼、桔梗、柴胡服之。服後背脊痛減。腹仍痛。與木香、

檳榔、薑黃、香附、青皮、酒連、大瓜、薑、柴胡、川芎服之。腹痛稍減。腰疼甚。知其痰積下行。欲去而不能也。即以木香、檳榔丸下之。連行三四次。舌上黃胎始退。腹痛全止。脈亦軟弱。改以人參、當歸、白芍、甘草、茯苓、陳皮、白芥子、香附、柴胡、青皮、白朮調理而安。

張淨宇文學發熱腹疼洩瀉口渴嘔吐不止。時師有認寒者。有認熱者。有認傷食者。予至診之曰。此時疫瀉也。以二陳湯倍白朮加青蒿、葛根、酒芩、白芍、藥、豬苓、澤瀉、滑石一劑而安。

張一尹近川翁始以內傷外感。過服發散消導之劑。致胃脘當心而痛。六脈皆絃而弱。此法當補而斂之也。白芍藥酒炒五錢。炙甘草三錢。桂枝一錢半。香附一錢。大棗三枚。飴糖一合。煎服一帖而瘳。

閔文川先生肛上生一腫毒。月餘膿潰矣。但稍動則出鮮血不止。大便結燥。胸膈飽脹。飲食不思。脈兩寸短弱。關絃尺洪滑。此氣虛血熱陷於下部。法宜補而升提也者。不然痔漏將作。可慮也。黃耆二錢。歸身、地榆、槐花、枳殼各二錢。升麻、秦艽各七分。荆芥穗五分。甘草三分。服後胸膈寬。惟口苦甚。前方加酒連、連翹各

五分而愈。

李古愚先生。每食後卽大便。腹皮稍脹急。胸膈飽悶。醫與參朮。則痞悶愈甚。小水清而長。予脈之。左寸濇。右寸滑。按之如黃豆大。且鼓指。關尺之脈皆絃小。左尺脈迢迢有神氣。據脈乃積痰鬱滯於肺。莫能出。以致大便之氣不固也。法當效丹溪治乃叔。用吐吐去上焦痰積。而大便自實矣。先用苦梗、蘿蔔子各三錢。白豆仁、橘紅、山梔仁各一錢。川芎五分。生薑三片。葱三根。水煎服之。取吐。服後半時許。惡心吐出清痰。心惡之勢雖有。乃痰積膠固。猶不易出。又以蘿蔔子一合。搗漿水。加蜂蜜與半碗飲之。始吐出膠痰二碗餘。平日每小水。則大便並行。吐後小水始能獨利。連行三四次。而胸腹寬舒。初亦以吐爲懼。至是豁然稱快。大便五日不行。始以予言爲不謬也。再以二陳湯加白朮、旋覆花、麥芽調理而全可矣。

姚惠齋先生。夜多洩瀉。瀉必三五次。甚且十數次。小腹時作疼。按亦疼。口不渴。小便長。醫半年不愈。予診之。左寸滑。餘五部皆濡弱。此陽氣大虛。虛中有寒也。治當溫補下元。兼之升舉。人參一錢半。黃耆、白朮各二錢。白芍藥酒炒三錢。大附

予五分。肉桂一錢。杜仲、補骨脂各一錢半。升麻、防風各七分。薑棗煎服。其夜大便減半。次早雖瀉。俱是白積。如生豆汁狀。小腹痛止。再診之。右脈稍起。連服四帖而瘳。翁喜言曰。抱病半年。藥無虛日。今收功於四劑。何速哉。認病真而投劑確也。敢不銘心。

大京兆姚畫老夫人。年幾七十。右手疼不能上頭。醫者皆以痛風治。不效。益加口渴煩燥。請予診之。右手脈浮滑。左平。予謂此濕痰生熱。熱生風也。治宜化痰清熱。兼流動經絡。可瘳也。二陳湯倍加葳靈仙、酒芩、白殭蠶、秦艽四劑。而病去如脫。

一僕發熱頭疼。口渴腹疼。小便赤。大便瀉。日夜不睡者六日。予診之曰。據脈汗後浮數。熱尙不減。乃疫症也。以滑石三錢、青蒿、葛根、白芷、片芩各一錢半、炙甘草、升麻各五分。一帖即得睡。熱減大半。頭痛全除。惟小水赤。頭暈。脚膝無力。此病後血虛之故。以四物湯加青蒿、酒芩、薏苡仁服之而安。

一僕病與前類。而身如火爍。頭痛如破。大便不瀉。小水赤。口渴鼻乾。不得眠。胸膈膨脹。腹飢不能食。六脈弦而數。用竹葉石膏湯加知母、枳殼、白芷、葛根。大加青

蒿一帖而熱痛減半。胸膈亦寬。惟口渴小水短澹。睡臥不安。又與化瘟丹三錢。井水化下。渴止。稍得睡。頭暈脚軟喘急。與四物湯加青蒿、酒芩、薏苡仁、木瓜服之。全安。

一僕之病。亦與前相似。以服丘一齋藥而大吐大瀉。熱益增。頭痛莫能當。煩躁口渴。鼻乾嘔吐小水短澹。寢食廢者十四日。勢甚危急。詢前所服藥。乃藿香正氣散加砂仁、厚朴、山查。大耗元氣之味。且五月火令當權之疫。當以甘寒之劑治之。何可以辛熱香竄者。益其火而枯其津也。其勢危矣。此皆不知因時達變。惟習常膠故以誤人者。用急投人參白虎湯加竹茹、葛根、青蒿、升麻。一帖而熱除。再帖而頭痛止。諸症盡去。後連治數人。多如此類。何也。此天行之疫。故一方見之。治多先以甘寒清解之劑。投之熱退。即以四物湯以補陰血。稍加清熱劑。而青蒿之功居多。此固一時自得之愚。用錄之以告同志者。使知治法。當隨時俗為變。而常套人可不脫也。

馬鳳陽文學。五月患咳嗽內熱。額上多汗惡風。脈左絃數。右滑數。予曰。據絃數為陰虛。滑為有痰。不亟調治。恐成虛怯。以白芍藥、川歸、茯苓、五味子、白朮、甘草、陳

皮、貝母、天花粉、酒芩、麥冬、知母、桑白皮。十帖。諸症皆瘳。七月復瘧。間日一發。寒熱相半。寒熱亦俱極渴甚。上身汗多。以石膏五錢、人參、黃耆、白芍藥、麥冬、知母各二錢、柴胡三錢、桂枝、甘草、陳皮、貝母各一錢、竹葉三十片。一帖而愈。

倪二南先生內人。小水不禁。一日二十餘起。脈右寸洪而有力。左寸虛。右尺沉微。此心腎不交之症也。以當歸、遠志、丹參、牡丹皮、桑螵蛸、人參、山茱萸、益智仁、黃柏、知母爲丸服之。五日而安。後凡遇辛苦則發。以此服之立效。

柱史嚴印老長媳。少司空沈鏡老女也。患腹痛有小塊。蕭蕭然。腹覺冷甚。兩寸關皆滑數。兩尺皆沉微。此脾氣弱而飲食不消。又當秋令濕淫之候。不利亦瀉。宜預防。與白朮、蒼朮、茯苓、甘草、白豆仁、木香、半夏、陳皮、澤瀉煎服。其夜果瀉一度。次早又瀉一度。小腹仍疼不少減。且裏急後重。蓋其稟賦素虛。當補中兼消兼利。白芍藥三錢、桂心一兩、甘草、人參、茯苓、澤瀉、陳皮、白朮各八分、升麻、葛根各六分。服後。脈皆軟弱不滑。蕭塊亦消。改以人參、黃耆、白朮、白芍藥各二錢、炙甘草、陳皮、澤瀉、葛根、柴胡、茯苓各一錢。調理而痊。

新市陳鹿塘先生。原有腸風臟毒之症。大便燥結。數日不能一行。痛苦殊甚。此胃

寒腸熱之症。其脈兩寸皆數。兩關皆弦而無力。兩尺洪滑。而左尤甚。診畢。渠告予曰。病數年。百醫不效。望生難矣。聞公治多奇中。冀一奇而生之。實再造之恩也。予憐其苦。而俛想久之。因思李東垣有云。大腸喜清而惡熱。脾胃喜溫而惡寒。以胃屬土。而大腸屬金也。今治腸胃相兼之疾。必寒非淒淒。熱非灼灼。始可。乃詳酌一方。專以腸風臟毒之藥爲君主。外以養血之劑裹之。使不傷胃氣。蓋藥先入胃。而方傳入大腸。入胃時裏藥未化。及入大腸。則裏藥化而君藥始見。庶幾兩不相妨。亦假道滅虢之策也。因以_一大黃酒浸九蒸九晒者二兩。_二槐花三兩。_三木耳二兩。_四郁李仁。_五皂角子。_六象牙屑。_七條芩各一兩。_八血餘灰。_九升麻。_十荆芥穗各五錢。爲末。煉蜜爲丸。赤豆大。外以四物湯加蒲黃各一兩爲衣。米湯送下。空心及下午各服二錢。服此。果然血止而大便不燥。飲食日加。鹿埤大喜曰。古稱用藥如用兵。奇正相生。鮮有不克敵者。其公之謂乎。

張道南先生內人。以飲食忤於氣。因腹痛不飲食五日矣。逆予診之。兩寸關弦。尺滑。予曰。此上焦氣虛。下有鬱滯也。以薑黃、青皮爲君。山查、檳榔、當歸、杏仁、烏藥、枳殼爲臣。柴胡、木香爲佐。吳茱萸爲使。服後氣稍順。然後用葱二斤煎湯浴洗。

腰腹。卽將熟葱擦摩腰腹。使氣通透。洗畢卽安臥。少頃。其夜大便通。先下皆黑硬結塊。後皆水。此積滯行而正氣虛也。以建中湯加山查、茯苓、澤瀉、柴胡、香附、薑、連調攝之而痊。

張道南先生尊堂老夫人。以勞倦。致早晨膈上有痰痞而惡心。每食熱物。目中卽出泪。脈右寸關皆滑。左寸短弱。此心血不足。而肺胃有痰也。以六君子湯加麥芽、白豆仁、旋覆化。治之而愈。

馬迪庵先生內人。原以飲食過傷。又爲風寒外襲。以內傷外感治之。後復至五更。發熱脣燥。胸中衝跳不已。手足皆冷。脈兩寸俱滑數。予謂此奇痰症也。以小陷胸湯加白芍藥、蘿蔔子、前胡、酒芩二帖。次早大便行。下虵蟲八條。胸中卽不衝跳。但覺力怯。再診之。兩寸減半。尺脈稍起。以二陳湯加白朮、白芍藥、酒芩調理。後四帖。加當歸而全愈。

大宗伯董潯老夫人。常眩暈。手指及肢節作脹。脈右寸軟弱。關滑。左脈弦長。直上魚際。兩尺皆弱。此亢而不下之脈。難經所謂木行乘金之候也。總由未生育而肝經之血未破。爾內經云。諸風掉眩。皆屬肝木。兼有痰火。治當養金平木。培土

化痰。以白朮。半夏。天麻湯。正與此對。服兩帖而眩暈平。再與六君子湯。加天麻。白殭蠶以治其暈。加白芍藥以瀉肝。麥門冬。人參以補肺金。麥芽。枳實。神麴。蒼朮以健脾。使宿痰去而新痰不生。少用黃柏二分爲使。引熱下行。令不再發。張裕齋惡寒痰多作呃。胸膈不寬。兩寸俱短弱。關洪大。尺濇。此上焦氣虛。中焦有痰。下元不實也。法當清中補下。不然。後將有中風之患。二陳湯加白豆仁。香附。藿香以開胃氣。白芥子。蘿蔔子。杏仁以降痰而潤大便。兩帖諸症悉去。乃錄入味腎氣丸方與之。令自調理。

大柱史嚴印臺夫人。年近六十。已孀居十年餘。以孀居而食長素。其壻張懷赤善予語。曰。外母近鼻塞。大便瀉。胸膈不暢。醫者下之。益甚。予曰。王海藏有云。雜病酒積下之早。必成痞滿。所當慎也。用拉予診之。兩寸沉弱。關弦大。兩尺亦弱。予曰。此陽氣甚弱。脾氣大虛。不當下而誤下之。故鼻作塞。而胸痞悶也。用蒼朮。川芎。桂枝。白芷。防風。桔梗以疎風而升陽氣。白豆仁。蘿蔔子寬胸利膈。麥芽以助脾氣。服後鼻不塞。而胸猶痞。復用東垣木香化滯湯。加吳茱萸。乾薑而安。乃囑之曰。病雖漸愈。第陽氣虛。脾氣弱。不宜久食素。恐中氣不充。防作中滿。謹識之。

謹識之。

王谷泉大便作瀉。上身熱。耳中壅塞。頭眩暈。胸膈不寬。口渴。痰多咳嗽。六脈俱濡弱。汗大出。此正氣大虛。或由尅伐太過所致。當以補養爲先。人參、白朮、白芍藥、酒炒各四錢。柴胡、石菖蒲、陳皮各一錢。炙甘草五分。澤瀉、茯苓各一錢。兩服而神清膈寬脾健。惟汗不斂。眩暈未除。再與人參、白朮、黃耆、酒炒白芍藥各二錢。炙甘草五分。大附子五分。桂枝三分。澤瀉一錢而愈。

方東楚兩脅痛。上壅至胸。發熱。飲食不進。脈左手沉而弦數。乃積氣也。右手滑。痰飲也。關脈濡弱。脾氣不充也。據症或觸於怒。故痛之暴耳。治當先去積熱。消痰氣。然後用補。瓜蒌仁六錢。枳殼、薑連、半夏各一錢半。白芥子一錢。牡蠣二錢。炙甘草五分。柴胡一錢五分。二帖。諸症盡去。飲食進矣。然恐其復發也。與當歸龍會丸使行之。以刈其根。服下果行二次。

一婦人懷妊七月。內熱咳嗽。胸膈飽悶。以條芩二錢。瓜蒌仁、白芍藥、紫苑、貝母、桑白皮各一錢。甘草三分。枳殼、紫蘇梗、知母、陳皮各七分。二帖而愈。

一婦人心痛脣紅。痛則大發熱。頭疼。少頃出汗。脈大小不一。予曰。此蟲痛之症。痛

吐白沫。可徵也。檳榔、川椒各二錢。杏仁一錢五分。石菖蒲一錢。烏梅七個。炮薑、草豆仁、陳皮各五分。山梔仁一錢。一進而痛減半。再進而痛全除。

倪二南內人小產後。小腹痛。夜分作熱作暈。予曰。此氣血虛而惡露未盡也。川芎一錢半。當歸三錢。澤蘭、益母草、香附、丹參各一錢。人參七分。荆芥穗五分。山查、桂皮各一錢。一帖而小腹痛止。再帖而熱暈悉除。

倪少南右頰車浮腫而疼。直衝太陽。大發寒熱。兩手寸關俱洪。大有力。此陽明經風熱交扇所致。以軟石膏三錢。白芷、升麻各一錢。葛根二錢。生熟甘草一錢。薄荷、山梔子、牡丹皮、連翹各七分。天花粉、貫衆各一錢半。兩帖。腫痛全消。

倪少南內人。經行如崩。勢不可遏。頭暈眼花。脈右寸極軟弱。左近駛。此氣虛血熱之候。由氣虛而血不固也。仲景云。血脫益氣。特用人參、黃耆各三錢。白朮二錢。粉草五分。荆芥穗、蒲黃、側柏葉、薑炭各一錢。三帖全瘳。

高仰山內人。痔血裏急後重。飲食入腹。大便即行。晝夜行五六度。五更咳嗽。喉中痰響。肌肉脫口作渴。由服痔科涼血之藥過多。致脾虛不能統血也。脈六部皆軟弱無力。以四君子湯。加荆芥穗、秦艽、陳皮、炮薑。四帖而飲食進。血全止。嗽定。

而睡寧。後減炮薑。倍加何首烏。又四帖而數年不發矣。

姚娘子小腹疼。飲食及藥入腹皆疼。疼來遍身無力。此由血崩而致。宜急治之。人參、黃耆各二錢。白朮一錢。茯苓、陳皮各八分。白芍藥、貫衆各一錢。薑炭、荊芥穗、蓮蓬殼、燒灰各三分。煎服而安。

張五橋先生令政。鄭都諫春實公令姊也。痰喘不能伏枕。且咳嗽。甚則吐痰涎碗餘乃止。以旋覆花湯爲主治之。旋覆花、紫蘇子各一錢。半夏一錢五分。厚朴、桂皮、粉草各三分。茯苓、陳皮、桑白皮、葶藶子各八分。薑三片。水煎服。臨臥以養正丹二十粒。白湯送下。兩帖。痰嗽喘各減十之七。乃去葶藶子。加白芥子、蘿蔔子。二帖而痊。

徐文學三泉先生令郎。每下午發熱。直至天明。夜熱更甚。右脇脹痛。咳嗽弔疼。坐臥俱疼。醫以瘧治罔效。延及二十餘日。熱不能退。後醫謂爲虛熱。投以參朮爲主。痛益增。逆予診之。左弦大。右滑大。搏指。予曰。內經云。左右者。陰陽之道路。據脈。肝膽之火爲痰所凝。必勉強作文。過思不決。木火之性。不得通達。鬱而爲疼。夜甚者。肝邪實也。初治。只當通調肝氣。一劑可瘳。誤以爲瘧。燥動其火。補以參

朮。閉塞其氣。書云。體若燔炭。汗出而散。今汗不出。舌上之胎已沉香色。熱之極矣。設不急治。立見凶危。乃以仲景小陷胸湯為主。大瓜薑一兩。黃連三錢。半夏麴二錢。前胡。青皮各一錢。水煎飲之。夜服當歸龍會丸微下之。諸公猶爭之曰。病久而食不進。精神狼狽若此。寧可下乎。予曰。經云。肝常有餘。且脈亦爲有餘。故有餘者瀉之。前時誤認爲虛。投補左矣。豈容再誤哉。服後。夜半痛止。熱退。兩帖全安。

王祖泉乃眷。朝飯後。稍寒。惡風發熱。遍身疼痛。汗大出不止。口中熱。腹中不知餓。小水短。六脈皆瀯。以白芍藥五錢。白朮二錢。桂皮。黃芩各一錢。甘草八分。二帖而汗止。寒熱除。減去白朮。加當歸。而遍身痛止。

費少垣乃眷。姪已九月。痰多喘嗽。胎氣上逆。眼撩不起。兩太陽微疼。予曰。此子懸症。兼痰火也。以大紫蘇飲爲主。纔服一帖。逆即不逆。胸膈頓寬。惟喘嗽不止。與七製化痰丸而安。

費一吾先生令政。娠已四月。夜不能睡。小便淋痛。痰嗽內熱。脈右關滑。左寸微弱。兩手皆數。與橘紅。貝母。片苓。黃連。茯苓。澤瀉。枳殼。蘇梗。前胡。水煎服之。其夜即

能安寢。次日再以四君子湯加當歸、香附、貝母、陳皮、條芩、紫蘇梗、前胡調理。足月而產一子。

令弟媳六娘子遍身痛。發熱汗大出。昏昏如醉。臥不能起。兩寸脈短弱。兩手皆數而無力。此勞倦之餘。故汗大走也。黃耆三錢。白芍四錢。粉草一錢五分。桂皮八分。當歸一錢。石斛二錢。一帖。熱除痛汗皆止。惟倦而不能起。仍以前方加人參、陳皮兩帖而痊。

又八娘子頭痛咳嗽。痰多有血。夜分發熱。喉中常作血腥。每經水行。必腹中先痛。二日用香附、牡丹皮、滑石、甘草、桃仁、川芎、當歸、柴胡、白芍、山梔子、茅根八帖而瘳。

姚弁山老先生內人。自上年十月左足不能履地。至十二月產後忽好。三日復不能動。時常胸脇作痛。素多痰火。而治者每以四物湯、天麥門冬為主。間服獨參湯。服將彌年而病如故。予診之。兩寸脈俱洪滑而數。夜分發熱。此係濕痰凝滯。補塞太重。故遷延不脫。乃以二陳湯加蒼朮、黃柏、葳靈仙、五加皮、生地黃、白芥子、白芍藥、當歸兩帖。胸脇痛止。熱除。再加薏苡仁八帖而足能舉步矣。

李坦渠老先生令子室。十月發寒熱起。一日一發。咳嗽心痛。腰亦痛。至次年正月十七日。始間日一發。肌肉大瘦。喉疼。汗出如雨。白帶如注。飲食減少。百試而汗不止。延予爲診。其脈右手軟弱。左手散亂。此汗多而脈不斂。病勢至此。危之甚矣。書云。火熱似瘧。此病之謂歟。以黃耆二錢。白芍一錢五分。粉草阿膠各一錢。鼈甲三錢。桂枝五分。烏梅一個。水煎服。其夜汗止。次早診之。左脈已斂。神氣亦回。前方加何首烏。石斛。牡蠣。其日寒熱亦不發。飲食稍加。駸駸然有幽谷回春之象。

太學周衡宇先生。吳江瀾溪人。大家宰白川公之令孫也。近來咯血色紫。胃中痰火素盛。壅於胸膈。作痞作疼。痰與瘀血挾而爲熱。脈左寸洪大。右寸關皆滑。兩手盡數。此有餘之候。總管丸四錢。再以滑石。桃仁各三錢。山查二錢。枳殼。梔子。貝母。紅花。丹皮各一錢。茅根五錢。水煎服之。次日大便行三次。痰積極多。內帶瘀血。改以山梔子。紫苑。丹皮各一錢。滑石三錢。桃仁一錢五分。小蘗三錢。茅根五錢。水煎。加童便一酒盃。三帖全安。

大參張公分守杭嘉湖道。因喪夫人。衙中亡者八口。心中惶。又因凌繹翁交厚。而

禮子爲診。左寸脈短。關弦。右關滑。兩尺亦弦。據脈心血不足。中焦有痰。流於下部。凝於經絡。以故腰膝痠疼。居常背心作脹。頭多眩暈。夜睡多汗。先時諸醫悉投風劑。非所宜也。予以陳皮、白芍藥、木瓜、牛膝、五加皮、苡仁、黃柏、酒芩、甘草、生地、當歸、藏靈仙。調理十劑。諸症悉愈。

大都諫鄭春寰老先生。爲春元時。頭痛內熱。入夜尤甚。汗出如流。通宵不止。小水短赤。舌上黃胎。右脅脹疼。先與桂枝白虎湯一帖。解其內熱。斂去浮汗。再與白芥子一錢、瓜蒌仁四錢、枳實、薑黃、黃連各八分。水煎服。外與當歸龍會丸一錢五分下之。而脅痛安。

大參徐天目老夫人。胸膈痞悶。不思飲食。咳嗽多痰。或時惡心。上焦頭目俱不清利。向來長素。兩寸關滑大如豆。兩尺沉微。痰火症也。二陳湯加酒芩、薄荷、前胡、枳殼、蒼朮、香附、鬱金、川芎。調理而安。

張麗川咳嗽多痰。面青潮熱。肌瘦性躁。而多自用。以數考不利。悒悒成疾。又新婚之後。飲食不節。脈之。右關滑大。餘部皆無神氣。且糞門已發癰瘡。潰流膿血。予曰。此陽病極而下也。法在不治。果不逾月而亡。

陳仰山先生內人。小產後二月。而血大下。白沫如注。五更洩瀉。面虛浮。下午身熱。口渴。面色青黃。脈右手大豁近乳。左濡弱。據此大虛之候。血海尙有瘀血不盡。以致新血不得歸源。稍動。氣卽下如崩。蓋脾乃統血之經。虛則不能約束。且面浮食少。脾虛劇矣。急宜溫補。勢或可爲。人參、白朮各二錢。薑炭、粉草各五分。茯苓六分。香附八分。丹參炒過一錢。水煎服。四帖而瀉止。再以人參、白朮各二錢。茯苓、丹參、黃耆、蒲黃各一錢。薑炭、澤蘭葉、粉草各五分。調理全愈。

張溪亭乃眷。喉中梗梗有肉如炙。嚥吞之不下。吐之不出。鼻塞頭暈。耳常啾啾不安。汗出如雨。心驚膽怯。不敢出門。稍見風。卽遍身疼。小腹時疼。小水淋瀝而疼。脈兩寸皆短。兩關滑大。右關尤搏指。此梅核氣症也。以半夏四錢。厚朴一錢。紫蘇葉一錢五分。茯苓一錢三分。薑三片。水煎。食後服。每用此湯調理多効。

溪亭子室。姪已七月。夢見亡過祖母。揮拳背打一下。驚醒。卽覺胎動不安。血已下。大小便皆急。腰與小腹脹疼者五日。此亦事之奇也。迺予爲治。兩寸脈俱短弱。此上焦元氣大虛。當驟補之。人參、阿膠、黃耆、白朮各二錢。當歸、白芍、條芩、杜仲各一錢。砂仁、香附各五分。苧根嫩皮三錢。葱白六錢。一劑而血止。兩劑諸症悉

除而神漸安。四帖後減去芎根、葱白。調理旬日。足月而產一女。

陳茂之勞倦之後。勉強色慾。精竭而血繼至。續感風寒。發熱頭痛。胸膈飽悶。始從太陽而傳至少陽。胸脇痛而耳聾。嘔逆口苦咳嗽。六脈俱弦數。此少陽症也。以小柴胡湯加枳殼、桔梗、竹茹而嘔逆止。熱退。因進粥。早復熱口渴。小水不利。大便一日夜六七次。所行皆清水。日晡熱甚。舌上黃胎。昏沉振顫。此食復之候。書云。渴而小便不利者。當先利其小便。以猪苓湯為主。猪苓、澤瀉各二錢。滑石三錢。赤茯苓一錢。柴胡八分。升麻、木通各五分。連進二帖。小便利而大便實。但熱不退。以六神通解散一帖。其夜熱仍不退。次早診之。左脈不弦數矣。兩寸脈虛。以故服藥無汗。口渴漱水而不欲嚥。咽熱。此邪傳陽明經。不急涼血。必作鼻衄。病勢至此。可謂極惡矣。投黃芩芍藥湯合生脈散。以止嗽渴。用葛根湯以解飢熱。白芍藥三錢。葛根、升麻、黃芩各一錢。人參一錢五分。麥冬、滑石各三錢。甘草、五味子各五分。烏梅一枚。急煎二帖。飲之。日中大便下燥糞十數枚。始得微汗。就得睡矣。晚進粥一盂。夜臥向安。

陳五山胃脘疼。醫作勞倦治不効。又醫作寒氣治。而用剛燥。痛轉極。又醫以巴豆

丸下之。大瀉皆水。亦無積滯之物。痛雖稍減。然面有虛浮。胸痞足腫。又張醫以人參、白朮各二錢。大補脾胃。則痰嗽氣逆。上膈熱甚。喉嚨乾燥。右脇不能貼席。大便一日二三行。因向被巴豆丸瀉起。迨今七日。猶瀉不止。飲食大減。延予爲治。診兩寸濡弱。兩關滑。兩尺洪大。予曰。據症原起於鬱火。亂投湯劑。大推大扳。以致加重。若平平治之。自當尋愈。二陳湯加薑連、枳實、薑黃、桔梗、蘿蔔子、前胡。一帖而熱嗽除。右脇亦可貼席。再劑而飲食進。大便實。其晚又爲怒氣所加。痰嗽脇痛如舊。且多煩躁。改用橘紅、貝母、瓜蒌、茯苓、山梔子、前胡、青皮、甘草、桑白皮、蘿蔔子。水煎飲之而平。

吳小峰年五十未有子。素有酒積作疼。晌午卽瀉。所下多稠粘之物。腹痛之疾。年已久矣。治當清潔中焦。分濕熱兼養脾法。用白滑石三兩。粉草、肉果各五錢。白芍藥酒炒一兩五錢。木香三錢。紅麴四錢。神麴糊爲丸。每早晚白湯送下二錢。服未竟而疾除。始舉一子。

沈大參玉陽老先生。中焦有食積痰飲而作痞滯。以故大便秘了而不了。間或作脹。予脈之。兩寸短弱。關滑。兩尺沉滑有力。予曰。脾胃經有濕痰。蘊而爲熱。但清其

中宮。使清陽升。濁陰降。而氣血自旺。此不補之補也。以二陳湯。加枳實、酒連、酒芩、滑石、薑黃、木香、乾葛、山查兩劑而愈。

王敬泉頭暈且痛。起則倒仆。胸膈脹悶。如繩束縛。嘔吐而食飲皆不得入。六脈俱瀉。此痰飲挾木火之勢而作暈也。先以濟生竹茹湯而吐不止。且煩躁發飽發熱。再與蘆根湯。連進二碗。氣飽稍定。再以吳茱萸一兩爲末。以鷄子清調塗兩足心。引火下行。外用二陳湯。加薑汁炒黃芩、黃連、旋覆花、枇杷葉、丁香、白豆仁、檳榔、柴胡。水煎服之。服後熱退。大便亦行。頭暈嘔吐皆止。惟胃脘有一塊作痛。仍與前藥兩劑。而塊亦消。

張二官發熱頭痛口渴。大便秘結三日未行。脈洪大。此陽明少陽二經之症。用大柴胡湯行三五次。所下者皆黑糞。夜出臭汗。次日清爽。惟額上仍熱。用白虎湯。加葛根、天花粉。因食粥太早。復發熱。咳嗽口渴殊甚。且惡心。用小柴胡。加枳實、山梔子、麥芽。次日渴不可當。改以白虎湯。加麥門冬、天花粉。外與辰砂益元散。以井水調下五錢。熱始退。渴始定。不虞夜睡失蓋。復受寒邪。天明又大發熱。不知人事。急用小柴胡湯。加升麻、葛根、前胡、薄荷進之。而汗出熱退。神思大瘳。四

肢皆冷。語言懶倦。且咳嗽。以生脈散加石斛、百合、大棗、白芍藥。服後咳嗽尋止。精神日加。飲食進而向安矣。

大司馬潘印川第三令子室。尚書蔣公孫女也。年二十五。體素弱。語言端謹。因難產傷力。繼以生女。拂意後。又女死。悲戚。即時暈厥。醒而神思咪咪。手足痠癢。目作上視。予更後始至。因痠癢不能診脈。細詢之。自女落地。惡露絕無。比有女醫在旁。乃昔所親信者。時與人參大嚼。及獨參湯并粥亂進。參與粥皆壅塞。鬲上不下。以故神昏痠癢不已也。予教以手於喉中探而吐之。喜其隨手吐出痰飲。粥藥盈盆。痠癢方定。乃與川芎、山查、澤蘭葉、陳皮、半夏、茯苓、香附進之。稍得睡。予亦出中堂就寢。不虞女醫又私與補藥二帖。子丑時。陡然狂亂如降神之狀。口中亂語云。我是觀音大士降壇。所言皆儒雅官話。問答如流。聲甚壯厲。殊無產後不足之態。生平不諳漢聲。至是出語如生成者。人皆異之。目爲神附。禳禱百般。予獨諍之。語諸左右曰。此惡露不盡。乃蓄血如見鬼之症。非真有神佛相附也。徐以正言叱之。即緘默。繼以清魂散。加滑石。童便與之。至天明。小水乃行。狂亂皆定。迨予出房少頃。詎知女醫意欲要功。又不知與何藥服之。少刻。狂亂

如前。再與川芎一錢五分。當歸四錢。澤蘭葉、益母草各一錢。臨服加童便。連飲二帖不效。予逆思之。胸中必有餘痰作滯。前劑中無佐使之品。故藥力不行也。即用前劑。大加山查與之。惡露稍行。神思即靜。嗣後稍睡少時。手足微動。或自以手掌其面。或自以手搥其胸。昏亂不息。診其脈近虛。早間面紅而光。申酉時面色白。此血行火退。故脈虛而當補矣。與人參、川芎、澤蘭葉各一錢。當歸、山查各二錢。茯苓、陳皮各八分。捲荷葉一片。煎熟。調琥珀末子五分。服下半時許。暖氣二聲。予喜曰。此清陽升而濁陰降矣。自茲安靜。夜中惡露微行。大便亦利。乃索粥飲。問其昨日漢聲何來。答曰。不知也。諸君始信蓄血如見鬼之言爲不誣。昔秦越人有言曰。病有六不治。信巫不信醫。一不治也。古稱用藥如用兵。以郭子儀之英明。而以魚朝恩監之。便不成功。予固非郭令公之儔。彼女醫之誤。則又有過於魚朝恩矣。噫。寧不慎哉。

孝廉臧茗泉老先生。脈左弦數。右寸弱。關大重則滑。右尺微。原以瘧後。復傷飲食。大便瀉而變痢。一日夜雖只五六行。皆積滯無糞。腹疼後重難安。午未後發熱。至天明始退。此夏傷於暑而秋爲瘧痢也。其熱乃瘧之餘邪。當先解散。然後以

補劑投之。則大便自愈矣。與神授香連丸一服。服訖。腹中腸鳴。須臾大便行。且較前更多。方有糞下。改以白芍藥四錢。澤瀉、黃連各一錢。滑石二錢。粉草、桂皮、木香各四分。山查七分。兩日後。乃與補中益氣湯。加木香、黃連、白芍藥。調理半月。潮熱大便皆愈。

包繼可先生令眷。孕三月而瘧疾發。先寒後熱。胸膈大脹疼。口渴。湯水入即吐。譫語無汗。胎氣上衝而成子懸。脈皆弦大。以川芎、柴胡、黃芩、知母、甘草、橘紅、紫蘇、枳殼、砂仁。水煎服之。吐止痛除。

一張氏婦。年纔二十一。其夫延予診之。左寸關短弱。尺滑。右寸亦滑。關濡弱。尺沉微。診畢。問予曰。脈何如。予曰。心神脾志皆大不足。肺經有痰。夫曰。不然。乃有身也。予曰。左寸短弱如此。安得有孕。夫曰。已七十日矣。予俛思久之。問渠曰。曾經孕育否。夫曰。已經二次。今乃三也。予問二產皆足月否。男耶女也。夫曰。實不敢諱。始產僅九箇月。手足面目完全。而水火不分。鬱肉一片。生下亦無啼聲。抱起已身冷矣。細檢之。乃知其無水火也。次亦九個月產下。又無啼聲。看時口中無舌。二胎之異。不知何故。聞先生能細心察人病。特祈審之。予方悟前二胎之不

完者。由心脾二經不足所致也。今左寸右關之脈可見矣。迺爲籌思一方。專以補心血爲主。令其多服。以百帖爲率。酸棗仁、遠志、茯神各一錢。白朮二錢。白芍藥、當歸、枸杞子各一錢五分。甘草五分。生地黃八分。艾葉二分。龍眼肉五枚。水煎服。足月而產一子。次年又有身。不以前事爲意。至九個月產下。形體俱具。外有脂膜一片。包其面耳目口鼻不見。但不能去此脂膜。產下卽歿。因思上年之子爲藥之力也。因予久不至。其家以予方粘於壁間。一覺有身。卽照方服之。後生二子一女。里中以此方爲補天手云。

癸巳仲夏。吳比部鳳麓父母以次君絃臺先生。眼目紅痛。恐學道按臨。速於取效。乃聽眼科聲寒涼而治。兩越月無驗。又眼科視之曰。目疾不宜多用寒涼。恐冰其血。以人參五錢。枸杞子一兩。悉溫補之劑。凡用人參。枸杞子五六斤矣。目腫如桃。絕不能開。又專科語之曰。紅腫而痛。明是熱症。誤服溫補。反助其熱。寧不益腫。顧其勢卽百寒涼亦不易瘳。捷徑無如用下。此釜底抽薪法也。絃臺惟求速效。一聽下之。用大黃、芒硝、枳殼作大劑。下五六次。而飲食日減。惡心畏風。則不能出房門矣。又專門謂前劑欠當。大瀉之後。正合補也。又聽補之一補而目

腫如舊。又有眼師云。目疾熱症多。寒症少。只當滋補腎水。水升則火自降。火降而目疾斯愈矣。用是以滋陰降火之劑爲恃。纔數服。而精滑不禁。一夜夢遺二次。神氣大脫。投補則目腫痛。用降則精元滑脫。屢試屢如是。諸醫無策。悉謝而退。乃修書命使自淮陰之海陽。懇祝令君介紹。徵予爲治。予始以遠爲懼。祝再四爲渠言。予亦素爲渠重。義不得以遠爲辭。乃介行李嚮往。至卽診之。左寸脈甚短。右寸大而無力。左關弦弱。右滑。兩尺亦滑。予見其坐在幔中。略不敢見。風問其日食幾何。答曰。三次計二碗許。葷腥絕不能用。予曰。夜臥安否。答曰。邇來甚苦於睡。纔合目卽夢覺可畏。或被虎蛇交咬。或有鬼來勾攝。或落橋墜井。或與人爭鬥而負。猛然驚悟。冷汗淋淋。四肢癱軟。不能動憚。少頃乃定。今幸公不遠千里而臨。足徵素雅。予曰。足下始無大恙。只緣大推大扳。以致狼狽。若是彼專科者。不足恃也。經謂五臟精華。皆上注於目。今專科局局然守其死法。安知五臟盈虛陰陽消長。隨時出入哉。以愚管見。但平平治之。易與耳。據足下之脈。心神脾志互相不足。肝膽之火鬱而不散。致生目痺。今爲補養心脾。壯其神志。則飲食日加。寢臥安穩。而精元有守。神水盈溢。何目痺之不愈哉。絃臺曰善。

惟先生命劑。乃以歸脾湯。減去黃耆。木香。加丹參而補心脾。以大安丸。專助脾胃而磨穀食。俾新痰不生。則氣血可繼。日而旺矣。後五日而飲食加。十日而夢覺少。尋能出戶。不畏風日。半月而肌肉生。目可觀奕。津津然而有萬全之兆。不虞專門張氏子復至。以白眼藥日頻點之。一日凡七八次。從此復不能開。瞼肉風粟生滿。適予有南都之往。卒爲所誤。後幸有李少塘打去風粟。眼始能開。李雖手法精熟。然於軒岐間奧。尙亦未窺藩籬。予後自南都至。見左目雖愈。右目終成內障。予故曰。彼專科者不足恃也。豈虛語哉。

丘太守鎮山翁令姪。淮陰人也。丁年患兩手筋攣。指掉不能屈伸。臂肉瘦削。體瘠面白。寢食大減。市中諸友調治無驗。乃任京口諸名家療之。半年肉更消。色更瘁。聞予在吳比部衙中。敦予爲治。診其脈六部俱弦。重按稍駛。診竟叩其受病之源。太守公曰。自上年冬底。偶發寒熱。筋骨疼痛。迨於仲春。寒熱雖退。而筋骨之疼不減。服藥無虛日。甚之日三四進。肉漸消去。指掉不隨。似有加於往昔。醫之來者。一曰風。二曰風。三四五六皆曰風。卽十數輩。又莫不皆曰風者。竭技盡方。卒無一應。奄奄床第。絕不知爲何病。予對公曰。此筋痿症也。乃少年不謹慾

而受風濕。邪氣乘虛而入。醫者不察天時。不分六經。概而汗之。仲景治風濕之法。但使微汗津津。則風濕盡去。若汗大出。則風去而濕存。由是血氣俱虛。經云。陽氣者。精則養神。柔則養筋。虛則筋無所養。漸成痿弱。乃不足之疾。故陳無擇。朱丹溪。劉宗厚。皆謂諸痿。切不可作風治。誤則成痼疾。公聞言愕然曰。服風藥幾二百劑矣。顧今已痼。奈之何。予對曰。令姪青年。猶可圖也。公曰。用何法。予曰。法當大補氣血。經云。氣主煦之。血主濡之。氣血旺。則筋柔而軟。由是乃可以束骨而利機關也。抑何掉之有哉。病者聞言大喜曰。聆先生詳病之源。治法之略。雖未服藥。已覺沉疴去體矣。即請劑。予以五加皮、薏苡仁、紅花、人參、鹿角膠、龜板、虎骨、當歸、丹參、地黃、骨碎補、蒼耳子之類。服兩月。肌肉漸生。飲食大進。兩手指掉亦平復。

一書辦年過五十。糟酒縱慾無憚。忽患下消之症。一日夜小便二十餘度。清白而長。味且甜。少頃凝結如脂色。有油光。治半年不驗。腰膝已下皆軟弱。載身不起。飲食減半。神色大瘁。脈之六部大而無力。書云。脈至而從。按之不鼓。諸陽皆然。法當溫補下焦。以熟地黃六兩爲君。鹿角霜、山茱萸各四錢。桑螵蛸、鹿角膠、人

參、白茯苓、枸杞子、遠志、兔絲子、懷山藥各三兩爲臣。益智仁一兩爲佐。大附子、桂心各七錢爲使。煉蜜爲丸。梧桐子大。每早晚淡鹽湯送下七八十丸。不終劑而愈。或曰。凡云消者。皆熱症也。始公具方。人多議之。今果以溫補成功。此何故哉。予曰。病由下元不足。無氣升騰於上。故渴而多飲。以飲多小便亦多也。今大補下元。使陽氣充盛。熏蒸於上。口自不乾。譬之釜蓋。釜雖有水。若底下無火。則水氣不得上升。釜蓋乾而不潤。必釜底有火。則釜中水氣升騰。熏蒸於上。蓋纔濕潤不乾也。予已詳著醫旨緒餘中。茲不多贅。

食憲韓約齋老先生令子室。每怒動則夜臥不安。如見鬼魅。小水淋瀝。今又大便秘結。腹中疼痛。腰跨脹墜如生產狀。坐臥不安。因痛而脈多不應指。此肝經鬱火所致。法當通利。以杏仁、桃仁各三錢。柏樹根皮、山梔仁、青皮各一錢。檳榔五分。枳殼八分。水煎服之。少頃大便通。痛脹隨減。

食憲韓約齋老先生夫人。向來夜分臍腹疼極甚。必用炒鹽熨之。兩時久乃止。次日必頭痛。兩太陽如箍。遍身亦疼。此上盛下虛症也。先用柴胡、川芎、粉草、酒連、薄荷、天麻、橘紅、茯苓、半夏、蔓荊子。水煎服。數帖頭痛全止。惟咳嗽胸前略痛。兩

寸脈浮滑。兩尺弱。再用鹿角霜、鹿角膠、補骨脂、遠志、枸杞子、金鈴子、香附子、煉蜜爲丸。梧桐子大。每空心及下午食前。淡鹽湯送下。七十九丸而瘳。

孝廉丁震瀾。文令郎。纔二歲。痘母上壅咳嗽。每午後發熱。至子丑時乃退。終日啼哭不止。鵝口白屑。神氣大弱。痘後遍身瘡疥未愈。多方治之不效。有灸之者。有刺之者。有以膏藥貼之者。種種施之。全然不應。予曰。乳下嬰孩。臟府薄脆。不可亂攻亂補。參耆足以增其嗽。灸刺適以驚其神。安能取效。予教以白朮、鼈甲各一錢五分。青蒿、麥芽、陳皮各八分。烏梅一枚。貝母、知母各六分。甘草三分。入帖全愈。

武進令君孫康宇公子室。臧位宇丈女也。年十六。初產女艱苦二日。偶感風邪。繼食麵餅。時師不察。竟以參朮投之。卽大熱譫語口渴。汗出如洗。氣喘洩瀉。瀉皆黃水無糞。一日夜不計遍數。小水短少。飲食不進。症甚危惡。時當六月初旬。女科見熱不除。乃投黃芩、芍藥、黃連寒涼之劑。諸症更甚。又以參朮大劑。肉果、乾薑等止瀉。一日計用人參二兩四錢。瀉益頻。熱益劇。喘汗轉加。譫語不徹口。醫各縛予辭謝曰。書云。汗出如油。喘而不休。死症也。又汗出而熱不退。瀉而熱不

止。且譫語神昏。產後而脈洪大。法皆犯逆。無生路矣。惟附子理中湯。庶微倖於萬一。適予爲顧太守肖溪公延至。卽過爲一診。六脈亂而無緒。七八至。獨右關堅硬。躊躇久之。因思暑月汗出乃常事。但風邪麵食瘀血。皆未消溶。補劑太驟。書云。蓄血如見鬼。治當消瘀血。麵食解其暑氣。猶可圖生。勿遽棄也。有臧玉宇者。位宇堂兄也。醫有雅致。深以予言爲然。而速予措劑。予曰。劑憑症發。難拘常套。不常之症。須用不常之藥。乃用益元散六錢。解暑氣清熱爲君。仲景云。渴而小便不利者。當先利其小便。況水瀉尤當用之爲君也。以糖穠子三錢爲臣。紅麴。澤蘭葉各一錢五分。消瘀血安魂爲佐。香附一錢五分爲裨佐。橘紅。半夏。麴。茯苓。乃統理脾氣爲使。京三稜五分。消前參朮。決其壅滯爲先鋒。水煎飲之。飲下卽稍睡。譫語竟止。連進二劑。其晚大便減半。次日仍用前劑飲之。其夜熱大減。大便只二次。有黃糞矣。惡露略行黑血數枚。又次日診之。脈始有緒。神亦收斂。進粥一盞。大有生意。前方減去京三稜。紅麴。加白扁豆。其夜大便一次。所下皆黑糞。從此熱盡退。大便亦實。改用四君子湯。加益元散。青蒿。香附。白扁豆。酒炒。白芍藥。炮薑。調理而安。

吳東星上舍。辰州太守公長君也。冒暑赴南都試。落第歸而怏怏。因成瘧。自八月中旬。延至十月。瘧雖止。而腰痛白濁。日夜咳嗽。肌肉大消。藥劑亂投。認爲風者。以羌活、防風、續斷等發散。認爲虛者。以六味、地黃丸爲補。認爲火者。以芩、連、梔、子、黃柏、知母、天花粉、生地、黃瀉其火。認爲半虛半實者。投以獨活寄生湯。認爲寒者。以大附子、肉桂、鹿角膠、參、朮溫補之。痛劇欲死。叫撼四鄰。予脈之。左弦細。右滑大。俱六至。口渴赤。予知其昔患楊梅瘡。餘毒尙伏經絡。適因瘧後。氣血不足。舊毒感動。故痛而暴也。以當歸、芍藥、甘草、牛膝、鈎藤、苡仁、木通、白蘚皮。用土茯苓四兩。煎湯代水煎前藥。服下而痛止。咳嗽亦除。脈緩其半。連服數劑。大效。精神漸復。乃起而督工視事。冬至日爲酒興鼓舞。縱慾無忌。次日腰如束縛。足面亦疼。左眼赤。小水短。足底有火從兩胯直衝其上。痛不可言。予以當歸、鈎藤、甘草、白芍藥、牛膝、苡仁、石斛、紅花、生地、黃柏。調理三日。症已守定。略無進退。適大雪寒凍殊甚。有女醫爲渠宅所親信者。因其大便燥結。一日夜服玄明粉一兩五錢。大便且不行。而腰痛愈猛。兩足攣縮。氣息奄奄。一語而三換氣。面青慘。渠自覺危急。迺喚內人及弟叔囑其後事。天明予至。診之。六脈俱伏。痛使然也。

扣其由。乃知服玄明粉所致。予曰。症雖熱。便雖燥。但公病不在腸胃而在經絡。筋骨間。徒瀉腸胃無益也。且冬月陽氣閉藏。藏瀉則陽氣虧乏。來春無發生根本矣。今四肢拘縮。腰胯痛劇者。由日來天令寒極。經絡凝滯也。寒主收斂。法當溫散寒邪之標。使痛定。然後復治其本。庶可保全。乃用桂心、杜仲、炙甘草、蒼朮、破故紙、五加皮。連與二劑。痛定而四肢柔和。飲食始定。予知渠宅素喜速效。予適有荆溪之往。迺宣言曰。足下之疾在經絡。顧今天令嚴寒。幸寧耐。以俟春和。爲足下拔去病根。渠宅不以予言爲然。迺用張雲溪調理。予亦讚張之可守。蓋張氏藥用養血清熱。雖不去病。亦不害事。迨二月太守公歸。迺改用沈春宇沈揣渠必以酒色而致陰虛。迺純用滋陰降火之劑。以爲旬日可奏功也。及調治月餘。略無影響。予從荆溪歸而謁渠。爲三月初旬也。渠聞予至。卽以沈藥呈予。且語予。公許春和拔除病根。此其時也。予知太守公方篤信沈。隨以溫語慰渠。曰。沈公名士也。可使彼展盡底蘊。沈又調理半月。以無功而行。沈去。予再以煨腎散進。大瀉五六度。四肢冰冷。舉家大恐。以予瀉之爲非也。予曰。病從此日減矣。夫奚憂。後進理脾藥。服數帖。神氣始轉。腰胯柔和。可下床舉數步矣。方始信。

而問予曰。人皆以補爲治。公何得病源之真。於三月之前。先已預定。節節如公語也。予曰。此楊梅瘡餘毒伏於經絡。豈補劑所能去哉。予故先爲疎通濕熱。然後以補劑收功。則無反覆之患。後仍以藏靈仙末子二錢。入猪腰子內煨熟食之。又瀉一二度。病根盡拔。改用苡仁、當歸、生熟地黃、白芍藥、牛膝、黃柏、丹參、龜板調理全安。

潘見所老先生有一小盛價。年可十六七。發熱於午後。城中周友以爲陰虛。而爲滋陰降火。服三十餘劑。熱益加。且腹中漸脹。面色清白。仍以六味地黃丸加黃柏、知母、麥冬、五味子之類。又三十劑。而腹大如斗。堅如石。飲食大減。髮黃成穗。額顙光亮。口渴不可言。兩腿大肉消盡。眼大面肉皆消。肌膚枯燥如松樹皮。奄奄一骷髏耳。予觀其目之神。尙五分存。欲爲治劑。潘公門下諸人語予曰。形症如是。死在目下。尙可服藥乎。予曰。症非死候。爲用藥者誤耳。譬之樹木。若根本壞而枝葉枯焦。非力可生。今焦枯乃斧斤傷其枝葉。而根本仍在也。設灌漑有方。猶可冀生。安可遽棄。予以神授丹日用一丸。煮猪肉四兩飼之。十日。腹軟其半。熱亦消其半。神色漸好。潘見老詰余曰。此何症。公能肉枯骨如此之神。予曰。

此疳積症也。彼誤認爲腎虛。而用補陰之藥。是以滯益滯。腹焉得不大不堅。公曰。彼純用寒而熱愈熾。君用非寒而熱反退。此何說焉。予曰。此熱迺濕熱。由脾虛所致。補陰之劑。皆濕類。蓋脾屬土。惡濕喜燥。今以大蘆會丸肥兒丸調理一月。可全瘳矣。公曰。善。無先生。此僕已爲泉下物矣。

少司空凌繹泉翁。年已古稀。原有痰火之疾。因正月上旬。爲令孫大婚過勞。偶占風寒。內熱咳嗽。痰中有血。血多而痰少。痰堅不易出。鼻流清水。舌生芒刺。色焦黃。語言強硬不清。大小便不利。喘急不能睡。亦不能仰。惟坐高椅。椅前安桌。桌上安枕。日惟額伏枕上而已。市醫環治半月不瘳。敦予診之。兩手脈浮而洪。兩關滑大有力。知其內有積熱痰火。爲風邪所閱。且爲怒氣所加。故血上逆。議者以高年見紅。脈大發熱爲懼。予曰。此有餘症。諸公認爲陰虛。而爲滋陰降火。故不瘳。法當先驅中焦痰火積熱。然後以地黃補血等劑收功。斯不失先後着也。翁以予言爲然。用瓜薑石膏各三錢。橘紅半夏麴桑白皮前胡杏仁酒芩紫蘇子水煎。臨服加入蘿蔔汁一小酒盞。一劑而血止。次日診之。脈仍浮而洪大。尙惡寒。予曰。古云。傷風必惡風。傷寒必惡寒。此其常也。只因先時失於清散。表中

之熱未徹。竟用滋陰之劑。又加重便收斂。降下太速。以致風寒鬱而不散。故熱愈甚也。改以定喘湯一劑。而喘急減半。再劑熱退而不惡寒。復爲診之。兩手浮體已無。惟兩關之脈甚鼓指。此中焦痰積膠固已久。不可不因其時而疎導之。以清中丸同當歸龍會丸共二錢進之。其夜大便所下稠粘穢積甚多。予憶朱丹溪有云。凡哮喘火盛者。以白虎湯加黃連枳實有功。此法正繹翁對腔劑也。與十劑外。以清中丸同雙玉丸夜服調理而安。

周鳳亭公年五十有八。正月腸風下血。又飲食過傷大吐。而朱友以枸杞地黃膏一斤進之。不知此公肝氣素盛。中焦原有痰積。且多思傷脾。又值卯木正旺之月。投以地黃枸杞。適以滋其濕而益滯其痰耳。由是飲食減少。肌肉日消。腹中痞滯。又吳友以歸脾湯進之。詎知濕寒未除。先用溫補。是以油撲火。勢成燎原。以致大便燥結。口乾舌燥。據已午未三時。中焦蒸蒸發熱煩悶。酉時而退。此皆濕熱壅滯於脾無疑矣。且面色黃中帶黑。下午足面有浮氣。皆是濕熱傷脾之徵。法宜清肅中焦。徹去濕熱。則飲食自加。而新痰不生。宿痰磨去。庶五穀精華不生痰而生血矣。血充則精神長而肌肉可復。且秋來無瘧痢之患。公曰。清肅

中焦。當用何劑。予曰。二陳湯。加薏苡仁。酒炒白芍藥。麥芽以養脾而消痰。以枳實。黃連洩痞而去熱。以青蒿分利陰陽而消其黃。葛根升引清陽之氣。使肌熱清而口渴可止矣。當服十劑。公曰。先生之方善。但枳實。黃連恐體虛者不足以當之。予曰。惟此二味適可以去公之病根。舍是則不效。緣中焦有餘之疾。非此不能去。亦非他藥所能代。公半信半疑。服四劑。而諸疾皆愈。公遽中止。不復服完。至七月盡。果發痢疾。而以木香檳榔丸下去。稠積甚多。迺追悔予言而延之診。予教以前方仍服十劑。夜以丹溪保和丸調理。則永無瘰癧之患矣。

令郎采石先生。中焦濕熱生痰。否悶。五更倒飽。且下午兩股或膝下筋脈抽掣疼痛。時常噯氣。面色帶黃。間常夢遺。予以清氣大安化痰丸。及猪肚丸。二方調治。而安猪肚丸。用白朮五兩。苦參酒炒二兩。牡蠣煅過三兩。為末。將雄猪肚子一具。摘去油。甘草湯洗過。將藥裝入肚中。縫其口。飯中熬極爛。為度。搗極勻。為丸。此方極健脾。去濕熱。固精丸也。清氣大安化痰丸。用白朮四兩。橘紅。半夏。山查。各三兩。黃芩。黃連。俱生薑汁炒。各一兩五錢。枳實。瓜蒌仁。各二兩。白芥子。蘿蔔子。各炒一兩。薑黃。鹹水煮乾。一兩。青黛五錢。麥芽取麴。打糊為丸。萊菔大。每食

後及夜茶送下二錢。

令孫女纔六歲。忽發寒熱。一日過後。腰脊中命門穴間骨節腫一塊。如大饅頭之狀。高三四寸。自此不能平身而立。絕不能下地走動。如此者半年。人皆以爲龜背痼疾。莫能措一法。卽如幼科治龜背古方治之。亦不效。予曰。此非龜背。蓋龜背在上。今在下部。必初年乳母放在地上坐早之過。比時筋骨未堅。坐久而背曲。因受風邪。初不覺其漸入骨節間而生痰涎。致令骨節脹滿而大。不急治之。必成痼疾。今起未久。可用萬靈黑虎比天膏貼之。外再以晚蠶沙醋洗炒熱。絹片包定。於膏上帶熨熱之。一夜熨一次。再以歲靈仙爲君。五加皮、烏藥、紅花、防風、獨活、水煎服之。一月而消其半。骨節柔軟。不復腫硬。便能下地行走如初矣。人皆以爲神奇。此後三個月。漸不能行。問之。足膝痠軟。載身不起。故不能行。余知其病去而下元虛也。用杜仲、晚蠶沙、五加皮、薏苡仁、當歸、人參、牛膝、獨活、蒼耳子、仙茅。水煎服二十劑。行動如故。

閔文學。蜃樓。患虛損咳嗽。晝輕夜重。乃政丁氏。長興富翁女也。軀甚肥。性甚躁。患痛風。手不能沐櫛。足不能履地。凡痛處略腫。呻吟喊叫。比有朱遠齋氏。爲時推

重。夫婦倚朱治者七越月。纖毫不減。吳九宜翁。迺舉予治。至其家。蜃樓大兄岳樓。旦暮與偕。診畢。語岳樓曰。令弟之症。雖易見功。然非百日不能斷根。丁氏症。十日便可刈其根。但恐不能盡吾劑。奈何。岳樓曰。何謂也。予曰。令弟咳嗽。由肺火未清。誤服參朮太過而然。但爲清肺利肺。咳可立止。止後。以補心安神之劑。養之。則萬全矣。藥用麥門冬、桑白皮、白藥子、貝母、桔梗、甘草、黃芩、枳殼。十帖。咳嗽全止。惟心血不足。神不固精。以酸棗仁、遠志、麥冬、蓮花心、丹參。調養百日。果能出戶肄業。丁症迺濕痰凝滯。經絡作痛。朱公作血虛。而投以地黃、芍藥、當歸、人參、牛膝之類。宜其痛愈加。而病愈久也。今必須燥濕流動之劑。疎決一番。庶經絡通暢。雖不服補劑。而五穀精華。足以自充。但疎決之劑。不能止痛。恐其不余信而中止也。岳樓曰。先生既已言明。惟命是聽。用二陳湯。加烏藥、葉蒼朮、殭蠶、海桐皮、南星。服至五帖。果不憚。而欲止藥。岳樓曰。孫君已先言十帖見功。今過半。何不勉強而使功虧一簣哉。又服一帖而止。百般強之不從。迺揚言曰。請醫療。痛而反加痛。吾何藥爲。後四劑斷斷乎不敢奉命矣。時已申刻。予知其富家矯態。亦不強服。隨以芫花醋炒過三分。海金沙一分。爲末。白湯調下。至晚瀉。

一次下稠痰半盆。足痛減大半。稍能動止。初更後。吾輩酒猶未散。忽報云。腹中大痛。促予進看。行至後堂。內中人出而止曰。病者卒矣。不勞進看。乃曰。此必痛厥。非長逝也。烏可不進一看。至即冷汗淋漓。兀坐溺器。面青息斷。執而診之。手冷如冰。但六脈俱在。惟沉伏耳。知其爲痛極使然。用生薑湯灌之而甦。徐語近侍女使曰。適來腹中痛甚耳。後火光灑出。肛門如焚。大響一聲。不知瀉下何物。衆看之。迺血鰓一條。長六寸。闊半寸餘。鱗目俱在。盆中尙能遊動。衆皆悚駭。岳樓問曰。此鰓下可好否。予應之曰。此尤物也。得下豈不好。但下症實由痰作。予特爲行痰。初不知其有蟲如是。第藥中有芫花。迺殺蟲之物。故偶中。亦令弟之福也。次日手足皆能動。仍以二陳湯加苡仁、紅花、五加皮四帖。脫然如故。閔宅以予不矜功而益重予。

金寄閒令堂。暑月患痢。小腹窘迫。胸膈膨脹。口舌焦渴。右寸關脈洪滑。左脈弦。迺氣鬱食積痢也。先與木香檳榔丸。開而下之。微利一二度。因口渴食西瓜一片。卽惡心而吐。昨日大便利後。胸膈寬快。就進飯一碗。致腹飽悶。兀兀欲吐。所吐皆痰涎。乃以溫膽湯加減治之。半夏四錢。枳實一錢五分。竹茹二錢。橘紅、茯苓

各一錢。甘草五分。薑連八分。生薑五片。水煎服之。一飲而胸膈舒暢。便能就枕而睡。惡心頓無。痢亦尋止。

徐中宇之婦。汗出如雨。昏昏憤憤。兩手無所着落。胸要人足踹之。不少放。少放即昏憤益甚。氣促不能以息。稍近風則嘔惡暈厥。與九龍鎮心丹一丸服下。即稍定。少間則又發。始知胸喉中有物作梗而痛。湯水難入。即藥僅能吞一口。多則弗能嚥下。乃以蘇合香丸與之。暈厥尋止。心痛始萌。昨日六脈俱伏。今早六部俱見。惟左寸短瀯。知其痛為瘀血也。用玄胡索、桃仁、丹皮、丹參、青皮、當歸、香附。其夜仍暈厥一次。由其痛極而然。再與玄胡、丹皮、桃仁、丹參、香附、青皮、烏梅、人參、貝母、桂枝、赤芍藥。服此痛減大半。乃自云。心虛有熱頭眩。加山梔仁。居常多夢交之症。近更甚。以其心虛故也。人參、石斛、丹參、貝母、當歸、白芍藥、酸棗仁、酒連、香附。調理全安。

金文學達泉先生令政。暑月患痢赤白。一日夜三十餘度。後重腿急口渴。小腹痛。孕已二月。幸而腰不痛。右手脈弦。左脈滑。與白芍藥三錢。黃連、黃芩、當歸、陳皮、香附各一錢。桂皮、木香各五分之一。水煎服。外與香連丸。服下後重稍輕。因進飯太

早。其夜仍十數度。次早診之。右絃減半。前藥煎成。吞女金丹。一帖。痢減大半。六脈已和。但軟弱。此氣血不足。宜從補養。用八珍湯。加陳皮、香附、阿膠、條芩。一帖全安。凡孕婦痢疾。後重稍輕。腹痛稍減。獨痢不止。必須補養血氣為主。加調氣之劑爲佐。庶可保胎。斯亦丹溪虛同而痢自止之意也。

金元岩文學。下午發熱。痢下紅多白少。一日夜七十餘度。後重下墜。飲食不思。左脈細數。右脈滑。此陰虛之候。詢知二日前曾夢遺。續得痢疾。陰虛明矣。但滑脈主食積。法當先補後攻。乃與小建中湯一帖。白芍藥三錢。桂枝七分。粉草、酒連、酒芩各八分。當歸一錢。檳榔五分。水煎飲之。夜半復診。脈稍充指。改與枳殼三錢。桃仁一錢。當歸四錢。煎熟。吞木香檳榔丸一錢五分。至天明。大便瀉三次。則見糞矣。次日午進飯。又食火肉。隨即大便頻併。後重如前。與山查枳朮丸一服。不效。再爲診之。六部皆虛軟無力。獨右關滑。此進肉飯太早。脾弱不能消磨。宜健脾氣。兼爲升舉。人參、黃耆各二錢。白朮一錢。升麻三錢。防風、藿香、炮薑、粉草各五分。白芍藥一錢半。茯苓八分。連進二帖。痢減而後重寬。因食狗肉過多。復傷脾氣。前方加砂仁、山查。調理全愈。

金文學達泉先生。因食肝白腸內傷。續又冒風。就成瘧痢。日夜四十餘度。小腹痛甚。每登廁。汗出如雨。下迫後重。小水澀痛。頭疼口渴。下午發熱。天明始退。左脈浮弦而數。右軟弱。中部稍滑。此內傷飲食。外感風邪。瘧痢併作。法當速治。否則深秋陽氣潛藏。邪因陷下。未易瘳也。乃先與柴苓湯一劑。小便即清。不痛。瘧發時寒多熱少。晚與人參敗毒散加減。人參、乾葛、防風、桂枝、粉草、茯苓、枳殼各五分。柴胡、白芍藥各一錢。水煎飲之。次日頭痛痢疾俱減。夜纔起三次。改與補中益氣湯。加酒苓、桂枝、白芍藥。其夜瘧止。但微熱。再改胃風湯。人參、白朮、桂皮各二錢。白芍藥四錢。當歸一錢五分。茯苓、川芎各八分。酒苓、酒連各一錢。炮薑二分。地榆五分。服後寒熱殄迹。夜起一次。已是真糞。前方減去桂枝。再三劑而巾櫛出戶矣。

金寄閒先生。七月既望。患頭痛口渴。汗大洩不斂。嘔惡發寒熱。間日一發。而發於陽日。迺爲診之。兩寸洪大有力。左浮弦而數。右脈稍軟亦絃長。此少陽與陽明合併爲瘧。以柴葛解肌湯主之。柴胡、葛根各二錢。白芍藥、石膏各二錢。粉草、桂枝各五分。知母一錢。薑三片。水煎飲之。次早左脈稍退。迺與補陰驚血何首烏

丸截之。又與黃耆芍藥湯一帖。以防作痢。白芍藥、石膏、黃耆各三錢。桂枝五分。知母、粉草各一錢。柴胡七分。薑三片。煎服後。加人參七分。瘧竟全止而向安矣。淮陰胡少泉翁。麗水縣三尹也。令郎年弱冠。患夢遺。百治不應。體倦而氣弱。食少而汗多。四肢痠軟。頭眩肌熱。將成瘵疾。知余在理。刑吳比部衙中。敦余爲治。其脈兩寸短。左寸尤甚。餘部滑數。余曰。郎君之脈。心氣大弱。蓋心者神之舍。神者精之主。神旺始能固精。今遺不禁。由神弱不能固攝其精。致多妄洩。時近端陽。諸症叢集。迺兼注夏病也。法當養心安神。庶不成瘵。翁曰。然前此諸公。每爲滋陰降火。多不見功。徒見損脾減食。今先生主以養神。願以先生是聽。迺與人參、黃耆、石蓮子、酸棗仁、蓮花心、石菖蒲、遠志、當歸、補心安神、爲君。俾精固汗斂。經曰。汗者心之液。汗多則心血愈虛。故佐以甘草、白朮、黃精、麥門冬、五味子。兼治注夏。使飲食加而四肢壯。緩而圖之。可萬全矣。藥進甚妥。竟以此方調理。果精固神全。肌熱盡退。又令愛及筭。頭痛微熱。經水愆期。日多咳嗽。食漸減。肌漸消。口渴。睡臥不寧。喉中血腥。四肢不勞而疲。體不動而汗。六脈弦而且數。左關長出寸口。余以逍遙散。加石斛、丹參、牡丹皮、酸棗仁、山梔子、麥門冬。調理而瘳。又

一文學貧士也。忘其姓氏。與胡少泉翁爲碩交。有奇疾。兩足不痠不痛。每行動。絕不聽其所用。或扭於左而又墜於右。或扭於右而又墜於左。之玄而行。不能一步步正走。此亦目之稀覯。竟不識爲何疾。書無所考。予臆度之。由筋軟不能束骨所致。故行動則偏斜扭墜也。夫筋者肝之所主。肝屬木。木縱不收。宜益金以制之。用人參、黃耆、白芍藥以補肺金。薏苡仁、虎骨、龜板、杜仲以壯筋骨。以鐵華粉專制肝木。煉蜜爲丸。早晚服之。別後三載。族姪理問公敬亭南還。道出淮陰。胡少泉寄語云。向者鐵粉所愈之疾。淮人極以爲奇。遠邇敦錄其方。布傳以頌。自恨貧儒。弗能致一芹爲謝。旦暮額手南斗。以識不忘云。

一吳氏婦有隱疾。其夫訪於予。三造門而三不言。忸怩而去。後又至。未言而面先赧。予因詰之曰。諸來詣予者。皆謂余能爲人決疑療患也。今子來者四。必有疑於中。疑而不露一語。雖百來而疑終不可決。疾終不可去矣。且盈天地間。怪事甚多。非聖智所能盡識。然亦非聖智不能通療也。彼折肱錄、醫鑑、醫說等集。怪症蝟毛。假非明哲決而治之。何以擴後人之聞見也。其夫乃俛首徐應曰。言之無任主臣。先生長者。即言之。諒無哂。山婦子戶中突生一物。初長可三寸。今則

五寸許矣。狀如堅筋。色赤。大可拱把。脹而且痛。不便起止。憎寒壯熱。寢食俱減。羞澁于言。每求自盡。聞先生能爲人決疑療怪。不啻扁華。特相訪而祈一決。予曰。疾成幾年。對曰。將百日。予曰。蓋凡所謂怪者。耳目無所聞覩。書籍無所註載。今所言者。迺陰挺症也。書有所徵。奚足言怪。夫曰。陰挺何自而生。何法而治。幾何月日而可愈也。可無妨于生育否。予曰。子戶屬厥陰肝經。肝屬木。肝有溼熱。故生陰挺。猶木有溼熱而生蕈。然法當以龍膽瀉肝湯。及蝟皮散。當歸、黃芩、牡蠣、蝟皮、赤芍藥爲末。每用二錢。空心米飲調下。卽而治之。大計月餘。可消釋也。奚生育之有妨哉。其夫合手頂禮於地曰。願如藥王言。敢徼一料。隨按法措劑。畀之而去。甫三月。來報云。前疾果如所言。消釋無痕。茲爲汛期一月不至。敢問。予曰。此有身也。夫曰。疾纔愈。未必卽能受身。恐防他疾。予曰。前恙匪肝經有餘之疾。肝爲血海。書云。女人血盛則懷胎。據血盛行當先期。今汛踰期。實孕耳。匪病也。後果足月而產一子。

前坵一染匠之婦。腹痛兩月矣。或以爲寒。爲熱。爲氣。爲虛。爲食積。爲蟲。遞嘗試之。轉加。一醫與膏藥如斗大者一個。滿腹貼之。痛益劇。迺揭去。膏藥卽粘牢不可

起。火熨油調。百計不能脫分寸。如生在肉上相類。無可奈何。知予在吳鄉宦宅中。迺買舟就予診。及抵吳門。轎口匠乃偕迺母迺姑四人盡力扶挽。絕不能動。移一步。岸上環視如堵。莫不語匠曰。病勢若此。時刻難抵。固迺強其起而欲污吾轎口耶。匠迺止婦舟中。起而懇予爲治。至舟中。見其面色蒼黑。及伸手求診。皮膚燥若老松樹皮之狀。六脈皆洪數。問其腹中之痛何在。匠卽爲解衣露腹。指其痛所。始知膏藥粘牢之故。此甚希觀。叩其不能舉步之由。婦曰。非力弱不能行。迺左脚不可動。動卽痛應於心。是以一步不能舉也。予俛思若色若脈皆非死候。胡治而益劇也。此必腸癰。左脚莫能舉。是其徵也。與營衛返魂湯。加金銀花爲君。與四帖。酒水各一碗。煎服一帖。痛稍減。二帖下臭膿半桶。痛全減。腹上膏藥不須手揭。自脫而下。由熱去而膏脫也。四帖完。其婦同匠詣吳宅拜謝。予并求善後之方。吳宅見之。一族皆驚。

王祖泉大便裏急後重。腹痛。日夜下紫黑稠粘三四十度。市中凡有名者。雷同痢治。自秋歷冬。三越月不瘳。形色瘦瘁。匙筋厭舉。卽勉強僅一盞而止。眼闔懶開。悉以爲不治。棄去。訪予脈之。六部濡弱。觀其所下之色甚晦。如芋苗汁之狀。予

曰。觀此色非痢。迺臟毒下血症。醫說中人參、檮皮散。正此對腔劑也。卽製與之。其夜果減半。終劑全愈。方以人參、檮根、白皮各二兩爲末。每空心米飲調服二錢。忌肉、汁、生菜、魚腥。

癸巳秋仲。南都大司馬裏洪溪老先生。以兼署工部都察院。操江印。日衝暑往來各衙門。而經略其政事。致發熱燥渴。因解燥渴。而過食水浸瓜梨新藕。遂成洩瀉。小水短少。醫以胃苓湯加滑石、木通、車前子。利之而瀉止。大便又因之結燥。艱澁不堪。迺用潤腸丸。復瀉不止。又進以前通利之劑。瀉雖止而小水竟不得流通。直遂臍下脹急。立起解之。則點滴不出。臥則流之不竭。以頻取夜壺。致通宵不得寐也。治半月餘而精神削。寢食廢。聞予寓崔勳部衙。而徵予治。初見卽告以受病之源。又謂都城諸醫俱不識爲何症。將認爲癰。則立解時點滴不出。認爲秘。臥則涓涓而流。謂爲脾約。大便又不結燥。謂氣虛下陷。心血不足。而補中益氣湯與安神丸服過十晝夜無益。雅聞先生高手。願一診以決之。探其脈兩寸短弱。關緩大。兩尺洪大。語之曰。此餘暑未解。而司馬素善飲。溼熱流於下部也。今已下午。恐診之未準。俟明早細察而再定方。公曰。延頸吾子久矣。適所

言近似。願亟求一劑飲之。徹夜間一睡。余不得已。以益元散三錢。煎香薷湯之。略無進退。次早復診。六脈如昨。予思之而恍然悟。又語之曰。此症尿竅不對也。司馬曰。名出何書。予曰。內經云。膀胱者。脬之室也。脬中溼熱下墜。故立解而竅不對。小水因不得出。臥則脬不下墜。而尿滲出膀胱。亦以竅不對。小水雖涓涓而流。亦不能通達直遂。故了而不了也。治惟提補上中二焦元氣。兼清下焦溼熱。斯得矣。又有一法。今氣虛下陷已久。一兩劑未能取效。安得伏枕而睡。且此不寐。非心血不足之故。因着心防閑小便之了而不了。而不敢寐也。暫將舊衣或布襯於席上。不必防而任其流出。又免取夜器而勞動其神。自然熟睡矣。以補中益氣湯提補上中二焦之元氣。加黃柏。知母。祛下焦之溼熱。夫清陽升則濁陰自降。脬無溼熱。則不下墜。竅可對而病可瘳矣。司馬忻然請藥。夜如法觀之。果嗒然一睡。相忘其尿之出不出也。次早視襯布雖溼而不甚。以久不闔目。得此一睡。神氣頓回。胸臆爽快如未病者。調理四日而病全安。司馬大喜而欲留久住。緣漕運李公相延之亟。弗克也。差大馬舡鼓吹送予。阡關而還。

崔百原公者。河南人也。年餘四十矣。而爲南勳部郎。患右脇痛。右手足筋骨俱痛。

艱於舉動者三月。諸醫作偏風治之。不效。馳書邑大夫祝公。徵予治。予至。視其色蒼。其神固。性多躁急。診其脈左弦數。右滑數。時當仲秋。予曰。此溼痰風熱爲痺也。脈之滑爲痰。弦爲風。數爲熱。蓋溼生痰。痰生熱。熱壅經絡。傷其營衛。變爲風也。公曰。君何以治。予曰。痰在經絡。雖不害事。然非假歲月不能愈也。隨與二陳湯。加鈎藤、蒼耳子、薏苡仁、紅花、五加皮、秦艽、威靈仙、黃芩、竹瀝、薑汁飲之。數日。手足之痛稍減。而脇痛如舊。再加鬱金、川芎、白芥子。痛俱稍安。予以赴漕運。李公召而行。速勸公請假。緩治。因囑其慎怒。內觀。以需藥力。公曰。內觀何爲。主予曰。正心。公曰。儒以正心爲修身先務。每苦工夫無下手處。予曰。正之爲義。一止而已。止於一則靜定。而妄念不生。宋儒所謂主靜。又曰。看喜怒哀樂未發以前。作何氣象。釋氏之止觀。老子之了得一。萬事畢。皆此義也。孟子所謂有事。勿正。勿忘。勿助長。是其工夫節度也。公曰。吾知止矣。遂上疏請告。予錄前方。畀之北歸。如法調養。半年而病根盡除。

孫文垣醫案 卷二 三吳治驗

五六

孫文垣醫案

明新安孫一奎文垣甫輯

鄞縣曹赤電炳章圈點

卷三

新都治驗

瓊兄內傷飲食。外感風邪。洒淅惡寒發熱。煩躁不寧。已經表汗瀉吐之後。小水短赤。口渴腹中疼。夜不能睡。耳聾氣塞。神魂不安。懊懣不已。予脈之。兩寸滑大。左關弦。右關滑。兩尺皆弦。皆七至。據此。迺少陽陽明兩經合病。仲景云。渴而小便不利者。當利其小便。先與柴苓湯加竹茹進之。耳稍聰。稍得睡。熱仍不退。聞食氣即嘔。以濟生竹茹湯加人參、麥冬、黃連。外與辰砂六一散三錢。服後神稍清。手足心仍熱。用竹葉石膏湯。而熱亦不退。且懊懣殊甚。合目即譫語。按仲景謂傷寒汗吐下後。懊懣不得眠者。熱在心胸之間。宜輕湧之。以梔子豆豉湯主之。

服後晚間仍不得眠。兩耳氣塞難當。改以小柴胡湯。合白虎湯進之。即得睡。睡中汗出二次。耳頓通利。因進食早。及發熱口渴。舌上黃胎。此陽明餘熱復萌。乃用石膏七錢。甘草一錢。知母三錢。黃連一錢五分。百合、竹茹各一錢。竹葉三十片。急進而熱全退。始得獲安。

程龍坵翁每行動即作熱。發渴嘔惡。腰與環跳常痛。脈左沉細。右寸滑。關尺濡弱。此上焦有痰火。下焦有濕熱。治當流濕舒筋。然後施補。先用苡仁三錢。蒼朮、藏靈仙、牛膝、黃柏、烏藥、紫荊皮各一錢。紅花、桂皮、防己各五分水煎服。外以鹿茸、虎骨、晚蠶沙、仙茅、黃柏、龜板、蒼朮、牛膝、杜仲、蜜丸服之而安。

汪松崗翁原傷於酒。夜分有熱。咳嗽咯血。不思飲食。左脇氣不調。左寸脈芤。關澁。尺弱。右寸短。關滑。此胃中痰火正旺。氣血俱虛。宜先清胃保肺。然後大補。麥冬、知母、寒水石、甘草、紫苑、人參、牡丹皮、白芍藥、當歸、貝母、桑白皮煎服一帖。紅仍未止。加側柏葉、茅根四帖而紅止。過後四月。又為怒氣所傷。血又動。左不能睡。桃仁、滑石、紅花、當歸、人參、貝母、山梔仁、甘草、香附、青皮、牡丹皮煎服而安。予囑渠令子曰。寄語令堂。諸凡得意事。可與尊翁知之。如不得意者。切不可使之聞。

也。蓋肝爲藏血之所。況血去多。肝火剛燥。心主不足。內經云。主不明則十二官危。不可不謹防之。且左不得眠。肝脹可知。予甚爲尊翁慮。後三年果爲怒復。乃命使迎予。予固辭謝曰。向曾叮囑。今病之來。非不佞所堪任也。不逾旬而歿。族妹經不行者八十日。每飲食入腹。卽疼痛。必盡吐出乃止。居常亦吐酸水。上焦熱。下焦寒。大便半月始一行。食飲不進者四十日。六脈皆數。左滑。右軟弱。妹能事者。以其夫多病。且不諳世故。由是悒悒。病從思慮而得。恐成膈症。今大便燥結。吐酸。乃膈之徵。急宜拂慮。庶藥有功。先與丁靈丸一粒而吐止。繼用溫膽湯。加大腹皮。薑連。痛吐全安。故以二陳湯加香附。條芩。山梔仁。丹參。砂仁。調理兩月。經行。大便始潤。而膈症斯不作矣。

孫華野脈沉弦而數。喉痛。頰車腫。兩太陽作脹疼。遍身皆脹痛。憎寒發熱。乃痰火上壅。而變風熱。將欲作毒也。宜急治之。薄荷。甘草。升麻。白芷。石膏。枳殼。天花粉。桔梗。大力子。連翹。玄參。一帖而愈。

顯兄每辛苦及酒多。則咯血數口。脈兩寸皆短弱。關尺洪數。此胃中有痰火。而下焦有陰火。由壯年酒色所傷故耳。以丹參。滑石各三錢。白芍藥二錢。麥冬。貝母。

桃仁、紫苑、牡丹皮各一錢。當歸七分。甘草五分。煎服而安。

歙邑吳遂兄木商也。在吳興年七十。因冒雨勞力汗出。又以冷水澡浴。因而發熱。口渴。心與背互相脹疼。小水長而赤。舌上黃胎。夜不得臥。眼目如金。皮膚盡黃。吳興之醫見之。遽走。不敢措劑。謂其年高不宜此病。讚勸回家。乃敦訪予治。診得左脈浮數。右濡弱。兩手皆有六至。予曰。此濕熱發黃症也。病雖重。年雖高。有是症。當有是藥。毋用倉皇。乃以柴胡三錢。酒芩、葛根、青蒿、香薷、天花粉各一錢。人參七分。粉草五分。連進二帖。晚得微汗。即能睡。次早熱退其半。舌胎稍淡潤。不焦燥矣。胸膈餘熱作煩。身黃如舊。以竹茹、青蒿、葛根各一錢。人參、麥門冬、天花粉、知母各八分。白芍藥六分。二帖熱退食進。精神陡長。後與補中益氣湯。加青蒿、麥門冬、天花粉。十帖而眼目肌膚之黃盡釋然矣。吳興諸公悉服其精當。各錄方而傳。

族姪文學明之。以作文過勞。痰火上逆。大吐痰沫。因而嘔血。一涌數碗。昏暈汗出。奄奄而臥。略不敢動。稍動即嘔吐而血隨出。色鮮紅。飲食湯水皆不敢入。入即吐而眩暈。血即隨之。里有婺君程聞野氏爲之診。駭而走曰。血如涌泉。體熱脈

大眩運而藥食難入。似無佳兆。乃速予治。予診視畢。語其乃兄勉之曰。可生也。何舉家張皇若此。勉之以程言告余。余曰。看症要圓活。勿拘泥。據經云。心主血。肝藏血。又曰。怒則氣上。又曰。脈虛身熱。得之傷暑。今左脈弦大。右脈虛大。明之不獨作文勞心動火。且亦被怒傷肝。抑又爲暑所逼。以致木火上升。眩運作吐。經曰。諸風掉眩。皆屬肝木。諸嘔吐逆。皆屬於火。又諸動屬火。內爲木火上升。衝外爲暑氣所迫。故吐而汗多。血隨吐出也。醫貴識病。有是病則有是藥。予特以白丸子三錢。解其暑氣。清其痰飲。抑其衝逆。則吐可止。吐止氣平。則血自能歸經。服後果嗒然而睡。醒則吐止食進。眩暈尋已。繼用滑石、香薷各三錢。甘草五分。黃連、白扁豆各一錢五分。竹茹一錢。四帖全安。

從嫂程氏。年近五十。患咳嗽吐衄。膿血。一日夜一碗餘。發熱晝輕夜重。肌肉大瘦。六脈浮而洪滑且數。人皆謂嘔血身熱。脈大。法在不治。予曰。此非嘔血比也。此係釀酒傷肺。又爲怒氣所觸。瘀血濁痰。滯於肺之氣竅。無從而出。久之化而爲膿。成肺癰也。治宜開肺竅。活血化痰。使膿盡當自愈也。諸人治之二年不效。予教以白芍、薏苡仁各三錢。牡丹皮、桔梗、茜根、歸尾、山梔子、貝母、白芍藥各一錢。

甘草、葶藶子各五分。三十帖全愈。後壽七十三。以他病而終。此疾再不復發。
族姪媳葉氏。年三十。身面四肢浮腫。漸而入腹。腹大不可言。眼泡腫而無縫。飲食大減。小水不利。此滯氣水脹也。以大腹皮、茯苓皮、薑黃、蒼朮、厚朴、澤瀉、木香、烏藥、陳皮。服三劑而眼目能開。飲食稍進。即爲食傷而復腫。予改用七傷丸調理全安。

族姪孫伍仲立年。善飲好內。小便血淋疼痛。予以滑石、甘草梢、海金沙、琥珀、山梔子、青蒿、茅草根。煎膏爲丸。梧桐子大。每空心及食前燈心湯送下三錢。不終劑而愈。後五年。因子遲服補下元藥過多。血淋又發。小便中痛極。立而不能解。必蹲下如婦女小解樣。始能解出。皆大血塊。每行一二碗餘。如是者半月。諸通利清熱之劑。靡不遍嘗不應。脈俱洪數。予以五靈脂、蒲黃、甘草梢各二錢。小蓟龍牙草各三錢。水煎空心服。二帖而痛減半。血仍舊。改用蘆麥、山梔子、甘草各二錢。茅根、杜牛膝、連葉車前草各三錢。生地黃、柴胡、黃柏、木通各一錢。四帖痛全減。血全止。惟小便了而不了。六脈亦和緩不似前矣。後以人參、葛根、青蒿、白朮、茯苓、甘草、白芍藥、升麻、黃柏、知母。調理萬全。

令眷辰州太守石峰公女也。吐紅發熱。經水二十日一行。或一月行二次。白帶且多。胸膈飽脹。脈洪數。以丹參、生地、山梔子、白芍藥、小薊、鹿角膠水煎。臨服加入童便一盃。酒二十劑而瘳。

亮卿令媛。右目紅腫。如腹中飽。眼乃能開。飢則眼不能開。此疳積虛寒症也。以夏枯草二錢、甘草、穀精草各一錢、香附一錢五分煎服四帖而安。

姪孫少竹。太學生也。眼紅腫脹。余雲谷以苦寒治時疾之劑與之。眼愈腫。且增兩太陽痛。前藥中再加石膏。不惟眼腫不消。頭痛不止。且令遍身脹悶。寢食俱廢。予爲脈之。弦大而無力。乃用蔓荊子、桑白皮、柴胡、香附、夏枯草、甘草、芽茶一帖而痛定。兩帖腫消。四帖全瘳。

一僕婦產後惡露不盡。腹中作痛。且冒風咳嗽。嘔吐頭暈。脚麻木不知痛痒。亦不能轉側。與糖毬子、紫蘇、旋覆花、烏藥、五靈脂、茯苓、川芎、當歸、澤蘭葉、玄胡索加沙糖煎服而痛止。再進惡露行。咳嗽嘔吐皆愈。

上舍程好吾公令孫。右耳後生一毒腫痛。遍身生大泡瘡。憎寒發熱。與金銀花、當歸尾、甘草、赤芍、連翹、僵蠶、大力子、玄參兩劑而消。

華岳令堂年五十餘。向來小水短少。今則右背鹽匙骨邊一點痛。夜尤痛。已經半月。醫治不效。展轉加劇。即於右邊手臂肢節皆脹痛。筋皆暴起。肌肉上生紅點。子脈兩手皆滑數。右尺軟弱。乃濕熱傷筋而成痛痺。以東垣舒經湯為主。羌活、升麻、桃仁、麻黃、紅花、當歸、防風、甘草、獨活、猪苓、黃柏、防己、知母、黃連。兩帖痛減。腫消。再亦不發。

由溪程兩峰丈內人。患血痢。裏急後重。嘔吐不納穀。兩寸脈洪大。以竹茹溫膽湯。加薑連、滑石、橘紅、酒芩。水煎服二帖。大便結實。膿血皆止。惟後重與枳殼、當歸、芍藥、生地、桃仁、條芩、甘草、滑石、酒連。四帖全安。

由溪程七護兄。臍腹右邊疼痛。小水短少。大便四日未行。嘔吐不能進食。舌上白胎。面青手冷。勢甚危急。脈之左沉伏。右滑大有力。予曰。此痰格中焦。氣閉下焦。故大小便秘而不利。氣逆嘔吐也。不急治。即無救矣。與柏樹東行根皮二錢。滑石三錢。桃仁、青皮、枳實、檳榔各一錢。水煎服之。夜半吐出膠痰碗餘。大便未行。痛亦不減。次日改用玄胡索五錢。水煎。臨服調下玄明粉三錢。辰刻服下。午刻痛減大半。未刻大便始行。右脈平而左脈起矣。覺體倦無力。以生脈散加甘草。

山梔仁、黃柏、芍藥、苡仁、陳皮。調理如故。

由溪程社貴兄。先醉酒。後御色。次早四肢冷。胃脘痛極。脈僅四至。先醫以鬱火爲治。投以寒涼。痛更增極。三日前所食西瓜。仍吐出不化。乃翁以爲陰症傷寒。欲用附子理中湯不決。逆予治之。予觀其面色青慘。叫痛而聲不揚。坐臥煩亂。予曰。此霍亂兼虺厥症也。先當止痛安虺。後理霍亂。可免死也。遲則誤事矣。急用五靈脂醋炒三錢。蒼朮一錢五分。烏梅三枚。川椒炮薑桂心各五分水煎飲下。痛減大半。下午以大腹皮、藿香、半夏、陳皮、山查、五靈脂、茯苓兩帖全安。

汪松崗令眷。左脇疼。咳嗽內熱。每嗽則脇下弔痛。寢食大減。與青皮、香附、甘草、芍藥、訶子、山梔子、貝母、茯苓、柴胡、桃仁、滑石、人參水煎飲之。熱除痛減。

文學贊皇令堂。產後左脇痛甚。咳嗽痰不易出。內熱氣壅。不能伏枕。予以瓜蒌仁六錢。桑白皮、紫蘇子、杏仁、半夏、桔梗、枳殼各一錢。水煎服之。而氣壅定。嗽漸減。除外與保和丸。及七製化痰丸而安。

許少峰胃中有痰。肝膽經有鬱火。心血不足。面色黑而枯燥。肢節疼痛健忘。精神恍惚內熱。將有中風之兆。左寸細數。關弦數。右關重按滑。兩尺弱。治宜清肝膽。

之鬱火。而養心神。消胃中之痰涎。而生氣血。使神帥氣。氣帥血。氣血周流。經絡無壅。則諸疾不期愈而自愈矣。何中風之有哉。用石菖蒲、黃連、白茯苓、半夏、酸棗仁、天麻、橘紅各一兩。牛膽、南星二兩。白殭蠶、青黛、木香各五錢。柴胡七錢五分。竹瀝生薑汁打神麵糊爲丸。菴豆大。每食後及夜茶湯任下二錢。一日三次服完。神氣大健。肢節皆舒。面色開而手足輕健。種種皆瘳。少峰曰。吾生平服藥少效。不期此方之神若是。不惟自服有功。卽諸親友有痰火者服之。莫不響應。

朱宅女眷。經水行一月不止。每黃昏先寒後熱。遍身疼痛。胸前脹悶不通。必欲大喊叫嘶。用手於喉中幹而吐出痰涎乃寬。今且渴甚。此痰飲癰疾。今飲食不進。夜如見鬼者。乃熱入血室也。用小柴胡湯加生地黃、丹皮、陳皮、桃仁兩帖後。以白朮三錢。何首烏二錢。陳皮、麥芽各一錢。烏梅一枚。生薑三片。水煎服之。而寒熱止。諸症皆安。

孫熙宇肢節腫痛。痰多嘔惡。胸中氣不暢達。語言亦不清利。夜夢皆亡人野鬼追陪。情神慘惡。驚恐不安。且汗多不止。飲食減三之二。遠近名家醫治。逾月不應。

敦予爲治。診其脈左手甚弱。汗多故也。右手滑大。痰飲溼熱而然。法當補斂。前醫皆作風治。而用疎散洩其元神。將成柔痿。予以人參、麥門冬、五味子、白芍藥、當歸、苡仁、陳皮、石斛、木瓜、甘草、白朮、桂枝。服此汗大斂。而神思稍清。吐亦止矣。惟飲食不思。夜夢與亡人同遊爲惡耳。改用人參、黃耆、枸杞子、苡仁、白朮各一錢五分。當歸、遠志、茯苓、木瓜、陳皮各一錢。甘草五分。水二鍾。入雄豬心血一枚。煎作八分。飲之。四帖乃能睡。始夢生人。不復夢亡人矣。

愛泉上年十月。因傷風咳嗽。卽時聲啞。繼聞父喪。過憂。右邊不能貼席而睡。醫以滋陰降火之劑治之。半年肌肉大削。大便溏瀉。飲食減少。咳嗽聲啞有加。喉且疼痛。迎余爲治。診得六脈俱弦數。此憂傷肺。思傷脾症也。危急甚矣。以白朮、茯苓、陳皮、粉草、苡仁、桔梗、柴胡、桑白皮、酒炒白芍藥、澤瀉、麥芽、山查煎服。一日再以荊芥、桔梗、玄參、甘草、茯苓、白芍、酒連、扁豆、山藥、山查、木通。服此而右邊可睡矣。改用參苓白朮散。加白芍藥、烏梅、訶子、酒連、山查。調理而愈。

姪婦戴氏。有孕已五月矣。忽血大下。午後發戰。六脈俱數。左寸滑大。右關搏指。左關軟弱。予以白芍藥二錢。生地、阿膠、人參、蒲黃各一錢。柴胡、香附、地榆、荊芥穗。

各七分。甘草五分。煎服。午後發寒熱。每夜凡三次。頭痛惡心。腹中塊硬。所下血塊甚多。心下怯力。此虛無疑也。以補中益氣湯。加阿膠、炮薑、白芍藥、烏梅煎服。下午右眼白珠發一白泡。光腫下垂。而面赤腫。此虛火遊行無制之症。其夜大發寒熱。指爪皆黑。唇白。汗大出。腹中作痛牽引。兩乳皆痛。仍以補中益氣湯。加阿膠、白芍藥、桂枝、五味子、麥冬。服後熱退汗止。渴除。神氣稍定。乃有生意。次日咳嗽而胎墮。即以獨參湯繼服。其夜腸鳴瀉二次。以人參、白朮各三錢。炙甘草一錢五分。炮薑一錢。桂心、茯苓各五分。陳皮七分。蓮子、大棗煎服。後因咳嗽。以四君子加炮薑、五味子、紫苑調理而愈。

靈岳乃眷。胃脘疼痛。手心熱。頭暈舌麻。兩太陽痛。背心亦脹。內熱而外惡寒。必厚被蓋覆。得微汗迺解。二陳湯加桔梗、杏仁、桑白皮、枳殼、青皮、白芥子、蘿蔔子、酒芩煎服兩帖。舌竟不麻。晚因食雞過多。膈上氣滯。二陳湯加蘿蔔子、枳實、山查、川芎、香附、酒連調理全愈。

歙溪南吳人峰先生內人。兩脇脹急。抵於胃脘作痛。痛一陣。則汗出一番。兩顴紅。脣口亦紅。飲食湯水。飲之立吐不受者。三日夜矣。予爲診之。兩寸脈洪大。兩尺

沉微。予以井水半碗。白滾湯半碗和之。名曰陰陽湯。用此調玄明粉一錢五分。服之不惟不吐。痛減半矣。少頃。大便秘行二次。因食豆腐及粥太早。而痛復萌。脣臉皆紅。此必有蟲。故如是也。與白芍藥、桂枝、粉草、烏梅、花椒、五靈脂、杏仁水煎。痛乃定。其大半再與蒼朮、厚朴、山查、枳實、茯苓、玄胡索、香附一帖全止。但心背皮膚外疼。不能着蓆而睡。以川芎、當歸、白朮、厚朴、大腹皮、粉草、茯苓、香附、陳皮、半夏調養全愈。

陳鐵兄內人產後腹痛發熱。下痢膿血。裏急後重。川芎一錢。當歸三錢。茯苓、乾薑、肉桂、山查、陳皮、酒炒白芍藥、白朮各一錢。粉草五分。一帖而腹痛止。痢輕。後重亦除。惟發寒熱多汗。改用人參、白芍藥、桂枝、粉草、川芎、當歸、白朮、茯苓、香附、陳皮、山查再劑而諸症如釋。

程石洲乃眷。因產難子死憂悶。小腹有塊作痛。下午發熱。不思飲食。次早診之。脈右大於左者三倍。且數。與芎歸湯加糖毬子、澤蘭葉、肉桂。次日下午。腰腹脹痛。詰之。晌午食圓眼一斤矣。從此小腹漸脹。大便三日未行。早晨鼻衄。夜間極熱。口渴。脈大無緒。勢甚危急。用川芎、當歸、紅花、桃仁、青皮、檳榔、莪朮、山查水煎調。

玄明粉二錢。服後大便稍行結糞二枚。安而就寢。醒後進粥稍多。又復脹痛。腹大如斗。堅如石。氣促不安。勢危至此。亦已極矣。迺與五靈脂、糖毬子各四錢。凌霄花二錢。赤芍藥一錢。服後大便通。腹軟氣定。始可進粥。漸有生氣。但脈仍鼓指。此腹中積滯尙多。不可不因其時而驅去也。用糖毬子、大黃各三錢。桃仁二錢。桂心、紅花各五分。炙甘草七分。水煎。臨服調玄明粉一錢五分。其夜下黑糞四次。熱始退。上腹雖消。臍下仍大。仍以桃仁承氣加山查、滑石、紅花煎飲之。五更大便行。臍腹脹又漸減。後與積塊丸調理全消。是役也。女流只知女科專門爲仗。故前發熱腹痛之時。彼專門不察虛實。卽以常套十全大補湯投之。詎知圓眼肉初入腹之時。不覺少頃漸漸脹開。故腹亦因之而脹也。且其味甘。尤能作滯。復加地黃、麥朮。寧不塞其塞哉。由是而成大滿大堅之症。內經謂中滿者瀉之於內。良以此夫。彼亦泥乎丹溪產後須當大補氣血之誤也。

程宅一老嫗。年八十餘。常頭暈脚軟。撐載上身不起。行須人扶。否則眩暈跌仆。大便澹洩。小水淋瀝。此下元虛憊所致。以人參、黃耆、白朮、薏苡仁各二錢。山茱萸、杜仲、茯苓各一錢。陳皮、山藥、粉草各八分。八帖而愈。

文學程道吾先生令眷。夜爲夢魘所驚。時常暈厥。精神恍惚。一日三五發。咳嗽。面色青。不思穀食。日惟啖牛肉脯數塊而已。時師屢治無功。吳渤海視爲寒痰作厥。投以附子、肉桂。而厥尤加。逆予爲治。診左脈弦。右脈滑。兩寸稍短。道吾先令眷二。皆卒於療。知其爲傳屍療症也。不易治之。迺權以壯神補養之劑。消息調理。俟飲食進。胃氣轉。始可用正治之法。姑用人參、茯苓、柏子仁、石菖蒲、遠志、丹參、當歸、石斛。以補養神氣。以陳皮、貝母、甘草、紫苑。化痰治嗽。服半月而無進退。迺爲製太上渾元丹。藥用紫河車一具、辰砂、鱉甲、犀角各一兩、鹿角膠、紫石英、石斛各八錢、沉香、乳香、安息香、茯苓、紫苑、牛膝、人參各五錢、麝香五分、煉蜜爲丸。赤豆大。每早晚鹽湯或酒送下三十六丸。又製霹靂出獵丹。藥用牛黃、狗寶、阿魏、安息各一錢、虎頭骨五錢、啄木鳥一隻、獾爪一枚、敗鼓心、破皮三錢、麝香五分、天靈蓋一箇、煉蜜爲丸。雄黃三錢爲衣。每五更空心葱白湯送下五分。三五日服一次。與太上渾元丹相兼服。纔服半月。精神頓異。不似前時恍惚矣。但小腹左邊一點疼。前煎藥中加白芍藥一錢。服之一月。精神大好。暈厥再不發矣。次年生一女。其宅療疾從此再亦不傳。

一僕婦年三十。患瘟疫一月餘矣。非勞復即食復。今則發熱咳嗽。胸脇疼。耳聾口渴。大便七八日不行。不知人事。迺與柴胡、石膏各三錢。瓜蒌、桔梗、枳殼各一錢五分。黃芩、前胡各一錢。天花粉八分。甘草五分。黃連八分。急煎服之。人事稍知。因大便不行。次日以大柴胡湯下之。又次日大便雖行。熱仍不退。改以柴胡二錢。白芍藥、黃芩、麥門冬各一錢。天花粉、茯苓、甘草各六分。四帖而愈。

參軍程方塘翁。年六十四。向以殭胤服溫補下元藥太多。冬月下身著單袴。立溪邊督工受寒。致筋骨疼痛。肩井缺盆脚膝跟踝手肘掌後及骨節動處皆紅腫而痛。臥床褥三年。吳中溪視爲虛而用虎潛丸。吳渤海視爲寒而用大附子。肉桂、鹿茸。徐東臯認爲濕。周皜認爲血虛。張甲認爲風。李乙認爲歷節。百治不瘳。腿間大肉盡消。惟各骨節處腫大而疼。予適在程道吾宅。迺逆予診之。其脈弦濇有力。知其爲溼熱痰火。被寒氣凝滯固濇經絡也。節爲藥劑不對。故病日加。所取者。目中精神尙在。胃氣仍未全損。但小水解下以瓦盆盛之。少頃則澄結爲砂。色紅而濁。兩膝下及脚指皆生大瘡。瘡靨如靴釘狀。此皆平昔服溫補春方所致。病雖久。年雖高。猶爲有餘之疾。不可因高年疾痼棄不治也。迺特爲先

驅逐經絡中凝滯然後健脾消痰俾新痰不生。氣血日長。最後以補劑收功。斯得矣。翁生平好補畏攻。故進門者皆務迎合。予獨反之。以新取藏。靈仙一斤。裝新竹筒中。入燒酒二斤。塞筒口。刮去筒外青皮。重湯煮三炷。官香爲度。取出藏靈仙。晒乾爲末。用竹瀝打糊爲丸。梧桐子大。每早晚酒送下一錢。一日服二次。五日後。大便瀉出稠粘痰積半桶。腫痛消去大半。改以人參、石斛、蒼朮、黃柏、苡仁、蒼耳子、牛膝、烏藥、龜板、紅花、犀角屑、木通煎服二十帖。又用前末藥服三日。又下痰積如前之半。仍以前煎藥服半月。又將末藥服三日。腹中痰漸少。乃爲製丸藥。以虎骨、晚蠶沙、蒼朮、黃柏、丹參、杜牛膝、莖葉、苡仁、紅花、五加皮、蒼耳子、龜板。酒打麵糊爲丸。梧桐子大。每空心白湯送下七八十丸。外以丹溪保和丸。食後服半年全愈。腿肉復完。步履如故。

汪省吾暮秋患瘧。三日一次。發於夜。迨次年仲春。猶不能止。遍身疼。頭疼背脊疼。百治不應。卽灸亦僅止得一日。次日仍發。面色青。肌肉瘦。以症參之。邪在足太陽經。用麻黃一錢五分。人參、桂枝、白芍藥、粉草、知母各一錢。陳皮、貝母各七分。薑棗煎服。諸疼減半。而瘧未止。以何首烏、白朮各五錢。青蒿一錢。烏梅一箇。陳

皮二錢。生薑三大片。水煎。臨發日五更服。尋常以六君子湯。加黃耆、柴胡、五味子、烏梅、草果。調理而愈。

汪東之丈。七月初旬自浙歸。連日與客手譚過勞。口中生瘡。醫以香薷飲、清胃湯、瀉黃湯、三黃丸、黃連解毒湯、白虎湯、涼膈散。凡治上焦熱症之劑。竭寒涼而進之者。十一日矣。口瘡日甚。一日不但飲食不進。即藥亦難下咽。因瘡延及於喉也。逆予爲診。其脈六部俱豁大無力。診罷。有外科陳氏者。自稱喉舌專門。銜其口疳。敷藥之妙。予曰。汝試爲口中一洗。看是何狀。纔開口。見涎沫迷漫。不能得見肉色。陳以荊芥湯洗而引之。攪出稠涎一二碗餘。傾於地上。偶有二雞爭啄之。二雞立斃。其毒何如此。亦疾之奇者。予囑陳曰。汝用藥只可吹入喉中。切不可敷其舌。必候喉中全好。然後敷舌。特舌好。再敷口脣。甚毋得概敷。恐毒無出路。反攻入喉。極爲誤事。陳曰諾。予對乃翁曰。令郎之疾。迺虛陽口瘡也。翁曰。當用何劑。予曰。附子理中湯。煎熟待冷。飲之可救。如他藥不能立功。翁曰。瘡乃熱症。况上身已熱。又天時酷暑。大熱之劑。其敢進乎。予曰。此陰盛格陽之症。初未嘗如此。因服寒涼過劑。激之使然爾。翁不看其兩足膝下皆冷乎。翁用手探足

下果冷。乃欣然聽用人參、白朮各三錢。大附子、炮薑、炙甘草各一錢。水煎冷與之。服後卽鼾睡。達旦。次早便能食粥半盞。足膝下漸暖。藥仍如前。早飯後。予與二三友散步山溪。午刻歸來。乃見舉家大慟於地。見予至。哭語予曰。不可爲矣。本是熱病。誤服熱藥。今舌腫大塞滿口中。不能言語。死在頃刻。奈何奈何。予駭然。應曰。安時有是不祥語也。今晨診脈與昨不二。適往返不過二時許。何倏爾有此大變乎。待予再診決之。及診六脈漸斂。較昨大有神氣。面色亦和。獨舌脹大。予心知爲陳寒涼敷藥所致也。迺詰陳曰。我別後可用敷藥否。陳點首曰。已二次矣。予撫翁及諸人曰。無慟。立看予爲翁消之。急取官桂研末五錢。用生薑自然汁調塗舌上。纔塗上。但見眼淚雙流。鼻中涕出口。出涎垂。舌頓消去。語近侍曰。我無事矣。諸環侍者男婦不下二十。皆面面相覷。以爲神奇。予曰。可卽取粥與食。使壓之。庶虛火不再升。適舌脹滿者。乃敷藥寒涼。閉其毒氣。毒無從出。故作脹耳。桂皮乃辛熱之物。又以薑汁調塗。取辛散之義也。諸人皆服其論。東之丈令眷。妊已六月。爲傷風咳嗽。腹中弔疼痰壅。喉音不清。頭且眩暈。脈左滑數。右寸弱。關滑。左尺有力。右尺弱。予以人參、白朮、陳皮、貝母、茯苓、桔梗、桑白皮、

紫蘇、粉草、黃芩、前胡四帖而病全愈。

吳東渠年五十又七。因上年患瘧。胸痞作脹。肌肉大削。因連服攻剋太重。脾胃敗壞。膝及跟踝皆浮腫。遍身發熱。口渴。小水短赤。舌上黃胎。舌心焦煤乾燥。誤服寒涼。大便連瀉五六次。目不能開。手足無力。倦於言語。予診之。六部俱浮大。按之豁然空虛。飲食不進。此中氣大虛。元神俱脫。可畏之甚。卽以人參、白朮、茯苓、粉草、木香、葛根、酒炒白芍藥水煎服之。連進二帖。始能開目。漸出聲言語。後以六君子湯去半夏。加葛根、白扁豆、山藥、藿香、苡仁、白芍藥、石斛調理而愈。

吳西源令眷。因未有子。多鬱多思。肌肉漸瘦。皮膚燥揭。遍身生瘡。體如火燎。胸膈脹痛。而應於背。咳嗽不住口。醫治十越月。僉以爲瘵疾不可治。知予在程方塘宅中。迺迂予治。診得右寸關俱滑。大有力。左弦數。予以瓜蒌仁四錢、蘿蔔子、貝母、枳殼、調氣化痰開鬱爲君。桑白皮、葶藶子、黃芩、瀉肺火爲臣。甘草、前胡爲使。三十帖全愈。仍以千金化痰丸調理。向來年年至冬月則咳嗽痰喘不能睡。自此後遇冬月。痰再不復發。

族嫂程氏。環跳穴邊腫痛。憎寒發熱。不能動止。寢食俱廢。頭重惡心。上身熱。下身

冷。天明乃退。口乾。舌上白胎甚厚。以柴胡、防風、桂枝解其寒熱。以蒼朮、黃柏、五加皮、桃仁、赤芍藥治其痛。木通利其濕熱。且引火下行。甘草調和諸藥。使各得職。一帖而痛止大半。再進寒熱除。三帖痛全減去。改以小柴胡湯加牡丹、枳殼、桔梗。二帖而舌胎脫然。

上舍恆宇先生原因生楊梅瘡後。偶遭一跌。環跳脫出不能復入。窠臼。疼痛殊甚。兩足因長短不齊。予思不能復入。窠臼者。以瘀血流入窠臼。占滿故竅。致骨不得復入也。今但消去瘀血。必以行氣活血之劑為主。以下行嚮導之劑佐之。庶可復原。用陳年窖中磚瓦。洗淨煨過四兩。生地、杜牛膝、骨碎補、丹參、赤芍各一兩五錢。自然銅三兩。蒲黃、車前子、蘇木各一兩。鹿角二兩。玄明粉五錢。各爲末。以茅草根一斤。紅花四兩。煎膏拌晒前藥。再以煉蜜爲丸。梧桐子大。每空心及食前酒送下八九十丸。未服此藥之先。病足長二寸餘。服此丸藥後。只差半寸。設再製久服。必能萬全。惜渠素畏藥。中道而止。故功虧一簣也。豈勝嘆哉。

族姪孫女一週歲時。發慢驚。眼開手拳。目不動移。脚指微動。先自顙門後遍身如火。喉中痰聲。口中痰沫。腹脹放屁。大便亦行。先以牛黃丸、蘇合香丸進之不效。

及各治驚治痰等藥。與之皆不受。即從痰沫流出。用通關散吹入鼻中。亦不作嚏。自申時至戌時。猶不能醒。面色素青而白。氣稟甚弱。因婢者抱而偶失跌。受驚發熱。此驚氣乘虛而入。在法已無生路。但不忍坐視。姑以人參三錢。生薑自然汁拌炒。煎湯。頻頻用匙挑入口中。初二三四匙皆不受。後又與五六匙。偶能入一二匙下喉。便覺痰聲稍緩。因此頻頻與之。十匙之中。有二三匙入腹矣。喉中氣轉。目便能動。始有生意。再以六君子湯。加天麻、石菖蒲、殭蠶、澤瀉、薄荷煎服。至雞鳴時。乃略啼一二聲。方識吮乳。次日咳嗽。語聲不出。小水短少。以辰砂益元散一錢。用燈心湯調下。熱退聲出。惟嗽不盡止。改以四君子湯。加陳皮、五味子、麥門冬、桑白皮、桔梗、杏仁、薄荷。一帖全愈。

程少湖因飲生酒食硬乾豆腐。以致次日面上浮腫。胸中作脹。今經半年。腹中腸鳴。四肢浮腫。兩腿及陰囊皆腫。口乾。大小便俱不利。年四十六矣。夜臥氣喘。膝下冷。先以人參、蒼朮、陳皮、蘿蔔子、半夏、麴、葛根、厚朴、枳實、破故紙、大附子、茯苓煎服二帖。氣喘稍定。腹中仍鳴。加白荳仁、白芥子、桑白皮。小水頗利。浮腫漸消。吳斗一丈。歙溪南人也。八月初旬。自新都往湖州。途次偶感風邪。發熱多痰。且又

腹痛下痢。裏急後重。原有腸風下血之疾。又以舊年乃翁痢疾發熱。卒於湖州。心甚恐怖。予脈之。兩關滑大有力。尺寸俱不足。乃以白芍藥一半生一半酒炒五錢止痛爲君。當歸活血。酒連、酒芩、柴胡、桔梗清熱升提陽氣爲臣。枳殼、槐花兼治腸風爲佐。益元散、木香以實大腸。山查以消瘀血。調肝安脾爲禪佐。一帖熱減半。痢稍輕。次日仍用前藥。外與丹溪保和丸調理五日而出戶。

姪孫二水年三十。體甚肥胖。夏月常浸在溪中。臥於松陰之下。至八月大發寒熱。於巳午間至天明乃退。不能起床。飲食亦不進。嘔吐黃苦膽汁。胸膈脹悶。舌上乾燥。生芒刺。沉香色。強硬不能言語。必含冷水漱之。始能說一句。若再語三語。必三噲水而後可。惟西瓜新藕是啖。先發寒熱之日。吐血一口。今則大便下血。症甚危惡。且咳嗽。此溫瘧症也。由醫失解散。遽用黃耆以閉邪氣。致成大禍。今法當清解止吐。俾飲食進。然後庶可保其生也。柴胡、知母各三錢。石膏七錢。葛根二錢。橘紅、竹茹各一錢五分。酒芩、枳實各二錢。甘草、貝母各五分。水煎服之。三帖而吐止。改用二陳湯加柴胡、枳實、黃芩、黃連、天花粉、鱉甲、白朮、何首烏。調理而愈。迺囑其不可食葷。食葷早恐復發也。

堪輿張錫泉先生。患左脇皮裏膜外疼痛。有惡寒發熱之狀。以白芥子一錢五分。川芎、柴胡、桔梗各一錢。桂枝、甘草各五分。水煎飲之。當愈其半。次日以八珍湯加青皮爲君。木香爲佐。柴胡爲使。一帖全愈。

族姪雲岳患偏墜。臍腹腰俞俱脹而痛。左關脈弦大鼓指。用小茴香、甘草、蒼朮、益智仁、防風各五分。荔枝核、橘核、糖棗子、柴胡各一錢。山梔子、青皮各七分。服後其痛如舊。脈且轉數。恐作囊癰。急爲解毒。瓜蒌五錢。當歸、甘草節、金銀花各一錢。連翹、柴胡、青皮各七分。水煎服之。痛定腫消。因食雞魚太早。次日臍腹又作脹痛。發熱不能睡。昨日囊消。後弦脈盡退。今復弦矣。改以山查、瓜蒌各二錢。金銀花、柴胡、連翹各八分。甘草節、黃連、當歸各五分。青皮七分。兩帖而愈。

一婦時方妙齡。表虛易感風寒。致成鼻淵。流清涕不止。便覺頭運。兩太陽常作痛。且多噴嚏。脈之兩寸洪大。用秦艽、酒芩、桑白皮、馬兜鈴各八分。白芍一錢。滑石、石膏各二錢。枳殼、蔓荊子各五分。甘草三分。四帖涕止病愈。

程兩峰丈。偶與乃姪稍有介蒂。其晚飲於姪家。歸覺腹中脹滿。嘔噦不寧。次日眼珠面色皆黃。惡寒發熱。時當仲秋。正瘧痢爲癘之候。醫作瘧治。五心加熱。下午

潮熱煩躁。似嘔不嘔。且鼻衄腹痛。大便黑如墨。吐出黑血。如爛猪肺者然。約碗餘。有謂所吐之物如此。大便之黑又如彼。似有中蠱之象。心疑乃姪毒之也。正欲與乃姪爭辯。予仲子泰來適在渠宅。徐語渠諸郎君曰。尊翁症尙可起。顧不爲救症。而務與人鬩。何舍重而圖輕耶。渠家素不急予。仍迂所親信者。率相視之。見目珠如金。面若熏橘。腹大如斗。其中有塊大如櫟。堅如石。兩足下皆浮腫。四肢且冷。小水赤。飲食不思。莫不面面相覷。辭而不藥。舉家聞言。通宵號泣。惟欲攘臂爭鬩。仲子泰來又語之曰。家君固不敏。其知識量不出諸公下。昨自華陽歸。迂而診之。當必有說。舉家忻然。敦予求診。其脈左瀉右滑。予曰。據滑脈主痰飲。瀉主有瘀血也。今所吐所下皆瘀之徵。斷非蠱也。使得早從事。曷有此猜忌。此號泣哉。兩峰曰。吾生平頗謹疾。瘀自何致。予曰。內經云。怒則傷肝。甚則嘔血。不嘔則積。積而瘀於經隧。滿而溢也。兩峰曰。若謂從怒而致。則此語恰當。吾病源矣。敢請劑。予用當歸尾三錢。赤芍藥、牡丹皮、川芎各一錢五分。玄胡索、五靈脂、桃仁各一錢。滑石、茜根各二錢。水煎飲之。所下黑物甚多。腹中仍痛。塊猶未軟。前方再加青皮、山查、酒蒸大黃服之。大便行三次。黑瘀及痰不計其數。從

此腹漸寬。塊漸鎔。面色稍轉。而黃日退。飲食津津有加。四肢微溫。有生氣矣。惟兩足浮腫不消。改用六君子湯。加炮薑、茜根、滑石、青蒿調理。而黑糞全無。三月精神復舊。里中謂予此役匪獨認病投劑爲足稱。且俾二宅釋猜疑。排忿爭。其雅誼尤足重也。

予有表嫂小產後。腹痛暈厥。冷汗淋淋。遍身麻木。心怔怔動。左脈絕不應指。虛極故也。以當歸三錢、川芎一錢五分、人參、荊芥穗、燈火燒存性各一錢、益母草、澤蘭葉各八分、甘草五分。水煎飲之。腹痛減。惟怔怔不寧。以四君子湯倍加黃耆爲君。當歸、香附、益母草爲臣。川芎爲佐。炮薑爲使。兩劑而安。

陳士美。孤子也。年弱冠。由夢遺後。患頭疼發熱。時值仲夏。醫治不瘳。凡市中有名者。率延致。轉治轉熱。及加水瀉。口渴日夜不得眠者旬日。衆視爲危。時有俞氏者。用參、耆、白朮。爲其斂汗止瀉。而汗瀉愈劇。呻吟不間晝夜。勺粒不入口。咳嗽。胸痞。躁悶不寧。又四日矣。渠親邵瓊林交予。因浼邵逆予爲治。診其脈。左弦長。右洪大。俱七至。舌胎焦黃。體若火燎。神昏氣促。予曰。此仲暑傷寒熱症也。邪在陽明。少陽二經。其危不啻風中燭。胡時師不認症察脈。徒以夢遺受病。率投補

劑。無怪乎轉治轉劇也。幸予至。設遲一日。大事去矣。用石膏五錢。柴胡、知母各三錢。炙甘草、白芍藥、枳殼、桔梗、黃芩、天花粉各一錢。粳米一撮。急煎飲之。夜半熱稍退。神稍靜。脈之仍數甚。繼以前劑進。天明乃得睡覺而熱退。神清瀉止。膈寬。惟口尙渴。再用柴胡一錢五分。白芍藥、麥門冬、知母各一錢。石膏三錢。甘草、五味子各五分。人參七分。服之。舌潤渴止。餘熱盡退。粥飲始入。漸向安矣。次日忽兩足指前一截痛如犬噬。不能耐。以野蓼一握入明礬四兩煎湯熏洗。痛勢稍緩。又以薏苡仁三錢。木瓜二錢。黃柏、牛膝各一錢。漢防己三分。一帖而愈。後又乾咳嗽。晝夜不住口。喉且疼。胸脹而體略熱。此爲誤服參朮太早之過。用馬兜鈴、百步御米殼各用蜜水製過一錢。五味子、甘草各五分。百合二錢。四帖而愈。

程松逸兄患酒疸。遍身皆黃。尿如蘖汁。眼若金裝。汗出沾衣如染。胸膈痞滿。口不知味。四肢痠軟。脈濡而數。以四苓散加厚朴、陳皮、糖菰子、麥芽、葛根。倍加青蒿水煎。臨服加萱草根自然汁一小酒杯。四帖其黃渙然脫去。太學岐原門下幹人。名仲諫者。患跨馬癱。大發寒熱。紅腫疼痛。嘔惡不納飲食。外

科醫月餘。腫痛日加。飲食日減。肌肉日消。精神大憊。不能起止。岐原邀予脈之。六部數而無力。形氣殊不勝息。時有專科唐氏。爲渠調劑將進。予詰何劑。唐曰。真人活命飲也。曾服四劑。今始加大黃。予復詰曰。前此何劑。唐曰。敗毒散。黃連解毒湯。予曉之曰。此皆治初起有餘之疾。據今症乃氣血大不足者。法當大補。託而出之。庶保終吉。唐曰。凡痛爲實。痒爲虛。今痛正盛。脈正數。飲食且不進。大補必加飽悶。飲食何由進。熱毒何由出也。正予色語之曰。素問云。數脈所主。其邪爲熱。其症爲虛。今痛極者。皆由寒涼敗毒之劑傷脾胃。凝氣血。故飲食減而痛增也。又以敗毒之劑進。是鳩之爾。安望膿出而全其生乎。唐曰。補劑迨膿潰之後。或因膿清而後用之。今膿未出。安可謂虛而補之。吾爲專門。不敢任其責。予顧岐原曰。生死在此一劑。不可不慎。彼謂膿未出無補理。彼排膿內託散。十全大補湯。非外科急劑乎。大抵凡病寧使有餘。後欲剝之。迺爲易易。今狼狽若此。再株守成法剝削。後何以措手。岐原曰。井蛙之見。豈知有天。惟叔命劑。予用黃耆三錢。人參二錢。川芎。當歸各一錢。白芷。官桂。甘草。防風各五分。急煎飲之。一帖痛止而精神回。飲食進。再劑而膿潰。十肉帖生。能動止矣。唐迺拊膺嘖嘖。

語同列曰。今而後知補劑能出膿而加食也。吾儕外科。當永識此。以爲法則。
一婦咳嗽。痰中有紅。大便一日五六度。惡心。飲食極難下。膈纔下。膈腹中卽不安。
立時欲瀉。必盡瀉出乃止。肌肉消瘦。下午發熱。熱將發時。四肢先麻。兩足膝皆
戰搖。兩寸關脈滑數。兩尺沉細。此虛中有實。積痰飲之候也。脈雖數。午後雖發
熱。不敢輕用寒涼。特爲溫補下元。庶關門有守。瀉可止也。山茱萸、兔絲子、人參、
破故紙、杜仲、山藥、茯苓、澤瀉、桂心、砂仁。服下甚安。四劑後。下體不戰搖矣。但飲
食腹中微疼。卽欲登廁。前方減去山茱萸。加白朮、肉果、木香。八帖愈。
族姪煌。春溫後。忽鼻衄。寒戰。小水不利。舌上焦黃。目珠極紅。六脈伏而不見。舉室
惶惶。予曰。此作汗之兆。由熱極使然也。因先時汗未透徹。陽明餘熱在經。迫血
上行。越出鼻竅。故有此症。以石膏、滑石、生地黃、升麻、赤芍藥、牡丹皮、麥門冬、天
花粉、甘草。煎而服之。汗出如雨。直至兩踝。舌潤而胎盡退。衄亦止。目珠色淡。脈
乃漸出。改用人參、麥門冬、五味子、白芍藥、甘草、知母、黃芩、柴胡、竹葉、石膏。服下
大便原五日未通。今亦始行。精神大轉。飲食亦漸進矣。
富陽汪氏婦。對河程門女也。年僅三八。經不行者半載。腹大如斗。堅如石。時或作

痛。里醫盡技以治。月餘弗瘳。乃舉歛友爲翼。又治月餘。腹轉脹急。小水涓滴不通。乃倣予治孫仲闇法。而用溫補下元之劑。則脹急欲裂。自經求盡。文學南瀛憐之。薦予診其脈。兩關洪滑。鼓指按之不下。迺有餘之候也。症雖重。機可生。詢其致病之源。由乃姑治家嚴而過儉。其母極事姑息。常令女童袖熟雞牛舌之類私授之。因魘食冷物。積而漸成鼓脹。前任事者並不察病源。不審脈候。誤作氣虛中滿治之。脹而欲裂。宜其然也。乃用積塊丸三下之。而脹消積去。後以丹溪保和丸調養一月而愈。積塊丸列赤水玄珠第五卷蟲蠱後

族姪孫仲登。因與堂兄構訟城中。方歸。時值二月末旬。醉後房事二起。而小溲。隨即臍下作痛。水瀉腸鳴。一日十數度。發熱頭痛。里醫進理中湯一帖。反加嘔逆。煩躁口渴。敦予診之。左脈弦大。右洪大。俱七至。飲食不能下咽。晝夜不得睡。面赤脣燥。舌上黃胎深厚。診畢語予曰。我房失後。陰症傷寒也。小腹痛。且漏底。幸叔祖救之。予笑而應曰。以予所言。決爲陰症。以予指下辨之。當是春溫陽症也。且外症亦陽。焉得爲有房事而遽以理中進之乎。族中相知者。交爲予言。渠病的屬陰症。故嘔吐水瀉。不可因其面赤。便認爲陽。顧戴陽症。與此近似。幸加察

之。吾輩正擬於理中湯內再加附子、肉桂，庶可保全。予極言不可。仲景有云：桂枝下咽，陽盛則斃。况附子理中者乎？陰陽寒熱之間，辨之不真，生死反掌耳。茲當舍症而從脈也。以溫膽湯加薑汁炒黃連、柴胡、乾葛，與二帖。囑令當夜飲盡。俾明日不它傳也。予別後，渠一服而嘔逆止。餘症悉在。詰朝予診，竟扣渠曰：夜來二藥必未服完。不然何兩手之脈洪大搏指如是？僉曰：因有竹茹、黃連，恐非房失後所宜。故僅服一。予曰：不服黃連，致熱轉劇。今日非石膏不能已。乃與白虎湯加竹茹兩劑。臨別囑渠曰：今症非昨日可比。用石膏者，豈得已哉？設當用不用，使經中之熱傳入於腑，非大黃不能瘳。切勿失時誤事。詎知別後又有惑之者，仍只服一帖，瀉即隨止。餘小腹之痛具在。次日予診畢，語渠曰：昨臨行時囑之再三，何乃又不服完？今脈洪長堅硬，邪已入腑，奈何奈何？對曰：衆謂石膏太寒，恐小腹加痛，實只服一帖而已。予曰：懼服石膏，今且服大黃矣。皆失時誤事之過。周金人銘云：熒熒不滅，炎炎奈何？其斯之謂歟？思非桃仁承氣湯不可。乃覲面煎服，連飲二劑，下極黑燥糞五六枚，痛熱俱減。再為診之，六脈皆緩弱。迨是病方盡去，改以四君子湯加白芍藥、黃連、香附，調養數日而愈。

汪希明竹山丈長君也。年弱冠。性多躁。素有痰火。舊曾吐紅。張醫用收澀之劑太早。以致痰與瘀血留滯經絡。釀成病根。恬不知覺。且爲灸肺俞膏肓。撼動前疾。止澀無功。滋陰作壅。咳不能睡。又誤作風邪。而投發散風劑。不思火盛得風。其勢愈熾。血從口鼻噴出。勢如泉湧。延予爲治。六部洪數。身熱而煩。又時當三伏。內外之火夾攻。縱體質剛勁。寧能堪此銷鑠哉。予思非釜底抽薪之法。難奪其上湧之勢。乃以三製大黃三錢。石膏五錢。黃連、茜根、滑石各二錢。牡丹皮一錢。急煎飲之。大便微行二次。血來少緩。即用石膏、滑石、冬青子各三錢。旱蓮草、茜根各二錢。黃連、山梔子、貝母各一錢。甘草五分。茅草根五錢。煎服。血乃全止。三日後。大便結燥。火又上逆。咳咳連聲。左關脈弦勁。右關洪滑。與當歸龍會丸下之。而咳始緩。改以瓜蒌仁、茜根各一錢五分。貝母、旱蓮草、麥門冬、知母各一錢。白芍藥二錢。黃連、黃芩各七分。青皮、甘草各三分。仍加茅根。後每遇大便燥結。即進龍會丸。迹此調理。三月大定。半載全瘳。書云。病有六不灸。火盛者不灸。此由誤灸。幾於不保。故特識之。以爲好灸者龜鑒。

德興文學祝弘吾公。祝令君叔祖也。在休衙偶有陰陽之患。子午潮熱。咳嗽痰多。

汗流不止。胸膈不暢。大便燥結。動作喘乏。口渴。以貝母、知母、瓜蒌仁、桑白皮各一錢。枳殼、黃連、麥門冬各八分。桔梗、柴胡、前胡各五分。甘草三分。五味子十一粒。服下。五更微汗。熱退十之七。惟痰嗽喘乏。改用瓜蒌仁二錢。餘如前。外以七製化痰丸夜服。熱盡退。渠甚喜。以爲自是以往。可勿藥矣。予曰。未也。據脈弦數不減。恐防作瘧。公未爲然。予適東行半月。書報瘧作。咳嗽轉加。所出皆黃粘老痰。予曰。書云。無痰不作瘧。仍用前方。倍加柴胡。貝母爲君。加烏梅一個。四劑霍然。良已。公曰。翁之視疾。應若桴鼓。古云。智者不治已病。治未病。吾於翁言徵之。迺以是備言。祝令公。祝令公喜曰。孫君匪獨得岐黃正脈。其雅誼足稱。叔祖尙未前聞。予當賦詩以贈。於是欣然。手書若干律。以授予。其詩附後
第六卷

素封汪宥翁。年八十有一。因勞倦感冒。胸膈大熱而痞。口渴。舌上胎白如敷粉。咳嗽。夜不能睡。此少陽症也。柴胡一錢。桔梗、枳殼、竹茹、知母各八分。酒連、酒芩、天花粉各七分。甘草四分。薑三片。服下。乃得睡。口仍渴。痰仍嗽。前方加半夏麴。夜與二母丸。治其熱嗽而愈。

汪鍊兄內人。經水久不止。內有紫黑血塊。今則胃脘胸腹皆痛。玉戶且腫。手足皆

冷。絕不知餓。臍腹之下有一塊。堅如鐵。脈左數右沉瀯。此血痕症也。用糖棗子五錢。玄胡索、五靈脂、香附、麥芽、青皮各一錢。水煎服。夜卽痛減其半。手足漸溫。後加丹參、川芎、蒲黃、益母草、當歸。四帖而痛全止。玉戶亦消。再四帖而經調。程相如丈令政。孕四月。頭疼。遍身皆痛。腰痛更甚。惡寒發熱。咳嗽口渴。六脈浮數。以小柴胡湯加防風、羌活、葛根、薑棗煎服。夜忽大發寒戰。繼而發熱。五更又發戰。告急於予。予曰。此作汗之兆。俄而汗出口渴。頭疼身熱皆減。惟胸膈脹悶。此胎氣上逼而爲子懸。以大紫蘇飲與之。紫蘇、人參、白朮、茯苓、甘草、當歸、陳皮、大腹皮、川芎、白芍藥。服後身冷而汗出不止。胸腹脹痛急。以奪命丹進。服下嗒然而睡。覺則痛止脹消。始能進食。身溫汗止。駸駸向安。奪命丹用白茯苓、牡丹皮、桃仁、白芍藥、桂枝。醋水煎服。止痛如神。

余文台壯年咳嗽吐紅。腹中常痛。夜多口渴夢遺。背心作脹。兩手脈短弱。兩關弦大。左尺弱。右尺滑大。心血不足。中焦有痰積。膈間有瘀血。陰分有淫火。乃先爲清肅上焦。用山梔仁、牡丹皮、丹參、茯苓、甘草、貝母、橘紅、益元散。服十帖。背脹漸消。惟咳不止。改用黃芩、杏仁、半夏、益元散、黃連、瓜蒌仁、甘草。十帖而嗽止。惟

腹疼不除。再以遇仙丹。同丹溪保和丸進之。大便下稠積痰甚多。後以人參、白茯苓、白芍藥、紫苑、知母、麥門冬、甘草、當歸、五味子調理而愈。

邵伯成丈大令愛。經水適行。洗浴後感冒風邪。誤服人參補劑。大發寒熱。嘔吐煩躁。隨即口噤。心煩不安。循衣摸床。時當仲夏之晦。予謂上焦有痰。因誤補。故阻滯其氣道而然。與加味溫膽湯。半夏四錢。橘紅二錢。白茯苓、枳實、竹茹、麥門冬各一錢。益元散三錢。生薑三片。水煎飲之。一帖而安。後稍勞。復頭疼。痰火上衝。背脹腰痛。以柴胡、薄荷、甘草、枳殼、桔梗、酒芩、桑皮、半夏、麥門冬、山梔仁、茯苓、生薑調養全愈。

金氏婦。蘇雙泉之親媽也。舊秋患崩中。愈後。方百日。時值上巳。因洗浴受風邪。外寒而束內熱。前後心脹。四肢腫痛。面有浮氣。惡寒發熱。呵欠不時。大小便欲行不行。口內常甜。六脈浮大而數。以柴胡、紫蘇、麻黃、桔梗、枳殼、大腹皮、厚朴、酒芩、薑黃服下。夜得微汗。胸腹稍安。四肢仍脹。再加蘿蔔子進之。覺煩躁。且醋心。改用二陳湯。加香附、大腹皮、桑白皮、薑連、枳殼、山梔子各八分。益元散二錢。薏苡仁三錢。吳茱萸三分。服下。四肢消半。面氣全消。覺腰痛。噯氣胸膈嘈辣。用六君

子湯。加薏苡仁、薑連、厚朴、知母、澤瀉、鬱金、砂仁、枳實。調養半月。四肢悉平。嘈雜尋愈。

文學張雲門三令郎丁年。偶發寒熱。右脇有一塊。降起疼痛。手不可近。下午至夜尤甚。額顱手心皆熱。脈右關洪滑。兩尺尤有力。日夜不得睡。迺倣椎氣散例。用薑黃、桔梗、川芎各一錢五分。枳實二錢。白芍藥一錢。粉甘草五分。薑棗煎服。外與當歸龍會丸。其夜大便行一次。頗得睡。三更後。先發寒戰。徐熱。至五鼓微汗。而脇疼寒熱悉減。再診之。左脈略弦。舌有黃白厚胎。兩脇重按微疼。大便燥結不行。以小柴胡湯減半夏。倍加瓜蒌、鱉甲、牡蠣。脇疼全瘳。畢丸略硬痛。彼自以爲無恙矣。予語渠姐夫徐仲子偉曰。病先起脇下。顧脇下爲肝之經。後及畢丸硬疼。其畢丸亦肝之地。此餘熱未盡徹故也。而彼已厭藥。以小愈爲全安。不出浹旬。必有奇疾。徐仲子曰。奇者若何。余曰。此君性急好勝。尙勉強作文。遇勞而發。增寒壯熱。非瘧卽囊癰也。予尙東行。子宜識之。別後半月。果因作文。夜發寒熱。囊漸腫大。其熱如火。及予至診之。六部皆數。兩尺且近於洪。知其膿已成。必潰而後已。彼心甚恐。予曰。無傷。易與耳。急以營衛返魂湯。加金銀花爲君。兩帖

而膿潰。再加人參。又兩帖而肌生。十日全愈。方用何首烏、赤芍藥、當歸、小茴香、甘草節、木通、金銀花、貝母、枳殼、白芷。水與酒共煎服之。此方加獨活。治流注尤神。

朱宅內眷。孕已八月。因送殯受驚。胸膈脹悶。嘔逆不入食。城中時師認爲外感。爲之發散。嘔惡愈劇。舉家恐胎有動。延予診視。兩寸脈皆洪滑。兩尺弱。此亢上不下之候。胸膈脹者。蓋由于懸而然。此一劑可瘳也。夫曰胎婦難任峻劑。觀其嘔惡之狀。脹悶之勢。時刻不止。一劑曷愈。予曰。請試之。與溫膽湯。加薑汁炒黃連、大腹皮。水煎成。送下薑汁益元丸。果一帖而嘔止。膈寬。卽能進食。午後酣寢。怡然。若未始有病者。其夫訝曰。溫膽湯何神若此。幸詳其義。予曰。胎孕之症。重在足少陽。足少陽者膽也。病起於驚。氣逆痰隨。胎氣上逼。故脈亢上不下。在難經爲溢候。由木火之性上而不下。經曰。上部有脈。下部無脈。其人當吐。不吐者死。予故用一劑可愈也。方名溫膽者。此溫字非溫暖之溫。迺溫存之溫。黃連、竹茹。清其肝膽之火。同白茯苓而安心神。益元丸壓其痰火下行。火下行而胎因之亦安矣。筠臯公曰。先生認症真。故投劑確。非神乎藥。神乎用也。

胡隣泉令愛及笄。後患吐血。每吐碗餘。下午倦怠。夜夜潮熱。嘔吐不食。大便秘結。時師視爲陰虛火動。投以滋陰之劑。反加飽悶。背心脹痛。予診其脈。兩寸洪大。兩尺弱。知其有瘀血凝滯。以致新血不得歸經。故滿而溢也。法當消瘀爲主。用白芍藥、枳殼、前胡、益元散、桃仁、紅花、牡丹皮、山梔子、貝母水煎。臨服入蘿蔔汁一小酒杯。服後嘔吐如舊。大便仍秘。乃以龍會丸通之。更以石膏三錢、橘紅、半夏、薑連、茜根、竹茹、黃連、枳殼各一錢、白茯苓八分、甘草三分。服後大便行三次。吐止食進。後用二陳湯加滑石、丹參、丹皮、茜根、白芍藥、香附二十劑。後經行熱退。背脹悉愈。從此經調血不上逆。

汪思石令堂。年可五旬。大怒後小解。驀然暈厥。口禁牙關。不省人事。以蘇合香丸灌之而甦。左手右足疼痛不能舉動。用二陳湯加酒芩、五加皮、秦艽、石菖蒲、防風、薏苡仁、紫荊皮四帖而愈。

族姪孫君實。壯年患遍身筋骨疼痛。肢節腫痛。其痛極狀如虎噬。大小便起止。非三五人不能扶。諸痛處熱如火燎。食飲不入。呻吟床褥。已經二候。有以疎風之劑投者。不應。又以乳香、沒藥活血止痛之劑投者。亦不應。延予診治。六脈浮緊。

而數。予曰。此周痺也。勢甚惡。俗名白虎歷節風。迺濕熱所致。丹溪云。腫屬濕。痛屬火。火性速。故痛暴猛若此。以生地黃、紅花、酒芩、酒連、酒柏、秦艽、防風、羌活、獨活、海桐皮、歲靈仙、甘草四劑而痛減大半。再加赤芍藥、當歸、蒼耳子、薏苡仁。減去獨活、秦艽。又八劑全愈。

葉子黑。內人患疫。醫爲其汗。爲其下。聲技不能起。屍寢者已浹旬。家事窶乏。亦不能復聊醫。鄰人覩其狀。以生死在須臾間。羣然發善愿。科斂助其殯斂之需。予聞爲之診。六部俱微弱不充。指右關稍滑。精神昏憊。僅一息奄奄。四肢冷厥。口渴。予診畢。語諸鄰曰。據症甚危。據脈邪已盡退。惟虛憊而神氣弱。非大補不能也。諸君苟能以助殯者助其市人參。庶幾可起死而還之生也。諸君旣憐其死。寧不以冀其生乎。予非毫有希覬。願渠力不足瞻。願與諸君共圓滿好生善果耳。諸鄰固有善心。激於余言。益忻然相語曰。惟先生命。卽以六君子湯加歸芍。補氣血而化痰涎。以麥門冬、五味子。復脈通心而生津液。以桂枝溫其四體。午刻進藥。晡刻四肢漸暖。精神煥發。尙無力開聲。改以生脈湯。加遠志、歸芍、苡仁、山藥。調理而愈。諸鄰人大快。

孫如亭令政。年過四十。眼偶赤腫。兩太陽疼痛。大便不行者三日。平時汛期一月。僅二日。今行四日。猶且未止。里有開化余雲谷者。自謂眼科捷手。醫治踰候。腫赤不消。而右眼內眥突生一白泡。垂與鼻齊。大二寸餘。余見而駭走。以爲奇疾。莫能措劑。又見其嘔吐眩暈。伏於枕上。略不敢動。稍動則眩愈極。吐愈急。疑其變而不治。予爲診之。兩寸關脈俱滑。大力。兩尺沉微。予曰。此中焦有痰。肝膽有火。必爲怒氣所觸而然。內經云。諸風掉眩。皆屬肝木。諸逆衝上。皆屬於火。蓋無痰不作暈也。眼眥白泡。迺火性急速。怒氣加之。氣乘於絡。上而不下。故直脹出眼外也。古壯士一怒而目眥裂。與白泡脹出眥外理同。肝爲血海。故血亦來不止。治當抑其肝木。清鎮痰火。則諸症自瘳。先用薑汁益元丸。壓其痰火。以止其吐。再以二陳湯加酒連、酒芩、天麻、滑石、吳茱萸、竹茹、枳實煎飲一帖。吐止暈定。頭稍能動。改用二陳湯加芩、連、穀精草、香附、夏枯草、茺莢、薏苡仁。兩劑赤腫消。白泡斂。四劑全愈。血海亦淨。從是後不發。

吳勉齋年近五十。有腹痛疾。或作或止。性極急。多躁多怒。今痛在當臍。不間晝夜。市里醫者爲下之。已五日。大便雖瀉。痛則尤甚。飲食不進。手足清冷。形神俱倦。

脈僅四至。重按則伏而有力。此由攻尅太過。寒涼傷脾。脾虛則中氣不運。積反凝滯。以故大便雖瀉而積不行。痛終不減也。治當建立中氣爲主。中氣一回。痛當立止。先與王海藏五神丸三錢。滾水送下。以止其痛。此丸補接元氣。安和五臟。升降陰陽。極有神應。故名五神丸。方出醫壘中再用小建中湯調肝養脾。蓋臍下迺肝經部位。惟此湯迺對症劑也。白芍酒炒三錢。炙甘草一錢五分。桂心一錢。加香附一錢。生薑三片。水煎服。午牌進藥。未牌已報痛止。因其夜進粥太頻。且食鴨汁。撼動餘積。腹又作痛。且加脹悶。面有浮氣。裏急後重。與四平丸而漸定。外以二陳湯加香附、砂仁、蒼朮、厚朴、山查。腹中始覺寬快。三日無恙。又縱恣口腹。大啖肥甘糕粽肉鷄之類。不飽不止。腹中大痛。時刻難存。欲吐則食已下膈。欲瀉則食尙未入腸。自喊叫云。可取木香檳榔丸。大承氣湯。急與我下之。雖死無憾。予諭之曰。據痛雖甚。腹則不堅。顧今日適屆冬節。禮曰。先王於至日。閉關安靜。以養微陽。曷敢以大寒峻劑而汨天和乎。設不得已。只須柏樹東行根上白皮一錢。長流水煎飲之。一服可愈也。夜已二鼓。覓而煎服。天明瀉三五行。痛減大半。仍與小建中湯和之。痛又旋減。惟臍下尙不脫然。常常以熱手重

熨之。大便欲行。及至廁。則又不解。知其血少而氣不調。用熟地三錢。白芍一錢。杏仁二錢。烏藥一錢。木香五分。水煎飲。既下黑糞甚多。十年腹痛沉疴。從此再不復萌。此後勉齋常語人曰。吾得孫公五神丸。柏根皮。小建中湯三法。不啻脫胎換骨。數年來。豈惟飲食增加。即步履輕便。捷若少壯。皆孫君賜也。親友有求其三法者。昇而服之。捷若桴鼓。彼家謂殆予三生夙緣云。

黃熙齋內子新產。醉犯房事。血來如崩。勢不可遏。發熱頭暈。大小便俱熱。六脈洪大。以竹茹、蒲黃、白芍各一錢。香附、茯苓、側柏葉、青蒿各七分。甘草、炮薑、艾葉各三分。血止大半。腰猶脹痛。下午胸膈飽悶。改以川芎五分。當歸、茯苓、破故紙、蒲黃、香附各八分。薑炭、甘草各一分。陳皮七分。人參一錢。服此血全止。腰痛亦愈。程心章兄。頰腮紅腫。嘔惡發熱。不能進食。下午煩躁口苦。夜不能睡。六脈洪大。此俗名鷓鴣瘟是也。迺少陽陽明二經之症。法當清解。以柴胡、貫衆各二錢。乾葛、竹茹、半夏、麴各一錢。黃連、枳殼各七分。甘草四分。一帖而瘳其半。再服。腫消食進而安睡矣。

程六十者。原有喘嗽。今腫發於面。四肢俱浮。大便溏。小水少。時多怔忡。此痰飲症。

也。以旋覆花湯。加桑白皮、薏苡仁主之。旋覆花、桑白皮各一錢。半夏、人參、橘紅、茯苓各七分。厚朴五分。桂心、甘草各二分。薏苡仁一錢五分。生薑三片。水煎服。一劑而怔忡除。四劑喘腫俱消。

程七護丈發熱背痛。起於傷酒。醫治三月。反加裏急後重。瀉下紅白稠粘。中脘有塊。自鳩尾骨直硬至臍。如橫梁狀。小水少且澀。一日僅進粥二盞。臥不能起。纔立起。即後重下墜。腹中隱隱痛。與積塊丸消之。連與二日。所下血屑甚多。外與滑石三錢。當歸二錢。桃仁、川芎、白芍藥、枳實、山查各一錢。酒芩、酒連各八分。木香六分。升麻五分。連進四帖。塊軟腹寬。再以丹溪保和丸兼服一月。而消其六。飲食大加。紅白俱無。塊痛硬勢雖云稍可。然其根尚未易刈。素多縱性。飲啖無忌。每每爲飲食所復。病久而中氣虛弱。難任峻劑。迺與六君子湯。加香附、山查、滑石、紅麴、木香、酒連調理而全。迺囑之曰。足下兩構危疾。皆縱恣所致。不佞殫力盡技。爲足下拯之。非易易也。固三生之緣有在。幸無爲再誤。邵子謂爽口物作疾。快心事爲殃。足下其鑒諸。

程孺人黃氏。予之內親也。發熱頭痛。遍身如燬。口渴譫語。飲食不進。先已迎程文

峰氏療之。認爲痛風症。授以蠟丸。及辛溫之劑。進之。予適至。爲之診。六部弦而洪數。視其舌皆沉香焦燥。芒刺深厚。神漸昏沉。迺語之曰。此春溫過時熱病也。法宜清解。彼視爲痛風。而用辛溫。是謂如火益熱。適足以戕生。非衛生也。方和宇氏亦以予言爲是。迺用石膏五錢。知母、麥冬各三錢。竹茹、甘草、黃連各一錢。生薑三片。一帖而神清。再帖汗津津出。始能言。熱解食進。又兩帖。一身輕快。自能坐立。再用薏苡仁、麥門冬、白扁豆、甘草、黃連、白芍藥、香薷、白茯苓。調養而愈。程有望孺人。年踰五十。月汛當止不止。來且甚多。遍身皆疼。手足牽扯而痛。牙疼經年不愈。此氣虛血熱症也。白芍藥二錢。當歸八分。人參七分。蒲黃、五靈脂、炒黑側柏葉各一錢五分。甘草、薑炭各三分。四帖。諸症悉減。惟牙痛尙存。改用石膏一錢五分。人參、石斛、當歸各八分。地黃、白芍藥各一錢。黃連、升麻各七分。白芷、甘草各三分。再四帖。牙疼亦愈。

上舍近洲。予族中至厚姪孫也。性拓落豪放不羈。夏仲在茗。與諸友泛舟遊於碧浪之間。興至卽百觥不辭。亦以是終爲酒困也。嘔惡體熱。胸脇脹悶。腹中疼痛。大便秘結。飲食大減。茗之名醫如楊調元者。橋梓悉方治之。已三月。或愈或否。

延至深秋。肌瘦神瘁。日進米僅二合。胸脇脹。腹中痛。漠然略無所減。憊然而不可支。兩足皆有浮氣。歸謀於予。左脈沉弦而數。右關結實。大如碧豆。因詰其在茗所服之劑。答曰。彼謂姪孫稟薄肌脆。宜當理脾。向服多理脾之劑。予曰。否。子所苦者。胸脇脹悶。腹中疼痛。大便燥結。其累大矣。理脾曷可以去此哉。適足以益病耳。經曰。塞者通之。又曰。通則不痛。其治此病之謂歟。迺取當歸、龍會、丸、三下之。大便行五六度。又與酒連、酒芩、青蒿、薑黃、檳榔、青皮、半夏、葛根、飲之。豁然焦膈通達。呼吸開利。惟頭略暈。足上浮未去。前方再加滑石、茯苓、薏苡仁、山查。與調中丸兼服。坐月全愈。近洲喜曰。人皆謂我症似中滿。今不滿者。叔公力也。敢不德歟。予警之曰。吾聞君子之於身也。兢兢焉不敢輕。父母之遺體。無伐天和。則疾疢不作。無反天常。則灾害不逢。蘧伯玉嘗言。行年五十而知四十九年之非。况新愈後。尤當痛懲。庶保遐齡。區區無足恃也。別未五年。予在宜興聞訃。果以傷酒而卒。噫。惜哉。

甲午仲秋下旬。黃源金先生以中饋病急。謁予於市。貌甚慘。步立慄然。語其症。怔怔言。澁於吻。不勝其憂。執族醫尺一白予云。病自仲夏吐血二碗餘。初以芩連。

梔、柏、生地、芍藥大寒之劑投之。一帖而止。未幾則咳嗽徹晝夜。後師謂咳自吐血後。當從滋陰降火之治。逾兩月。盡其法而罔效。反加喘促洩瀉。辰巳二時發熱煩躁。師告技窮。謂喘咳迺火刑肺金。洩瀉迺脾胃已憊。保脾則火愈熾而喘咳增加。滋陰則洩瀉綿綿而元氣下脫。經書所記嗽而下洩上喘者死。此症之謂也。似無可奈何矣。語竟。淚潛潛下。予觀其忡忡之狀。心不覺惕然動也。市去渠宅五里許。即步去一視。觀其面青。喘從擡肩擗項。息息連身而倒。脇背俱疼。日夜不得伏枕。脈之左澁。右寸關滑大。診畢。顧金兄猶淚盈眦。予撫其背曰。毋淚。尚可生也。適徐仲子同視。詰予曰。症若此。夫子曰可生何也。予曰。是非汝所知也。第觀予治。俟奏功。當語汝。遂以紫苑、茜根、牡丹皮、桃仁、益元散、桑白皮、茯苓、桔梗、瓜蒌仁、桂枝、白前水煎。臨服加韭菜汁半酒杯。服後背脇痛止。瀉減半。迺得睡。但咳而聲啞不除。次以杏仁、桔梗、紫苑、甘草、白前五味子、瓜蒌、乾薑、款冬花、半夏、麴、通草水煎服。服後聲漸開。瀉全止。惟嗽尙多。再以半夏、麴、桔梗、茯苓、陳皮、甘草、杏仁、桑白皮、白前、苡仁、白芍、牡丹皮水煎。後以丹溪治嗽吐方。用瀉白散加青皮、人參、白茯苓、五味子調理全愈。次年誕一子。是役也。徐仲子之

功居多。蓋金爲徐仲子友也。徐仲子治疾多奇中。迺篤信予而推轂之。初投劑。人多置議。仲子獨贊之曰。其必有見也。人人辟易。彼許可生。安得不望生哉。故金任之不貳。功成。余明甫查仲修問予曰。病起於吐紅發熱。煩躁喘咳。皆是火邪。前後之師。滋陰降火藥。法亦未爽。然而病轉增劇。其故何也。予答曰。醫不難於用藥。而難於認病。余明甫查仲修曰。市人議先生治疾多不循方。每每師心。金之役人。皆市爲火症。而用寒涼。先生獨用溫熱。雖成功。小子竊爲先生恐。予曰。病原於火。其勢之劇。以治之太峻致然。夫血之初來。勢如湧泉。安能一吐遂盡。必有餘血伏於經絡。思不及此。而以大寒之劑。一帖而止。夫大寒之劑。豈能止血。適以凝其血耳。血凝經絡。滯於氣道。氣滯血凝。日甚一日。氣滯又復生痰。痰與瘀血兩滯經絡。則肺氣不利。故咳嗽聲啞。不加察而爲消痰化痰導血歸經。又以滋陰苦寒之劑施之。則痰瘀愈凝。而氣道愈不利也。久則胃寒脾弱。反增洩瀉。晝夜喘促。不能臥矣。書云。上熱未除。中寒復生。而爲陰盛格陽之症。故咳而嘔吐。予故始以桂枝乾薑之類溫其胃。以桃仁韭汁丹皮茜根之類治其血而消其瘀。故喘止而瀉除。東垣曰。脾胃喜溫而惡寒。信不欺也。古謂藥不貴

執方而貴合宜。方卽兵家之陣圖。匠氏之規矩也。圖可授人。而不能授人關。匠可授人規矩。而不能授人巧。此岳武穆對宗留守云。運用之妙。存乎一心也。予遊方之外。亦不失方之內。惟不失方。竊謂知方。知方合法。豈區區能哉。觀古人治虛怯之疾。卽不治之症。亦能延之三五載。迺今治虛怯者。不半載而竟殞逝。猶駕言曰。殆今之天元運氣使然。故人多不壽。愚謂天元運氣。則人人皆如是。夫何予母八十有六。予父踰八望九。予伯母今九十有五。予表伯汪春元東台之父。年九十餘。強健不啻少壯。不思速夭之由。皆爲滋陰降火之誤。而反歸咎於天。天何尤哉。緣滋陰降火之法。起於丹溪。繼而王節齋。何大英之流。倡而和之。以成其風。此當今之大弊。而人未之警也。我師祖汪石山先生。揭而指之。惜乎未有繼其言者。一齊衆楚。故滋陰之禍流而迨今。敝以繼敝。無已時也。二三予其識之。徐仲子其聞之乎。仲修又問先生何以認是症爲中寒。而非陰虛之火。而又認其喘爲瘀血也。予曰。脈與症皆可考。脈經云。澁爲氣滯。氣滯則血凝。盛吐之後。大寒之藥一帖而止。其未盡之餘血。爲寒涼所凝滯於氣道。爲喘。書云。從前來者爲本。從後來者爲標。茲用活血消瘀之劑。治其本。以溫熱暖胃之

劑治其標。故瀉止而喘定也。若夫陰虛火動之脈。迺細數之候。今脈滑大。非陰虛之脈。陰虛喘嗽之症。潮熱於夜。兩頰皆紅。今熱在辰巳陽分。而面色帶青。由是以知其非陰虛之火。乃誤用寒涼。激其火而上行也。經曰。水流濕。火就燥。中氣既寒。火愈不能下矣。正如雨驟雷烈。則電光之火愈熾。日出而電光自息也。且陰虛火動。火起九泉。皆自足下湧泉穴起。以漸上升。今膝下冷而上身熱。兩尺脈又弱。蓋由咳而氣升。經曰。形寒飲冷則傷肺。肺氣爲寒。藥壅遏不得下降。故咳而吐酸。丹溪纂要云。陰氣在下。陽氣在上。喘咳嘔吐瀉白散。加人參茯苓五味子青皮。故不從河間。而用諸嘔吐酸皆屬於火之治。况今歲次甲午。爲濕土司運。八月建酉。水土衰敗之時。內經曰。毋違時。毋伐化。且脾惡濕。濕多則瀉。濕則生痰。前後之師。不考運氣月令。一概而用滋陰降火之劑。助濕生痰。安望其痰之愈也。丹溪纂要云。實脾土。燥脾濕。是治痰之本也。遵而用之。如鼓應桴。予故曰。醫不難於用藥。而難於認病。有以也。

族姪合溪。年當八旬。春初偶爲寒襲。發熱咳嗽。醫與芎蘇散。卽汗出不止。餽餽連聲。勺粒不入。昏憤經旬。汗日加。餽日甚。延予診之。六部浮大無力。重按三五不

調六七至一止。右關近滑。診畢。語嗣君敬所曰。尊翁由勞倦表虛感邪。脈故浮大無力。法當從東垣補中益氣湯。一二劑可瘳也。醫乃妄爲散表。致汗漏神疲。昏憤飭飭。高年值此。寧不殆乎。即可微倖圖安。亦不過千日養耳。敬所勃然俛而對曰。上已後爲家君壽期。不虞構疾。羸憊若此。苟保百日。俾菽水之心。庶幾少盡。叔祖之賜多矣。若千日。又出於望外也。予卽以六君子湯加竹茹。柿蒂以止飭。再加酸棗仁。石斛以斂汗。一進熱退。飭定。再進汗止。食入。三進霈霈然精神長矣。乃減去竹茹。柿蒂。加當歸。半月全安。先是祝令君謂渠有嗜德。請爲介賓。以疾辭不及赴。迨季春。令君聞渠壽。卽援例賜一級寵。以冠帶扁額用彰恩典。光於鄉間。後果三年而卒。

孝廉方叔度令嫂江氏。年甫三旬。患脹滿。諸名家或補或消。或分利。或溫或寒。悉爲整理一番。束手而去。舉家惶惶無所適。從叔度曰。聞孫仲闇昔患此。衆亦束手。比得孫生生者治而起之。衆皆歛衽欽服。仲闇伯仲適在館中。闔諮訪之。卽發書介予。隨紹嚮往。診得左脈絃大。右滑大。予曰。此李東垣木香化滯湯症也。病從憂思而起。合如法按治。可保終吉。叔度喜曰。曩從事諸公。悉云不治。先生

謂可保終吉。此故倉公有言。拙者疑殆。良工取焉是也。幸先生早爲措劑。予卽照本方發四帖。服訖。腹果寬其半。繼以人參消痞湯。琥珀調中丸。調理二月全瘳。叔度信予從此始。每推轂予於諸相知。多有奇中。卒爲通家之好。

臨溪吳天威丈。年七十有三。客邸遠歸。偶墜馬跌傷。左脇作痛。隨治而愈。後半年。忽左胯腫痛。增寒作熱。動止極艱。里中諸公有認濕痰者。有認風氣者。有認濕熱者。總罔效。聞歎外科洪氏能。且識雜病。迂以爲治。居數日。視爲疝氣。率投荔枝核。大小茴香。川練子。橘核之類。痛躁不可當。乃欲引繩自絕。諸子百般慰解。洪乃辭去。竟不知爲何疾也。其壻汪開之。予之表弟也。邀予診之。六脈而浮而洪數。左寸尤甚。驗其痛處。紅腫光浮如匏。撫之烙手。予曰。此便癰也。洪係外科專門。胡獨忽此。蓋渠素慎重。見患者年高。烏敢認爲便癰治哉。此殆千慮一失。毋足怪。諸郎君聞予言。皆駭然詰予曰。家嚴不御色者十載。顧安得此。願先生再思。予曰。此非近色而得。審髀屬足厥陰肝經。肝爲血海。乃昔時墜馬惡血消之未盡。瘀蓄經絡。無門可出。化而爲膿。由年高氣虛。又被香燥剋伐太過。不能潰而卽出。故散漫浮腫。觀其色青中隱黑。膿已成腐。必須外用鑱針。引而出之。

內用千金託裏。庶可排膿生肉。但予生平心慈。不能用針。予弟警吾。外科良手。可延而決之。至卽以鑱鍼深入寸餘。出青黑膿五六碗許。臭穢難近。卽語諸郎君曰。使早決三日。可免一月之苦。今卽日大補之。非百日不能痊。此俗名石米瘡也。諸郎君及患者。見膿色如是。始信予言不爽。急以請劑。予乃用內託十宣散。參耆每帖三錢。後加至五錢。一日兩進。兩越月膿盡肉滿而愈。一市稱奇。文貴者。善爲族文學岐原出入子母者也。寓長興邸中。病發熱晝夜不止。口渴齒燥鼻乾。舌胎黃厚。不得眠。服藥不效。予適至雒城。岐原邀診之。脈俱洪數。嘔惡。胸膈痞懣。小水短而赤。大便下皆清水。予以石膏七錢。知母五錢。甘草一錢。軟柴胡五錢。葛根三錢。黃芩二錢。枳殼。桔梗。竹茹各一錢。連進三帖。嘔惡止。胸膈寬。熱仍未退。無汗。瀉未止也。時有問予者。謂胡不用柴苓湯。而退熱止瀉也。服石膏故益瀉耳。予戲之曰。予乃二脚描耶。能認此爲何症。而用柴胡湯也。仍以柴胡。石膏各七錢爲君。葛根。知母各五錢爲臣。黃芩。甘草各一錢爲佐。生薑五片。速進二帖。汗則津津然出。熱退瀉止。口不渴而眠矣。予因他往。留藥三劑。而囑之曰。胃氣初回。勢必思食。宜謹慎不可多進。若多則餘熱復作。必成食復。治

將費手也。慎之慎之。後五日。果以食不慎而復病。予又至。熱較前爲重。且加懊
懣。夜譫語如見鬼狀。口大渴。齒燥。舌焦黑。有芒刺。熱危甚急。以前方加枳實。梔
子各三錢。淡豆豉二錢。煎飲之。二帖。懊懣止。餘症猶然。夜更甚。前方減去豆豉。
加黃連、麥冬、生地、白芍。一日二帖。舌以井水生薑擦去黑胎。用蜜調玄明粉塗
之。而胎去矣。服三日。始得微汗。諸症盡減。再四叮嚀。慎飲食。調理半月而全。岐
原問曰。人始皆認此症爲漏底傷寒。謂叔不用柴苓湯退熱止瀉。而用石膏爲
非。乃竟以石膏收功。何也。予曰。此問甚善。蓋醫貴認症。此症乃少陽陽明合病
也。柴胡白虎湯。葛根爲二經對症之藥。服之可解肌熱。止口渴。若柴苓湯爲太
陽少陽合病之劑。內有五苓散。乃太陽經之裏藥。症非太陽。曷敢用之。且其內
有人參、白朮、肉桂。皆助熱發燥之味。誤投則必發斑。其齒燥舌乾而焦黑。又何
敢用茯苓、澤瀉、猪苓利之。使益亡其津液耶。古人謂以傷寒爲大病。不察症而
誤投。則生死立見。傷寒論有言。不得汗。不得下。不得利。小便。是謂三禁。故曰。少
陽陽明。不從標本。從乎中治。小柴胡白虎湯中治劑也。人徒見其大便作瀉。爲
漏底。不察瀉皆清水無糟粕者。爲熱極所致。症乃春溫時疫也。但爲發散。使清

氣上升。而微有汗。瀉當自止。此瀉豈五苓散所能止哉。止則誤事。岐原曰。夜重如見鬼者。何以故。予曰。熱入血室故也。岐原曰。男子亦有血室乎。予曰。血室男婦同之。衝任二脈。爲血之海。二脈附於陽明。今病乃陽明之熱。遺入血海也。故加生地。白芍而效。余治傷寒。用柴葛解肌湯。及柴胡白虎湯。而熱不解者。加此二味。則熱無不退。汗無不出矣。且下午與夜。又陰分主事。欲解血海之熱。必投此二味。以收其功。此亦予一得之愚也。岐原曰。善。願記之以詔後來。

鍾澤有程夢奎孺人者。年將五十。僅一子。念一歲。而歿於痘。旦夕哭之。哀且彌月。攬鏡自鑑曰。何子死而形色不瘁如此。因持鐵如意鎚其胸。絕粒斷漿。肌容日瘠。時爲初秋。寒熱交作。嘔噦懊懣。遍身疼。夫爲遍延診視。却藥不飲。諸醫百策。開譬拒而不聽。媳與孫跽而懇。姻族就而諭。其不納者。若罔聞也。惟合睫以待死。已而作色語其夫曰。病若此。汝曷不延名醫一決生死乎。夫曰。所延皆名士。病者曰。昔常聞程方塘參軍患瘋三年而起者誰。曰。孫君。又問吳西源孺人病燥渴痰喘三年。與程道吾內眷勞瘵暈厥。誰爲起之。夫答如前。病者曰。何不請孫君決我生死。夫聞言。物色徵予。五日而後至。則薄暮矣。病者猶疑爲誕也。私

至三家訪予狀。皆曰。魁然長髯者也。詰朝。覲面診之畢。則問曰。何日死。予應曰。病勢危。去死不遠。病者喟然嘆曰。死不足惜。第九華山香愿未了。爲恨耳。予曰。孺人大愿不思。何須以此小愿爲孜孜也。孺人曰。無大愿。予曰。人之脩短有數。今年之痘死者。不可勝計。令嗣之死亦數也。然有二孫可承宗祧。孺人能忍哀撫孫。使其成立娶婦。以審後胤。令嗣雖死。猶不死也。而孺人亦有令名。若不此之思。憂傷以殞。夫君必娶。娶必少年。繼室生子。則必厚其子。而薄孺人之孫。晚娘晚爺之謠。獨不聞之耶。孺人萬金之家。使令孫不得其所。令嗣九泉之下。恐不能無憾。孺人憂死。何益也。愿孰大於此者。予故謂未之思耳。孺人試思之。誰輕誰重。當自辨也。語畢。憮然曰。先生言至此。吾如寐者得醒矣。顧病勢去死不遠。何能得如吾愿。予曰。所謂近者病也。非脈也。脈左弦細。右關滑。故發熱體痛。嘔噦。乃秋來癰症。非死脈也。若如前執拗不服藥。不進飲食。書謂絕穀者亡。殆非虛語。孺人誠聽余言。以二孫爲念。以大體爲重。予以活血養血之劑。而治其傷損。以小柴胡加竹茹。滑石。以和陰陽而止其嘔噦。不一月而可無恙矣。奚憂哉。果從予言而進食服藥。調理五日。寒熱嘔噦皆止。後以丹參。劉寄奴各三錢。

爲臣。五加皮五錢爲君。香附一錢爲佐。入四物煎服。果一月而全可矣。程孺人病起而聞者皆曰。七發起太子之病。觀於孫君益信。

歙潛口汪召南令郎。年十四。患蠱脹大如覆箕。經醫三十餘人。見症皆駭而走。獨市之幼科汪養直者。調理數數見效。第此子溺於養。縱口腹不守戒忌。病多反復。一日語召南曰。郎君之症。非求之孫生生者不能成功。召南曰。聞此公多游吳浙。縉紳間。何可以月日致也。養直曰。歸矣。吾有妹適羅田。爲方與石某嫂也。舊歲患症如蠱。治經彌歲無功。生生子立全之。吾推轂孫君者。豈有他腸。爲郎君也。召南卽浼羅田延予。予至日已晡矣。觀病者腹脹大極。青筋縷縷如蚯蚓。大上自胸脯。至上腕而止。惟喜其不下現也。臍平。四肢面目皆浮大。兩足胫骨上各裂開。大出清水。一日間數爲更衣。易被陰囊光腫如泡。淫淫滲濕。發寒熱。脈以手腫不能取。必推開其腫。下指重按。浮而六至。予曰。症可謂重之極矣。僅可恃者。目瞳子有神耳。餘皆險惡。將何以治。養直知予至。亟過相陪。宣言曰。病重不必言。引領先生久矣。幸爲投劑。生死無憾。予曰。且先爲理表。若表徹稍得微汗。使肺氣少利。則小水可通。召南喜而亟請藥。乃用紫蘇葉、蘇子、陳皮、麻

黃各一錢。桑白皮八分。防風、杏仁各七分。炙甘草、桂枝各二分。生薑三片。水煎服之。五更乃有微汗。次早面上氣稍消。胸脯青筋皆退。餘症雖仍舊。機括則可生矣。仍投前藥。次日腹與四肢皆有皺紋。惟小水未利。乃改用破故紙、蒼朮、赤茯苓、澤瀉、桑白皮、赤小豆、桂心、木香。二帖而小水利。駸駸已有生意。乃以飲食過度。大便作瀉。又以四君子湯加苡仁、破故紙、澤瀉、山查、砂仁調理而全。安此症予閱歷者不下數十。然青筋未有如此之粗。足脰出水有之。未有出水處如鮎魚口之大。而取效亦未有如此之速。蓋此子體未破而真全。故症雖重而收功速也。數十人間有五六不能成功者。由其縱慾恣情。不守禁忌。非藥之罪也。召南昆仲見人談醫。輒以不佞爲稱首。予笑曰。君得無到處逢人說項斯者耶。乃汪養直亦醫道中白眉。乃不收功於後。病者不忌口過耳。於養直何尤。養直不矜己之功。亦不恃人之功。所謂忠厚長者非耶。

岩鎮鄭景南丈病臥年餘。百治不效。昔體豐腴。今瘦骨立。飲食少進。新都名士皆辭不治。其家聞昔年方士榮孺人蠱症。時師亦皆辭去。予爲起之。因徵予治。時則六月望也。診其脈。左弦大。右關滑大。兩尺俱無。惡心腹瘦削。狀如仰瓦。腸鳴。

如雷。晝夜不往。小水不利。肌膚及眼珠色若黃金。腹中有塊如撲。動跳不止。足膝以下皆冷。飲食不入。予詳思其病機。昔肥而今瘦者。痰也。形雖瘦而目炯炯有神。先以五飲湯。姑試之以觀其勢。再爲加減。因用旋覆花八分。破故紙一錢。肉桂三分。白朮、茯苓、澤瀉、陳皮、半夏各八分。生薑三片。水煎服之。二帖。惡心腸鳴皆止。次早飲食稍進。舉家欣欣色喜。令岳程鍾山公於予爲石交。聞病有起意。心殊異之。不知爲予。因而過訪。見予撫掌大叫稱快曰。吾固知是公也。指其甥而語之。此卽所嘗與爾曹言者。聞久爲西吳縉紳遞留。不意今歸。誠吾壻之幸也。相與談對兩日而別。別之時。景南飲食稍加。小水利。肌膚面目黃氣退。漸有生機。不虞逾半月。爲拂意事所激而怒。復吐痰不思飲食。家人驚惶無措。亟請予診。兩寸滑大。左關弦勁搏指。右關亦滑大有力。兩尺沉微。予語之曰。病甚重。脈非前比。且不敢以萬全許。第盡吾心爾。病以藥力而同。君之福也。時爲七月之朔。予因留視七日。日進一劑。劑以人參、陳皮、半夏、茯苓、香附、白蔻仁、黃連、旋覆花、麥芽、甘草與服。服三日。惡心止。大便有稠痰下。其中間有瘀血。此皆大怒所致。故經云。怒則傷肝。甚則嘔血。并下洩上吐。亦或有紅點子在痰中吐出。

是其徵也。後改用六君子湯。加麥芽、黃連、枇杷葉、白扁豆調理。病勢駸駸向安。腹中如撲之塊亦漸消去。大僅如指耳。肌肉亦生。能下榻舉足以步。市上之人稱奇。

後聞臘月又被鬱怒。頸發癰瘰。外科以藥潰。服蜈蚣敗毒藥。卒莫能收口而終。

孫文垣醫案 卷三 新都治驗

孫文垣醫案

明 新安 孫一奎文垣甫輯

鄞縣 曹赤電炳章圈點

卷四

新都治驗

孫文學子元。素多瘡疥。近因沐浴。鼻涕出紅。面足浮腫。汗多。左脈大而有力。右寸亦大。據脈多思而氣不暢。以葛根、大腹皮、厚朴、赤茯苓、青蒿、澤瀉、白朮、鬱金、升麻、木通、滑石、黃芩水煎飲之。浮腫漸去。惟鼻紅尚在。口且渴。改用當歸、白芍藥、知母、甘草、石斛、麥門冬、五味子、山梔子、玄參調理而愈。

一婦因夫荒於酒色。不事生計。多憂多鬱。左跨疼痛。且及於膝。小水頻數。大便頻併。臍腹脹疼。口乾。脈之左手數。右手弱。近又發熱惡寒。一因痛疼。時刻不寧。血食積痰飲。瘀血流於下部。是厥陰之經。挾鬱火而痛。怒成腸癰。與神效瓜蒌散。

一帖。半夜後。痛卽減半。汗亦尋止。次日診之。數脈稍退。小腹堅如石。按之且痛。再與前藥。其夜環跳穴亦作痛。直至於膝。小腹稍軟。小便仍痛。大便亦未通利。仍與前藥。每帖用大瓜蒌二枚。加牡丹皮、莪朮、五靈脂、金銀花。服下。大便利而熱退痛止。小水亦長。諸症悉平。

太學恆宇姪令堂。仲春。右肩搖筋腫痛。夜尤甚。次日痛連胛下。出牖入曲池。且洒淅寒熱。以二陳湯加南星、酒芩、白殭蠶、羌活、秦艽、藏靈仙。服後至子丑時。痛乃減半。而筋不搖矣。紅腫略消。次日減去南星。加當歸、川芎。其夜肩痛又遞減。但一夜不睡。口乾舌硬。用川芎、當歸、防風、秦艽、甘草、藏靈仙、白殭蠶、酒芩、白芍藥。服此熱全退。痛全減。飲食始進。以人參、川芎、白芍、當歸、甘草、秦艽、殭蠶、防風、陳皮調理。良安。

旋姪孫君錫。頭痛胸背脹。飲食下膈。便吐。咳嗽不住口。痰濁如膿。大便結燥。脈之。獨右寸洪大。以二陳湯加竹茹、滑石、石膏、酒連、麥冬。連進四劑。夜與益元散兼服。而嗽吐俱止。惟痰濁如膿色。且腥氣觸人。此將欲作肺癰。改用牡丹皮、麥門冬、山梔子、甘草、貝母、枳殼、桑白皮、紫苑、知母、當歸、生地黃、桔梗。四帖全安。

姪孫爾嘉內人。三孕而三小產。六脈滑數。乃氣虛血熱也。由其熱。故多滑下。因其血頻下。心甚恐怖。終日偃臥。略不敢起身。稍起。血即大下。與生地黃、白芍藥、白朮、地榆、桑寄生、續斷、甘草、升麻、椿根白皮、黃柏、條芩服之。而血三日不來。惟白帶綿綿下。過五日後。因有不得已事。起身稍勞。血又大下。予謂血滑已久。如水流行舊路。若不濇之。必不能止。又思血海甚熱。亦肝風所致。防風子芩丸。正與病對。宜製與之。又製白芍藥六兩。側柏葉、條芩各三兩。防風、椿根白皮各二兩。蜜丸服之。從此血止胎安。足月而產一子。此後連產三子。並無胎漏之患。後遇胎漏。遞用此法。莫不良已。附告同志。以便取用。

鴻臚被垣姪內人。喉中掀癢。咳唾紅痰。兩寸關洪大。內熱生瘡。山梔子、小蘗、生地、牡丹皮、滑石、青皮、麥門冬、甘草、黃連、瓜蒌。水煎飲之。而血止嗽除。後遇勞心。即咳嗽。喉中血腥。總由上焦熱盛而然。以枇杷葉、山梔子、生地、白芍藥、甘草、牡丹皮、地動蜂、天花粉、滑石、紫苑。常服三五劑。兩月而安。

戴萬奇。文中痰後。而右手不能伸動。與之牛膽、南星、陳皮、茯苓、甘草、天麻、僵蠶、黃連、木通、石菖蒲。防己。服後手稍能動。惟左邊頭痛。喉舌俱痛。大便秘結。三日一

行。又與川芎、荊芥、玄參、桔梗、柴胡、酒芩、蔓荊子、甘草、杏仁、枳殼。水煎飲之。諸症悉減。但下午體倦。右邊頭微痛。後又爲怒氣所觸。舌掉不言。頭復大痛。與連翹、甘草、山梔子、薄荷、石菖蒲、遠志、木通、麥門冬、五味子、白芍藥、黃柏。調理而愈。

亮卿文學內人。頭痛遍身痛。前後心兩乳皆脹。玉戶撮急。肛門逼迫。大便三日未行。口乾。因大拂意事而起。下午發熱似瘧。惡心煩躁不寧。而時當盛暑。乃怒氣傷肝。挾暑熱而然。以石膏三錢、青皮、柴胡、枳殼各一錢、半夏、麴、黃芩各八分、甘草、桔梗各五分。夜與當歸龍薈丸下之。大小便皆利。熱退而諸症悉減。惟略惡心。與清脾飲兩帖全安。

梓林兄令眷。右手痛風。小水頻迫。起身稍遲。卽出不禁。足有浮氣。年過六十。右寸關脈濡弱。左手和。此脾虛停濕之症。近且咳嗽。用六君子加蒼朮、石菖蒲、遠志、大附子、晚蠶沙。倍加薏苡仁。緩治而平。

一婦經不行者三月。大便瀉。腹脹嘈雜。吐酸水。時下白帶。常惡心。自以爲有孕。予脈之。候非有孕。乃脾經有濕熱。心經有瘀血症也。與二陳湯加白朮、澤瀉、猪苓、酒連、木通、吳茱萸、滑石、麥芽、山查。瀉止腹寬。經行。腰腹作痛。以川芎三錢。當歸

五錢。香附、丹參、桃仁各一錢。水煎服之。經雖行。口中吐出黑血水甚多。且亦有如膿者。改用四物湯加牡丹皮、丹參、桃仁、紅花、山梔、滑石。調理兩月而痊。

姪婦程氏。下午喉痛。近來痰多。暈厥。一日二三發。頭痛面赤。素未生育。左脈弦大。右寸關滑。大力以荊芥、薄荷、甘草、桔梗、玄參、殭蠶、柴胡、枳殼、竹茹、貝母。水煎飲之。連進二帖。其夜得睡。惟背脹怔忡。痰猶不清。面多熱。用黃芩、枳殼、甘草、桑白皮、地骨皮、天花粉、玄參、前胡、半夏、麴、橘紅、山梔仁。調養而平。

江鏗兄時。疲熱病。被發汗過度。熱留胸中。煩躁不止。嘔惡不安。汗竟不斂。口且渴。脈之。獨兩關洪大。此陽明之熱。尙在。當以白虎生脈湯爲主。石膏五錢。知母三錢。人參、白芍藥、甘草、石斛各一錢。麥門冬二錢。五味子十五粒。急煎飲之。而熱退。繼以益元丸服之。而吐亦安。

何明吾時。疫食復。大便不通。嘔惡內熱。昏憤不省人事。或作夢語。循衣摸床。此熱在心。包絡經。以竹茹、麥冬、知母、山梔各一錢。陳皮、半夏、麴、酸棗仁、枳實各八分。甘草三分服之。至夜半。人事稍清。餘熱未散。用石膏三錢。知母二錢。竹茹、麥門冬、生酸棗仁各一錢。天花粉、陳皮各七分。枳實、麥芽、半夏、麴各六分。水煎飲之。

下午大便行而熱退。諸症悉愈。

族姪元素。春溫頭痛發熱。左脈弦大。右洪大。以小柴胡合白虎湯。二帖而愈。乃爲食復。發斑色紫。神昏。人事不省。身重不能轉動。卽水火皆不自知。合目鼾睡。形如醉人。面赤發熱。舌胎外黃內黑。皆有芒刺。三日後。予至脈之。六部俱浮洪。以三黃石膏湯。加枳實、鱉甲進之。稍得微汗。大便如有真糞。次日纔開目言語。乃進粥一盞。改以小柴胡湯。加山梔、枳實、鱉甲、白芍藥。調理而愈。

僕子孫安空。晨出門。途次食麵三碗。飢勞感疫。因麵內傷。表裏皆熱。及至績溪衙中。昏悶譫語。頭痛身疼腹痛。醫不察爲勞倦感疫。遽以遇仙丹下之。大便瀉三四十行。邪因陷下而爲挾熱下利之候。急歸視之。舌沉香色。額疼口乾。燥渴煩悶。昏昏憤憤。脈左弦數。右洪數。但不充指。知爲誤下壞症。以柴胡、石膏各三錢。白芍藥、黃芩、竹茹、葛根各一錢。天花粉、甘草各五分。山梔子、枳實各七分。葱白五莖。水煎服之。後半夜吐虵一條。乃稍得睡。次早大便猶瀉二次。嘔吐酸水。腹仍痛。改用小柴胡加滑石、竹茹。夜熱甚。與絲瓜汁一碗。飲既。神頓清爽。少頃藥力過時。煩熱如前。再以絲瓜汁一大碗進之。卽大發戰。予謂此戰非寒戰。乃作

汗之徵耳。不移時。汗果出而熱猶然。憶活人書云。再三汗下熱不退。以人參白虎湯加蒼朮一錢如神。迹此。再加玄參、升麻、柴胡、白芍藥、黃連。飲後身上之斑先發者紫。後發者紅。中夜後乃得睡而熱散。斑尋退去。腹中微疼。腸鳴口渴。右脈尙滑。左脈已和。再與竹葉石膏湯加白芍藥、蒼朮。服後睡安。腹仍微痛。用柴胡、芍藥各一錢。人參、酒芩、陳皮、半夏各六分。甘草三分。烏梅一枚。服此腹痛漸減。精神駸駸長矣。惟兩跨痛不能轉動。此大病後汗多而筋失養之故。宜當補益。人參、黃耆、白芍藥、桑寄生、枸杞子、薏苡仁、桂心、牛膝、熟地黃。水煎服。後加木瓜、黃柏、當歸。減去桂心。調養而痊。

一人喉疼。夜臥氣壅不能伏枕。痰嗽不出。遍身生瘡。面足皆浮。夜間發熱。睡醒多出冷汗。此由脾經有濕熱。水氣不利而然。薏苡仁、款冬花、陳皮、貝母、前胡、蘿蔔子、桔梗、桑白皮、茯苓、甘草。服此喘嗽大定。乃得伏枕。惟下體腫脹不消。且膚皮緊硬。小水黃。動作則頭眩。用大腹皮、茯苓皮、陳皮、桑白皮、五加皮、生薑皮、木瓜、薑黃。四劑而消。

善易數者何洗心。每飲食稍冷。饘粥或稀。必作脹瀉。理脾之劑。歷試不瘳。就予診

之。左三部皆濡弱。右寸亦然。關滑。尺沈微。此下元虛寒所致。法當溫補。以補骨脂、杜仲、兔絲子各二錢。山茱萸肉、人參、山藥各一錢。白茯苓、澤瀉各八分。肉果五分。數劑而愈。

程湘孺人孫氏。鼻衄後。眩暈嘈雜。嘔吐清水。夜臥不安。腹中飢而食不下膈。由脾虛肝膽有鬱火也。以人參、黃連、白朮、扁豆、甘草、陳皮、半夏、竹茹、茯苓、石膏水煎。調養而平。

姪君孝。後溪兄次子也。三月患頭項痛。腰脊強。遍身如被杖。臍腹亦痛。口渴不寐。飲食不進。六脈浮數。吳醫以爲陰虛。爲滋陰降火。三投而三劇。反加嘔惡。又與疏通熱尤不退。下午煩亂。延方和宇丈視之。以爲外感。擬進人參敗毒散。吳爭之。謂陰虛體弱難再汗。仍用四物湯加柴胡、葛根、薄荷、黃芩、知母而熱如焚。神且昏冒矣。予時遠出促歸。診之。六脈浮弦而數。鼓指。語之曰。此春溫症也。方診良是。因復加內傷。以故病劇。滋陰之劑壅而作滯。且引邪入於陰分。宜乎熱加而躁悶也。法當清解兼消。可愈無傷。以二陳湯加羌活、柴胡、防風、麥芽、山查服下得微汗。熱退其半。惟下午作潮。大便未行。腰臍之痛不止。用小柴胡湯加葛

根、白芍藥、青皮、黃連、山查。飲下熱又少退。大便已行。腰臍之痛。亦隨減去。但不
知餓。再以柴胡、甘草、青皮、枳實、麥芽、知母、黃芩、白芍藥。諸症悉平。惟覺體倦乏
力。加人參、白扁豆、薏苡仁、減去柴胡、青皮。調養而痊。

一僕婦。頭疼喉嚨痛。咳嗽嘔惡吐痰。胸膈作脹。經水適來。身熱口乾。此少陽經痰
火症也。用柴胡為君。半夏、白芍藥、竹茹為臣。葛根、天花粉、橘紅、桑白皮、黃芩、知
母為佐。甘草、桔梗為使。一帖。微汗而熱散痛除。惟痰嗽不轉。小水短濇。柴胡、知
母、麥冬各八分。白芍藥一錢。滑石三錢。黃芩、貝母、竹茹、桔梗各七分。五味子十
二粒。甘草三分。一帖而瘳。

族姪婦范氏。大參晞老女也。素有痰涎。胸腹痞脹。近因乳腫。大發寒熱。欲成癰毒。
以加味神効瓜蒌散二帖。寒熱雖退。而腫不消。用貝母、白芷為臣。瓜蒌為君。赤
芍藥、當歸、連翹為佐。青皮、甘草、柴胡為使。痛雖減而腫仍不消。脈之近數。知已
成膿。乃與內託十宣散。加金銀花、蒲公英。兩帖而膿潰。因脚上生瘡而有浮氣。
前方去蒲公英、金銀花。加薏苡仁、蒼耳子。調理全安。

表姪女黃氏。孕已七月。患赤痢腹痛後重。體素弱。舉家甚憂。以白芍藥三錢。條芩

一錢五分。白朮、地榆各八分。甘草三分。二帖而愈。後五日報云。因稍勞。痢又復來。教以當歸三錢。川芎一錢半。真阿膠二錢。艾葉三分。一帖全瘳。

一程氏婦。吾孫門女也。小產後二十日矣。患赤痢一日十餘次。怯寒惡食。小腹脹痛。診之。右寸滑大。知其虛中有熱。憶其惡露未盡。故小腹脹痛。專科泥丹溪產後大補氣血之語。概施之。因而作痢。乃翁曰。病尙怯寒。何云有熱。予曰。書云。惡寒非寒。明是熱症。由熱極而似水也。飲藥後。當自知之。以白芍藥、當歸、滑石爲君。桃仁、酒芩、酒連爲臣。木香、桂皮、檳榔爲佐。青皮爲使。服下果去臭黑瘀血甚多。小腹頓寬。惟口乾小水少。惡心怕飲食。體倦。仍裏急後重。人參、川芎、白芍藥各一錢。當歸一錢五分。酒連、陳皮各六分。木香二分。外與清六丸服下。熱除。痢減十之八矣。但大便不實。惡心虛弱。以四君子湯加酒炒白芍藥、陳皮、木香、肉果、酒連、當歸養之而平。

孫竹塹所歸。途次受暑。又爲酒麵所傷。因而作吐。胸膈痞悶。時師以消導之劑。燥動脾火。口渴嘈雜。躁亂不寧。目珠如金。一身盡黃。已成疸症。診獨右寸脈洪大有力。先以溫膽湯倍加香薷、滑石、葛根解暑止吐爲君。黃連、麥門冬清熱止渴。

爲臣。使溼熱散而黃自瘳也。連與三帖。吐止食進。黃亦定矣。再與五苓散。加青蒿、葛根、滑石、黃連、枳實八劑而黃釋然。

程菊泉暑月患喘嗽。咳連聲。濃痰滾滾。行動則喘促不寧。夜分口渴。胸膈脹悶。兩寸脈滑而數。兩關弦。此肺有宿痰。膽有鬱火。內經云。火鬱發之。又云。風寒外束者可發。用紫蘇子、半夏、杏仁各一錢。石膏二錢。款冬花、桑白皮各八分。桔梗、枳殼各五分。麻黃三分。服下無進退。改以杏仁、陳皮、人參、貝母、款冬花、麥門冬各七分。薏苡仁一錢五分。桔梗、知母各五分。五味子十一粒。桑白皮一錢。陳皮六分。服下痰減大半。胸膈仍不舒。口仍乾。脚仍熱。前方減去款冬花、五味子。加枳殼、葶藶子。兩帖全安。

程應禎兄。胸膈背心時常脹疼。頭眩暈。脚軟弱。手指痛。咳吐紅痰。診其脈左關弦大。右寸關滑大。予謂此食飽後感於怒。老痰瘀血積在上焦。宜其胸背脹疼而熱壅也。治當清化上焦。使新痰不生。宿瘀磨去。則萬全矣。如落時套。用地黃、山茱萸等滋陰降火之劑。是以滯益滯。則熱無由去。瘀無由消。而痰益增不去也。病者聞言謬然曰。未見公時。業已服過一月久矣。疑其飲食損而熱。尋加胸背

痛脹遞長哉。予曰。今反轍幸早耳。再遲則敗事。亟以青皮、枳殼、陳皮快其氣。而疏其壅滯。蓋痰隨氣行也。貝母、桑白皮以消餘痰。而清其嗽。牡丹皮、滑石、桃仁消其瘀血。山梔仁開鬱清熱。白芍藥伐肝補脾。甘草調和諸性。緩而理之。當見其去泰去甚也。別後半月。復書報云。胸背之脹減三之二。血已十日止矣。痰如舊。改以山梔仁、牡丹皮、丹參、赤芍藥、桃仁各八分。滑石三錢。五靈脂、當歸尾各一錢。半夏麴、青皮各六分。諸症悉去。獨足心熱。再以黃柏、知母、苡仁、牛膝、甘草、白芍藥、茯苓、陳皮、貝母、石斛、牡丹皮調之如初。

虛山內人。胸脇脹痛。五更嘈雜。每一嘈雜。則痛發更甚。左寸關脈洪滑。右關亦然。此肝膽有鬱火。胃中有膠痰。乃有餘之疾。內經云。木鬱則達之。蓋木火之性。貴乎疏通。當以龍會丸條而達之。顧痛則不通。通之則不痛也。服龍會丸一錢五分。大便行一次。痛隨殄迹。惟聲不開。以陳皮、柴胡、貝母、茯苓、甘草、白芍藥、酒芩、香附、杏仁、桔梗調之而安。

一婦當暑月。小便不利而痛。玉戶脹。且又便血發熱。左脈弦數。右脈短弱。此肺氣不足。肝火太熾。蓋肝爲血海。肝又主小便。玉戶爲肝經所絡之地。治當疏決肝

經壅塞。脾氣暢。則新血得以歸經。熱解。則小水可不痛。而腫亦可消矣。以滑石三錢。桃仁、當歸、白芍藥各一錢。柴胡、黃連、人參各八分。川芎六分。甘草、桂皮、白芷各三分。四劑而病如失。

族弟婦戴氏。腹中痛。多在臍腹。白帶如注。四肢痠痛。大便裏急後重。已成赤白痢矣。脈之兩寸關俱滑數。尺亦數。以白芍藥、當歸、黃連、黃芩、木香、檳榔、桂皮、甘草、滑石、桃仁、桔梗一劑而紅止。惟小水短澀。下午發熱。大便一日夜仍四行。改用白芍藥、當歸、白朮、陳皮、滑石、甘草、茯苓、厚朴、酒連、酒芩、桔梗、柴胡、木香。飲下。諸症悉愈。惟頭痛腰疼。再以桂心、當歸、白芍藥、白朮、茯苓、甘草、酒芩、酒連、破故紙、木通、黃柏煎服全安。

族弟應章。胃腕當心而痛。手不可近。疑有瘀血使然。玄胡、五靈脂、牡丹皮、滑石、川芎、當歸、甘草、桃仁、桔梗、香附。水煎。臨服加韭菜汁一小酒杯。其夜痛止得睡。飲食亦進。惟大便下墜。逼迫不安。此瘀血已動欲下行也。前劑減去韭菜汁一帖全安。

予弟淑南。額痛遍身疼。口乾。舌胎黃厚。左脈浮大。六部俱數。時當仲秋初旬。以小

柴胡合白虎湯。加羌活。熱仍不退。下午用六神通解散。以葱湯調服三錢。熱稍退。至半夜後。又復熱。額疼。頂巔尤甚。舌根黃且焦黑。小水赤痛。煩躁不睡。遍身又痛。此三陽合病暑症也。次日以小柴胡。大加石膏爲君。藁本、白芷、竹葉、粳米、生薑、大棗。少頃。汗大出至足。熱始盡退。猶煩躁不睡。仍以小柴胡湯。加桂枝、山梔子、竹茹、竹葉。飲下。煩躁寧而得睡。餘熱悉平。精神爽而向安矣。

一富家婦。當仲秋。大小便秘者三日。市師以巴豆丸二帖。大便瀉而小便愈秘。腹悶。臍突二寸餘。前陰脹裂。不能坐臥。啼泣呻吟。欲求自盡。此轉臍病也。柏樹東行根皮一寸。滑石二錢。玄胡索、桃仁、當歸、瞿麥各一錢。水煎。臨服入韭菜汁半杯。服後食頃。而小便稍行。玉戶痛甚。小便非極用力努之。則不能出。改用升麻、桔梗、枳殼、玄胡索。煎成。調玄明粉二錢。乃提清降濁之意。服後大小便俱行。始不脹急。次日報云。每大小便來時。腹中先痛。有淡血水。小便短。再以丹參、丹皮、當歸、白芍藥、甘草、青皮、香附、玄胡、茯苓、山梔子、山查。兩帖。各症良安。

孫文約孺人。年八十有三。胃腕疼痛。手不可近。腹中飢而飲食不能下。兩寸關脈滑大。兩尺沈弱。此血虛氣滯症也。先與積氣丸。一服而痛減半。再用生白芍藥。

山梔子、五靈脂各一錢。酒炒白芍藥二錢。粉草、山查、香附各八分。一帖全安。應章族弟。三陰瘧發於子午卯酉日。已四越月矣。每發於夜。熱多寒少。左脈微弦。右關滑大。以二陳湯加柴胡、黃柏、川芎、當歸、黃連兩帖而熱稍輕。飲食不進。四肢懶倦。脾氣大虛。白朮、何首烏各三錢。鱉甲二錢。青皮七分。烏梅一個。一帖而截。

太學程好吾。倜儻博洽士也。季春。患兩太陽痛。胸脇稍疼。口渴。大便水瀉。左脈浮弦而數。中按有力。右關滑大。予曰。春溫症也。柴胡、前胡、葛根、粉草、青皮、黃芩、知母、桔梗、半夏、麴、石膏。半夜後得微汗。因起大便感風。續又發熱。依然口渴。更覺煩躁。石膏三錢。知母、柴胡各二錢。葛根、黃芩各一錢。粉草、桔梗各五分。竹葉二十片。兩進而汗出熱解。諸症悉平。四肢尙倦。口微乾。語言乏力。以生脈湯加薏苡仁、石斛、甘草、白芍藥、黃芩調養如初。

令媳長卿之婦。腹中微疼。經行不流利。喉痛。四肢麻木作戰。不知飢餓。右脈洪大如菡豆。以川芎、香附、麥芽、山查、烏梅、粉草、桔梗、酒芩、防風、荆芥、白朮、茯苓、四劑而安。次月經水大行。又以黃耆、阿膠、蒲黃各一錢。白芍藥二錢。粉草三分。一帖

而止。此後但覺濁氣下墜。屁從子戶中出。以補中益氣湯。加酒炒黃連。調養而平。

族子應章之弟。十月發三陰瘧。至次年仲春未止。每發於辰戌丑未日。午後寒多。熱少。夜有盜汗。左脈軟弱。右關尺弦數有力。用白芍藥。當歸各一錢。白朮二錢。柴胡。川芎。粉草。砂仁。桂枝。酒芩各三分。生薑三片。水煎服。再以何首烏。白朮。鱉甲各三錢。柴胡一錢。青皮。酒芩。甘草各五分。烏梅一個。生薑三片。水煎。臨發日五更服之。兩帖而止。後半月下身大生瘡癰。以東坡四神丹調理而痊。

湘潭吳中岳孺人。先感風邪。後傷飲食。發熱頭疼。腹中作脹。醫與巴豆丸瀉之。而熱不減。後醫又以大黃重瀉之。而熱亦如初。再後醫謂瀉而熱不退者為虛。大用參耆。白朮補之。補經四日。神氣昏沉。不知人事。乃敦予診。左脈弦數。右關尺沉數有力。舌尖沉香色。舌根焦黑刺。語言含舌不清。扣前服藥。始知妄下妄補。不思飢饉之餘。疫氣為厲。誤成壞症。危而且殆。姑以知母。柴胡各三錢。石膏六錢。枳實。天花粉各五分。粉草。黃芩。麥冬各一錢。山梔子。生地黃各七分。人參六分。竹葉三十片。生薑三片。水煎飲之。中夜後。人事稍清。微有汗。舌稍柔和。言語

已不含舌。驥驥然有生氣矣。次日前方減去地黃。加白芍藥。舌心焦黑盡退。諸症十減其七。但大便五日未行。遍身尙痛。咳欬。與七製化痰丸二帖。再以石膏二錢。麥冬、貝母各一錢。前胡、枳實、黃芩、梔子各六分。甘草三分。桑白皮八分。煎服而安。

鮑子五保。時疫耳聾。體有熱口乾。大便五日不行。人事不清。竹葉、黃芩、柴胡、半夏、麴、甘草、枳殼、天花粉、知母煎服。而熱渴更甚。大便行而瀉。手攣縮不能伸。且發呃。或又咳嗽。改以柴胡、石膏、竹茹、人參、甘草、麥冬、半夏、麴、橘紅、黃芩、黃連一帖。而呃止瀉除。諸症悉罷而安睡矣。

僕子孫守。以中麻咳嗽無痰。上唇厚腫。體熱。大便燥。聲啞。以麥門冬、知母、瓜蒌仁、甘草、白芍藥、桑白皮、地骨皮、石斛、枳殼、五味子。服後嗽減其七。乃減去瓜蒌、枳殼。以其大便已溏。加生地黃、當歸、薏苡仁。調而理安。

僕子得貴。春溫頭痛體熱面赤。舌心焦燥。以石膏、柴胡、葛根、甘草、黃芩、知母、天花粉、白芍藥服之。而舌不焦黑矣。進粥太早。半夜後又復發熱。中腕硬痛。與大柴胡湯一帖。汗出津津。大便行二次。腹痛不止。乃以小承氣湯。調下玄明粉一錢。

大便又行二次。熱不退而痛全減。旋作鼻衄。改以石膏、牡丹皮、生地黃、山梔子、甘草、升麻、黃芩、赤芍藥。一帖而熱散衄止。

元素姪令政。春後經水適止。餘熱不退。口中甚渴。胸脇痛而耳重。脈左弦數。右滑大而數。小柴胡加石膏、知母、桔梗、枳殼、葛根、瓜蒌、半夏、麴。服下而熱渴如舊。改用柴胡二錢、人參、甘草、天花粉、黃芩各七分、白芍藥、紅花、當歸、牡丹皮、知母各八分。調理而瘳。

朱氏子天送。時疾頭疼。身若燎炭。口渴氣促。申酉刻熱潮更甚。舌心焦黑。遍體紫斑。語言含舌不清。時多發呃耳聾。先治者誤進藿香正氣散。而加嘔逆水瀉。又醫以柴苓湯。嘔益甚。熱轉增劇。迎予爲診。六脈俱洪數。此少陽陽明合病之疫。以石膏五錢、知母、柴胡各三錢、黃芩一錢五分、半夏麴、麥門冬、竹茹、橘紅、葛根各一錢、粉草、枳實各五分。服下熱退其七。舌不燥矣。再以柴胡、半夏麴、白芍藥、竹茹各一錢、石膏三錢、麥門冬、知母各一錢五分、黃連、甘草、人參各五分水煎。飲之而斑退。諸症悉平。

朱桃源內人。胃腕疼。年五十有二。經水尙行不止。一月且二至。每至十餘日不淨。

白帶淫淫下。常苦夢遺。近又眩暈。先與積氣丸一帖。以止胃腕之痛。再以逍遙散。加石蓮子、蓮花心、五倍子、煉蜜爲丸。每早晚白湯送下二錢。夢遺竟絕。桂亭兄壯年原有濕熱痰積。年逾艾。偶墜轎跌傷背脇。專科以草藥敷貼於外。內以藥酒攻之而愈。越十五年。左脇痛手不可近。左脈弦數。堅勁搏指。小腹亦痛。知爲舊瘀及痰積作祟。以青皮、赤芍藥、黃連、當歸尾各一錢。桃仁一錢五分。大黃二錢。滑石三錢。水煎。臨服調玄明粉一錢。服下吐出痰涎碗餘。大便僅行一次。而左跨及腿膝皆痛。夜睡不安。由小腹痛甚之故。此瘀物欲行而未能也。再與大黃、當歸尾、紅花、牡丹皮、赤芍藥各一錢。桃仁二錢。滑石三錢。青皮八分。調玄明粉一錢。再下之。大便行三次。皆沉香色稠粘瘀物。腹痛雖除。跨痛仍在。用乳香、沒藥、歸尾、紅花各一錢。桃仁、滑石各三錢。大黃二錢。穿山甲、丹參各一錢五分。服後大便行四次。所下皆紫黑如筋膜者。不可勝計。諸病悉減。因食雞湯牛肉。臍腹又痛。裏急後重。此餘積未盡。欲再下之。舉家驚怖。謂六旬已外之年。已下數次。恐脾弱不能再下。予曰。醫貴認病。何以年齒數下拘哉。今藥力到而積已動矣。破竹之勢。可迎刃而解。若失時姑息。恐他日滋蔓。欲下難動也。行後

而補。庶無反顧之憂。大兄然之。以紅花、桃仁、當歸尾、赤芍藥、山梔仁、玄胡索、牡丹皮、穿山甲、滑石煎調玄明粉下二次。紫黑瘀物如前之半。腿跨小腹疼痛則俱釋。次日用人參、茯苓、白芍藥、粉草、陳皮、山查、桂心、當歸、半夏調養半月。精神步履飲啖一如舊矣。

江右熊二官。疫後食復。額痛口渴。譫語神昏。面青舌黑。鼻中停灰。不省人事。小水短少。勢已危急。以小柴胡湯減去半夏加石膏、知母、當歸、山梔子、豆豉、枳實。急與服之一飲便得微汗。熱退大半。次日以柴胡、滑石、甘草、知母、石膏、人參、桔梗、黃芩、天花粉與之。舌黑始退。人事乃清。飲食纔進。霍然生矣。

堂弟東里內子。咳嗽吐紅。發熱頭眩。脚膝乏力。先已服滋陰降火。十數劑不愈。飲食漸少。精神漸羸。懇予治之。兩寸脈累累如貫珠。兩尺俱軟弱。此上盛下虛之候。上盛者痰與瘀血也。下虛者腎陰弱也。且生平好飲。不無助熱。法當先清上焦。化去瘀血宿痰。然後以養陰藥收功。則病根可刈。癆瘵可免也。用貝母、枳殼、桑白皮清肺化痰。滑石、桃仁、牡丹皮、小薊消除瘀血。山梔子、甘草、白芍藥養血。以祛餘熱。三帖後紅漸稀少。前後心始不脹痛。惟痰嗽不止。大便結燥。減去滑

石、桃仁。加瓜蒌、黃芩、紫苑。調養而平。

由溪程竹坡孺人。年過六十。爲疫所染。頭疼口渴。舌胎前黃燥。後紫黑。身熱沉重。人事昏憤。語言錯亂。小水短澀。嘔逆煩燥。合目不開。譫語不徹口。耳聾胸脇痛。時五月初旬也。迎予爲診。左浮而弦數。右洪長而數。診畢。仲君清夷問曰。何症。予曰。此熱病類也。清夷曰。因體熱。便名熱病乎。予曰。否否。仲景謂春溫過時爲熱病。矧茲又爲熱厲也。邪在陽明少陽二經。又問曰。可生乎。予曰。脈症對。可生也。此症遠邇染延甚夥。不足怪。清夷曰。適方和宇亦云。少陽陽明二經之病。二公所見既同。乞的確一方爲幸。予與和宇診多符合。卽以柴胡、石膏爲君。知母、麥門冬、天花粉、竹茹爲臣。黃連爲佐。甘草、枳殼、桔梗爲使。連進兩帖。丑刻微汗。熱退神清。不虞。卽進葷粥。下午又復大熱。譫語昏沉。舉家驚怖。予曰。此食復也。卽以小柴胡湯加山梔子、枳實、淡豆豉、鱉甲。四劑。復得汗。熱從散去。神頓清爽。仍口渴煩躁。以生脈湯加黃連、香薷、竹茹、竹葉而安。

程家內眷。藏溪汪氏女也。乃夫歿於疫癘。新寡七日。疫卽及之。大熱。頭疼口渴。胸脇併痛。醫與小柴胡湯。夜忽夢夫交洩而覺。冷汗涇涇。四肢如解。略不能動。神

昏識語。面如土色。舌若焦煤強硬。迂予診之。六脈沉弦而數。大小便俱秘。此亦陰陽易類也。疫後有是危已極矣。予以生脈湯加柴胡、黃芩、桂枝、甘草水煎成。將乃夫昔穿舊袴襠燒灰調下兩劑。而神醒體溫汗斂。舌始柔和。焦亦漸退。次日仍以前方加酸棗仁、竹茹。四肢始能運動。乃飲粥湯。僅一子甫十歲。一女甫十四。繼被疫困。均以六神通解散。汗之而安。妯娌及婢輩六人。皆六神通解散。療之。舉家德予。以爲再造再造。

族姪太學從明。夏初由客邸患滯下。調半痊而歸。因食隔宿猪首而復。裏急後重。晝夜三四十度。日漸沉困。口渴。胸膈焦辣。手心熱。腹微痛。小水少。每解時先乾噦嘔惡。汗出飛飛下。皆稠粘紫黑血無糞。彼素知醫。且慎重。不輕服人藥。敦予診之。脈左沉弦。右滑數。面色外黑內黃。飲食不入。肛門辣疼。予以渠原稟薄弱。今遠歸途次。不能無勞。不敢疏下。姑以胃風湯加黃連。與二帖不效。腹稍加脹。渠叮予曰。古云。無積不成痢。顧積勢膠固。切勿用補。無以體素弱爲疑。予曰。諾。改用黃芩芍藥湯三劑。無進退。迺私語渠姪元亮曰。令伯之症。實實虛虛。熱熱寒寒。實不易治。且穀食禁口不入。乾噦可慮。須得明哲參治。元亮從容言之。欲

得方古墩爲翼。諸相契及內眷遞相讚言。太學不從。曰吾豈不重命而吝費哉。顧新都之醫。無如叔最明。吾之交。無如叔最厚。舍叔安所倚。元亮曰。叔祖善矣。能用人之長。得一雋商確。可無後慮。太學拂然曰。知莫貴於知心。吾知其心久矣。專任勿疑也。予知渠信任堅若金石。益加研究。圖欲先開胃口。使新穀食將宿穢壓出。或補或攻。視緩急以爲方略。迺背囑元亮曰。令伯非人參不可。幸且勿露。俾予得以盡技。元亮曰。諾。迺倣朱丹溪法。用人參、黃連各二錢。煎濃。細細呷之。但得一呷下咽。胃口便開。噦惡便止。蓋胃口虛熱衝上爲噦也。其日用之噦惡。卽止大半。連與兩日。覺胸腹脹。卽以保和丸應之。覺小水不利。又以清六丸應之。裏急後重。以參朮加苓連、木香、檳榔、滑石、桃仁應之。人參皆背加。太學不知也。渠每診必叮予曰。日來疾稍平。叔之力也。予勿遽補。恐廢前功。予曰。如教。詎知人參已服過十日。計二兩許矣。此後脈僅四至。軟而無力。憶丹溪云。虛回而痢自止。又云。氣虛甚者。非附子不能行參耆。迺以胃風湯加黃耆。附子、薑炭。四劑而血全無。後重亦止。惟大便瀉而不實。所下俱黃糞。渠知積滯已盡。始欲理脾。用參苓白朮散。服十日。便仍不實。迺問予曰。補脾而瀉不止。奈何。予曰。

據脈乃下元虛寒。殆腎洩。非脾洩也。溫補下元則固矣。蓋腎者胃之關。初不敢用下劑者。慮有今日也。教以免絲子、破故紙、杜仲、山茱萸、人參、大附子、白茯苓、澤瀉。四帖全瘳。里中稱太學能知人。而予不負所任也。

查少川公。年四十三。夙有哮喘疾。每發則遍身如燎。氣貴貴上騰。息息短促。喉中痰聲響若湯沸。經七晝夜汗而漸平。居常嗜飲通宵不輟。醉後縱慾。不避風寒。族中有教以石膏、麻黃、杏仁、枳殼、細茶各一兩。作大劑飲之。名曰五虎湯。喘至卽以此禦之。隨飲而止。屢發屢進。應若桴鼓。公喜甚。恃爲保命丹。寓大通一月。邑中麻黃、石膏爲之缺市。詎知情慾無窮。胃中冲和有限。三年之間。飲五虎者。殆不可以數計。而胃中之冲和者。亦不知損之何若也。因而腹大若覆箕。兩腿光腫如柱。內外腫疥瘡。中清水涓涓。流之不竭。晝夜腥氣逼人。不能伏枕而臥者五越月。自儀楊醫起。聞京口之醫如何。如張者最良。遍延治之。彌月。卒無一驗。又舍京口抵姑蘇。歷嘉杭。凡有名者。悉迎療之。而勢益劇。昇回至岩鎮。鎮醫擅名者。吳與方也。先請吳。吳駭辭不治。就方。方診視久之。曰。公疾非常。必得非常人。迺可已。公曰。先生世家大方。昔在兩淮。且人人引領。願得先生一診爲快。

何我棄而使需非常人也。今世非常人。舍先生其誰。方曰嘻。公貴邑孫生生者。名動三吳。今歸不出。亟迎治之。或可無恙。公扣孫生生居何里。狀何若。方書予姓氏里居與之歸。卽懇程公山氏紹介。迓予時。長至後一日也。至則見公坐高椅之上。氣高而喘。身熱而煩。覆以綿被。足納火箱。前後左右環火五盆。首戴絨帽。帽外籠以貂套。套外仍束一帕。鼻用絨套籠之。門設重幔。猶凜凜怯寒。診其脈。浮大無力。睇其色。白中隱青。徐問公曰。惡寒身熱。從何時起。公曰十日。予曰。據色據脈。予已得其概矣。公歷數府名家。認爲何症。擬何湯劑。請詳述之。公曰。衆論落落不一。先生學博見真。願惟命。予曰。公疾迺氣虛中滿。法當溫補下元。人徒知利小水。不知小水不利者。由下焦之氣不充。不能滲從膀胱故道而行。若利之急。則汎濫而橫流。肌膚下於陰囊。甚則脹裂崩塌而出。若使下焦壯盛。則小水自通。譬之甑炊釜底。水火交旺。甑中之氣。自然蒸騰。若霧若露。內經曰。上焦開發。宣五穀味。熏身充膚澤毛。若霧露之灌溉。是謂氣。故曰。上焦如霧也。清陽升則濁陰降。降下則爲小水。故曰。下焦如瀆也。瀆者水也。言下焦爲決水之官。水道出焉者是也。人之汗。卽此霧露之氣。小水卽降下之氣。蓋氣者水之

母。由氣化而爲水。故又曰。氣化則能出矣。融衆理而觀之。總由下焦元氣壯盛。斯能升降變化。清陽升。濁陰降。卽地天交之泰。陽不升。陰不降。卽天地不交之否。否者塞也。此脹滿之所由生也。公之疾起於五虎湯。致臟寒生滿病也。公曰。善。吾迺今始知致病之源。第近來身熱手熱。鬲內焦辣。而外惡寒竟不解。孰爲熱。孰爲寒也。予曰。仲景云。傷寒必惡寒。由寒邪在表而然。合先散之。胸鬲焦辣者。乃陰盛格陽。虛陽之火。被寒氣驅逼上行。非真熱也。經云。水流濕。火就燥。但得下元一溫。熱自下行。公曰。然。唯先生命劑。予以紫蘇、馬蹄苳、炙甘草、防風、白豆仁、蒼朮、陳皮、人參、羌活、生薑一帖。而得微汗。悉徹。去環列之火。僅存足底一盆。首上所覆之帕亦去。獨鼻塞如初。迺用防風、黃耆二兩煎湯。置器中。令熏其鼻。飯頃而止。一日凡三熏。次日鼻塞亦除。嘔惡不止。用人參溫膽湯。加丁香進之一帖而止。又謂鯉魚能利水。一日盡二斤半。夜脹極。迺告急於予。予曰。病勢如是固。迺縱恣若此。等閑之劑。曷能消釋。沉思久之。以平胃散一兩。入橄欖肉一兩。水煎飲之。兩劑而定。獨腹脹小水不利。不能伏枕爲苦。迺以附子理中湯。加砂仁、補骨脂、赤小豆、桂心。連進四帖。小水略長。繼以尊重丸。日三服之。每五

丸。五日後。小水通利。可貼席而睡。守此調理。腹脹漸消。兩月大平。三月而公出市。市中人信予。實從公始。

夏益吾肢節腫痛。手足灣痛腫尤甚。不能動止。凡腫處皆紅熱。先起於左手右足。五日後。又傳於左足右手。此行痺症也。且喘咳氣湧不能睡。左脈浮數。中按弦。右滑數。迺濕熱風痰壅遏經絡而然。以茅山蒼朮、薑黃、苡仁、葶靈仙、秦艽、知母、桑白皮、黃柏、酒芩、麻黃水煎服下。而右手腫消痛減。夜服七製化痰丸。而嗽止。迺得睡。再劑。兩足灣消其半。左手經渠列缺穴邊腫痛殊甚。用苡仁、蒼朮、秦艽、甘草、天花粉、五加皮、石斛、前胡、枳殼、葶靈仙、當歸。旋服旋愈。

初陽姪迺政。先時咳嗽。諸治無功。且嗽急則吐。用碧玉散二錢。白湯調下。立止。後半年復咳嗽。胸背隱隱疼痛。身常內熱。咳出桃花膿。不可勝計。腥穢之氣甚惡。右脇并乳脹痛。脈洪數。大便燥。肌瘦骨立。此肺癰症也。用貝母、茜根、白芍藥各一錢。知母、麥門冬、山梔子、紫苑各八分。桑白皮、當歸、牡丹皮、杏仁各七分。薏苡仁一錢五分。甘草、葶藶各五分水煎服之。服此甚安。但要常服。若一缺藥。其疾便發。據此肺竅中痰積瘀血尙多。未能即去。宜緩圖之。書云。俟膿去盡。當自愈。

也。愚謂丹溪雖有此言。亦不可固執。設不以藥消化之。必俟其膿自盡。恐歲月深而有他變。且中年之人。何能當此。莫若清熱潤肺。消痰化瘀。久而服之。或早愈也。方黃吳諸公謂久咳傷肺。每每投補。屢被紊之。每補必增熱。加痛加咳。而膿轉多。余曉之曰。諸公之意誠良。其如病加何。是姑息之謂也。古人不務姑息。惟以去病爲安。夫姑息可以養病。非所以去病也。獨汪無懷然余言。守余法二年。良愈。肌長如初。

族姪仲木內人。賢淑婦也。不育。多鬱腹脹。左脇不能側臥。亦不能仰臥。仰側臥卽氣湧。每午夜背心作脹。氣喘吐痰發熱。必摩坐。令人揩摩。久之始定。面有浮氣。右寸關脈滑大有力。此氣鬱食積痰飲症也。蓋憂思傷脾。思則脾氣結。氣結不行。則五穀之津液皆凝聚爲痰。故喘急作脹。先與定喘湯二帖。而無進退。繼用核桃肉五錢。杏仁三錢。人參。桑白皮各七分。水煎服之。氣喘迺定。惟腹中脹急。改用橘紅。半夏。木香。白豆仁。鬱金。蘿蔔子。薑連。香附。茯苓。四劑。大便痰積隨下。腹脹尋消而愈。

族姪孫女。年甫十歲。大便脫肛。鼻中時常出血。夜多咬牙。肚熱面黃。將成疳症。以

山查、青蒿、枳實、升麻、酒連、滑石各一兩。甘草、蘆薈、乾蟾各五錢。俱爲末。神麴糊爲丸。一料全愈。

唐岩祈首秋患痢赤白。延至次年春分不愈。腹中作脹。不知餓。每行動則氣喘。四陽之末皆冷。陰囊腫。大便日夜十數行。而肌肉甚瘦。小水短少。飲食減半。面黃。兩跖腫大及踝。與平胃散加酒連、猪苓、澤瀉、升麻、防風、酒炒白芍藥、薏苡仁。外與香連丸合益元丸相兼服。四日而痢止。迺知餓而加食。精神爽快。再四劑。兩跖陰囊之腫皆消。惟咳嗽。用薏苡仁、酒炒白芍藥、粉草、澤瀉、杏仁、桑白皮、陳皮、薑連、茯苓、薑黃、葛根、蘿蔔子。二帖而嗽除。但體乏力。與六君子湯加補骨脂、薏苡仁、滑石、紅麴、酒炒白芍藥、桔梗、麥芽。調養半月而全瘳。

姪壻程東山。仲夏患休息痢。所下皆紫血腹痛。迨清明猶不愈。醫藥備嘗。體倦肌瘦。或三五日一發。或七八日一發。發必三日。迺止。予爲診之。左瀉而右滑。據脈有瘀血痰積。近來小水不利。姑用四君子湯加滑石、紅麴、陳皮、山查、澤瀉、升麻。服後微覺有熱。改以四君子湯加滑石、桃仁、紅麴、酒連。神氣稍旺。脾氣始回。迺用番鴨膽三錢下之。果去紫黑血塊及如敗魚腸者半桶。從此痛除痢止。次日。

以六君子湯。去半夏。加酒炒白芍藥、山查、紅麴、滑石、桃仁、升麻調之。報云。胸膈作脹。恐積滯未盡。而服參朮。欲再下之。予爲再診。兩寸短弱。兩尺洪大。前日滑瀉二脈俱無。此陽虛下陷之候。宜當大升大補。以六君子湯。大加黃耆爲君。酒炒芍藥爲臣。升麻、桔梗爲使。服此胸膈寬快。精神亦好。惟肛門熱。前方加酒連。減半夏。脫然平安。

陳氏婦。腸鳴腹痛。大便溏瀉。合目卽汗出。下午潮熱。醫謂潮熱盜汗。迺虛怯之症。加之洩瀉。脾氣壞矣。視爲不治。俛予診之。右脈濡數。左脈洪數。予曰。此鬱火痰積症也。蓋憂傷肺。思傷脾。飲食因而不化。積而生痰。故腹痛溏瀉。但理中焦。消去痰積。可瘳也。以四君子湯。加半夏、麴、滑石、紅麴、麥芽、苡仁、酒炒白芍藥、酒炒黃連、牡蠣、桔梗。八帖而病去如釋。

九德姪。耳鳴氣築築然。閉而不通。鼻塞不利。口不知味。痰多而鬲熱不清。脈左浮而弦大。右滑大俱數。內經云。頭痛耳鳴。九竅不利。腸胃之所生也。此由胃中痰火上壅。熱極生風。迺以蔓荊子、升麻、木通、赤茯苓、桑白皮、麥門冬、生地黃、前胡、甘菊花、赤芍藥、甘草、石膏、生薑三片、棗子一枚。水煎飲之。四帖。左弦雖減半。而

症尙如前再用甘菊花、橘紅、半夏麴、茯苓、甘草、知母、白芍藥、酒芩、麻黃、石膏、桑白皮、桔梗、加薑棗。又四帖而諸症悉平。後以六君子、加酒連、柴胡、川芎、白芍、麥門冬、升麻兩帖。飲食亦甘美矣。

陳覺字文常，山縣人也。年四十有三，體肥。患痰火十年多矣。每月必一發。或勞心過度，則二發。吐痰身熱，吼喘，飲食不進，不能倒頭而睡。合目則亂語，面赤頭痛，遍身痰氣走動，牽扯作痛。必俟吐出痰後，則耳始不鳴，目始不泪。素服風痰藥：南星、半夏之類，不效。後服參耆，則亦僅止四五個月。診其脈，兩寸洪滑，兩尺沉微。殆上盛下虛之候。法當清上補下。以橘紅、貝母、茯苓、甘草、桔梗、杏仁、前胡、鈎藤、天麻、酒芩、枳殼，水煎服之。夜進七製化痰丸，再以八味丸，加人參、麥門冬、五味子，空心服之。半年而瘳。

程紹溪，中年患鶴膝風症。兩腿及脚肚內外，肌肉盡削。獨兩膝腫大。迺酒後縱欲所致。經治蘇松嘉湖杭嚴六府，視爲痼疾。且四肢膿疥連片，淫爛腌臢，臭惡難近。自分必死。家人以渠病久，醫藥破家。今則衣食不抵，無門求生矣。渠有親爲予鄰家，偶言及渠病之異，家道之窘。予聞惻然。鄰素知予不以窘異爲憚，懇爲

一看。予攜仲子泰來同往。令渠沐手診之。左寸關浮數。右寸短弱。兩尺沉微。此氣虛血熱之候。法當大補氣血。壯其筋骨。猶可冀生。病者聞言。命家人子媳羅拜於地。請藥。予曰。病勢已痼。非百日不見功。蓋補血無速效。日浸月潤。漸而濡之。關節通利。骨正筋柔。腿肉自生。初以龜板、苡仁各三錢。蒼耳子、五加皮、頭二蠶沙、節節香各一錢。當歸、人參、黃耆、蒼朮、杜仲、黃柏各八分。紅花五分。水煎服之。十劑而瘡疥漸稀。精神稍長。再以薏苡仁、五加皮、龜板各二錢。節節香、蒼耳子、地黃、丹參、蒼朮、黃柏、何首烏各一錢。人參、當歸各八分。紅花、木通各五分。三十帖。足可倚杖而行。腿肉漸生。瘡疥盡愈。膝腫消去其六。後以虎潛丸加鹿角膠、何首烏、金毛狗脊、節節香、牛膝。用龜板膠爲丸。服三越月。腿肉復完。出之。茗上茗中嘖嘖稱奇。悉錄其方以布。

予堂嫂程氏。喉間有物如嚮。咯之不出。嚥之不下。梗梗不安。腹中痛且瀉。年五十有八矣。迺梅核氣症也。腹痛覆新疾。以二陳湯加旋覆花、白朮、香附、紫蘇、桂皮、厚朴、澤瀉。四劑。腹痛仍在。瀉亦不止。仍用胃苓湯加麥芽、砂仁、香附。二帖。痛止瀉瘳。仍用二陳湯加厚朴、桂皮、紫蘇、旋覆花、細辛、人參。煎服四帖。而喉中病去。

如失。

一婦先傷風發熱咳嗽。二日迺分娩。熱尙未退。又食雞汁肉等太蚤。咳嗽發熱愈盛。已八日矣。胸膈脹痛。頭痛口渴。大便秘。咳出之痰。色黑而臭。小水短少。脇下扯痛。氣逆而喘。不得臥。左脇不能着席。汗出不止。症甚危急。予以瓜蒌五錢。紫蘇子一錢。枳殼。酒芩各六分。前胡。桔梗各五分。粉草三分。生薑三片。水煎飲之。胸膈之痛減半。氣喘稍定。次日再進前藥。大使用蜜棗導之。熱盡退。痛盡減。諸症尋愈。

表嫂孀居二十年矣。右癱不能舉動。不出門者三年。今則神情恍惚。口亂言。常悲泣。詰其故。答曰。自亦不知爲何故也。診之。兩寸脈短澀。以石菖蒲。遠志。當歸。茯苓。人參。黃耆。白朮。大附子。晚蠶沙。陳皮。粉草。服四帖。精神較好於前。但悲泣如舊。夜更泣。予思仲景大棗小麥湯。正與此對。卽與服之。兩帖而瘳。方用大棗十二枚。小麥一合。大甘草炙過三寸。水煎飲之。此憂傷肺臟。臟寒故多泣也。桂亭大兄。原因墜轎跌傷。腰脇脹痛。不能轉側。咳嗽弔痛。用三製大黃二錢。桃仁一錢五分。杏仁。紅花。天花粉各一錢。穿山甲八分。甘草五分。水煎服之。兩帖而

大便行。繼以五加皮、紅花、川芎、當歸、生地黃、白芍藥、丹參、甘草、桃仁、穿山甲、柴胡、煎四劑飲之。而痛大定。後因過飲葷腥，喘嗽腰痛，右肩背墜痛。素有濕熱痰積，以葳靈仙、紫蘇子、枳實、酒芩、半夏、麴瓜、蔓仁、甘草、陳皮、姜黃、防風、羌活。服後腸鳴，坐則重墜。此痰積已動，欲行而不可得也。與穿山甲、當歸尾、紅花、杏仁、枳殼、大黃、蘿蔔子、川芎、莪朮、青皮。服後大便所下稠積穢瘀甚多，痛隨減去。以保和丸調理而安。

堂嫂王氏。兩寸脈洪大。右關滑大。五六月間必吐紫黑血塊。足跟焮腫痒痛。時流黃水。與牡丹皮、山梔子、玄參、甘草、白芍藥、當歸、陳皮、滑石、桃仁、四劑而愈。族弟婦程氏。姪已五月。痢下膿血。裏急後重。腰重墜難當。以白芍、當歸、木香、砂仁、條芩、酒連、艾葉、陳皮煎服。夜仍痛痢三次。次日大便所下如爛魚腸者甚多。夜半忽兩足脚底前半節紅腫疼痛難安。此厥陰肝經虛。胎氣下墜也。當補氣血。以川芎、當歸、人參、白朮、紫蘇、茯苓、甘草、檳榔。服下夜半痛止。即得睡矣。左脚略痛。再用人參、紫蘇、川芎、當歸、白芍、甘草、陳皮、茯苓、大腹皮、柴胡。服後左脚痛亦全減。後以補中益氣湯加白芍、黃芩、茯苓調補。而胎亦無恙。

族嫂汪氏。發寒發熱。頭疼遍身痛。眼珠疼。小腹痛。裏急後重。赤白膿血。日夜三十餘度。口渴。此瘧痢並作也。以柴胡、葛根、甘草、青蒿、枳殼、酒芩、酒連、當歸、白芍、桂枝、防風、羌活、川芎水煎服之。外與神授香連丸。其夜痢減十之九。但遍身尙疼。略惡寒。不發熱。頭略暈而已。改以川芎、川歸、白芍、木香、桂皮、陳皮、酒連、酒芩。調理三日全安。

仲閻姪孫。赴府考試。過食牛麵。且勞苦。因而發瘧。城中醫瘧半月。形神俱瘦。瘧愈而腹大如箕矣。健所黃夫人。仲閻岳母也。凡名家遞爲延至。率認瘧後腹脹。其中必有瘕母爲祟也。諸消痞藥嘗之不效。又以五皮飲利之。不應。將議攻下。而予適至。觀其色黃。口渴。小水短濇。腹脹不可言。足膝之下。腫大不能行。兩腿腫連陰囊。氣壅不能臥。飲食絕少。脈纔四至。大而不斂。予曰。此真氣虛中滿症也。法當溫補下元。而兼理脾。病猶可愈。若攻下。是殺之也。渠父與予厚。今宦河南。予安得不爲渠任其重哉。顧歛友所用之劑。迺皂角、檳榔、三稜、莪朮、薑黃、葶藶子、木通、枳實、青皮、厚朴、山梔、大黃、牽牛、黃連等。皆破敵有餘之品。見之且駭然。但黃夫人薦來之醫。又不能拒止。躊躇間。幸渠迺伯溪亭公。知予心。卒謝歛醫。

而一任予治。予即以人參、白朮各三錢，炙甘草五分，大附子、炮乾薑、桂心各一錢，破故紙二錢，桑白皮、砂仁、茯苓、澤瀉各八分，水煎飲之。其夜小水稍利，喘急稍緩。連飲五日，腹稍寬，皮作皺。因食猪肚子太蚤，依舊作脹。前方人參、白朮加作五錢，再加陳皮八分，又二十劑，而腹消其大半。廼能伏枕而臥，始能移步行動。改以參苓白朮散，加破故紙、肉桂調養而安。溪亭公問曰：腹脹如此，口渴如此，小水短濇如此，諸人悉認爲熱，爲有餘。廼今以溫補收功，何也？予曰：公不觀古人以氣虛中滿，名鼓脹耶？由氣虛所以成中滿，設氣不虛，何中滿之有哉？且鼓者，外皮堅緊而內空無物，若復瀉之，真元脫矣。安能復生？故惟有補而已。口渴小水少者，皆元氣虛弱，不能轉運，清氣不上升，故口渴；濁氣不下降，故無小便。廼天地不交之否，茲特補其下元，俾水火充實，陽氣上騰，濁氣下降，中氣運動，而諸疾皆瘳也。

朱懷竹壯年客外，不謹而生楊梅瘡，恐人知之，又欲回家，廼求速愈。每日用藥外，燻燻而不效，用藥水頻洗，洗而不瘳。廼以末藥點之。一日凡服煎藥三帖，如斯兩月，不惟瘡不能瘳，毒且趕入內，在下則肛脫二寸餘，周匝瘡滿如葦，弗克收。

入。因而不能行坐。在上則毒入於肺。喘咳氣湧。胸膈脹悶。不能仰臥。內熱而外惡寒。寢食俱廢。合目即譫語。陰囊疔瘡。紅腫脹痛。兩足瘡延腫大。精神恍惚。軟床昇歸。迺兄少竹。逆予爲診。六脈俱洪大而數。語少竹曰。病至重。幸壯年猶可治也。今予尙未可付藥。俟彼胸中瘀血毒物出後。迺可服。否則彼以予藥動血。而反致疑。顧城中諸友鮮有識此病者。一誤則大事去矣。慎之慎之。少竹素信予。固請予藥而不與其服。懷竹見予不發藥。迺延張程二公爲治。晌午服藥。晡刻大發喘咳。吐出紫黑血塊如膿之類。碗餘。滿房腥穢不可近。懷竹心慌。少竹慰之曰。毋恐。孫君先已預言汝胸中脹悶者。由燠藥逼毒入內。上迫於肺。痰與瘀血壅遏肺竅。將欲成膿。故喘咳不能伏枕。顧脈洪大而數。從可知也。必俟吐後乘而消之。極易爲力。今果如孫君言。孫君藥具在。急煎飲之。藥用牡丹皮、桑白皮、白蘚皮、木通、前胡、枳殼、桔梗、甘草、杏仁、苡仁、葶藶子。服後大便裏急後重者二十餘次。所下黑紫膿血甚多。喘咳稍定。痰紅稍淡。二三劑迺能伏枕而睡。改用白芍、當歸、白蘚皮、甘草、貝母、黃連、金銀花、皂角子、苡仁、麥冬、木通。連飲二帖。足上跟踝瘡腫漸消。其夜陰囊出臭膿血二碗許。次早診之。兩尺脈不洪大。

矣。仍用前劑。加丹參。又二帖。陰囊結靨甚厚。橫裂一縫。三日後。隨縫連皮落下。約重五六兩。厚可半寸。色如猪肝。洞見兩陰子。系一光白薄胞。令人駭然。此亦亘千古稀見者。舉家謂陰囊迺致命之所。且未有子。今爛去。即使復好。亦不能育子矣。環哭甚悲。予諭之曰。此毒去也。而真元不傷。吾能使其生肉如故。亦不妨於生育。毋過慮焉。舉家將信將疑。予即用紅粉霜加生肌末藥敷上。一日三次。並不作痛。膿水立乾。外以人參當歸酒炒白芍白芷甘草白蘚皮皂角子苡仁何首烏調理一月。囊肌全生。諸症悉愈。迺令日用土茯苓猪肉各半觔。同煮極爛。將肉入醬鹽如常法食之。湯當茶飲。脫然全瘳。次年生女。

查良本兄令眷。怒後偶食魚頭。骨梗於喉中。即以饅頭粽肉等壓之。骨雖下。便覺胸膈不快。又服消骨藥兩日。迨今迺七日矣。胸膈脹痛殊甚。飲食悉從背後而下。惡寒發熱。六脈弦數。予思骨梗之後。用硬物壓之。傷其胃腕。必有瘀血停蓄。兩間將食管逼在背後。故飲食覺從背後下也。今但消去瘀血。使食管復原。胸膈之痛可瘳矣。藥以五靈脂爲君。山查玄胡索桃仁枳殼爲臣。赤芍藥牡丹皮香附山梔仁爲佐。柴胡石菖蒲爲使。水煎。臨服入韭菜汁一酒杯飲之。其夜胸

鬲寬快。大便瀉一次。痛減大半。飲食乃從右邊而下。右邊咽喉稍痛。吞物甚艱。苦。吐出痰皆血腥氣。改以山梔、赤芍藥、歸尾、桃仁、劉寄奴、五靈脂、牡丹皮、穿山甲煎入韭菜汁服之。兩帖全瘳。

後溪大兄孺人戴氏。勤篤嚴謹人也。秋患痢。所下皆血及屋漏水。內有血子如赤小豆者。不可計數。晝夜五六十行。裏急後重。噦惡不住聲者五日。予以劉守真芍藥湯與三劑。而病無進退。適後溪兄在浙。姪女輩素信醫博黃氏爲女科專門。延而治之。投以芩連、枳殼、檳榔、山梔、地榆、黃柏、滑石之類。服已五日。始雖噦惡。一日尙有碗粥。今則粒米不能進。腹痛轉加。必用重物壓之。廼稍定。神思昏弱。臥不能起。下午發熱。女科仍以前劑加青皮、枳實。姪孫爾嘉持藥見予曰。家姑酷信黃醫爲專門。今已任事五日。較前精神大瘳。叔翁爲祖父至交。寧無一語啓愚乎。予曰。吾非不言。欲詆黃。恐爲妬婦之口。今子來。予可診之。六脈滑大無力。診畢。慌語爾嘉曰。事急。可速令人促廼祖歸。否則令姑女流。不諳醫藥。吾安能施其巧。比有西席汪帶川聞之。決爾嘉曰。此事極要調停。留黃醫以安女流心。黃發之劑。閣而不進。以東宿之劑作黃劑進之。內外無猜。則妥矣。予然其

言。以人參、白朮、酒炒白芍各三錢。炙甘草一錢半。炮薑、肉桂各一錢。白茯苓、陳皮各八分。砂仁五分。大棗二枚。水煎飲之。噦惡減半。其夜痢減十之五。惟腹痛不甚減。次早診之。脈稍斂。黃醫以爲渠功。大言自矜。藥仍以芩連之類。予仍以前劑。再加黃耆。其日下午始納粥一茶盞。腹痛漸減。又次晨黃醫診視。見夜來痢減其七。益揚揚得志。語左右曰。寒家業醫五代。似此大病。亦不多見。自以爲非彼亦無能治也。爾嘉詰曰。瘧痢尋常耳。何以爲大。黃曰。丹溪云。下痢身涼者生。身熱者死。下痢純血者死。脈洪大者死。如屋漏水者。半死半生。今皆犯之。故云云也。爾嘉曰。然則今日當用何劑。黃曰。劑已投。病仍當。確守前方。何敢輕改。爾嘉笑而點首。復向予求劑。予以理中湯。倍加酒炒白芍藥。以肉桂佐之。腹痛身熱悉愈。痢十去九矣。後溪兄亦浙回。爾嘉述病源。以黃方予。方呈看。後溪唏噓嘆息。迺辭謝黃而詰予曰。人言下赤痢者熱。噦惡者熱。又身熱脈大。吾弟何獨認爲寒。而用此大熱之劑成功。曷故哉。予曰。此虛虛實實之處。極能誤人。尊嫂之熱。非真有餘之熱。迺內有虛寒。逼其虛火上行。故噦惡潮熱耳。脈大而無力。仍作虛看。且向服寒涼不效。當自知警也。後溪兄曰。微弟幾敗迺事矣。

邵敬圃令眷。常胃脘痛。由氣鬱而起。近以產後下痢紅白。而胃脘之疼不止。汗多。六脈滑大無力。法當收斂。以小建中湯爲主。白芍藥酒炒四錢。炙甘草一錢半。桂皮五靈脂醋炒各一錢。香附糖毬子各八分。水煎飲之。痛減。汗未全斂。次日前方加御米殼醋炒過一錢。兩帖全止。

蘇文學望臺患瘧。一日一發。先寒後熱。熱多寒少。胸膈痞悶。口渴。小便溷濁。腥臊不可近。醫五越月不效。面黃肌瘦。飲食減少。喘息呻吟。精神疲憊。起須人扶。迺敦予治。脈得沉弦而數。公問曰。是瘧否。予曰。是。公曰。吾聞之。真病不治。治之無功。蓋真者死候也。瘧殆常病。不過寒熱虛實表裏。諸名家曾認爲表症者。麻黃羌活柴胡等汗之矣。有認爲裏症者。大柴胡湯輩下之矣。有認爲痰飲者。常山信石吐之矣。有認爲虛寒者。附子理中湯人參服過三觔矣。有認爲實熱。用白虎湯枳實青皮檳榔草果消之矣。盡法備嘗。絕無一應。瘧豈亦有真而卒至於死耶。言訖。淚漣漣下。予曰。觀公色脈。瘧將發矣。不暇辯。第飲予藥不死也。以柴胡滑石各五錢爲君。鱉甲三錢爲臣。黃連知母各一錢爲佐。枳實甘草各五分。黑豆四十九粒爲使。水煎。送下昆布鱉甲丸。申刻瘧至。戌初便止。公喜曰。向者瘧

發未申。夜半尙不能止。卽止猶倦怠。嬾言。適飲先生藥。不兩時而止。止便能言。先生之功也。予曰。偶耳。今日服藥已晏。明日五更幸早服之。服訖。竟日不發。又次日。前方加人參、白朮。小水腥臊之氣已無。精神陡長。公又喜曰。兩日無苦。先生之功也。予曰。偶然耳。公曰。嘻。吾瘧幾半載。休歛之名公。莫不歷試。卒無影響。先生一舉奏奇。有而不居。益元所養。不審湯名何劑。乞指示之。以詔將來。予曰。公何以名爲哉。老子曰。無名天地之始。矧醫亦道也。卽道亦是強名。醫貴識。苟識病。一二三品便能成劑立功。經云。方約如約囊。又曰。方以類聚。方憑病立。苟不識病。卽盡本草一千六百五十六品。併而服之。未見其益也。瘧固常疾。治亦不易。仲景有言曰。治瘧當分六經。予謂卽六經之中。又各有寒熱虛實陰陽在焉。是六六而三十六也。卽三十六之中。又有挾痰挾食挾氣者。稟弱者。曷能枚舉。人與天地陰陽一致。天地變化無窮。人身災患不一。豈拘拘一百一十三方。三百九十七法所能概哉。王節齋曰。古人因病以立方。非立方以待病也。斯言深得軒岐立方大意。然予今日所用之劑和劑也。仲景謂汗吐下後。而邪熱不減者。是爲壞症。以小柴胡湯加鱉甲治之。予特倣仲景小柴胡例。加益元散。徹

邪。熱從小便中出。驚甲雖治壞症。又能截瘧。公曰。噫嘻。前此諸公。看病不過曰寒曰熱曰虛實而已。未嘗有此妙論。誠空谷跂音也。吾聞先生從祝令君潘去榮輩。六邑下會中。討究理致。又曾覽先生序大易。序翼飛。迺知先生融三教而萃於醫。先生之醫。得之於性命竅中。故能全性命也有如此。

一汪氏嫗。寒痰壅滯於背。胸脇腹皆脹痛。小水頻數。先與女金丹。以治胸脇之痛。以二陳湯加益智仁。香附。白芥子。青皮。柴胡。蒼朮。桂枝。一帖而小水減半。次日以白蔻仁。易益智仁。以枳殼。易青皮。再加川芎。桔梗。開提清氣。諸脹痛悉減。

一 大塘徐公諱客者。其子弱冠。肌肉瘦削。尻膝腫大。手肘肩顚背腫。腫處皆痛而發熱。時醫有作風治者。有作濕痰治者。有作鶴膝鼓椎風治者。愈治愈重。伏床蓐奄奄一息耳。舉家倉皇而決之。著撰者。釋策曰。易象可不死。天醫上卦。約遠在東方。相去百里而遙。迎而治之。無恙也。因訪予而迎之。治。予診其脈。六部皆弦。觀其色青而白。飲食少。時當長至。予曰。此筋痿症也。書云。諸痿皆不可作風治。病勢幾危者。以前藥皆風劑耳。風能傷血。血枯則筋愈失養。况弦脈迺肝木所主。攬前而至。是肝有餘而脾土受敵。脾爲所傷。宜飲食少。肌肉削而勢將危也。

內經曰。諸痿獨取於陽明爲治。陽明者。腸與胃也。法當滋補腸胃。俾飲食日加。五臟六腑有所稟受。營衛流行。氣煦血濡。調養至春。淑氣司令。君火主事之時。宗筋潤而機關可利也。病者年雖少。而能聞言相信。懇予爲治。予立方。五加皮。苡仁。甘草。蒼耳子。枸杞子。同陽人參。杜仲。黃柏。黃耆。桂枝。兩劑。便能步履。四劑。手足強健。每隆冬必服十數劑。則精神加。飲食美。睡臥亦安。翁喜語曰。吾得君方服之。可不杖。君劑當我几杖乎。嘻。此余初發之治也。

邵都諫老封君思翁。年過古稀。右手足麻而無力。不爲運用。足不良於行。以六君子湯。加川芎。當歸。苡仁。大附子。鹿角膠。黃耆。桂枝。兩劑。便能步履。四劑。手足強健。每隆冬必服十數劑。則精神加。飲食美。睡臥亦安。翁喜語曰。吾得君方服之。可不杖。君劑當我几杖乎。嘻。

太塘程巢父文學廼郎。諱萬里者。年十五。夏月患痢。族醫爲治。彌月。痢止而筋骨腫痛。痛處發熱。晝輕夜重。肌肉消。飲食少。煩躁。醫者以白虎歷節風治之。病劇而形削骨立矣。又有作鶴膝鼓槌風治者。法愈更而病愈甚。其家有程松谷者。博洽嘉聞君子也。爲巢父族大父。以余在西吳治多奇中。命巢父迎余。予至診。

之。脈皆細瀋。曰。此痢後風也。蓋由治痢不善。以致寒濕穢瘀凝滯經絡日久。氣血爲痛所傷。此症虛虛實實極難認。而措藥不易。欲補虛則腫愈劇。欲疏通則痛愈甚。惟局方大防風湯可愈此疾也。防風、熟地、黃耆、人參、白芍、當歸、杜仲各一錢。白朮一錢五分。羌活、牛膝、甘草、回陽各五分。川芎七分。加薑三片。水煎服。服三十帖而愈。

按局方云。痢後脚緩痛不良於行者。名曰痢風。或兩脚腫痛。足脛枯臘者。名曰鶴膝風。併一切癱痺痿軟風濕挾虛之候。服之其效如神。余故用之。亦謂治氣血兩虛挾風氣而成痿蹶者爾。非謂可併治初起有餘之疾也。

葉潤齋年近四十。心鬲嘈噓。好啖肉。尤好雞。一日不能缺。缺卽身浮力倦。神魂無措。必急得肉迺已。見則大嚼。及入腹。腹又大痛。痛極則吐酸水稠涎。然後定。稍定。又思肉啖也。其痛苦之態。喊叫之厲。難狀。見者酸鼻。而潤齋則甘心焉。市人咸以爲祟。或有諭之者曰。古云。與其好肉而受痛。孰若絕肉以無妄也。久病脾虛肉入難化。故使作痛。此婦人女子且知之。汝丈夫獨不慎何哉。潤齋曰。吾豈不知絕肉之爲愈也。蓋痛雖苦。尙能噉。若嘈噓則遍身淫淫蘇蘇。左右無可奈。

何。手足無所把握。頃刻不能自存。有近於死不能熬。急需肉少甦。吾豈縱口求痛哉。不得已也。迺翁延予爲診。六脈大小不等。觀其色。唇紅臉黃。予曰。據色脈。迺蟲症。非祟也。予能拯之。先與雄黃丸一服。不瘳。改以膩粉五分。史君子末一錢。用雞子打餅。五更空心飼之。辰刻下長蟻十條。內有二大者。長尺有咫。自首貫尾皆紅。下午又下小蟲百餘。自此再不喜肉。而嘈噉良愈。

程相如丈令政鄭氏。孕踰七月。因食冷患痢。所以皆白膿。腹痛後重。小水不利。兩關脈滑數。以艾葉、砂仁、白芍藥、白朮、厚朴、澤瀉、滑石、甘草與之。痢如舊。小水仍不通利。夜更痢頻。改用當歸、白芍藥各二錢。益母草、酒連、酒芩各一錢。滑石二錢。枳殼七分。木香、甘草各三分。艾葉二分。兩帖而安。

太塘程曉山。程松谷從弟也。客湖州。年四十。懸弧之日。湖中親友舉賀。徵妓行酒。宴樂月餘。一日忽言曰。近覺兩手小指及無名指掉硬不舒。亦不爲用。口角一邊常牽扯引動。幸爲診之。六脈皆滑大而數。浮而不斂。其體肥。其面色蒼紫。予曰。據脈滑大爲痰。數爲熱。浮爲風。蓋濕生痰。痰生熱。熱生風也。君善飲。故多濕。近又荒於色。故真陰竭而脈浮。此手指不舒。口角牽扯。中風之症已兆也。所喜

面色蒼紫。其神藏。雖病猶可治。切宜戒酒色以自保愛。爲立一方。以二陳湯加滑石爲君。芩連爲臣。健脾消痰。徹濕熱。從小便出。加膽星。天麻。以定其風。用竹瀝。薑汁。三拌三曬。仍以竹瀝打糊爲丸。取竹瀝引諸藥入經絡化痰。外又以天麻丸滋補其筋骨。標本兩治。服二料。幾半年。不惟病痊。且至十年無恙。迨行年五十。湖之賀者如舊。召妓宴樂者亦如舊。甘酒嗜音荒淫。而忘其舊之致病也。手指口角牽引。掉硬尤甚。月餘中風。右體癱瘓矣。癱瘓俗所謂半身不遂也歸而逆予診之。脈皆洪大不斂。汗多不收。呼吸氣促。予曰。此下虛上竭之候。蓋腎虛不能納氣。歸原。故汗出如油。喘而休。雖和緩無能爲矣。閱二十日而卒。

程曉山中風。歸而逆予診時。其子僅七歲中麻。西吳呼爲爲瘡子姑蘇呼爲瘡子。一月餘矣。發熱如故。咳嗽聲啞。肌削骨立。頭髮盡禿。衆醫束手。舉家亦墮淚而已。余以診曉山見之。曰。舉家驚惶。謂此兒不保耶。此疳症。疳因麻後虛熱而發。以大蘆會丸治之。可獲萬全。君家初不問予者。謂予非幼科專門也。不知此特大方家餘事耳。爲製藥服之。藥未盡而病瘳。松谷君語其鄉人曰。東宿公見病而決死生。治病而隨俗爲變。一秦越人也。孫真人後身非耶。予聞之。而三謝不敏。

去予舍二里許。地名曰前坑口。一婦人。清明前十日。發熱頭痛。醫者以九味羌活湯。十神湯進之。不效。而又加口渴。舌黑如煤。更一醫。以如神白虎湯。竹葉石膏湯進之。亦不效。而加洩瀉不止。人事昏沉。四肢厥冷。呼吸氣微。米粒不進者十四日。其家爲具含斂而待斃。適予掃祖墓而近其家。其子聞之。卽告急於予。懇爲一診。其脈細如珠絲。予曰。此疫症也。合理中。生脈二湯飲之。連進二服。夜半神氣稍甦。飲粥湯半盞。次早六脈漸見。予喜語其子曰。可保無事。書云。脈絕微續者生。仍以前藥與之。至晚瀉止。口不渴。舌心焦煤退。精神清爽。駸駸向安矣。再用人參。白朮各五錢。炮薑炙甘草各二錢半。麥門冬三錢。五味子十五粒。水煎。不拘時服。不數日而全愈。

族太學從獻長郎七歲時。患痢紅白稠粘。而紅更多。飲食少。形氣弱。於時太學應南都試。其兄從明雅知予。因逆予視。視畢。予曰。此不可以尋常治。治也。法當補。從明曰。語云。無積不成痢。故法先推。今不下而遽用補。積何從去。予曰。足下論者常也。治病貴先察症。古人有先攻後補。有先補後攻者。因症投劑。不膠於常也。今形瘦體弱。面色青。稟受大不足者。飲食又少。予故用補。欲使寧有餘。卽不

如意。猶可措手。若拘常法下之。倘有變。將奈之何。從明是予而索藥。卽以四君子湯加歸芍黃連山查與服三帖。而病無進退。婦道間有議予非幼科專門。令更請夏氏。夏至卽語予先不下而用補。以至遷延如是。夏曰。幸不下。若下今不可爲。叩其故。曰。丹溪云。大孔如竹筒者不治。今肛門有竹筒狀。豈可下。然亦不必補。香連丸六一散可愈耳。三服而痢愈頻。其痛愈甚。又加惡心而神氣憊。又更請汪恆春。汪至亦以香連丸黃芩芍藥湯與之。痢下日夜不可以數計。飲食不入口。婦道信耳。謂二氏有時名。故遞迎之。獨從明持議復逆予。予往觀其形神。大非昔比。知中氣虛極。非理中湯不可。用人參白朮各二錢五分。酒炒白芍藥白茯苓各一錢。炙甘草炮薑各八分。肉桂三分。四帖。痢卽減半。前方減其半料。又六帖。而飲食進。痢亦止。稠粘雖無。而血水日夜仍三五行。肌肉亦未生。予思其故。必疳疾從虛而動。用如聖丸以治疳病。則全瘳矣。

族姪孫子忠患痢於湖之東雙林。腹大疼。日夜行百餘次。下皆紅膿。狀若腐爛魚腸。絕無糞。疼而喊叫。聲震中外。由孟秋飢飽後。倡家縱慾而得也。一病卽伏枕已十日餘矣。予時寓雉城。相去百里外。渠叔少崖邀予往視。診其脈皆緩大無

力。始用芎、歸各五錢。加人參、白芍藥、桂心、木香、黃連。服四日不效。改用膠艾湯。亦不效。大孔狀如竹筒。物食而下不變色。猶原物。予思之。此腸經爲寒濕所傷。脾不裹血故也。非附子理中湯加肉桂、肉果不可。進五六帖。痢始減半。飲食稍進。但所下穢惡仍若前狀。亦無糞。渠父仲珪家居。聞報。卽徧訪徽之名家。僉囑以切勿用補。兼程而抵茗城。倣虞留款。因詢近用何劑。倣虞曰。聞用附子理中湯。人參每帖三錢。仲珪駭而墮筯。亟馳見予。潸然淚下。言曰。姪五旬僅此一子。症危如此。倘不測。後將何望。予曰。郎君險過矣。復何憂。亦以姪只此子。故殫心力相扶也。仲珪曰。離家而徽之名公俱囑以勿輕用補。姪故兼程而來。竟以補收功。非叔幾於誤事。吾兒自今以往之年。皆叔之賜。姪父子何以報效。予曰。治疾如救焚。醫家分內事。矧屬在宗鄰。且無德我之望。又何望報。第雉城之約不可失。若俛李鍾泉邀吳華齋代視數日。俾予得踐雉城之約。庶兩盡矣。而吳子疑而辭曰。病者危在旦夕。何孫公欲自脫手而愚我被惡聲也。予聞而哂之曰。見何鄙哉。丹溪有言。虛回而痢自止。病者再五日可脫然矣。予亦暫留。卽以東垣和中勝濕湯與之。服七日。卽衣冠出市。報謝四鄰。吳見之而悔。李鍾泉斬之。

曰。孫公欲成爾名。爾欲自沒沒也。悔之何補。吳繇是改容相敬。令其弟遊予門。彼亦納交予而稱莫逆。子忠之始病也。其友李鍾泉重交誼。日夕省候。督其僕事湯藥。毋許離跬步。所下穢物腥臭不可聞。皆用漆布拭之。晝夜用數十觔。悉其湔浣。了無難色。兩月如一日也。此友亦今時所希觀者。因併記之。以著其高。余姪元素內人。季夏難產。夜過半。亟叩予門。起而問之。爲產者急矣。曰。然。作何狀。曰。產已及戶。不能下。用力則胸膈間有物上衝。痛不可忍。予思少頃。曰。此必雙胎。胞已分而一上一下也。及戶者在下欲產。在上者以用力而上衝。惟上衝。胸膈故痛也。勢亦險矣。迺諸書如產寶良方。胎產須知。與各大方家。俱未論及。將何以處。因詳思其治法。偶悟必安上而下。始用力產也。卽取益元散一兩與之。令以紫蘇湯送下。囑必如法。飲藥入腹。而胸膈痛止。不逾時產二女。母亦無恙。予仲子泰來問曰。益元散非產科急劑。何能取效如是。予曰。紫蘇安胎下氣。滑石滑以利竅。亦催生之良品。蓋醫者意也。予亦以意裁處之耳。此法方書無載。故記之以備專女科者采而用焉。

有邵兄而諱馬者。年五十。患嘔吐。吐物如爛猪肺狀。胸背脹。市上諸醫。皆以翻胃。

治之不效。而反加潮熱煩躁。飲食不入口。歎醫謂肺壞。辭去不治。延予治之。診其脈兩寸滑數。左關尺澁。予曰。此瘀血痰飲症也。非肺壞。果若肺壞。聲音當啞。今聲亮而獨胸背作脹。瘀血痰飲明矣。此症殆繇酒後怒發所致。蓋肝藏血。脾統血。酒傷脾。怒傷肝。以故不能藏。不能統。血隨氣上。積於胸膈。必吐出而脹斯寬也。法當消瘀血。調氣化痰。氣調瘀消。則新血始得歸經。大本端而病根可除矣。迺爲立方。滑石三錢。甘草五分。茜根二錢。小薊一錢。五分。桃仁。貝母。歸尾。香附各一錢。山梔仁。枳殼。桑白皮各八分。服十帖而全安。

許卓峰者。多酒多怒人也。上吐血。下洩血。咳嗽聲啞。族醫皆以爲瘵。辭去不治。迎予診之。其脈左關弦大。右寸下半指累累如薏苡子狀。予曰。此有餘症也。作瘵治者。非客有辯之者。謂此症人皆認爲瘵。而先生獨謂非瘵。知何以失血而聲啞也。予曰。其爲人也。好酒。酒屬濕熱。而助火生痰。火性炎上。迫肺下降。積而生痰。壅瘀肺竅。肺屬金。主聲。書云。金空則鳴。金壅塞而不通。故啞。此痰壅之啞。非肺痿之啞也。其性又多怒。內經曰。怒則傷肝。甚則嘔血并下洩。蓋血隨氣行。氣妄動。血隨之。亦妄動而不歸原。故上吐而下洩。法宜清熱開鬱化痰。導血歸原。

不半月而病可瘳也。若認爲瘵。而以地黃、天麥門冬、牛膝、山茱萸之類。將甚其塞而益其熱。聲音何由而開。血隨氣行。氣不清。血又何得歸原哉。諸君試觀之。予用滑石、青蒿解酒熱爲君。貝母、鬱金、山梔仁、香附開鬱爲臣。杏仁、桔梗同貝母化痰爲佐。丹皮、丹參、小薊、甘草導血歸原爲使。服十帖。血果歸原。又以貝母一兩。童便浸一日。爲末。柿霜等分。時時抄舌上化下。五日而聲音開亮矣。計期不出半月。

族嫂鈞孺人。年六旬。孀居已十餘年。患痢赤白俱下。腹微痛。晝夜二十餘次。嘔吐痰涎。粒米不入口者兩月。日惟用薄白酒打雞蛋花飲之。肌肉盡削。諸藥不效。予歸診之。六脈滑數。知濕微痰火所致。以二陳湯加益元散、薑汁炒黃連、黃芩。服幾四十帖。而嘔吐痢瘳。其病亦幾危矣。予爲治者。恃其神存。惟神存。雖形氣不足不食。猶可不死。此亦醫者當察也。

邵來儀丈令眷。咳吐紅痰。或如桃花膿色。前後心稍脹疼。兩寸脈洪滑。此瘀血痰火鬱滯肺之氣道。而欲成肺癰也。治當調氣化痰。兼消瘀血。清利肺金。以山梔子、牡丹皮、貝母、桑白皮、赤芍藥、麥門冬各一錢。白滑石三錢。茅草根五錢。小薊

二錢。甘草五分。枳殼八分。四帖而瘳。

程玄祖兄。春瘟食復。人事昏沉。內熱口渴。舌如焦煤。脇痛耳聾。身熱如火。僵硬不能轉動。屍寢者十日。口中喃喃。蓋夢語也。城中時疫正盛。親友咸不弔慶。予爲脈之。左弦數。右洪大而數。以柴胡、石膏各五錢。黃芩、知母、葛根各二錢。山梔子、枳實各三錢。甘草五分。連飲三劑。額上微汗。腹中雷鳴。其夜大便瀉三次。皆清水。熱仍不退。次早脈之。右寸稍軟。前方加人參七分。又二帖。而汗出熱退。身仍僵。口仍渴。耳仍聾。瀉亦不止。汗亦不收。四肢如冰。勻粒不進者已十三日。人皆以爲死矣。予獨不忍棄。以人參、麥門冬、白芍藥、石斛各一錢。五味子十一粒。當歸八分。桂枝三分。黃柏、甘草各五分。後再診之。左脈已弱。咳嗽。人事漸爽。粥飲稍進。迺能開目發聲。瀉已止。頗可轉身。纔有生氣。後以四物湯加苡仁、甘草、陳皮、白朮、石斛、百合、貝母。調理一月全瘳。

汪郎兄。腹痛嘔吐不止。城中諸友。畢力醫治不痊。予爲脈之。早晚大小緩急不一。知其爲蟲痛也。以乾薑、檳榔、蒼朮各一錢。五靈脂三錢。烏梅三個。川椒三分。水煎飲之。痛吐立止。

查景川兄遍身癩瘡。紅而掀癢。諸君以白蒺藜、荊芥、升麻、葛根、玄參、甘草、石斛、酒
芩、甘草與之。不愈。又謂爲風熱。以玄參、蟬退、赤芍藥、羌活、防風、甘草、生地、當歸、
升麻、蒼耳子、連翹服之。飲食頓減。遍身發瘡。痛癢不可言。予脈之。兩手俱緩弱。
以六君子湯減去半夏。加白扁豆、砂仁、苡仁、山藥、藿香、黃耆。一飲而飲食進。四
帖而痛癢除。十帖瘡芥如蛻。

程玉吾內人。姪已七月。乳忽紅腫而痛。洒淅惡寒發熱。而成內吹。以大瓜蒌四錢
爲君。當歸尾二錢爲臣。甘草節、蒲公英、貝母、連翹各一錢二分爲佐。青皮、柴胡
各八分。橘葉五片爲使。水煎飲之。兩劑而瘳。此方治驗不可勝數。緣婦女怒鬱
肝經爲多。故瓜蒌、甘草爲緩肝之劑。貝母開鬱。連翹、蒲公英、解毒。柴胡、青皮調
氣。橘葉引經。當歸活血。血活氣調。毒解熱散。而腫痛消釋也。若將成膿。可加白
芷。

一黃氏婦。青年初姪。已及彌月。忽午夜口中吮吮。目作上視。角弓反張。裸裎不避
羞恥。口眼偏邪。昏憤不知人事。問之不能言對。舉家悚駭。予曰。此風痰爲怒所
動而成子癇。當從雲箕子葛根湯加大腹皮。一兩劑可愈也。方以葛根、貝母、丹

皮、防風、川芎、當歸、茯苓、桂心、澤瀉、甘草各二錢。獨活、石膏、人參各四錢。水煎飲之而甦。

按貝母令人易產。未臨月者。用升麻代之。

吳見南令郎心脾痛。因勞倦而致。每痛必得可口之物壓之立止。兩腿生瘡。右脈滑。左脈弱。以白芍藥三錢。甘草一錢五分。白蒺藜、碧胡麻各一錢。當歸、黃柏各八分。石菖蒲、白茯苓各六分。四劑而痛止。仍用小建中湯。減去桂枝。加黃柏、蒼耳子、白蒺藜、何首烏。煉蜜爲丸服之。瘡亦尋愈。

又令郎八歲。原有疳積蟲痛。因幼科攻剋太過。脾氣不足。面色青。以啓脾丸爲主藥。用人參、白朮、茯苓、甘草、白芍藥、山查、澤瀉、薏苡仁、白扁豆、史君子、蘆薈、雞肫皮。以神麴糊爲丸。一料而瘳。

族姪女年甫八歲。腹高於胸。發熱面紅。咳嗽嘔吐。甚則連血噴出。右關脈滑大有。力。此風熱羈絆於脾肺之間而然。以滑石二錢。枇杷葉一錢。麥芽、天麻、半夏麴各八分。枳實、枳殼、防風、青皮各五分水煎服之。熱退嗽定。吐亦良瘳。

從兄鎔年近五十。左脇痛。手足抽搐。不能步履。兩手脈俱軟弱。用當歸、白芍藥、木

瓜、石斛、蒼耳子、枸杞子各一錢。薏苡仁二錢。人參、牛膝各七分。陳皮、白芥子各六分。紅花三分。水煎飲之。其夜大便下黑血二升。迺得睡。痛搐俱緩。改用人參、當歸、白芍藥各一錢二分。薏苡仁四錢。牛膝、木瓜、石斛各八分。紅花、酒芩各五分。其夜大便仍有黑物。從此精神和好。寢食俱安。後五日。因爲怒忤。且加食傷。右手左足大搐。左足大腿疼痛。縮而難伸。伸則痛。其左脇極痛。小水短。用山查、青皮、防己、人參、半夏、麴、陳皮、苡仁、川芎、蒼耳子、杜仲、石斛。以瓜蔓爲君。服下左脇痛止。右手亦不搐矣。惟左大腿內股筋痛。一搐則膝抵於口。此亦事之異者。因改以人參、當歸、薏苡仁、甘草、黃柏、白芍藥、鉤藤、牛膝、木通、山梔子。諸痛搐悉愈。口亦不渴。後只以此法調理五日。隨能縱步出戶。

一小童上達。年十六。忽面大腫。足亦微腫。喘息不安。此脾虛濕氣壅盛所致。酒芩、桑白皮、防風、葶藶子、陳皮、羌活、升麻、甘草、澤瀉、白朮。此上下分消法也。服後腫勢稍退。但正氣甚虛。以六君子湯加麥芽、澤瀉調理而安。一日因多飲食。且感風寒。痰涌吐逆。見鬼。面掉手足角弓反張。唇口色黑。勢極危急。此癰症也。以膽星、半夏、天麻、僵蠶、橘紅、炙甘草、枳實、麥芽、白朮、紫蘇子、杏仁、前胡、白茯苓、薑三

片。水煎飲之。一劑而愈。此後再不復發。

族姪良詮。患血痢腹痛。裏急後重。時師治以香連丸、黃芩芍藥湯。不愈。腹反增痛。面赤唇紅。有似塗硃。喊叫之聲。四舍悚駭。比有太學寧宇者。仁心爲質人也。憐其家貧莫抵。拉予爲診。六脈洪大。伏於床間。兩眼淚而不能言。太學會其意。語予曰。症誠急。彼以後事無措。而難以言。予曰。諾。吾能起之。以生熟白芍藥六錢。生熟甘草二錢。乾薑、肉桂各一錢。木香五錢。棗二枚。水煎飲之。飲竟。嗒焉而臥。太學心疑。歸囑家奴曰。倘有急扣門。可卽報我。及明見無動靜。迺令人覘病者。何若。復曰。夜來痢減十之五。痛減十之七。早間已啜粥半盞矣。太學喜而叩予。曰。渠面赤唇紅。脈大。所下皆血。症皆屬熱。叔迺復投熱劑。吾甚恐。一夜不能寐。迺今疾已減半。生有望焉。不卜今日用何劑。予曰。比昨劑差小耳。方仍昨也。太學曰。吾惑矣。何視熱爲寒耶。予曰。君知脈下爲熱。不知大而無力。迺虛寒也。面赤唇紅。由中寒而火不能下。陰盛格陽之症。設是真熱腹痛。其人體仰而舒。寒則引而伏。所下血色帶晦。均是假熱寒症明矣。前劑果再進而全瘳。太學復書報予曰。昨聞虛實真假之論。非飲上池水者。不能道也。幸註之以詔後世。

一婦年三十二。大發寒熱。胸膈有痰。大便洩瀉。以二陳湯。加白朮、桂枝、白芍藥、柴胡、酒芩。一帖而止。後因怒。早晨又復發熱。吐血一盞。口渴汗多。脈甚數。陳皮、知母、柴胡、杏仁、丹皮、酒芩、白朮、人參、烏梅、青皮、檳榔。水煎服之。用此調理。數脈漸退。惟左脈尙弦。寒熱已止。喉中痰聲已定。後又因將息失宜。兩脅疼。痰多。嗽不易出。脈較前不甚數。以瓜蒌仁一錢半、貝母、白芥子各一錢、蘿蔔子、桃仁、滑石、牡丹皮、香附、山梔子各七分、青皮、赤芍藥、甘草各四分煎服。血絕不來。嗽熱寢息而安。

從弟婦程氏。右脅痛不能睡。背心疼。下午潮熱。胸膈作梗。痰中有血。大便秘。用大黃、以韭菜汁、蘿蔔汁、苧根汁各和勻。將大黃拌濕炒乾。再拌再炒。如此三次。以黑爲度。三錢。瓜蒌仁二錢。貝母、當歸、山梔子、牡丹皮各一錢。青皮、前胡、穿山甲各六分。甘草三分。水煎飲之。凡三帖而瘳。再亦不發。

黃懷虛咳嗽嘔吐。不知飢餓。氣逆不調。不得仰臥。左脅亦不能着席。原曾吐紅。近又傷食。先以丹溪保和丸進之。繼以穀芽、橘紅、白朮、枳實、半夏、麴、甘草、蘿蔔子、茯苓、杏仁、桑白皮將養而安。

一族姊。年近六十。咳嗽口渴。常吐蚘蟲。用前胡、知母、天花粉、白芍藥、當歸、甘草、陳皮、桔梗、烏梅、桑白皮煎服。諸症悉止。後半年。膝灣紅腫作痛。大便秘。黃柏、當歸、生地、紅花、藏靈仙、羌活、蒼耳子、五加皮、防風、苡仁、四劑全瘳。

族姪婦戴氏。兩寸脈滑大。兩尺沉微。心痛徹背。背痛徹心。甚則必探吐其食。迺已。近來每一痛必七日。僅進白水。粒食不能進。進則吐而痛更加。七日後痛漸已。如此者十七年所矣。始則一年兩發。又一年六七發。今則一月一發。以積氣丸治之。不終劑而斷根。

老僕來興咳嗽。胸脅背心脹痛。如刀刃所割。發熱口渴。諸治不瘳。脈浮而數。此風寒鼓激痰火上湧而然。以前胡、麻黃、紫蘇子散風邪爲臣。以瓜蒌仁治痰火爲君。橘紅、半夏、旋覆花、杏仁爲佐。枳殼、桔梗爲使。兩劑而平。

一婦生女不生子。過思多鬱。小便秘而不通。脹悶不安者二日。歎醫汪氏。以備急丸進之。謂大便行。小數自利也。詎意大便行後。而小水點滴不通。脹悶益急。時刻不能存。將欲自盡。家遂急予爲治。予詢之曰。近來經水行否。答曰。行過十日矣。小腹腫大如一大西瓜之硬。自大便瀉後。疲困不足以息。勢若燃眉。予曰。此

轉脖子病也。不急治。則危矣。以補中益氣湯。臨服。入韭菜汁一小酒杯。服訖。選有力婦人進房。令患者橫臥床間。力婦以患者兩腳膝灣架於肩上。將患者下身虛空提起。搖擺數四。俾尿脬倒上。人徐放下。患者去衣不及。小便箭射而出。熱如湯。黑如墨。頃刻盈盆。小腹立消而愈。後遇數人。不拘男女。皆以此法治之而安。

崑池太學內人患牙痛。一晚暈厥三次。次日兩腮紅腫。痛不可支。且洒淅惡寒。寢食廢。以清胃湯加石膏爲君。白芷爲臣。連翹爲佐。北細辛爲使。飲下痛頓釋。然如風滅燈之速。外以明礬爲末。大五倍子一枚。將礬裝入。以滿爲率。炭火上炙焦。以礬紅枯爲末。不時擦牙痛處。牙痛立止。此方多效。

一僕婦因產難而子宮墜出戶外。半月不收。艱於坐臥。家貧不能求藥。憂恐成痼。鄰嫗爲訪之專門。黃醫博氏教之曰。此易事也。只須補中益氣湯一百帖。每帖要人參三錢。計二觔可收功也。夫聞言。卽大伸舌謝之曰。儂家朝傭暮食。無隔宿之儲。甌生蛛網者半越月矣。安有人參二斤可服也。惟命是俟耳。嫗復向予言之。且告以醫博氏之治。予笑語嫗曰。審如彼言。貧家則盡俟命矣。又奚醫爲。

此必產時受寒血凝滯。不能斂而收入。症雖名陰脫。未必盡由氣虛下脫也。觀其善飧而大小便如常可知矣。予有一法。價廉而功捷。三五日可瘳也。用未經水石灰榦一塊。重二三觔者。又以韭菜二三觔。煎湯置盆中。將灰榦投入。灰開湯沸。看沸聲盡。迺濾去灰。帶熱坐於盆上。先熏後洗。卽以熱韭菜於患處揉擲。蓋石灰能散寒消血。韭菜亦行氣消血。一日洗一次。如法洗之。初極爽快。洗三日。果消軟收入。此予臆度之方。初不期捷效如是。里中聞之。咸謂此方合命名曰賽百帖人參湯云。

族姪孫媳程氏。雙桂翁女也。年甫三旬。產曾五胎。今則經閉不行者八年。肌肉則豐肥於昔。飲食又倍加於昔。精采則艷羨於昔。腹柔不堅。略無所謂病者。獨經閉不行。不生育耳。專科率用四物湯。玄胡索。牡丹皮諸通調之劑。服千餘帖矣。又如三稜。蓬朮。乾漆。桃仁。蘇木之類。莫不概嘗。罔有一應。訪予爲診。六脈緩大有力。予曰。此脾濕生痰。脂滿子宮。徒行血活血破血無益也。法宜調氣消痰。燥濕熔脂。俾使清瘦。庶新飲食不復生痰。不助肥脂。復爲經水。經不期行而自行矣。若彼專科者流。局局然養血活血破血。而欲望其經行。不亦難乎。蓋前劑皆

滋濕生痰之味。非有濕痰者所宜。而肥人尤不宜用也。迺爲訂一方。以平胃散加滑石、桃仁、黃連、薑黃、丹參、南星、半夏。作丸劑服。半年而經行。次年生一子。後連生一子一女。

熊成八官江右南昌人也。早日行路。忽見邪火二團。滾滾而來。大驚駭。次日腹中膨滿。漸成脹滿。面白皮薄。兩手瘦削。兩足皆有浮氣。按之窅然不起。行動氣促。形神俱弱。醫謂神弱氣促。面白肌瘦。胸腹青筋。縷縷如貫索。小水清長。形症如此。脾虛所致。以參苓白朮散投之。十日堵然如鼓。中有一塊。巍巍突出。堅若鐵石。臍已平滿。勻粒不入。醫者復診。與渠決曰。若疾法在不治。盍早圖歸。毋作異鄉鬼也。病者聞言。汨簌簌下。熊東溪憐而懇予爲診。脈沉弦有力。診竟語渠曰。審脈驗症。非氣虛中滿候也。前補太驟。適有助長。顧今霉雨。途遙卽歸。恐未能時刻可到。卽到又未必遇良手。治稍異。則大事去矣。予有一藥。尙可冀生。東溪力爲之請。以珀琥調中丸。日二進之。一進甚甘。再進稱快。十日腹漸寬。塊漸熔。半月塊盡消去。青筋俱斂。改以平胃散。加蘿蔔子、薑黃、苡仁、砂仁、木香。調養一月。飲食大加。帖然安寢。兩足之浮。亦并消釋。

從姪中叔太學。以暑月赴南雍。一日轉班。出索茶飲。飲輒逆流。左鼻出茶。入腹者十之三。當迂白下。名家調理者盡其人。幾一月。不惟飲茶水爲然。食粥與飯亦多從鼻出。太學生平喜精潔。日與交遊。皆縉紳逢掖。遂以疾自慚。因告假圖治。聞京口多名醫。買舟訪之。如何如張如團。無不謁治。然愈服藥愈病。漸加惡心。頭暈肌肉削。四肢無力。心益惴惴。亟歸就予治。予診畢。因叩所見。諸名公認何症。投何劑。中叔曰。諸君皆謂此疾。板籍無載。治法無稽。徒揣度爲胃火。謂諸逆上衝。皆屬於火。故投劑非黃連解毒。卽三黃石膏。梔子黃柏。知母。天花粉。葛根之屬。姪亦以初到白下。苦酒。因酒動火。理或爲然。聽其治。而不遑它計也。予曰。治病貴辨明經絡。與經絡之出納虛實。明藏象。察經度。究竟夫病機病能。此扁鵲所以隨俗爲變也。何常拘拘守方書哉。內經有云。咽喉者。水穀之道路也。喉嚨者。氣之所以上下者也。頰頰者。分氣之所洩也。人之鼻涕淵出不收者。頰頰不開也。子之症亦頰頰不開之類爾。頰頰不開。故氣上而不下。會厭弱而不能揜其氣喉。夫鼻與氣喉相通。惟不揜。故飲食逆。從鼻竅而出。不見常人偶氣逆。而飲食自噴嚏出乎。卽其例也。且右脈緩弱無力。氣虛明矣。內經云。形寒飲冷。

則傷肺。又曰。脾胃喜溫而惡寒。又云。視聽明而清涼。香臭辨而溫暖。子多服寒涼。此所以惡心頭暈肌消也。予但爲溫補。蓋肺屬金而主氣。金氣旺則收斂下降。氣下降則飲食從氣下矣。以六君子湯加辛夷、桑白皮、苡仁、沉香。一進而勢緩。三進而止大半。七劑而全安。以此症舊無載。故筆之以俟後人采焉。

程達庵四媳戴氏。產半月而腿疼。迎專科診視曰。虛投以八珍湯。服十日。疼益甚。予赴邑侯之召。道經其廬。達庵趨問產後半月而腿疼何症也。予曰。兩腿皆疼。獨一疼耶。達庵曰。右腿疼。予問疼處熱否。曰熱。予謂切不可認虛認風。此產後敗血凝滯血海。流於經絡。不急治。則血無從出。久必化膿成毒。或爲腸癰。今腿痛是其徵也。達庵默然而別。復迎專科。又曰風也。但丹溪有云。產後須當大補氣血。雖有它症。以末治之。投以十全大補湯。痛轉劇。大發寒熱。小腹近髀果紅腫出膿。外科又爲生肌收口太蚤。致腰俞復發一毒。腫痛寒熱如初。十日後大潰膿而不收口。精神委頓。肌肉陡削。飲食不進。惡心怯寒。奄奄一息爾。外科曰。不可爲也。專科曰。余但治胎前產後。今爲腫毒所壞。皆辭去而不下藥。達庵始悔不聽予言。以致誤事。因急予。予往視。六脈濡大無力。瘡口流清水而無膿。予

曰。勢棘矣。不暇治疾。速爲保脾。蓋五臟六腑。皆藉脾土以爲養。然非大劑人參。附子不可。始以人參。白朮各五錢。甘草。乾薑。大附子各一錢。黃耆三錢。白芷。桂心各五分。以其能排膿止疼也。外科猶然阻曰。白朮作膿。恐不可服。予曰。膿不殺人。飲食不入口。則死人也。急進之。四帖而神氣回。飲食進。諸症悉減。瘡口成膿。予語之曰。生矣。改用參苓白朮散。調理一月而安。達庵叩予曰。公何預知必爲腫毒。當急治也。予曰。內經所謂臟象。又云。現症腿疼而熱。症已現矣。生於產後。非敗血所致。而何。於時急爲疏通。不留經絡。何毒之有。專科不察而補。是益其毒而助之潰也。外科不審虛實強弱。槩以毒治之。奈何不使患者幾危哉。達庵曰。專科之不足恃也如此。夫雖然。不如是。無以見公之高矣。

孫文垣醫案

明 新安 孫一奎文垣甫輯

鄞縣 曹赤電炳章圈點

卷五

宜興治驗

學士徐檢老。體豐厚。善飲。致有腸風。計下血不下數桶。因而委頓。己卯仲冬。右脇極疼痛。上至耳後。夜分尤甚。左右不能轉動。轉動則痛甚。飲食減。面色青。閉目。汗出如雨。濕透衣被。故不敢合睫而睡。族醫皆投以香附、青皮及辛散之劑。痛愈甚。汗愈多。面愈青。逆予診之。兩寸短弱。左關弦而搏指。右關沉滑。六脈皆近七至。予曰。據痛在少陽經分野。治必動於怒。水火之性。上而不下。故上衝耳後而皆痛也。夜痛甚者。蓋夜屬肝。氣用事。內經云。司疎洩者肝也。邪在肝膽。故闔目汗即大出。中焦原有濕痰。法當調肝清熱解毒為主。兼利小便。不可遽止汗。

而使邪無出路。今脈太數。如遽斂汗。是逆其木火之性。不惟痛加。且將發腫毒。而害非淺矣。內經云。膏粱之變。足生大疔。當預防之。公曰。何爲斂劑而謂不宜。予曰。當歸六黃湯。內有地黃。當歸。黃耆。皆滯痰閉氣之味。桔梗亦非所宜。書曰。下虛者。及怒氣上升者。皆不可用。故當慎也。因以柴胡。黃連爲君。白芍。甘草。天花粉爲臣。紅花。連翹爲佐。龍膽草爲使。服後汗雖仍舊。痛卽減三之一。不妨睡矣。次日仍用前藥。痛又減半。第三日又服。左右轉動如常。飲食亦加。予未至。公已先迎姑蘇盛氏。盛氏幼時窗友也。家世受醫。公初不急。予曰。引領期盛到。可刈枯剷朽也。盛至診畢。遂詰曾用何劑。公出予發劑示盛。盛大叫稱謬。謂當隆冬之候。汗多如此。陽氣大洩。何敢以柴胡爲君。喉中痰既未清。又何不用桔梗。當歸六黃湯。前賢已試之藥。置而不用。是舍紀律而務野戰也。卽取六黃湯加桔梗以進。公雅信盛。迺傾心以從。速煎服之。未逾時而舊病隨作。色色如惡。左右復不能轉動。自戌而至子丑。苦不能支。有內侍語之曰。服孫君藥雖未全可。亦已去泰半。甚彼曾言二藥不可用。何爲輕犯而受此苦。宜急取孫君藥煎飲。飲下。卽伏枕鼾睡。達旦始寤。命使速予。至而叩予曰。人言隆冬汗出。不當用柴

胡。而公用爲君何旨。予曰。膽與肝爲表裏。肝膽之火鬱而不發。故痛。痛極而汗。汗出而痛減者。是火從汗出。蓋汗迺邪出之門也。予故曰。汗不可斂。本草云。柴胡瀉肝膽火。而以黃連佐之。內經云。木鬱則達。火鬱則發。言當順其性而利導之。勢則易克。古人治火之法。輕則正治。重則從其性而升之者。以此。蓋醫貴通變。如陰虛火動而汗出者。內無有餘邪。故以六黃湯斂而降之。常治法也。今內有餘邪未出。遽斂降之。邪無從出。勢必成毒。故變常而從治者。使邪有出路。木火之性不逆。則毒不成而痛可減也。公曰。善哉。孫君之劑。奇正相生。不下孫武子兵法。何輕以無紀律議之。願投劑而奏凱也。予曰。公數日後。瘡瘍大發。後跨且有興塊作痛。此毒出之徵。公於時無恐。改用柴胡、白芍、甘草、丹參、苦參、茯苓、藿麥、車前子、黃柏、金銀花、連翹。服三日而痛全減。汗全收。左右不難轉動矣。踰日。公謂肌膚癢甚。藹藹然似癰疹。豈瘡出與。欲以藥浴之可乎。予曰。可。再三。日兩跨果發興塊如棋子大者數枚。且痛。予業已製蠟礬丸以待。至是授服之。瘡果遍身大發。兩腿爲甚。一月餘而瘳。公始信予防毒之言不謬。披襟交驩。且作序識勝。期與終身不替云。

吳儀制主政尙卿先生。柱史安節公公子也。弱冠時。病鼻塞不能噴者四年。且衄。寒月更甚。口渴。咽喉邊有痰核。脈之右寸關洪滑。予曰。此肺經痰火症也。與前胡、秦艽、葛根、薄荷、石膏、天花粉、玄參、貝母、山梔子、甘草、白藥子、桔梗、丹皮、四帖而衄止。夜與牛黃三清丸數粒噙之。鼻氣卽通利。能嗅。噙未旬日全愈。先生初年績學。心專志一。不知寒暑。致有塞衄疾。又萬歷己卯庚辰。郡邑試皆首選。如此者再。而皆不得籍名學宮。益鬱然不適。予時把臂語之曰。先生何以一儒冠爲汲汲據脈。科甲當不在尊君下。卽館中二友。亦金馬客也。依愚見。史先登。公次之。吳又次之。日後當以斯言爲左券。毋相忌。後三公先後登第。一如予言。萬歷戊戌春。余應吳宮詹召。公暨史玉老。不爽前言。皆爲予譔玄珠序。而紀其事。以見一時良遇云。

宜興宋令君。山東人也。太夫人年五十餘。病胸膈脹痛。予時寓吳宮詹家。而繩庵安節二公。皆宋公年友。因二公而逆予。診太夫人脈。右寸關洪滑。彈指如黃豆大。左三部散亂無緒。如解索狀。兩尺絕無神氣。予不得其受病之源。而宋公亦不以病源告。卒然問曰。脈爲何症。予曰。據左脈爲虛弱久病。右脈似又爲飲食

所傷必病小愈而又傷。反覆之疾也。其勢亦危。宋公聞言危。迺拂其意。貌似不恭。予見其貌。即辭出。至後堂。有各佐貳。及學博。余公在焉。余公子鄉人也。素亦知醫。問曰。症候何如。予曰。不治。渠謂前診者皆無難色。公何云然。予曰。兩尺無神。如樹無根。此難經所云也。左脈散亂。右脈如豆。大彈指。不旬日當見。果後七日而卒。邑中鄉先生士民相傳。謂予能預決死生云。

宮詹吳少溪先生有酒積。常患胃脘疼。近右腰眼足跟肢節皆痛。予謂此皆由溼熱傷筋。脾肺痰火所致。法宜清肅中宮。消痰去濕。俾經絡流通。筋骨自不疼矣。切不可作風痛而用風劑。公極然之。用二陳湯加藏靈仙、蒼朮、黃柏、五加皮、枳實、葛根、山梔子進之。肢節痛減。改用清氣化痰丸加瓦楞子、蒼朮、枳實、薑黃。用竹瀝、神麴打糊爲丸。調理而安。

宜興令君胡鏡陽公尊堂太夫人年七十二。脾洩十五年不愈。近加吐紅咳嗽痰多。痰亦不易出。申酉時潮熱。胸膈壅塞不能就枕。飲食大減。且惡風。終日坐幔中。諸醫謂發熱吐紅。法當寒涼。脾洩多年。氣虛老萆。法當溫補。二病矛盾。難於投劑。又謂身熱脈大。血家所忌。益束手無能爲計。皆辭去。且歸咎於長橋上拆。

屋。致正堂不利。以是前丁宋二公接跡憂去。邑中洶洶。因延予治。診得兩手脈皆浮而洪數。亦皆帶滑。予曰。據脈洪數爲熱。滑爲痰。浮爲風邪在表。以傷風故惡風。仲景曰。當汗不汗。必作衄症。法當清解。可無恙也。公以諸醫二病矛盾之說爲問。予曰。此暗於先後者也。夫脾洩已久。未嘗爲害。新病勢熾。宜當速去。所謂急則治其標也。俟邪去之後。補脾未晚。且潮熱爲風邪所致之熱。而非陰虛火動之熱。血適當汗不汗之血。亦非陰虛火動之血。內經云。奪血者無汗。奪汗者無血。當汗不汗。邪鼓血動。但得表解熱退。血自止耳。公憮然曰。噫。噫。疇昔老母過錢塘。遇風濤受驚。因發熱咳嗽。血出痰多。今以公言質之。誠由風邪起病也。願以藥進。予用紫蘇子、前胡、麻黃、薄荷解表爲君。枳殼、桔梗、桑白皮、瓜蒌、紫苑、貝母消痰治嗽爲臣。酒芩、甘草爲佐。連服二帖。五更微汗而熱退。胸膈不壅。嗽亦稍減。血止大半。始進粥。次日減麻黃。加白茯苓。夜服七製化痰丸。其夜痰嗽又減半。從是不惡風而去。慢矣。前方再減枳殼。加薏苡仁。調理而安。

曹同府東崗先生。右脅痛。脈之左弦大。右滑大。此由外傷風。內傷食所致也。又加咳嗽。夜更痛。體肥面青。寢食俱廢。予以紫蘇、柴胡解其表。白芥子、桂皮、香附治

其脅痛。山查、蘿蔔子消其食。杏仁、陳皮、半夏、瓜蒌仁治其嗽。四帖。飲食進。嗽亦除。脇痛減十之七。再與保和丸服之而安。

宜興令君鏡陽先生。上焦有浮熱。胃中有食積痰飲。平常好食熱物。稍涼卽腹痛。洩瀉。大便後間有紅。又因勞心動火。頭面生瘡癰作疼。脈左數。右滑數。以玄參、石斛、白芍各二錢。甘草一錢。天花粉、連翹、貝母各一錢。茯苓八分。薄荷五分。四帖。瘡癰皆愈。再以保和丸加薑、連、滑石、紅麴、白朮丸與服。半月全安。

吳鵠源先生。咳嗽口乾。腹中如火滾動。不知飽餓。亦不思飲食。右脇痛。脈右滑數。左弦數。此中焦有痰積也。先以總管丸去其痰。而後養脾。服後大便下稠粘黃糜甚多。小水如血。此熱下行也。繼以保和丸理脾消餘痰。又使新飲食不生痰也。外以橘紅、貝母、天花粉、桔梗、酒芩、知母、葛根、甘草、滑石服之。其咳嗽亦除。

吳鶴洲先生太夫人。年八十六。素有痰火。大便一日三四行。一夜兩起。腸鳴。臍腹膨脹。脈三四至一止。或七八至一止。諸醫不知溫補。妄以平胃散加黃連、山查、白芍一切苦寒之劑投之。尅伐太過。因致腹疼。顧不咎其誤。但謂年高而脈緩。至是爲凶兆。辭去不治。逆予診之。予曰。據脈書云。脈緩而止曰結。數而止曰促。

今結脈非凶脈也。由寒溼之痰凝滯所致。法當溫補下元。俾火得以生土。所謂虛則補其母者。當無恙矣。鶴洲公曰。壽算何如。予曰。兩尺迢迢有神。壽徵也。卽百年猶未艾。以補骨脂、白朮各三錢爲君。杜仲二錢爲臣。白茯苓、澤瀉、陳皮、甘草各一錢爲佐。肉豆蔻、益智仁各五分爲使。四帖。大便實。惟腸鳴未止。減肉豆蔻。加炮薑五分而安。壽果至九十有八。

吳鶴洲如夫人。病胃脘痛。醫有認爲蟲者。有認爲火者。又有認爲痰爲氣爲食爲虛爲血爲寒者。諸說紛紛。百治不效。羣然指爲怪疾。請予診。兩手大而無力。皆六至。予曰。豈怪耶。肝脾相勝之症耳。東垣治例。腹痛以芍藥爲君。惡熱而痛。加黃柏效。此法則治當萬全矣。白芍四錢。一半生。一半酒炒。伐肝補脾爲君。大甘草二錢。一半生。一半炙。緩肝養脾爲臣。山查爲佐。炒黑山梔仁、五靈脂各一錢。止痛爲使。三帖而病愈。鶴洲公喜曰。君真能用藥神而降病怪者也。嘻。

曹宜崗常多夢遺。予曰。此神志不足也。又有疝氣。近加嘈雜。食硬物。喉中梗作疼。予謂病有緩急。則治有先後。咽喉之症。非急先而何。初爲清肅上焦。次爲養補神志。俾神旺而精有主。可不妄遺。然後以下部之劑治其疝。清肅上焦。用六君

子湯。加滑石、酒連、枇杷葉、蘆柴根、香附、吳茱萸。四帖。嘈雜止。喉中寬舒。再以猪肚丸補其神志。遠志、石菖蒲、石蓮子、韭菜子、黃連、貝母各二兩。白朮五兩。枸杞子、白茯苓各一兩。爲末。入雄猪肚內。飯中蒸熟。搗爲丸。梧桐子大。硃砂爲衣。每晚燈心湯送下二錢。治疝丸。橘核、昆布各四兩。川椒、山梔子炒黑、山查核各二兩。柴胡、小茴香各一兩。哺雞子殼煨三兩。麵糊爲丸。空心白湯或酒送下三錢。不終劑而瘳。

吳荆樵文學。愷悌君子也。左關尺脈甚弦。疝氣半年。兩跨結核硬痛。予以平疝丸消之。海藻、昆布、橘核各酒醋炒四兩。玄胡索、山梔子仁、山查核、小茴香、柴胡各一兩。龍膽草酒炒五錢。醋打麵糊爲丸。梧桐子大。空心酒下三錢。服一月而消。吳鶴洲先生。中焦有痰。肺氣不足。瘧一日一發。熱多寒少。口渴小水不利。倦怠頭疼。脈左弦大。右寸短弱。關尺滑大。以石膏、知母、黃耆同柴胡湯煎服。服後腹作瀉。前方去石膏、知母。邪熱減大半。惟僅潮熱而口渴甚。改以人參、葛根、知母、麥門冬、柴胡、陳皮、甘草、白朮、鱉甲。五更服之而愈。

吳雪舫先生。左脅下紅塊大如雞子。傍有小菩藟作疼。左脈弦大而數。右滑大而

數。蓋由生平嗜燂炙。以致肝膽二經有熱毒也。用大瓜蒌一枚。白芍三錢。當歸。甘草。貝母各一錢。連進三帖。疼減其半。脅下紅成一小癰。以解毒早。故硬塊潛消。大毒不成也。仍當爲活血清熱。再用白芍三錢。當歸一錢半。金銀花。甘草各一錢。大瓜蒌一枚。連翹。山梔仁各八分。紅花。柴胡各五分。四帖而愈。

吳孝廉球泉先生。心血不足。胃中有痰。下元陽氣不充。脈六部皆弱。惟右關滑。以遠志。枸杞子各四兩。巴戟。兔絲子。破故紙。山茱萸各二兩。五味子。白茯苓。人參各一兩。煉蜜爲丸。空心淡鹽湯送下三錢。外以固陽鎖真丹助之。龍齒。益智仁各一兩。黃柏二兩。辰砂。甘草。蓮花心各五錢。芡實粉打糊爲丸。梧桐子大。每夜燈心湯送下一錢五分。極能固精。

李思椿患胸膈脹痛。痰中有紫色瘀血。其原有酒積鬱火也。脈兩寸短。關滑。兩手皆數。先與紅六神丸服之。繼與山梔。酒連。鬱金。香附。橘紅。茯苓。半夏。麴。甘草。滑石。紫蘇子。服後胸膈稍寬。仍以山梔仁。貝母。益元散各二兩。牡丹皮。黃連。橘紅各一兩半。白茯苓一兩。紫蘇子。鬱金。紅麴各五錢。茜根三兩。神麴打糊爲丸。每早晚白湯送下二錢。調理而愈。

吳雙泉公。兩尺脈洪大。兩關滑。兩尺沉微。此陽亢陰微之候。上盛而下虛也。上盛者。痰與火。下虛者。腎經真陰不足也。法當清上補下。上清則頭自清利。耳鳴眩暈之症可除。下實則腰膝不痠。筋骨強健。清上用清中丸。貝母、橘紅、枳實、海石、山查、茯苓、白芥子、黃連、黃芩、滑石、青黛、神麴爲丸。食後茶送下二錢。補下用既濟丹、辰砂、磁石各一兩。生熟地四兩。黃柏、知母、兔絲子、柏子仁各二兩。牛膝、枸杞子、白茯苓各一兩半。煉蜜爲丸。梧桐子大。空心淡鹽湯送下八九十丸。

李寅齋先生患血淋。幾二年不愈。每發十餘日。小水艱澀難出。竅痛不可言。將發必先面熱牙疼。後則血淋。前數日飲湯水欲溫和。再二日欲熱。又二日非冷如冰者不可。燥渴之甚。令速汲井水連飲二三碗。猶以爲未足。未發時大便燥結。四五日一行。發則瀉而不實。脈左寸短弱。關弦大。右寸下半指與關皆滑大。兩尺俱洪大。據此中焦有痰。肝經有瘀血也。向服滋陰降火。及淡滲利竅之劑。皆無效。且年六十有三。病已久。血去多。何可不兼補。治當去瘀生新。提清降濁。用四物湯加杜牛膝補新血。滑石、桃仁消其瘀血。枳實、貝母以化痰。山梔仁以降火。柴胡升提清氣。二十帖而諸症漸減。再以滑石、黃柏、知母各一兩。琥珀、小茴

香、桂心各一錢半。玄明粉三錢。海金沙、沒藥各五錢。茅根汁熬膏爲丸。每服一錢。空心及晚茅根湯送下而愈。

徐熙字文學內眷。常患前後心痛。每痛必面赤手心熱。耳鳴眩暈。卽飲白湯亦停。膈間不下。且作酸嘔逆。吐出皆酸水。五七日方止。四肢痠軟無力。氣逆上噯。迺其常也。兩手脈皆沉數。左弦。此上焦有痰飲故也。先以二陳湯加瓦楞子、滑石、吳茱萸、薑連、前胡、枳殼、竹茹、香附、大腹皮。服後以橘紅、半夏、滑石各一兩爲臣。白螺螄殼煨過四兩爲君。茯苓、薑黃各一兩半爲佐。旋覆花一兩。吳茱萸三錢爲使。麴糊爲丸。每服三錢。調理而愈。

湯簡菴封君。血分熱甚。以善飲致腸風。且心腎不交。予以四物湯。加酸棗仁、側柏葉、槐花、連翹。煉蜜爲丸。服之頓愈。

吳仰玄先生。患胃脘痛。痛則徹於背。以手重按之少止。痛時冷汗如雨。脈瀼。此氣虛而痛也。以小建中湯。加御米殼服之而愈。

杭芝崗文學。酒後近內。每行三峰採戰。對景忘情之法。致成血淋。自仲夏至歲杪未愈。便下或紅或紫。中有塊如筋膜狀。或如蘇木汁色。間有小黑子。三五日一

發。或勞心。或勞力。或久立。坐亦發。訪問醫道。百治不效。以吳中書漢源公交善。逆予治之。觀其色白而青。肌肉削甚。診其脈。左寸沉弱。關尺弦細。右寸略滑。據此必肺經有濁痰。肝經有瘀血。總由酒後竭力縱慾。淫火交煽。精離故道。不識澄心調氣攝精歸源之法。以致凝滯經絡。流於溺道。故新血行至。被阻塞而成淋濁也。三五日一至者。科盈滿溢故耳。先與丹參加茅根濃煎服。小便解後。以瓦器盛之。少頃即成金色黃砂。迺用腎氣丸加琥珀海金沙黃柏。以杜牛膝連葉搗汁熬膏爲丸調理。外以川芎三錢當歸七錢杜牛膝草根煎服。臨發時用滑石甘草梢桃仁海金沙麝香爲末。以韭菜汁藕汁調服。去其凝精敗血。則新血始得歸源。而病根可除矣。三月全愈。

吳中翰漢源先生。腸風下血。腹中微痛。脈左寸短。右關滑。兩尺弦大。以地榆槐花。枳殼各三錢。荆芥穗秦艽青蒿葛根各一錢半。黃連二錢。兩劑而愈。

大柱史吳安節公。脾肺二經有痰火。中焦有溼熱。流於膀胱爲淋濁。溲之前作痛。小便了而不了。脈左寸短弱。關弦大。右寸關滑。兩尺洪大。六部皆數。法當先清上中二焦痰火。然後提清降濁。庶日後筋骨無疼痛之患。先與葶藶分清飲。加

山梔、黃柏、滑石。服之淋濁減半。改以二陳湯。加山梔、黃柏、滑石、螺螄殼、木通。以去溼熱而消中焦之痰。再加柴胡、升麻、桔梗。以提清氣。四帖而愈。

吳宮詹少溪翁。原有酒積。且頻傷於怒。致右脅之火衝上作疼。耳鳴眩暈。大便艱澀。脈右寸關滑數。左弦數。以當歸龍會丸加牛膽、南星。治之而愈。

吳孝廉球泉公內人。痢疾後感寒。又月水適至。大發熱口渴。遍身疼。胸膈飽悶。煩躁。頭微疼。耳亦聾。大便瀉。舌上白胎。脈七八至。亂而無序。此三陽合病春溫症也。時師誤以爲漏底傷寒不治。予曰。病已危。醫而不起者有矣。未有不醫而起者也。且投三陽藥服之。挑察徵應。再相時而動。以柴胡三錢、葛根、白芍藥各二錢、枳實、桔梗、酒芩、竹茹各一錢、天花粉八分、炙甘草、桂枝各五分。服後但覺遍身冷如冰。面與四肢尤甚。六脈俱無。舉家及醫者皆嘆爲物故耳。予獨曰。非死候也。蓋夜半陰極陽生。勢欲作汗。譬之天將雨而六合皆陰。球泉疑信相半。而諸醫聞之皆笑去。四鼓後果戰而汗出。衣被皆溼。四肢體面漸溫。神思清爽。且索粥。舉家欣欣以爲再生。次日惟耳尙聾。腹中大響。脈近六至。改以柴苓湯加烏梅兩帖而愈。

吳西雲先生庶母。筋骨無力。不能起止。將成痿症。上熱下寒。易爲驚恐。小腹左邊疼。以玄胡索、五靈脂、陳皮、半夏、香附、青皮、白芍藥、茯苓、山梔子煎服。小腹痛減。惟小水頻數。改用青蒿、山梔子、苡仁、白芍藥、甘草、蘆麥。服後熱退。小水不頻數。獨胸膈微痛。夜不欲睡。再以當歸、白芍藥、山梔子、香附、柴胡、陳皮、甘草、茯苓、青蒿調理全愈。

蔣近思令郎。脇痛氣促。胸滿喉疼。痰中有血屑。下午潮熱。口渴頭重。指稍冷。服滋陰降火之劑不效。且紅愈多。痰咳不出。請予診之。右寸關滑大。左尺亦大。予謂此肺經有瘀血。濁痰壅而爲熱也。治當先清化。不當先滋補。以瓜蒌仁三錢。紅花、紫苑、丹皮、枳殼各一錢。滑石二錢。甘草五分。前胡、青蒿水煎。臨服加童便一小酒杯。兩帖而熱退血止。惟咳嗽未除。胸膈不寬。再以瓜蒌、陳皮、貝母、蘆薈子、馬兜鈴、白茯苓、甘草、紫苑、滑石、杏仁調理而愈。

徐學士檢老。以正月食新蒜炒肉。又冒風寒。因咳嗽喉疼聲啞。翁原有痰火。又爲外邪所束。不得發越。以致此。治當潤肺清熱。化痰調氣。以祛其本。兼散邪解表。以治其標。庶乎喉痛可除。聲音可開亮矣。先與瓜蒌仁、橘紅、桔梗、薄荷、貝母、桑

白皮、地骨皮、葛根、前胡、甘草四帖。復以滾痰丸同七製化痰丸兩帖夜服。諸症除而聲且亮矣。此釜底抽薪法也。

萬肅庵先生令郎發熱十一日。口渴。舌心色若沉香。且甚乾燥。額上熱極。兩脇亦熱。耳微聾。曾未有汗。亦已下二次。熱不少除。小水絕少。神昏足冷。飲食不思。市醫技窮。迺告急於予。予診之。左脈中按數而有力。右脈軟弱。據症爲陽明少陽并病也。當以柴葛湯清徹其熱。看汗有無。再當機而處。柴胡五錢。葛根三錢。白芍藥、石膏各二錢。人參、升麻、天花粉各一錢。粉草七分。水煎服之。次早診數脈稍緩。熱稍退。舌齒仍乾。小水不利。神思尙昏沉。改用柴胡、粉草、天花粉、黃芩、人參、白朮、茯苓、滑石、木通、澤瀉。下午又覺微熱。面赤。額上痛且重。卽以益元散三錢服之。大便行一次。溏而色黃。熱仍甚。面仍赤。服前藥後。小水去二次。再診之。寸關脈將和。兩尺尙洪大。迺知邪熱在下焦。惟利之而已。再與辰沙益元散五錢。口渴稍止。齒下盤雖潤。上盤仍燥。神思昏沉。睡而不醒。睛彩不與人相當。又知熱在心包絡也。宜用陶節庵導赤散二帖。而神清。惟小水尙欠利。以四苓散加酒連、麥芽、木通煎服。再二帖。而諸症悉退。飲食且進矣。

大宗伯黃履庵老先生夫人。右脅下疼。咳嗽喉乾。間亦吐紅。或一碗。或半碗。腸鳴洩瀉。年六十外。原因頭風壞目。性急躁。左脈弦數。右滑數。以瓜蒌仁二錢。黃連。前胡。桔梗。枳殼。橘紅。貝母。白茯苓各八分。甘草五分服之。次日紅仍不止。惟脅疼減半。改用山梔仁。牡丹皮。香附。貝母。甘草。瓜蒌。紫苑。滑石。水煎服。方欲覓真鬱金。苦不能得。唐凝庵老先生。迺夫人壻也。偶至聞之。應聲曰。有。取磨三分用煎藥飲之。兩帖而紅止痛瘳。

白雲仰先生令眷。每觸怒即暈厥。必閉門合目靜坐。不留一人在房。手足皆冷。汗出如雨。氣息俱微。越一時許。甦如常。原以頸生瘰癧。多服女醫草頭藥。及專科用斑貓等毒。因而脾胃損。元氣虧也。年三十八。曾未生育。每日令二婢不住手敲兩腿。俟其熟睡迺已。不然則睡不安。晚至二更後始睡。夜半心多驚跳不止。指甲皆無血色。經將行。小腹先疼二日。色紫有塊。諸病雖如是。而肌肉飲食却如無事人。百治不效。慕予而請診之。兩寸短弱。左關大而有力量。右關滑。左尺滑。右尺沉微。據脈肺氣虛。肝木實。胃中有痰之症也。用六君子湯。加丹參。酒連。青皮。外與硃母丸。及獨活湯二方調理而安。二方出醫綱目

吳心逸先生之使。患額疼。口大渴。身大熱。汗多。胸膈痞。惡心昏沉。先與柴苓湯。加枳殼、桔梗。熱減大半。次日以六君子湯。加黃芩、白芍藥、當歸。調攝而愈。蓋勞倦傷寒以致虛極。而邪未散。故宜先散而後補也。

吳文學霽陽先生。篤志士也。以積學勞心。又有星士以己卯決科許者。其星士前許歷歷有驗。至期瘧發。不能終場。遂心憂而成顛狂。日間或悲或歌。或鼓掌。或頓足。甚則罵詈不避親疎貴賤。迺叔邀予視之。面白而青。脈兩寸短弱。關弦。右關滑。兩尺平。予謂兩寸脈既短弱。此心肺之神不足。志願高而不遂其欲。鬱結不舒。津液生痰而不生血。又攻痰尅伐太過。心神愈不得養。故昏亂而無所攝持。內經云。主不明則十二官危。按此。則治宜補養收斂心神。而兼之清痰。可萬全也。用酸棗仁、人參、茯神、小草、丹參、當歸以補心安神。黃連、竹茹以清肝膽之火。玄參佐之。外以龍齒、珍珠、羚羊角、牛黃、膽星、天麻、青黛、辰砂、全蝎、冰片、黃連、甘草膏爲丸。金箔爲衣。調理而愈。

宜興令君胡鏡陽老先生夫人。夜間熱。口渴經行。過十日復行。小腹痛。兩寸關短弱。兩尺洪滑。予診畢語曰。此內經所謂陰虛陽搏之候也。可預防之。以川芎、當

歸、條芩、蒲黃、白芍、側柏葉、生地、荊芥進之。下午熱甚。口中氣如火噴。血下如傾。內有紫塊。小腹仍痛。迺用川芎二錢。當歸四錢。地榆、香附各一錢半。黃芩一錢。蓮蓬殼一枚。燒灰煎服。兩帖而止。

太史徐檢老。向爲癩疔所苦。而妨生育。辛巳孟秋。有江右陳嶺泉者。以是症爲專科。寓無錫。翁延而治。謂將爛藥。煮竹片夾陰囊。俾陰囊爛見子。又以爛藥點開腎子。使其中蓄積臭水潰出。然後用生肌藥長肉收功。翁以此治。與道中諸友商之。無有勸者。而謀於予。予曰。翁疾非常疾。則治當非常治也。陳能爲翁治於外。予當佐陳補於內。內外兼治。必可成功。翁因予言而決用陳。是時予有湖州之役。而陳用其術。治一月。囊爛子開。洞見水泡。第不能使泡破水出也。由是胸中氣滿。汗出如流。終夜不寐。飲食減三之二。面青。肌肉瘦其半。形氣弱而大便艱澀。腰腎俱痛。苦不可殫述。將令人急予。予適自湖州至荆溪。主吳少溪公家。翁時杜門謝客。聞予至。大喜而促予。診脈兩寸軟弱。右尺大。右關滑。予診畢曰。向許佐陳治內。今其時也。比陳技已竭。而水不得出。翁又難於痛。業已用收口藥矣。予曰。無傷。痛由元氣虛憊。而汗亦因痛來。汗去多。則心血不足。心血不足。

則神失養。故不寐。脾胃爲痛所傷。故飲食減。今只大補血氣。不惟痛止疾除。卽水泡亦可出也。陳謂用補收口生肌。或可使泡出水。或未必然。予曰。三日後當自見。翁曰。補當善。奈生平不能服參。何。予曰。翁體非昔比也。脈症皆可服。又何憂。迺用人參、黃耆各三錢。當歸、白芍、石斛各一錢五分。陳皮、貝母、紅花、粉草各八分。飲下卽睡。次早汗斂。且索粥。胸膈頓寬。連服兩日。痛減大半。飲食頓加。精神亦爽。迺陳恐予奪功。私譖之曰。孫君之藥雖善。但非外科所急。服之恐生肌收口後。而水終不得出也。翁謂必如何而後可。陳曰。當於前藥加羌活、防風、白芷、遠志。減去石斛。則外內兩得矣。翁然其說。且服其藥。飲未平而痛立至。汗立出。頭熱如火。氣逆上升。夜竟不寐。種種病復矣。亟索予劑。予知陳之忌而行譖也。迺宣言曰。予實佐爾成功耳。爾何自敗爾。知翁之痛乎。元氣虛而毒藥凝滯。故補而助之。活動其血。則毒藥自行。藥行則泡可潰。水方可出。翁之謝爾已有成議。予雅善翁。來者爲義。非爲利也。鄙見與尋常較不牟矣。陳聞言而語塞。亦以投劑無功。遂乘機而聽予治。仍用前方。加酸棗仁、枸杞子、皂角刺各一錢。兩帖而泡潰出。臭水五六碗。囊隨消癰。陳拊掌曰。今而後知用補之神。其老先生

之福也。太史受補。自此始。

丁酉冬。宮詹少溪吳公。年七十二。以長君冬闈之捷。應酬賀者。過勞過飲。又傷於犬肉。市醫槩用消導之劑投之。漠如也。反加內熱。常州張氏。荆溪縉紳大家。恃爲鎖鑰者。至則謂公高年過勞。消劑峻而致內熱。用補可愈也。因投人參。則右脅脹痛。晝夜難支。張又謂補法不差。惟少行氣之味。故無功耳。於前藥加木香。砂仁。辛熱止痛之劑。益嘔吐不止。脹痛轉劇。而大便燥結。張不自咎。不認病而誤投。迺遍語縉紳相知曰。吳少翁老年鬲食。非其所宜。丹溪復生。無能爲也。少翁聞予在茗。而急于治。予兼程而往。至則臘之念一日也。診其脈左弦右滑。兩手皆數。且搏指。諦視其色。神藏氣固。惟肌肉略瘦。手心甚熱。予曰。此內傷症。非鬲食症也。公曰。諸君言吐而大便燥結。食不得下。非鬲而何。予曰。否。公原不熱不痛。又不吐。由誤飲藥而使然耳。書云。通則不痛。痛則不通。大便既燥。而用補非也。經曰。食不得入。是有火也。尤用辛熱。非之非之。以是而治。譬之以油救火。益令其熾爾。予見與諸醫不侔也。卽與琥珀調中丸一帖。其夜脅痛稍緩。次早診之。脈仍如前。予決謂非通不可。卽以龍會丸與調中丸兼服之。五日內下黑

糞十五六次。諸症悉減。飲食大進。改以保和丸調理。念七日。公卽能巾櫛。元旦命庖人治酒。榜人艤舟拉予泛於南門。持觴爲予壽曰。與兄別者十六年。不憚勞涉險而赴吾急。自今以後之齒。皆兄之賜也。敢不銘心。爲驩竟日。至穀日。予迺別而復之茗。

別駕吳勉齋翁。體豐腴。嗜炮炙。任性縱慾。年六十七。極躁急。一日跌傷其齒。恬不爲意。閱三日。復跌。亦不爲意。復跌之。次日晚。左手足忽不能動。口眼歪邪。陸懷南先生。公通家友也。卽往診之。語公諸郎曰。此中風也。治不可緩。急取牛黃丸進之。諸郎皆有名博士弟子。延予爲治。診其脈。左洪大。右緩大。觀其色蒼黑。神昏。鼾睡。呼長而吸短。呼至口氣勃勃出。不能回。終日偃臥如醉。人不能動。陸曰。此非半身不遂乎。予曰。症候甚惡。不特半身不遂也。半身不遂者。中風已過之疾。其勢仍緩。亦有十餘年無恙者。今纔病勢便若此。迺中風之漸方來。且不可測。陸重厚長者。所詣亦精。聞予言。當下了然。卽與予商確用藥。始以六君子湯加全蝎。僵蠶。天麻與之。兩日。神氣仍未清。猶昏睡。睡猶呼吸。口邊勃勃然。間作吐。粒米尙不進。前藥再加竹茹。又兩日。神始甦。欲言而舌難掉。囁囁不能出諸

口。前藥又加石菖蒲遠志紅花。始能進粥數口。日計亦可茶甌許。夜與正舌散。同前藥飲之。又三日能坐。粥亦頗加。惟言尙蹇澹。欲言以筆代口。寫我左手甚痛。大小便艱少。又用四君子加陳皮竹茹當歸芍藥紅花鈎藤天麻服三日。神思大好。飲食日加。以是方調理彌月。手痛減。稍能動。足稍能伸。扶起能坐。且能自按譜鋪牌。語言十分清至八九。駸駸有萬全之望。惟大便有七八日。或十餘日始一行。予曰。此血少之故。補養久當自全。幸無他用而速害。公常自言吾疾迺痰在膈間。何能得一吐爲快。此醫家有授之言也。予曰。公脈大虛。非餘痰爲害。況今以補養而漸安。此其明驗。何敢輕試一吐。願寧耐靜疾。毋涉險爲也。此戊戌九月念五。予以是日別往茗城。別不及旬。公復傾心而任張甲。張大言曰。公病可吐。早吐早愈。諸郎君始信予言。持議不可。彼曰。公病痰也。不可不吐。吐後而補可全瘳。而無後患。不然必成痼疾。公欲速效。決意吐之。諸郎君不能阻。一吐而煩躁。猶曰吐不快耳。須大吐始可。再吐而神昏氣促。汗出如雨。立時就殂。可嘆可嘆。

少冢宰徐檢老。以萬歷丁酉三月初旬。往賀長興臧老夫人眉壽而發寒熱。醫近

肛硬處生一毒。紅腫而痛。坐臥爲艱。因歸荆溪訪治外科。卽以鐵針點開。插藥線於內。塗以爛藥。使膿血急潰。又於瘡口上以生肌藥敷之。使易收口。可受謝而去。未半月。其傍之硬處。又紅腫痛。寒熱交作。幾於成膿。以前醫有功。遂復延之。至則又以向者之法治之。受謝而去。遞醫遞患。遞針而遞插藥。計其患者凡八遍。計其醫之更者。如張如魯如馮凡八人。有陳外科者。則總其中而受謝獨多。其時則丁酉三月。至戊戌八月。幾年半矣。於時予赴吳。少溪翁召。因知翁在尊。亟往謁於臥榻間。翁見予至。悲喜交樂。備陳其歷病之由。針刀之苦。伏枕歲月之深。輒爲痛心。予聞之亦爲酸鼻。諦觀其色。則青慘。診其脈。皆濡弱。把其手足。則冷如冰。問其飲食。減平日之六。究其所服之藥。則槐角、黃柏、生地、涼血解毒之類。予駭然而語翁曰。此痔癰非痔漏也。痔漏當用掛線。以五灰膏點之可愈。今腫硬無定處。離肛門且遠。况其初原無硬塊。硬塊由插藥凝滯中來。諺云。剝肉做瘡者非耶。假令非翁稟氣厚。胃氣壯。安能六十以外之年。而當此剝削哉。初只可大補氣血。卽有毒。只宜託出一膿而愈。未成者使活動消散。不復生毒。此王道之治。不勝於針刀萬萬。諸君之治。如避影者。不知息陰而急趨以求

避。則影益速而氣促敝矣。自殆之道也。翁初不逆予者。以非外科。至聽予之論。幡然有悟。又見玄珠集有外科二卷。益信予之善外科。而聽予治。予即以十全大補湯進之。四帖而飲食加。手足暖。大便艱澀。百方潤而不能行者。今亦通利。而肛門如不知也。諸外科猶嘵嘵議補非是。予極言排之。翁惟予爲聽。予以何首烏四兩。人參、枸杞子、黃耆、當歸、熟地各二兩。槐角、秦艽各一兩。蜜丸服之。不終劑。其腫處少出膿而全瘳。傍亦不生硬塊。益信向之硬塊。爲插藥之毒所致也。翁喜爲謔曰。予病非孫君。諸外科視我疾爲金穴。其取寧有已耶。呵呵。

官詹吳少翁患痢赤白兼下。裏急後重。市醫治半月。後重不除。飲食漸減。最苦者。下午發熱嘔吐。迺遣使往茗招予。予聞狀心怖。卽涉險而過太湖。一晝夜而至荆溪。翁臥榻已二十日。觀其色。唇紅面瘁。聽其聲。微弱不揚。但一兩語氣卽不接續。下午潮熱。至丑方退。形神俱弱。診其脈。兩手俱大而無力。右關略滑。予曰。據此乃虛虛實實之候。不足中之有餘也。治當補養兼清兼消。緩以治之。庶可無恙。公深然之。以四君子湯加白芍藥、黃連、山查、滑石、陳皮、柴胡兩帖。而潮熱除。嘔吐止。去柴胡。因口渴不止。加葛根六劑。而飲食漸進。血亦止。惟白膿不除。

改用人參、白朮各二錢。白茯苓、白芍藥、當歸、神麴各一錢。酒連、陳皮、澤瀉各七分。滑石、山查各一錢半。外以丸劑消息盈虛。調養半月。則神氣回而飲食大進。肌肉漸生矣。少冢宰檢翁問曰。諸醫先謂老年痢非所宜。又嘔吐飲食不進者。謂之噤口。且身熱脈大。爲痢所忌。公不旬日而收功。蓋諸醫稱書之忌。皆幻妄哉。予曰。諸君所言。皆至言也。第非因時制宜耳。愚見以脾胃迺五臟六腑之倉廩。故曰納穀者昌。又曰。人身之內。穀氣爲寶。予姑舍痢不治。而先開胃口。俾進飲食。使新糟粕將宿穢壓下。若見糞。則後重除而痢易愈也。然又相其機宜。若食入而腹脹作痛。又量勢略與疎通。通後或氣虛下墜。又因勢而略與升提。大抵以理脾開胃進飲食爲先。此亦遠交近攻之策。日雖多功可萬全矣。斯僕一得之愚。屢試而屢驗也者。設不先開胃口。不審老弱。不揣緩急。一概治痢。雖有得。未必無失。豈勝算哉。公曰善。

臧少庚年五十七。每飲食胸膈不順利。覺喉管中梗梗宛轉難下。大便燥結內熱。肌肉漸瘦。醫與五香連翹湯。五膈丁香散。諸治膈之劑嘗試之不效。時予方有事於先塚。久未遠出。臧則不遠千里而就予治。觀其色蒼黑。目中神炯炯不眊。惟

氣促骨立。予知其有機心人也。其脈左弦大。右滑大。予謂之曰。據脈迺謀而不決。氣鬱成火。脾志不舒。致成痰涎。因而血少便燥。內熱肌消。張雞峰有言。膈迺神思間病。卽是推之。子當減思慮。斷色欲。薄滋味。絕妄想。俾神思清淨。然後服藥有功。不然。世無大丹。而草根木石。何足恃哉。子旣遠來。予敢不以肝膈相照。茲酌一方。頗妥。歸卽製服。但毋輕示人。恐見未精者。妄爲加減。敗迺事矣。慎之。慎之。臧曰。謹如教。其方用桂府滑石六兩。炙甘草一兩。真北白芥子、蘿蔔子、射干、連翹子各一兩半。辰砂五錢。以竹茹四兩煎湯。打饅頭糊爲丸。菴荳大。每食後及夜用燈心湯送下一錢半。一日三服。終劑而病如失。

孫文垣醫案終

孫文垣醫案 卷五 宜興治驗

〔清〕

葉天士

繆宜亭

著

薛生白

二家醫案合刻

中國醫學大成

三家醫案合刻 提要

二家醫案合刻提要

清吳子音纂輯。子音字金壽。笠澤人。清道光辛卯刊行。其第一卷。葉天士醫案。第二卷。繆遵義醫案。第三卷。薛生白醫案。皆清雍乾間蘇州名醫。素聞其治病之神。如磁引鍼。如鼓應桴。今閱其方案。靈機活潑。議論精醇。誠非學有根柢。不克臻此。然非子音拾遺補缺。彙萃成編。則當時斟酌今酌古。殊途同歸之理。何由觀其會通。案取揣摩。方留繩墨。此則濟世之盛心。指迷之寶筏也。炳章選刊本集醫案。蒐集葉案五種。以是編殿後。因有繆薛二案附於二三兩卷故也。其他葉氏尚有南陽醫案四卷。未刊鈔本。爲古越何氏所藏。惜其遺失一卷。猶待徵求。異日補全。再爲續刊。以成葉案全璧。藉供海內方家參酌遵循耳。

陸序

三家醫案者。葉天士布衣。薛生白徵君。繆宜亭進士之所作也。青囊一肩。紫書三卷。壺公術妙。獼女神奇。甘居帶下之名。自獲肘後之秘。變金液於六一。改銀丸於三七。丹砂玉札。待用無遺。牛溲馬勃。收藏不棄。盛以竹節。量以刀圭。赤箭鬪於雲根。紅鹽拂於竈上。明珠恥其價。金鏡慚其形。杏林之樹。以董奉而益珍。橘井之泉。非蘇耽其誰鑿。遊刃恢乎。奏刀騖然。無枝經肯綮之憂。得批卻導窾之要。今雖扁盧已杳。和緩云遙。郭玉之鍼靡傳。淳意之經失授。而問祕書於金匱。鼠跡猶存。抄禁方於龍宮。蠹蝕未盡。儻不搜之石室。鐫以玉版。則桃膠莫問。金漿遂漓。安能喚三折之肱。起一抔之土。續已斷之琴絃。補久亡之笙詩乎。此鶯湖吳子音先生。所以有合刻之選也。先生以民胞爲懷。婆心救世。赤餅胸納。青芝手採。五行精

理。六氣辨經。心源接俞跗之傳意。學探允宗之妙。歲活人以萬計。日捫心無一疵。固已嚴州道上。爭頌桐君。成都市中。惟尋韓伯矣。乃當夫春雨初過。藥苗微香。花拂簾垂。茗熟爐沸。茶烟裊於帳後。硯雲起於池中。簞滑甌甘。窗疏几淨。爰翻玉軸。細檢牙籤。考陰陽之和。按升沈之度。攻必腠理。位必君臣。總思邈之千金。資葛洪之萬卷。莫不明折蟲翼。細察蚊睫。著解顧理腦之效。顯滌胃滯腸之能。洵可以壽諸棗梨。觀其草木焉。今夫祕術不宣者。庸醫之窄量也。著書行世者。良醫之苦心也。設或篋藏內典。枕貯靈樞。竊巫彭之製。而號爲己能。抱岐伯之書。而矜爲獨得。則春風已歇。蘭草孤芳。抱朴虛傳。簡文空勸。竟沒飛仙之跡。難言妙道之公。乃先生則玉字親編。金鍼暗度。潛消沴戾。廣被太和。其心可不謂美哉。其利於是乎溥矣。長春少有痼疾。長習微疴。藥性粗諳。方書漸熟。命含毫而撰序。遂濡筆而成章。嗟拙陋之無文。恐掄揚之未善。神君活我。醫者原存割股之心。賢士知余。狂夫難

療看花之癖。

道光辛卯九月既望愚姪烏程陸長春辦香氏謹撰

三家醫案合刻 陸序

四

姚序

余奉命視學江左。按臨蘇屬。蘇屬人文淵藪。校士之暇。留心博訪。震澤吳生金壽。以所纂三家醫案。請序於余。三家者。葉天士、薛生白、繆宜亭三先生也。三先生皆吳中往哲。素聞其治病之神。如磁引鍼。如鼓應桴。今閱其方案。靈機活潑。議論精醇。誠非學有根源。不克臻此超詣。然非吳生拾遺補缺。彙萃成編。則當日斟今酌古。殊途同歸之理。何由觀其會通。余故心折三先生而并以此多吳生也。吳生博學好古。工詩。善六法。兼通醫理。爲吳郡張容庭入室弟子。容庭者。繼三家而起者也。生於醫固無俟於余言。而余竊有一言爲生進者。蓋醫之道。下流爲藝。上通於儒。軒岐以來。內經素問尙矣。而後賢輩出。代有成書。要其旨。虛實以質異。情性以因感。風氣以變生。所謂窮陰陽升降之微。悉運會轉移之故。五行盡其變。五土異

其宜。實足與天地權生息之機。爲國家培太平之本。醫之學不亦大哉。余望吳生能近守師承。遠宗前哲。功深養到。實至名歸。有以傳三先生之書。必有以傳三先生之學。則此集其嚆矢焉耳。故於請序也。書以勗之。并囑其持示容庭。其不以使者之言爲河漢否。

道光紀元歲次辛巳十月旣望 賜進士及第 誥授光祿大夫 南書房行走
戶部左侍郎提督江蘇全省學政加三級歸安姚文田撰

例言

三家醫案。藏篋有年。校刊醫效祕傳竣事。同人以兩書如豐城寶物。必合延津。慙憑合刻。緣重爲補訂。命門人凌又新。姪右厓校正。以應同人之命。並略繫例言如左。

醫案與醫書。似同實異。書則示人以規矩。故宜分門別類。使後學有一定之準繩。案則因症用法。寓法於症。無一定之體存之者。欲人知治症之常變。處劑之權宜。一症有一症之治法。一方有一方之運用。不致泥古不化。以佐書之不逮。旣無定體。奚煩類別。故隨選隨錄之。況案中病情雜見者頗多。本難條分縷析也。

葉氏方案。散播人間者不少。然所存俱當時門診爲多。余搜羅二十餘年。不下八九百案。惟襍湖毛氏、邱氏本。皆係及門彙存赴診之案。案中議論超邁。立法精到。

尤足啓迪後人。故採取獨多於他本。

薛案。余所得郡中朱氏抄存本外。散見者落落晨星。如定武蘭亭不少概見。惟余同里沈子蓮溪有手抄本。較朱本多十分之四。亟爲登入。然終恨存方不多。倘同志君子另有藏本。尙希郵寄補刊。以廣其傳。幸甚。

繆案。乃業師張友樵先生手錄。繆氏專於調補。善用異類有情之品。療治虛勞雜症。頭頭是道。實補前哲所未發。故合纂行世。

是書所錄。僅三家之寸鱗片爪耳。而同春妙手。已見一斑。誠卽此觸類而引伸之。於斯道未必無小補云。

續刊書五種。西洋利西泰人身說概。鹽官裴一中言醫。平湖陸秋山瘟疫新編。暨拙著語冰漫錄。閱歷知非。俱已彙稿嗣出。

道光辛卯秋八月望日笠澤吳金壽子音氏識

三家醫案合刻

卷一

清葉桂天士著

吳金壽子音纂

粵東地卑多濕。陽氣多泄。宦遊十載。恰已五旬。中年二炁。不及壯盛堅固。眩暈汗出。乃陽不潛藏。變化內風。擾動虛靈所致。內經藏象謂腎爲根本。左右有二。蓋一陰一陽。互相交紐。水中有火。爲生生化育。惟藏畜不露。斯永年無病。而肝爲腎子。母氣既衰。水不生木。肝屬風藏。內風乘龍雷相火。迅速飛騰。陡升莫制。每慮仆中之累。是皆內因之症。自述熱起脊背。直至巔頂。清之補之。無效。未究藏陰內乏。陽

氣獨升之旨。古人以腎藏內寓真陽。非溫不納。肝臟內寄相火。非清不寧。用藥之法。填實精氣以固其下。佐鹹味以達之。兼氣重以鎮之。介類以潛之。酸味以收之。複入滋清以涼肝。引之導之。浮陽內風。勿令鼓動。

熟地

北五味子

萸肉

磁石

青鹽

瑣陽

龜板

茯神

湘蓮

天門冬

猪脊筋搗爛。和蜜丸。熱酒送。

經漏百日。淋帶不止。是衝任督帶奇經諸脈不能固攝。病在下焦。脈左關沈微而緩。右部虛浮。陽升於上。陰虧於下。然先以血凝成塊。決非血熱妄行。況食減味少。胃氣孱憊。補中益氣。僅升脾營。焉得藥到病所。滋陰堵塞沈膩。與胃衰少穀相背。考古崩漏不止。先用局方震靈丹。直達衝任以固之。繼用人參湯。續其生氣。得效。

再爲進商。

震靈丹

診脈百至。數促而芤。勞損數年不復。寒熱。大汗泄越。將及半載。臥枕嗽甚。起坐少緩。穀食大減。大便不實。由下焦損傷衝脈之氣震動。諸脈皆逆。醫投清熱理肺。降氣消痰。益令胃氣戕害。昔越人有下損過脾不治之訓。此寒熱汗出。二氣不交所致。秋半之氣不應。天氣肅降乖離。已見一斑。生陽不發。入冬可慮。急固散越之陽。望其寒熱汗出。稍緩再商。

救逆湯去白朮、加人參

稗年純陽體質。熱症最多。病偏右胸高。呼氣不利。肺氣不能清肅。熱鬱內蒸。逆傳膈中。經天君震動。狀若癰症。夫肺主衛。心主營。二氣循環於肺胃脈中。苟營衛失和。越日觸遇乃發。翁仲仁謂扶肚擡胸。爲肺熱壅塞。然不及周歲。未受穀食涵養。

藏府柔薄。一切苦寒沈降及膩滯陰藥。俱在禁例。且肺位最高。逆行心胞絡間。仍從上治。抱持勿臥。令上氣下行爲順。可使營衛兩和。

薄荷

桑葉

米仁

茯苓

鬱金

淡竹葉

鮮石菖蒲

再診。

西瓜翠衣

鮮枇杷葉

通草

茯苓

生米仁

淡竹葉

三診。宿熱未平。秋金燥令亦從天降。致上氣不能全順。症見欬嗽燥逆。議清氣分之熱。

大沙參

麥冬

花粉

生甘草

桑葉

燈心

四診。視面部清竅未能爽適。顯然肺熱未能全解。議進甘寒。倣喻嘉言清燥意。

桑葉

麥冬

梨肉

川貝母

銀花

生甘草

五診。伏暑上壅。得宣通而降。頭項胸次已平。但乳食不能少運。便溏日有數次。思肺降之熱。必移於府。考古幼穉泄瀉。每以四苓為主方。不越分利和中之意。

四苓加廣皮、木瓜、生穀芽

據述產育頻多。產後兩年。經水至今未來。此爲病根。已屬下元陰虧。長夏初患泄瀉。必天雨地濕。潮霧穢濁氣。由口鼻吸受。原非發散消攻可去。祇因體質甚薄。致穢濁蔓延。充在三焦。上則欬痰不饑。下則二便澀少。非表有風寒。故無寒熱見症。然氣分壅塞。津化濁痰。入夜渴飲。胃汁消乏。求助於水。是本虛標實之病。夫肺位最高。與大腸相表裏。清肅不行。小便不利矣。

蘆根

米仁

通草

茯苓

桑葉

西瓜翠衣

冲入白蔻末。

再診。前議虛不受補。皆因夏令伏邪著於氣分。夫肺主一身之氣。既因氣阻清肅不行。諸經不能流暢。三焦悉被其蒙。前言攻邪不效。蓋客邪由吸而受。與風寒感冒不同。乃氤氲虛空。聚則爲殃耳。故取淡滲無味氣薄之品。僅通其上。勿動中下。俾虛無傷。伏氣可去。稍佐辛香。非燥也。倣辟穢之義。

經霜桑葉

鮮枇杷葉

茯苓

蔻仁

米仁

蘆根

脈小右弦。呼吸不利。喉中有聲。入夜神迷昏倦。少腹微脹。二便不爽。自言筋骨如針刺。身重難以轉側。右環跳筋。縱不能伸屈。此皆暴寒內入。周行上下。陽氣痺塞。

且頻年交冬痰嗽。天暖自安。老年腎真衰乏。少藏納之司。水液化痰上泛。寒中少陰。則太陽膀胱之氣。無以上承。而流通宣化。開合失度。樞機悉阻。濁氣升痰飲逆。最忌喘急神昏。若用發散墜降。恐致傷陽劫陰。議進仲景小青龍法。乃太陽表中之裏。通營衛不耗其陽。開痰飲不泄其氣。仍有收肺逆通膀胱之義。

小青龍湯

驚自外觸。恐自內起。內經論驚必傷肝。恐則傷腎。丹溪謂上升之氣。多從肝出。謂厥陽暴升莫制。則氣塞於上。陰不上承。即天地不能交泰。而爲否塞。至於夢擾筋縮。乃精氣不能護神。神無所依。用藥當鎮其怯。益其虛。漸引道以致二炁之交合。是爲醫之能事。

妙香散

尾閭尻骨先痛。繼以洩溺淋閉。兼有瘀血。夫督脈部位。隸於太陽脈絡。氣墜頻溺。

點滴不爽。分利清熱愈痛。古賢每以軟劑溫藥。升任督之氣。按經旨以治病。諒無誤矣。

鹿茸

當歸頭

淡苳蓉

巴戟

枸杞

沙蒺藜

脘下脹及少腹。疎肝平胃。不應腎氣。加辛香又不應。食物仍進。二便仍利。病既非停著。有形之滯。自屬陽微氣結。議與通陽潤劑。

阿魏

麝香

丸服。

新產不滿百日。天暑汗出氣泄。加以澡浴湯蒸。更助開發。陽浮左升。陰弱莫制。遂喉痒欬逆。牽連左脇。及氣街背部皆痛。蓋產後肝血未充。腎液未足。奇經諸脈。悉皆怯弱。陰虧陽熾。血不能榮養筋脈。法當味厚質靜。流護至陰之藏。兼溫養奇經。

倣仲聖阿膠雞子黃湯。

阿膠

生地

雞子黃

白芍

穉豆皮

石決明

再診。考足厥陰肝經。過胃貫膈上。循喉嚨。因肝陰少藏陽氣。有升無降。每交暮夜。欬甚如噦。戌亥乃肝陰旺時。肝陽擾胃。則陽明脈衰。四肢倦怠。面色青晦。陽化內風。掀越鼓動。爲肌浮偏腫。心無液養。似嘈非嘈。似痛非痛。熱釀涎沫。吐出復聚。余不以欬嗽爲治。急於疏護至陰靜。制風陽內鼓。夜分更以胃藥助之。

午服

雞子黃

白芍

枸杞子

阿膠

甘菊

炙草

暮服

人參

南棗

秋石

據述久有胃痛。當年因痛吐衄。服資生丸。消補相投。用八味丸。溫潤不合。憑脈論症。向時隨發隨愈。今病發一月。痛止不納。口味酸濁。假寐未久。忽躁熱頭汗淋漓。口不渴飲。凡肝病必犯胃府。且攻滌寒熱等藥。必先入胃以分。佈藥不對。病更傷胃氣。胃司九竅。清濁既亂於中。焉有下行爲順之理。上下不宣。狀如關格。但關格乃陰枯陽結。聖賢尤以爲難。今是胃傷困乏。清陽不司旋運。斯爲異歧。不必以寒之不應而投熱。但主傷在無形。必圖清氣宣通。則爲善治程法。金匱大半夏湯。

大半夏湯

診脈左數微弦。寸尺關虛數。閱五年前病原。左脇映背脹痛。不能臥蓆。曾吐瘀血。凝塊紫色。顯然肝鬱成熱。熱迫氣逆血瘀。雖經調理全愈。而體質中肝陰不充。肝陽易動。凡人身之氣左升主肝。右降主肺。今升多降少。陰不和陽。胃中津液乏上。

供涵肺之用。此燥痒欬噎。吐出水沫。合乎經旨肝病吐涎沫矣。肝木必犯胃土。納穀最少。而肢軟少力。非嗽藥可以愈病。此皆肝陽逆乘。實係肝陰不足。仲聖云。見肝之病。先理脾胃。俾土厚不爲木尅。原有生金功能。據述凡食雞子。病必加劇。則知呆滯凝滯之藥。皆與病體未合。

北沙參

生扁豆

麥冬

玉竹

桑葉

生甘草

蕉漿

病已十餘日。身尙躁熱。舌苔粘膩。神呆目定。脈剛而數。煩躁囁語。此暑濕久伏。與時氣之穢邪凝合。釀成膠膩之痰。閉塞清明之府。神情迷昧。胃家濁液蒸遏不宣。藥食甘味。必虬厥上冒。然內經有濕位之下。燥氣乘之。是以從之濕轉爲燥。若無濕痰之潮氣上蒸。舌苔早已燥刺矣。今先滋液以潔烈焰之燔。

鮮生地

麥冬

烏梅

蕉漿

銀花露

羚羊角

蚌水

再診。面垢舌白。渴飲。氣短如喘。自利。是穢濁氣入口鼻。與水穀之氣。互相混擾。濕氣阻窒。氤氲內蒸。三焦皆受。胸背肢節有晦黯斑紋。穢與氣血膠固。心絡爲邪薰灼。神昏囈語。手經蔓延。疫邪不與傷寒同例。法當芳香辟邪。參以解毒。必得不爲濕穢蒙閉。可免痙厥之害。

石菖蒲汁

白蔻仁

犀尖

小青皮

連翹心

金銀花

六一散

金汁

至寶丹

三診。邪陷復利。傷及厥陰。症見氣上撞心。饑不能食。乾嘔腹痛。全是肝病見端。肝爲至陰之藏。相火內寄。仲聖治法。不用純剛之劑。以肝爲剛藏也。令正交土旺之時。水火爲仇。五日內未爲穩當。宜慎之。

人參

淡吳萸

當歸

白芍

秦皮

炒烏梅

脈沈而微。沈爲裏寒。微爲無陽。舌白似粉。瀉起口渴。身體臥著。其痛甚厲。交夏陰氣在內。其病日加。寅辰少陽升動。少緩少腹。至陰部位。濁陰凝聚。是爲疝瘕。若讀書明理之醫。凡陰邪盤踞。必以陽藥通之。歸地列於四物湯。護持血液。雖佐熱劑。反與陰邪樹幟。當以純剛藥。直走濁陰凝結之處調攝。非片言可盡也。

川附子

黑川烏

吳茱萸

乾薑

猪膽汁

再診。陰寒盤踞少腹。非純陽剛劑。直入堅冰之地。陰凝不解。此如亞夫之師。從天而降也。醫易腎氣湯。陰多陽少。立見病加。反至不食。藥不對症。倣通脈四逆湯法。

附子

乾薑

猪膽汁

五旬有四。陽氣日薄。陽明脈絡空乏。不能束筋骨。以流利機關。肩痛肢麻。頭目如蒙。行動痿弱無力。此下虛上實。絡熱內風沸起。當入夏。陽升爲甚。滲濕利痰。必不應病。議清營熱以泄內風。

犀角

鮮生地

元參

連翹

桑葉

丹皮

天麻

鉤藤

下體痿躄。先有遺泄。濕瘍頻進。滲利陰陽更傷。雖有參耆。朮養脾肺以益氣。未能救下。卽如長冷陽微。飯後吐食。乃胃陽頓衰。應乎衛外失職。但下焦之病。都屬精血受傷。兩投溫通柔劑。以腎惡燥。久病宜通任督。通攝兼施。亦與古賢四飭健步諸法互參。至於胃藥必須另用。夫胃府主乎氣。氣得下行爲順。東垣有升陽益胃之條。似乎相悖。然芩連非苦降之氣乎。凡吐後一二日。停止下焦血分。藥卽用扶陽理胃。二日俾中下兩固。經旨謂陽明之脈束筋骨以流利機關。本病卽有合矣。

鹿茸

歸身

柏子霜

茯苓

菴蓉

巴戟

補骨脂

川石斛

牛膝

枸杞子

吐後間服大半夏湯。加乾薑、薑汁。

再診。長夏濕熱。經脈流行氣鈍。兼以下元絡脈已虛。痿弱不耐步趨。常似酸楚。大便或結或溏。都屬肝腎為病。然益下必佐宣通脈絡。乃正治之法。恐夏季後濕熱還擾。預為防理。

鹿角霜

生茅朮

茯苓

菴蓉

歸身

熟地

桑椹子

巴戟

遠志

茴香

酒蒸金毛狗脊

水熬膏

三診。痿躄在下。肝腎居多。但素飲必有濕熱。熱瘀濕滯。氣血不行。筋縮肌肉不仁。體質重著不移。無非濕邪之深沈也。若論陽虛不該大發瘡瘍。但病久非可速攻。莫計效遲。方可愈也。

細生地

歸身

黃柏

萆薢

菴蓉

川斛

牛膝

蒺藜

四診。寢食如常。脈沈而緩。獨兩腿內外肉脫麻木。年逾五旬。陽脈漸衰。躄維不爲用事。非三氣雜感也。溫通以佐脈絡之流暢。倣古聖四觔金剛之屬。

菴蓉

牛膝

茯苓

萆薢

木瓜

枸杞子

蒺藜

金毛狗脊膏丸

經云。煩勞則張。精絕辟積。於夏令入煎厥。夫勞動陽氣弛張。則精氣不充。留戀其陽。雖有若無。故曰絕積之既久。逢夏季陽氣開泄。五志火動。內風以生。若煎厥治

法。以清心益腎。使肝膽相火不致暴起。宣風靜熄。不爲暈厥。然必薄味靜養爲穩。

細生地

連翹

知母

元參

生白芍

竹葉

腎厥。由腰脊而升。發時手足逆冷。口吐涎沫。喉如刀刺。蓋足少陰經脈。上循喉嚨。挾舌本。陰濁自下犯上。必循經而至。倣許學士椒附湯。通陽以泄濁陰爲主。

炮附子

淡乾薑

胡蘆巴

川椒

半夏

茯苓

薑汁泛丸。

臍上心下熱熾。咽喉間陳腐氣。遂神昏撲厥。經時汗出而醒。口湧血沫。乃臆中熱壅。以致心竅受蒙。若非芳香清透。不能宣通絡中瘀痺。

犀角

茯神

天竺黃

麝香

丹參

菖蒲

鬱金

冰片

各生研末。赤豆皮煎湯泛丸。竹葉湯送。

暑由上受。先入肺絡。日期漸多。氣分熱邪。逆傳入營。遂逼入心胞絡中。神迷欲躁。舌音短縮。手足牽引。乃暑熱流陷。勢將發痧。熱閉在裏。肢體反不發熱。熱邪內閉外脫。豈非至危至急。考古人方法。清絡熱必兼芳香。開裏竅以清神識。若重藥攻邪。直走腸胃。與胞絡無干涉也。

犀尖

鮮生地

元參

銀花

石菖蒲

化至寶丹

向來久欬傷肺。更值雨潮感邪。但熱不寒。是爲癰瘡。仲聖云。消燂肌肉。當以飲食消息之。在乎救胃以涵肺。醫知是理否。

竹葉

麥冬

連翹

甘草

梨皮

青蔗汁

瘧得汗不解。近來竟夜汗出。且胸痞不饑。形瘦脈大便秘。顯然陰虛體質。瘧邪爍液。致清陽痞結腕中。議以柔劑。存陰卻邪。

竹捲心

辰砂益元散

生地

麥冬

知母

脾經瘧邪。必由四未擾中。仲景論太陰經九條。深戒攻下。謂脾爲孤藏。體陰而用陽。喜暖而惡寒。不饑痞脹。暖氣。陽傷則運動無權。滯濁瀰漫矣。昔賢製方。陽傷取藥之氣。陰傷取藥之味。奈何不究病之陰陽。不分藥之氣味。便窒則攻下。痞悶則開泄。藥不對病。脾胃受傷。數年沈痼。如脾胃論莫詳於東垣。苟能玩讀。焉有此等混治。

炒半夏

淡吳萸

生益智

草撥

乾薑

茯苓

苦辛過服。大瀉心陽。心虛熱收於裏。三瘧之來。心神迷惑。久延恐成痼症。考諸金匱仲景每以蜀漆散爲牡瘧治法。

雲母石

蜀漆

生龍骨

爲末。開水調服二錢。

下焦精虧。瘧邪遂入少陰。當其發作從背起。乃太陽與少陰表裏相應也。陰邪得汗不解。托邪固是。但氣易泄。薑附純剛。又恐劫陰矣。

人參

鹿茸

桂枝

細辛

杞子炭

歸身炭

生薑

脈微而遲。色衰萎黃。凡陽氣不足。久利久瀉。窮必傷腎。今浮腫漸起。目下是水失火而敗。若非煖下。徒見泄瀉有紅。爲脾胃濕熱。必至中滿敗壞。

熟地炭

淡附子

茯苓

車前子

生茅朮

乾薑

脈左弦右浮濇。始由脘痛貫脇。繼則腹大高凸。納食減少。二便艱濇不爽。此乃有年操持。縈慮太甚。肝木拂鬱。脾土自困。清濁混淆。脹勢乃成。蓋藏真日漓。府陽不運。考古治脹名家。以通陽爲務。若滋陰柔藥。微加桂附。凝陰沍濁。豈是良法。議用局方禹餘糧丸。煖其水藏。攻其穢濁。俟其小效。兼進通陽剛補。是爲虛症內傷脹滿治法。至於攻瀉動奪。都爲有形而設。與氣傷之病不同也。

禹餘糧丸

脈緩弱。脘中痛脹。嘔湧清涎。是脾胃陽微。得之積勞。午後病甚。陽不用事也。大凡脾陽宜通則運。溫補極是。而守中及膩滯。皆非通府。勿佐用之。

人參

半夏

淡乾薑

生益智

茯苓

生薑汁

大便不通。間服半硫丸五分。

痔血久下。肌肉萎黃。乃血脫氣餒。漸加喘促浮腫。再延腹脹。二便不通。此症藏陰有寒。府陽有熱。詳於金匱穀疸篇中。極難調治。

人參

白朮

茯苓

智仁

菟絲

木瓜

廣皮

經營不遂。情懷拂鬱。少火化為壯火。風木挾陽上巔。眩暈不寐。是陽不入陰。非陰虛症也。如果純虛。豈有由春及秋。仍能納食驅馳。今忽然中脘噎阻。由藥傷胃口。致胃陽上逆使然。溫膽湯加減之。

陳皮

茯苓

丹皮

梔皮

半夏

枳實

桑葉

竹茹

濕溫長夏最多。濕熱鬱蒸之氣。由口鼻而入。上焦先病。漸佈中下。河間所謂三焦病也。治與風寒食積迥異。仲景云。濕家不可發汗。汗之則痙。濕本陰邪。其中人也。則傷陽。汗則陽易泄越。而邪留不解。濕蒸熱鬱。發現爲黃。熏蒸氣墜之間。正如罨麴之比。斯時病全在氣分。連翹赤小豆湯。可以奏效。今經一月。邪彌三焦。自耳前後左腫及右癰瘍大發。夫癰者壅也。不惟氣滯。血亦阻塞。蒸而爲膿。穀食不思。陡然肉消殆盡。胃氣索然矣。商治之法。補則助壅。清則垂脫。前輩成法。一無可遵。因思濕熱穢濁結於頭面清竅。議輕可去實之法。選芳香氣味。使胃無所苦。或者壅遏得宜。少進漿粥。便是進步。經云。從上病者治其上。靈樞云。上焦如霧。非輕揚芳香之氣。何以開之。

青菊葉

荷葉邊

金銀花

象貝母

綠豆皮

馬兜鈴

連翹

射干

煎好。露一宿。臨服加金汁一小盃。

身腴。體質適值過勞。陽氣受傷。嘔吐食物。身熱而無頭痛。已非外感風寒。間日煩躁渴飲。脣焦舌黑。是內伏熱氣。由募原以流布三焦。亦如瘧邪之分爭營衛者然。然積勞既久。伏邪客病。脈來小緩。按之不鼓。可爲徵驗。且兩便頗通。略能納穀。焉有停聚積滯。仲景以單熱無寒之症。不出方藥。但以飲食消息之。後賢參擬甘寒滋養胃陰。其熱自解。

竹葉

花粉

麥冬

連翹

生地

杏仁

蔗漿

寅卯少陽內動。絡中血溢。寒熱嘔逆。驟然泄瀉。不能左臥。蓋陽木必犯陰土。膽汁無藏。少寐多寤。土藏被尅。食減無味。宜補土疎木。

人參

山藥

炙草

白朮

扁豆

丹皮

虛損泄瀉。用異功理中。乃補脾胃以煦其陽氣方法。無如失血遺精。金水久虧。陰乏上承。咽痛失音。而瀉仍不已。長夏吸受暑濕之氣。與身中浮越之氣。互為鬱蒸。遂起疳蝕。氣阻則妨納食。是勞損為本。而雜以暑濕純補。決不應病。與輕淡氣薄之劑。先清上焦。後議補益。

蘆根

馬兜鈴

通草

米仁

滑石

西瓜翠衣

瘦人陰虛。熱邪易入於陰。病後遺精。皆陰弱不主固攝也。泄瀉在夏秋間。是暑濕內侵。其間有瓜果生冷。不能速行。是中寒下利。什中僅一。況此病因遺泄患瘧。病人自認為虛。醫者迎合。以致邪無出路。轉輾內攻加劇。夫犯房勞而患客邪。不過比平常較勝。未必便是陰病。近代名賢。訛傳陰症。傷人比比。總之遺泄陰虧。與利

後陰傷。均非剛劑所宜。當擬柔剛以扶精氣。

人參

山藥

川斛

芡實

茯苓

生地炭

七年沈痼。心惕熱迷。咬牙嚼舌。陰火失守。陽乃鴟張。前方理厥陰陽明。以和陽主
治。繼方以鹹味純陰。填水源以生木。病究竟未能卻。自述每每遺泄。其病隨發。春
夏兩時。發病甚頻。況五更寅卯少陽氣振。陽冒病來。更兼操持不已。內經膽藏汁
三合。腎藏液三合。精遺則腎液少。操勞則膽汁虧。欲望春陽不動。安可得耶。

熟地

肉蓯蓉

五味子

龍骨

茯苓

左牡蠣

石菖蒲

遠志

川斛

山萸肉

脈弦數右大。舌絳色。面微浮。欬嘔上逆。心中熱。腹中氣撐。臥側著右。暮夜內外皆

熱。自五月起病。百日不曉饑飽。病因憂愁嗔怒而起。諸氣交逆。少火化爲壯火。煩熱不熄。五液皆涸。內風煽動。亦屬陽化。見症肝病。十之八九。秋金主候。木尙不和。日潮加劇。病屬鬱勞。難以久延。議鹹苦清養厥陰之陰以和陽。

阿膠

川連

生地

糯米

白芍

雞子黃

再診。脈百至。右弦數。左細數。寒熱無汗。渴飲嘔逆。病中咯血。經水反多。邪熱入陰。迫血妄行。平日奇經多病。已屬內虛。故邪乘虛陷。竟屬厥陰之熱熾以犯陽明。故爲嘔爲悶。不食。目胞紫暗羞明。咽中窒塞頭痛。由厥陰熱邪通胃貫膈。上及面目諸竅。先寒後熱。饑不能食。消渴。氣上冲心嘔噦。仲景皆例厥陰篇中。此伏邪在至陰之中。必熬至枯涸而後已。表之則傷陽。攻之則劫陰。惟鹹味直走陰分。參入苦寒。以清伏熱。清邪之中。仍護陰氣。俾邪退一分。便存得一分之陰。望其少甦。

阿膠

雞子黃

生地

白芍

黃連

黃柏

右脈平和。左寸關弦動甚銳。面色帶赤。體質清癯。得木火之形。稟多動之性。加以操持煩慮。五志之陽。無有不熾。宜乎寤多寐少。內風不熄。眩暈自生。經云。陽氣下入陰中。陰蹻滿乃得寐。謀慮不決。則火動陰傷。肝陽獨行。乏陰和協。而魂不藏。則寐不安。總以益陰和陽爲主治。議加味補心丹。兼和肝陽。

人參

生地

元參

桔梗

川連

茯神

天冬

丹參

棗仁

遠志

羚羊角

琥珀

麥冬

白芍

柏仁

石菖蒲

煉蜜丸。

五日前脹滿已在腕間。兼中下寒冷不暖。議參附川烏驅陰寒之氣凝結。非補虛方也。十九日陰雨天冷。正陽氣不生之象。況日久胃氣已疲。腥濁入胃即吐。確是陽微見症。王先生主通陽極妙。若得陽氣通調。何患水濕不去。

人參

熟川附子

大茴香

生淡乾薑

茯苓

川棟子

川椒

和入童便盃許。

脈弦數。腹膨便泄。目自淚出。經來身體掣痛。今秋冬兩月不至。據說兩年患病。醫藥不效。緣情懷抑鬱。熱自內起。厥陰風木化火。陽明侵削。日迫氣血內蒸。血海無貯。漸漸延及乾血勞症。凡調經諸法。須論在氣在血。今久鬱熱勝。經阻有年。正氣已虧。補藥固宜。而氣血偏滯。非徒補可以治病。議厥陰陽明同治。酸苦泄熱爲先。和補胃氣爲佐。

吳茱萸

川連

胡連

川棟子

烏梅

人參

白芍

延胡索

雲苓

香附

南棗

益母草膏同烏梅肉搗丸。

痰飲乃濁陰所化。阻遏陽氣。不入於陰。陰蹻空。夜不熟寐。靈樞經用半夏秫米湯。謂通陽交陰。飲邪不聚。天王補心丹一派寒涼陰藥。與濁陰樹幟。中年必以護陽爲要。卽金匱所云。必以溫藥和之也。

半夏

秫米

茯苓

少年面色青黃。脈小無神。自幼頻有嘔吐之症。明是飲食寒暄不調。以致中氣不足。欬嗽非外感。不宜疎泄。小建中湯主之。

小建中湯

氣鬱單脹。中空無物。臥則氣塞。濁飲上冲。漸有不得安臥之象。問其起病之由。多是惱怒動肝。爲肝木鬱傷脾土。脾失健運。氣阻成脹。延及百日。正氣愈虛。濁更堅凝。逆走攻肺。上欬氣逆欲喘。腕中蘊熱。欬出膿血。病根固在肝脾。今已傳及肺部。丹溪曰。養金制木。脾無賊邪之害。滋水制火。肺得清化之權。目下至要務在順氣。胸中開爽。寢食不廢。便可從容論治。不然春分節近。更屬難調矣。先用宣通上焦法。

紫苑

杏仁

薑皮

鬱金

厚樸

大腹皮

桑皮

茯苓皮

黑山梔

兩劑後。早服腎氣丸。晚服四君子湯。

陰氣先傷。陽氣獨發。但熱無寒。是爲瘧瘧。舌乾渴飲。欬嗽。暑邪尙在肺胃。如饑不

嗜食。乃熱邪不殺穀也。先用玉女煎。存陰消暑以和肺胃。

玉女煎

再診。

原方去牛膝。加竹卷心。

任脈、督脈。分行乎身之前後。自覺熱蒸。不夢自遺。皆奇經虛也。辛溫藥頗效。六味加五味子不應。方藥僅僅達下。未能約束奇經。議用聚精固攝之法。

桑螵蛸

龜板

芡實

沙蒺藜

線魚膠

胡連

龍骨

金櫻子

覆盆子

產後陰虛陽實。熱易拂鬱。近日客邪。乃冬應寒而反溫。凡羌活辛溫。柴胡擾動肝血。皆屬禁忌。謂陽明未復。再動衝陽耳。惡露變成腥水。亦是熱犯肝陰之極。液不

養筋。內風必動。致面腫身痛。消渴嘔逆。自利暮熱汗多。全是肝胃受病。諸厥皆隸厥陰。嘔不能食。厥陰之氣。冲犯陽明所致。產後厥冒。厥而下利。恐其陰涸難愈。今神氣欲昏。正是衝陽上犯。治以鎮逆。佐以酸苦。泄熱調經。

牡蠣

烏梅

黃芩

茯苓皮

川連

鬱金

秦皮

炒山查

經以腎司二便。若腎無藏液。下竅氣不運化。腸中即不能通水液之燥。水火吸消為多。議知。柏苦寒。滋其水源。龜甲性潛。以通其陰。人中白鹹重以入下。茯苓鹹溫以通便。少佐肉桂。化肝風以制木。是為穩當方法。

黃柏

知母

龜甲

肉苁蓉

人中白

肉桂

蜜丸。

望色痿黃少膏澤。按脈弦促而芤。納穀不旺。病已數年。每春夏陽升氣泄。偶加煩冗。情志不適。血必溢出上竅。中氣非少壯陰火相同。夫心主血。脾統血。肝藏血。藏陰內虛。陽動乃溢。常服歸脾湯。去耆朮木香。加白芍。以和肝脾之陰。所謂王道養正善藥。不計驟功。

人參

茯神

炙草

歸身

白芍

棗仁

遠志

桂圓肉

背痛得按摩愈痛。吐涎沫。短氣腹滿。小腹堅。小便不通。大便自利。下身麻木。不得移動。不食不寐。煩則汗出。病機多端。無縷治成法。思冷濁竊踞。陽微不行。爲痞塞之象。二氣既乖。豈可忽略。引仲景少陰例。急進通陽爲要。議用白通加人尿猪膽汁湯。

去鬚葱白

生淡乾薑

生炮附子

右藥用水一盞。煎至四分。濾清。加入尿一小杯。猪膽汁一枚。頻頻調和。勿令其沈於藥底。

再診。濁陰蔽塞。捨通陽再無別法。服白通加人尿猪膽汁湯。脈不微續。仍三五參差。尚非穩保。議用四逆通脈方。

人參

淡乾薑

人尿

炮附子

猪膽汁

三診。症象稍減。但少腹濁陰尚踞。胃氣不甦。猶慮反覆。

人參

生淡乾薑

炮附子

茯苓

澤瀉

四診。誤用攻表傷陽。致陰邪濁氣結閉於下。少腹堅痛。二便阻滯。濁上千逆則嘔。非溫熱佐以鹹苦寒。何以直達下焦。

炮附子

淡乾薑

人尿

猪膽汁

葱白頭

凡瘧久邪結。必成瘧母。其邪深客於陰絡。道路深遠。肌膚無汗。能食不運。便溺通調。病不在府。從腹下升逆。貫及兩脇腰中。推及八脈中。病理固有之。然立方無據。捉摸。憶讀仲景轉旋下焦痺阻。例以通陽。

苓薑朮桂湯

精未充而先洩。異日必有難狀之疾。此南齊褚尙書之言。夫精氣所以護神。既受損傷。神形衰怯。數年不得充旺。議雙補脾腎。略用通絡。舍此竟無別法。

黑地黃丸。痛發時用阿魏丸。

宿癥腕脹。似乎氣滯。從小產後失調。病起三年不愈。病傷日虛。不思納穀。經候如常。及立夏小滿。經候不來。食下卽吐。湯飲下咽。腕中脹痺。腹滿臍突。大便旬餘始

解。始而畏寒。今漸怕熱。嘔吐。先出有形之物。繼以痰涎白沫。味必酸濁。參諸經旨。全是足厥陰肝經受病。陽化內風。乘犯陽明胃土。胃不主乎順趨達腸。遂成反胃之症。治宜理肝木以安土。但氣逆沸騰。陽藥不能下膈。勢必隨湧。議分治方法於左。

左金丸鹽水煮。蒸餅和丸。

左金平肝。苦辛氣味。尤慮下行未速。加鹽味令其下行。宗內經本草。鹹苦之味入陰厥。陽濁氣退避。胃乏中流砥柱。勢必風陽再逆。議坐鎮中宮木火。庶不乘土。服左金丸逾二時。繼用釘頭。代赭石。化州橘紅。飯和丸。煎大半夏湯。加薑汁送下。再診。昔人云。吐中有散。謂多嘔多吐。諸氣升騰而散。內經以陽明經脈主束筋骨。以利機關。今爲厥陰風木久侵。中虛困窮。清空潰散。致濁蒙蟠聚。不徒胸腹脹滿。腰痺肌膜。亦令浮腫。左金瀉肝止嘔吐。謂肝家鬱勃上冲。大苦寒降其逆。大辛熱

泄其氣。丹溪製方之義。以相火內寄於肝膽。上升之氣。皆從肝出。氣有餘便是火。此非有餘。因數日不食。陽明胃土傷疲已極。中無砥柱。木橫濁攻。歷考治脹諸賢。河間分消三焦。戴人必攻六府。此皆有餘治法。今乃虛症。若呆鈍補陽。適助其脹。議通陽明兼泄厥陰法。

人參

川棟子

延胡索

麻仁

茯苓

荒蔚子

時刻精遺。少腹脹滿。皆腎不收納。咽喉微乾。火升及面。由陰不上承。虛陽浮越。上年用純陰靜藥。即瀉下損及中。今當固下。

熟地

山藥

茯苓

北五味

人參

芡實

湘蓮

人乳粉同河車金櫻二膏爲丸。

眼胞上下脾腎之脈。循行倦於開闔。太陰脾脈已鈍。甘補多用爲宜。

蒸於朮

枸杞子

桂圓肉

歸身

黃耆

炙草

脈弦右大。弦則爲飲。大則胃陽已虛。緣操持繁思積勞陽傷。致不饑不食。勉納食物不運。瞋怒兼以夜臥不安。多寤少寐。恍惚中心懊懣。忽爾腹鳴氣震。四肢筋骸痿弱無力。起病時晨必寒瘕。足跗微冷。按是脈症有年。陽虛爲本。而痰飲氣逆。因虛而聚。夫虛則生寒。實則生熱。寢食不安。將及半載。已交四之氣中。長夏濕土乘侮脾胃。慮及肌腫腹脹。故周身束筋利機。陽明胃脈是積。閱醫藥氣血淆混。寒熱互投。不以陰陽偏著調理。宜乎不應。議通補理胃陽爲主。疎肝爲輔。氣宣陽甦。何慮痰濁之蒙昧。以茯苓飲法減朮。合薛氏星附六君子意。

人參

茯苓

香附

蘇梗

白附

半夏

薑汁

陳皮

舌白不大渴。寒戰復熱。神躁欲昏。心胸飽悶更甚。瘧係客邪。先由四末以及中宮。欬痰嘔逆。是邪干肺胃。體虛邪聚。閉塞不通。故神昏煩悶。鬱蒸汗泄。得以漸解。營衛之邪未清。寒熱蔓延無已。此和補未必中款。按經設法爲宜。

白蔻仁

黃芩

半夏

竹葉

苡薏仁

薑汁

治目疾無非辛散寒苦。遂致精滑淋濁。夫陽虛則生外寒。陰虛則生內熱。精氣皆虧。神志孤獨。夢魂紛擾。驚惕恐懼。而無以自主。法當固攝腎關。養心寧神。鎮怯理虛。漸次夜視反聽。十分調護。方可治療。

桑螵蛸散

舌色白晦。脈得右大。來去不整。左部小促。耳聾身熱不寐。語言蹇澀。非是少陽傷

寒。良由小產。陰氣不復。惕氣上冒。恐有牽搐暴厥之憂。勿以輕淺視之。

生地

阿膠

丹皮

麥冬

白芍

蕉漿

再診。

前方去白芍。加元參、羚羊角。

遺由精竅。淋由溺竅。異出同門。最宜分別。久遺不愈。是精關不攝爲虛。但點滴痛癢。少腹堅滿。此屬淋閉。乃氣墜不通。未可便認爲虛。况夏秋足指先腐。下焦蘊有濕熱。氣不流行。膀胱撐滿。遂致堅滿耳。五苓散主治。

五苓散

秋暑失血。初春再發。脈右大能納食。金匱云。男子脈大爲勞。極虛亦爲勞。要知脈大爲勞。是煩勞傷氣。脈虛爲勞。是情慾致損。安靜一年可愈。

黃耆

北沙參

南棗

白芨

炙草

薏苡仁

欬嗽從肺治者。以外邪必由皮毛而入。內合乎肺。然六氣皆令火化散之。未解清之潤之即愈。若內因之嗽。由別經干連及肺。當明其因。徒治肺無益。夫腎爲先天。坎中真陽。內藏而主。封蟄奇經。得司其間。衝陽由前直起。且少陰脈循喉嚨。挾舌本。陰乏上承。陽獨自灼。故陰上陽下則壽。反則死。八味丸陰中之陽。似乎有理。然肉消形瘦。桂附仍屬剛燥。宜溫和柔劑。取乎血肉有情之品。議用斑龍峻補玉堂關下。但鹿角入督升頂。有過升之弊。加以青鹽引入下元。斯爲合法。

鹿角膠

鹿角霜

熟地

菟餅

白茯苓

青鹽

補骨脂

柏子仁

住居臨海。風瘴癘氣。侵入腦髓骨節。氣血不和。壅遏內蒸。頭面清陽痺阻。久則邪

正混處其間。草木不能見效。當以蟲蟻疎通逐邪。

蜣螂

蜂房

川芎

威靈仙

火酒飛麵爲丸。

由夏季目黃神倦。漸至中焦脹滿。延至霜降。上吐瘀血。下便污濁。按脈弱細不調。視色神采不振。兼以呼吸帶喘。素有寒疾氣逆。其宿飲之畜。已非一日。當夏三月脾胃主令。天氣熱。地氣升。人身氣泄。加以饑飽勞役。而遂減食脹滿。是皆病於中綿延上下矣。夫六府以通爲用。不但府不用事。其間經脈絡脈中。氣血皆令不行。氣壅血瘀。脹勢愈加。古人以脹病專以宣通爲法。而有陰陽之殊。後之攻刳宣通如神佑、舟車、禹功等方。值此久病淹淹。何敢輕試。議以專通三焦之陽氣。驅其錮蔽之濁陰。溫補兼進。若不陽氣漸甦。難以擬投。引用仲景白通湯。

去鬚葱白四枚

乾

薑切片鹽水泡二十餘次去辣味三錢

猪膽汁十匙

淡附子

去皮臍再用
包火煨一錢

再診。脈神如昨。胸滿脹更急。不思納食。鼻尖冷甚。熱汗出。自吐痰便垢。至今神衰吸短。古人謂上下交征。當理其中。但陽微濁僭。格拒不通。理中守劑。不能理煩治劇。此護陽通陽。仍參苦寒。俾濁陰泄得一分。其陽復得一分。安穀之理在焉。不及縷述。

前方去葱白。加人參三錢。

前用生津養陰。已得效。停熱退。可以漸入佳境。不虞發熱較甚。三晝夜不減。口渴不饑。蓋體弱肌疎。邪易侵襲。鬱遏不宣。蒸燎如焚。質係金虛火旺。今遇炎威酷烈。相火內煽。暑熱外侵。交相燦液。必致煎熬枯涸。欲進苦寒。奈虛火不堪直折。且慮徒傷胃氣。議用海藏神朮法。上解三陽。下安太陰。

白朮

梨汁

防風

麥冬

甘草

酒客淋濁。必係濕熱之邪。著於氣分。故五苓八正。俱用通利。病數年不愈。必由情欲致傷。敗精血阻於內。竅溺與精異路同門。莖中因精腐阻居多。必通敗精。一定之理。

杜牛膝一兩五錢。搗汁沖入麝香三分。

痰飲留伏。而發最詳。金匱、玉函、仲景。必分內外。以內飲治腎。外飲治脾。更出總括一論。謂飲邪必和以溫藥。數年寒暄。感觸致病。今屢發勢甚於昔。男子中年以後。下元漸衰也。

都氣丸。加坎炁、胡桃。

經來漸遲。色淡而少。當期必暮夜。腹痛臍脹。腰髀痠楚。經絡牽掣少舒。脈數。右小左大。此乃奇經衝任二脈。爲他經之氣所束。以致氣機日鈍。血少貯蓄。若加暴怒。

須防經漏沸溢。用藥須擇入奇經者爲宜。血海固陽明隸屬奇經。肝腎爲多。議兩和氣血宣通奇脈方。

當歸

茺蔚子

生香附

小茴香

焦麥芽

大黑豆皮

調入西琥珀末一錢。

面腫氣喘。欬噎不止。音漸啞。酒客久蓄之濕熱。必上熏及肺。爲腫爲喘。聲音閉塞。按內經濕淫於內。治以淡滲。佐以苦溫。

蘆根

薏苡仁

滑石

赤苓

杏仁

厚樸

寒入厥陰之脈。結爲氣疝。痛則脹升氣消。絕無踪跡。老年下元已虧。不可破氣攻疝。尿管痛或阻溺。溫養下元。佐以通竅。

鹿茸 麝香 韭菜子 蛇床子
茴香 歸身 青鹽 覆盆子
肝腎精血交虧。陽氣不肯潛伏。陽升面赤戴陽。陽墜精關不固。時令冬失潛藏。陽生陽動病加。靜處山林。勿預家務。迎夏至一陰來復。必有好音。倘然却藥。心境操持。與身病無益。

水製熟地

瑣陽

元武板

茯苓

線魚膠

遠志炭

宿瘕在脇下。亦與肥氣相類。自述因嗔怒。蓋肝之積也。久鬱氣血不通。肝藏內寄相火。時當夏令泛潮苦雨。脾胃受濕。自必困倦。肝木橫尅脾土。脹勢日滿。所受濕邪。漫無出路。蒸於腸胃。粘膿積滯。利不肯爽。中焦不和。寤不得逸。症屬難治。且議分消。

白朮

厚樸

茯苓

猪苓

茵陳

通草

胎孕而患瘧。古人先保胎。佐以治病。茲診齒燥舌白。嘔悶自利。乃夏令伏邪。至深秋而發。非柴枳之屬可止。嘔吐黑水。腹痛。胎氣不動。邪陷入裏。蒸迫藏府。是大危之象。

黃芩

黃連

黃柏

秦皮

川貝母

再診。寒少熱多。即先後厥之謂。熱甚胎攻衝心痛。蓋胎在衝。瘧邪從四末漸歸胃。衝脈屬陽明。胃脈管轄。上嘔青黑涎沫。胎受邪迫。上攻衝心。總是邪熱無由發泄。內陷不已。勢必墜胎。且協熱自利。外邪從裏而出。有不死不休之戒。方書保胎必固陰益氣。今熱熾壅塞。人參膠地反爲熱邪樹幟。前以純苦氣寒急取。固上焦陽

明胃厥陰肝兩治。今則用酸苦辛。泄兩經之熱邪。外以井泥護胎。

川連

草決明

烏梅肉

石蓮肉

黃芩

白芍

炒川椒

三診。苦辛酸清。泄陽明厥陰邪熱。兼外護胎法。病減十之二。視苔色芒刺。舌心乾板。而心中痛不已。此皆熱邪內迫。陽津陰液告窮。兩日前慮其陷伏閉塞。今又怕其昏瘳。最難調治。夫護胎存陰。清邪去邪。俱不可少。

阿膠

鮮生地

川連

雞子黃

知母

雨淋衝陽受傷。熱水洗浴。迫其冷濕深入。與水穀之氣互蒸。而肌肉發黃。陳無擇云。穀疸能食不肌。舌有黃苔。一年之久。寒濕釀成濕熱。凡濕在太陰脾。熱在陽明胃。不分經絡治不可。

生穀穿

半夏

廣皮白

柴胡

黃芩

川連

人參

枳實

薑汁

經云。謀慮在肝。決斷在膽。操持思慮。五志陽氣。有升無降。肝脈循環。遶乎陰器。氣逆拂亂。不司疎泄之權。似疝如淋病象。其實內係肝藏。但治淋治疝。不越子和辛香流氣。即從丹溪分消洩熱。今形脈已衰。當以虛論。肝病三法。曰辛。曰酸。曰甘緩。經云。食酸令人癢。小便不爽。大忌酸味。

當歸

茴香

穿山甲

枸杞子

沙蒺藜

凡當臍動氣。臍腹結瘕。肌肉濡動。眩暈羞明。昔賢都主下焦精血之損。二氣不得攝納。則變亂火風。如混蒙之象。泄氣溫燥攻病。是虛其虛也。溫養有情之屬爲宜。

紫河車

肉蓯蓉

當歸

青鹽

茯苓

胡桃

黃柏

小茴香

柏子仁

紫石英

暑風入肺爲痺癰。金匱爲陽氣獨發。嘉言云。體中陰液素虛。所伏熱氣。日久混入血分。陰虛陽冒。上焦清氣皆蒙。胃陽失和。不納易痞。究竟伏邪未去。凡苦辛疎泄。皆屬禁例。夫上實下虛。有客邪留著鎮降。不應倣徐子才輕可去實之例。分別氣血。以宣之。以逐之。

犀角

連翹

元參

通草

竹葉

荷葉

十年前小產血崩。損傷未復。家政操持。形神俱不能清靜。上年交秋。帶下淋濁。不特肝腎脂液告竭。奇經與諸絡亦無血存留。氣衝犯胃。脘膈刺痛。脇肋高突。更兼

下焦寒冷。腰圍如帶拘束。兩足麻木。踐地痿軟。二便窒塞不爽。五液枯涸。至陽不交。陰見痛用沈香大謬。凡血液枯槁。大忌香燥。姑以血肉參入人參。若春和溫煦。草木藉以滋生。

人參

甘枸杞

歸身

肉蓯蓉

小茴香

沙蒺藜

黑芝蔴

羊內腎

診脈尺垂。據述衝氣上衝。肝脈必搏大無偏。視面色赤亮。肌肉瘦削。乃腎精肝血內耗。陰不和陽。致衝任不主把持。固攝壯水。正謂助陰抑陽。然久損不復。當與味厚質靜。或血肉有情。填實精隧。考古海藏與可久輩。咸遵是製。內損精血。務宜絕欲靜養。使其加餐壯胃。所謂精生於穀也。且肝腎久傷。累及八脈。陰傷漸干。及陽。豈一法網羅者。

閨中室女。忽然神志時惑。遂月事不來。正內經謂二陽之病發心脾也。蓋氣逆血

菀。經緯紊亂。日加鬱痺。焉得聰明。清曠情懷。致病草木藥餌。都屬無情。所以不易奏功。議以上清心竅以通神。下調奇脈以通經。

琥珀末五錢

丹參一兩

鮮石菖蒲搗汁法丸。辰砂爲衣。

同生丹爲小丸。早服一錢。另以大黑豆一兩。炒赤。置竹籃蓋內。以無灰酒淋熱豆。取酒服藥。

天癸從未至。肉瘦色悴。欬喘著枕更甚。暮夜內外皆熱。天明汗出勢減。痰或粘或稀。咽中總不爽利。此先天最薄。真陰不旺。弗勤針指。務要安閒怡悅。俾經來熱除。不然俗云乾血勞。

復脈湯去薑桂。

男子結疝。在內經則曰衝任爲病。子和統論疎肝。今疝未愈。臍右復高突硬起。乃

由疝漸至瘕聚腸覃之屬。夫腸覃者。寒氣客於大腸。與胃氣相搏。大腸與肺表裏。傳送肺氣。寒則氣凝不行。清氣散而濁氣結爲瘕。遷延日久。如懷胎妊。按之堅。推之移。氣病而血不病也。

穿山甲

椒目

桂枝

川棟子

小茴香

茯苓

麝香

白芥子

冒暑遠行。熱氣由口鼻吸入。先犯上中。分走營衛。故爲寒熱瘧疾。當淡泊飲食。滋味。清疎胃氣。投劑或以涼解芳香。或以甘寒生津。皆可療治。奈何發散不效。復肆行滋補。致肺氣壅閉。胃中凝滯。自上及下。一身氣機不通。變成腫脹。矯其非而欲與攻逐。無如病久形消。又慮正氣之垂寂。不得已用保和丸。緩疎中焦。漸漸升降。得宣六府。轉達府氣。先通經脈之氣。無有不通者矣。

保和丸

女科肝病爲多。產後必病及八脈。卽如少腹痠聚。冲氣攻心。必嘔吐。逆上則喉間閉塞。經水半年不來。越日常有寒熱。凡下焦多屬血病。癥屬氣聚。瘕爲血痺。病在衝脈。陰維陽維混混施治。焉得入奇經。

延胡索

川棟子

蓬朮

桃仁

生鼈甲

地鼈蟲

麝香

查炭

脈緩按之濡弱。穀少不食。厚味運化最遲。飲食不適。卽欲痛瀉。膚腠麻木。骨栗筋痛。且遇暴風驟冷。體中更覺不安。上年腸紅。入夏方愈。種種脈症。是氣弱陽微。脾胃少於運化。濕鬱生痰。致氣機不能靈動。法當健陽佐運。卽治痰驅濕之本。

人參

於朮

茯苓

半夏

陳皮

益智仁

木瓜

天麻

生薑

大棗

女子四十九天癸當止。謂陽明脈衰。衝脈力怯。不能招集諸絡之血。聚於血海。按月經行。此向老皆然。今秋熱致傷。客邪不重。已見帶淋。肌麻血阻。內傷之勢已露。況所患甚於腰腹。是必藏陰內損。及於八脈。有形之血既去。無形之氣掀旋。諸竅百骸。攻迫肆虐。卽身中之陽氣獨行。不得真陰眷戀耳。熟地、五味。滋收固不甚謬。然不入奇經。法當介用潛陽。鹹味下引。酸味內收。或佐微苦微潤。蓋肝惡剛喜涼。腎惡燥喜煖。古人之制然矣。

鹽水炒阿膠

茯苓

山萸肉炭

鹽水炒鼈甲

知母

女貞子

鹽水炒旱蓮草

天冬

鹽水炒黃柏

幼穉驚癇。古人有陽癇之分。據述自幼至今。不論寒暑。寐必汗泄。乃藏真不固。陽不內依。致內風灼筋牽強。冒竅神迷。且時時神餒恐懼。治在肝腎。用包舉大氣。內

安肝腎。

熟地

石菖蒲

龍骨

五味子

遠志

茯苓

瑣陽

黃柏

萸肉

紫河車膏丸。

驚則動肝。肝氣上逆。憂則傷肺。肺氣失降。升降失司。中焦不運。氣聚成形。風擾鳴泄。仲景論上升吐衄。下墜狐惑。都從胃虛起見。風木相侮。陽土日困。食減便澹。有諸。由驚憂偏逆致病。因病失治。延虛最難奏效。用藥不過生化尅制之理。培其受侮。平其衝擾。補陽明以宣府。泄厥陰以平逆。如是而已。至於拔病根。在乎居恆頤養。當醫藥外求之。

人參

乾薑

川椒

川棟子

茯苓

桂枝

白芍

烏梅

產育頗多。衝任先傷。其欬嗽失血。嘔吐涎沫。都是下元不攝。衝氣上逆所致。況晨刻必瀉。乃屬肝腎虛滑。爲瘕泄驚塘。此病原係蓐勞。根本已怯。倘經水阻隔。無法可商。急急招納下元。散失之真。固之攝之。尤慮弗及。若見血見嗽。用滋清沈降。非內熱肺欬。奚益於病。徒使遷延胃敗。遂至廢食。豈不危哉。

鹽水炒補骨脂 石殼蓮肉

熟地炭

炒黃山藥

覆盆子

五味子

芡實

再診。

前方服二劑瀉止。今去補骨脂覆盆子。加青花龍骨。

三診。自前方固攝之後。五六日精神頗覺向安。但寒在四肢背部。熱在心前腹中。卽內經陽虛外寒。陰虛內熱之旨。然產後氣虛。必自陰分傷及陽位。張景岳云。氣

因精而虛者。當補精以化氣。況產後八脈空虛。填補方中。必佐以收拾奇經之散亡也。

熟地炭

龍骨

湘蓮

紫石英

五味子

人參

芡實

茯神

丸方

砂仁拌炒熟地

芡實

桑螵蛸

五味子

紫河車

茯苓

人參

遠志

沙苑蒺藜

山藥漿丸。

診脈右弦左濡。久痔注血。致納食不易運化。此脾營先傷。胃陽繼困。府氣不能宣暢。大便不爽。溫補未能通調。府氣疎滯。更損脾胃生陽。東垣每以治土。必先達木。

不宜過投燥劑。倣古治中湯法。佐以疎肝解鬱。

人參

青皮

陳皮

木瓜

黑槐米

益智仁

查肉

茯苓

黑地榆

水泛丸。

診脈百至。左小瀯結。右部弦大。緣高年中焦。清陽已微。濁陰漸阻。致腕中窒塞。日盛。物不能納。下焦陰液枯槁。腸中氣痺。溺少便瀯。虞花溪云。噎膈反胃。陰枯陽結。爲多。衰老之象。最難調理。誠情志偏勝。無形之傷也。若夫痰氣瘀血積聚。亦有是病。有形有象。卽易爲力矣。惟無形致傷。以有形之藥餌施治。鮮有奏效。當以陰陽二炁推求。在上爲陽。在下爲陰。通則流通。守則呆鈍。古人成法。宜遵其言。居恆頤養。不在藥餌中矣。議宣通之味。以翼小效。

大半夏湯加枳實、薑汁、川連。

脈右弦左濡。秋涼宿飲上泛。欬嗆入夜。著枕欲寐。氣冲胃脘。心悸震動。必欲起坐。仲景論脈篇弦爲飲。背寒爲飲。當治飲。不當治欬。飲屬陰邪。乘暮夜竊發。金匱法中。每以通陽滌飲。與世俗僅以肺藥疎降迥異。用小青龍減麻辛法。

桂枝

五味子

乾薑

茯苓

白芍

炙草

半夏

丸方

八味去附。加沈香。

頻因小產。奇脈不固。經來甚多。經過帶下。早晨大便溏滑。納穀日少。時覺心悸震動。始養血滋膩。卽脘悶不思納穀。此皆自下焦損傷。漸及中焦。致脾胃不能轉運。近日擬用王荊公妙香散。宣通補中。仍兼顧下。雖似相投。然於調和經帶。其力未

專再議兩去分治。中宮宣通。下焦固攝。

鹿角霜

淡骨脂

青鹽

炒黑小茴香

紫石英

禹餘糧

當歸

茯苓

用雄羊腎蒸熟搗丸。人參湯下。

男子血淋成塊。尿出痛。醫治一年妄效。夫淋屬肝經鬱火濕熱皆有。是病患少壯情慾勉強。必致敗精凝竅。精腐變瘀。理固有諸。用虎杖散法。服五六日。痛減血少。晨溺尚有血絲。此隨竅中有未盡之敗濁。宜通不宜濇。

人中白

琥珀

沈香

白牽牛

川柏

韭菜汁丸。

產育致虛。病情多歧。不能縷分。思產後八脈皆空。損傷非在一藏一府。所以諸恙

並起。稍涉情志不適。藥餌便少功效。沈痼宿恙。驟難奏功。閱病原。再診脈。知內因虛損。小效病復。實由於此。姑擬遵日再急。在腹脹洞泄。脇腹疔痛。冀得少緩一二。爲進商之步。

人參

鹿茸

茯苓

柏茴香

紫石英

補骨脂

另用禹餘糧、赤石脂等分。糯米煮糊爲丸。煎前方送廿丸。

脚氣古稱南地。多因濕熱。醫用苦辛宣通開氣。滲濕久進。病未祛除。而血液反耗。心熱氣沖。目黃嘔涎。煩躁頭痛昏厥。四肢筋縱掣。大便艱澀。顯然肝血衰涸。內風掀越。此風乃陽氣之化。非外來入風。同例而治。分經辨治。病在肝藏。擾動胃絡。由氣分濕熱延中。血中枯燥。靜攝小安。焦煩必甚。蓋內傷情懷。草木難解。斯爲沈痼。

石決明

魯豆皮

天冬

生地

荒蔚子

阿膠

丸方

生地

白芍

天冬

桂圓肉

丹參

杞子

阿膠

麥冬

知母

荒蔚子

魯豆皮

烏骨雞煮爛杵丸。

暑屬陰邪。一種濕溫穢濁之氣。膠結於三焦。故苔灰邊白。氣喘脘結。周身痛難轉側。小溲窒澀而痛。老年情氣已衰。恐有內閉外脫之變。

鮮石菖蒲

厚樸

茯苓皮

橘紅

白蔻仁

杏仁

另服蘇合香丸。

病久反覆。精氣損傷。遂成虛怯。據說臍下閃閃升觸。逆干欬嗽。兼痰多咽痺。明明元海無根。衝脈氣震。無以把握。陰精內枯。陽乏眷戀。非靜處山林。屏絕世擾。望其生生復聚。問醫便投草木湯液。恐難久持。

鮮紫河車膠

秋石拌人參

雲茯神

鹽水炒紫衣胡桃肉。

經云。脾氣散精上輸於肺。地氣上升也。肺主治節。通調水道。下輸膀胱。天氣下降也。憤鬱戕肝。肝氣拂逆。憂思傷肺。肺氣失降。左右二藏既乖。上下不交。而否象成。中宮亦不和暢。至晨夕嘈雜。食少無味。下脘如納粗物。病久胃汁枯。四肢無力。顯然脾病。右脇少腹作痛。升降有聲。寅卯病進。午後病退。是清陽之氣閉結。若仍勤勞家政。深秋關格是慮。

香附

延胡索

黑山梔

歸身

柏子霜

桂圓肉

諸動屬陽。煩勞則損氣。肝司藏血。拂鬱則血菀於上。午後則氣併於血。升降混淆。爲厥。脈來浮數。退而細澹。面黃脣白。熱勢稍輕。神昏如故。胸膈隱痛。必非停滯。諒有瘀聚所致。目眦舌縮。爲腎水竭絕之徵。瘕瘕不止。乃肝虛風動之象。病名暴厥。趙養葵所謂薄厥煎厥之類。開心竅不應。勉以蒲黃散去瘀舒鬱。續進滋養天一之水。以翼風寧火熄。

蒲黃散

情志鬱勃。氣逆多升。絡血上冒。連次小產。衝任已怯。心嘈震悸。目珠痛。頭脹。肝膽厥陽動極。必須懷抱寬舒。可望病痊。否則延成痼疾矣。用復脈湯去薑、桂、參。加淮小麥、天冬、石決明。經來後期兩旬。牙宣吐血。防其倒經。議養肝陰。兼通衝脈。

生地

天冬

枸杞子

牛膝

茯苓

白芍

阿膠

桂圓肉

丹參

茯神

烏骨雞煮爛爲丸。

煩勞氣泄。陽升巔頂。瞳神必脹。容色奪。目眵變。呼吸似乎下陷。若熱氣升。舌本必麻。即痰氣阻咽。天暖風和必逸。乃血氣因勞致虛。有藉乎天氣之煦涵。內經云。勞者溫之。取味甘氣平。以補其陰陽血氣。然痰氣宿恙。勿以膩濁爲準。

人參

白朮

當歸

枸杞子

茯苓

甘草

白芍

天麻

嫩鈎藤

菊花炭

桂圓汁丸。午後服三錢。另早服虎潛丸四錢。

質瘦脈弱。交夏天煖真氣發泄。心熱口渴。頭痛脇疼。食下如噎。右耳氣閉。少聰。語言過多。齒戛寒噤。或顛脹面浮。皆津液因熱而傷。致令浮陽動搏。議用甘涼生津和陽法。

北沙參

天冬

麥冬

麻仁

杏仁

桑葉

蜜水炒橘紅

川石斛煮汁泛丸。

筋脹膚疼。發作有年。左脇有形。不痛爲癥。肝氣久鬱血虛。生熱生風。不受辛熱之藥。以肝木內寄相火。只宜和血熄風。柔筋緩痛。

生首烏

歸鬚

胡麻

丹皮

黑山梔

桑葉

嫩鈎藤

丸方

桑寄生

阿膠

鈎藤

丹皮

大生地

當歸

天冬

白芍

黑芝蔴

柏子仁

煉蜜丸。

情懷挹鬱。肝氣不舒。患乳生癰膿潰。血液大耗。氣蒸上逆欬嗽。左脇內痛。不能轉側。蓋肝絡少血內養。左右升降不利。清潤治嗽無益。

炒桃仁

當歸

茯神

丹皮

阿膠

柏子仁

時令溫邪內迫。經水不應期至。淋淋不斷。二便不通。脣舌俱白。不喜冷飲。神呆恍惚。言語支離。診脈細小欲絕。當芒種夏至。陽極洩越。陰未來復。神魂不攝。是謂亡陽昏譫。最屬危脫之象。擬用仲景救逆法。以扼其危。

人參

龍骨

製附子

炙草

桂枝

牡蠣

蜀漆

南棗肉

經停兩月。恰值嗔怒。陽氣升降失和。血隨氣行。衝任脈絡不固。遂爲崩漏。且血凝成大塊。非血熱宜涼。從來血脫。必須益氣。但衝任奇經在下焦。又非東垣歸耆、升柴、升舉諸法所宜。須固攝奇脈之藥。乃能按經循絡耳。

人參

茯苓

烏鰂骨

鮑魚

茜草

震靈丹冲服。

再診。昨擬震靈丹通攝。鹹苦入陰。加人參見效。但頭痛身熱。是血大去。陰氣不主內守。陽孤失偶。泛越。景岳云。陽因陰而離散。宜從陰以收散亡之陽。兩儀煎加龜甲、秋石主之。諒中病機。

人參

熟地

茯神

龜板

紫石英

桑螵蛸

當歸

酒客中虛聚濕。口鼻吸受穢濁不正之氣。初病頭脹胸痞。身痛微汗。不解穢濕。在募原內蒸。非傷寒之邪。從表入裏。及中道斜行。鼻受穢濕。皆蘊結於氣分。治以芳香。邪氣得開。奈不分氣血。從熱消導。清熱攻下。邪混血分成斑。冒入膈中。神昏譫妄。內閉藏府。外象肢冷大汗。勢已危篤。仍以病根源穢邪。逼迫心胞絡。論神氣少清。翼其同生。

至寶丹四分。金汁一盃。石菖蒲汁一匙。研細和勻。燉溫服。

三家醫案合刻 卷一

七二

三家醫案合刻

卷二

清繆遵義宜亭著

吳金壽子音纂

欬失音。脈右部向內極微而濇。水竭金枯之象。姑變法治之。

炒熟地

麥冬

川貝

敗叫子

海參

梨汁

紫苑

蟬衣

加雞子清一個。囹圄煎。

另方。猪肺一個煮爛。俟臥後將醒。不可開口說話。取肺及桐城秋石少許。食之。

即睡。

失血欬嗽盜汗。從陰虛治。

黃耆

北沙參

炒棗仁

麥冬

北小麥

生牡蠣

南棗

胃寒不能食。

河車一具。重湯煮。收入菟絲餅末四兩。焙燥爲末。

鹿角膠四兩

蛤蚧一對

製附子一兩

乾薑一兩五錢

補骨脂二兩

製白朮觔半

南棗半觔

煎膏丸。

腹滿發黃。惡寒舌白。多食即脹。

陳香櫟挖去蓋入砂仁二錢。仍用蓋合上。用水和東壁土煨。存性取出。去泥

研末。即將東壁土一撮。煎湯送下一錢。用糠火煨。
牙齦腫痛。左尺弦搏之象稍緩。水中之火漸戢。

大補陰丸加

犀角

藕汁

生牡蠣

人中白

骨碎補

丹皮炒炭

蘆根

傳藥

石膏

廉珠

人中白

金絲草灰

土貝

青黛

生赤小豆

研末。

酒濕侵絡。肩髃痠麻。留著不去。肺受其傷。痰中亦帶血矣。絡脈既傷。鬱而成熱。清補不可廢也。

細生地

地骨皮

料豆衣

白扁豆

絲瓜筋

炒黑新絳

米仁

柿餅灰

氣急脈數久欬。內熱盜汗。用虛損法。

生精羊肉

一兩煎

黃

者炙蜜水

土炒當歸

炙鼈甲

製白朮

北沙參

淡天冬

懷山藥

鼓舞胃氣。

炒鬆黃鱔

參條

炒香焦朮

梨汁

白荷花露

南棗

大麥仁

丸方

黃鱔六兩

淡菜六兩

五味一兩

黨參二兩

蓮肉二兩

山藥二兩

麥冬二兩

玉竹二兩

米仁二兩

梨膏四兩

爲末。黃精二兩。南棗二兩。去皮核。同梨膏搗丸。

服藥後。血止而口中之熱亦去。亦稍見效矣。而食不加增。膿亦未除。詢其所得之證。則自齒中出血之日始。則非一日矣。使投六七劑。而卽掃除痼疾。恐扁倉亦謝不敏也。今姑用王良詭遇之法以試之何如。

炒熟地

龜板

骨碎補

黃柏

生牡蠣

人中白

旱蓮草

夏枯草

犀角

蘆根

野菊根

紅麴

黃鱉

蒸白朮

查炭

小赤豆

鬱結傷肝。肝火上侵肺絡。故痰中見血。治從肺肝兩經清理。

阿膠

白芨末

雞子清

白棉紙灰

炒黑側柏

料豆衣

炒柿餅

氣下陷。肛門似墜。下鮮血。用補中升陽法。

四君子湯加

升麻

柴胡

砂仁

木香

鯽魚末

用礬五分入腹中
縫好泥塗煨存性

血症屢發。於滋養中。寓堵截法。

炒熟地

麥冬

北沙參

川斛

女貞子

料豆衣

茜草

側柏

白芨

牡蠣

藕節灰

汗泄太過。津傷口燥。究竟邪未得清。欬猶未除。夫邪在手經。本非重症。止宜以輕劑調之足矣。

枇杷葉 南沙參 杏仁 川貝母
霍石斛 南花粉 玉竹 水梨皮
真陰虧損。火炎爲患。用滋降方。

熟地 河車 龜板 石決明
川斛 犀角 廉珠 黃柏
人中白 蓮鬚 淡天冬 丹皮炭
黑山梔 金櫻子 芡實 夏枯草
煎膏和丸。

耳內流膿。昔人謂之腎疳。用六味丸加味治。今用其法。兼清少陽。
六味丸加

桑螵蛸 黃甘菊 山梔 石決明

桑葉

黃柏鹽水炒

猪脊髓、芡實、粥為丸。

診脈左瀯滯。右弦滑。飲邪為患。肝鬱不舒。若以燥藥治水。則陰傷。以滋藥養肝。則飲滯。皆非策也。議用加減當歸四逆。以養肝而利水。健脾運痰。

蒸於朮

霞天麴

酸棗仁

茯神木

半夏

橘紅

石決明

辰砂

砂仁

沉香

淡菜膠丸。

痰喘而見血燥。藥難於進矣。變法治之。

淡菜

霞天麴

青鹽陳皮

川貝

生蛤殼

蛤蚧

藕粉和丸。

脈小微數。真陰不足。今既見血。旋復欬嗽。久燥肺金。不能無慮。溫燥不可進。姑從金水二藏治之。

炒熟地

麥冬

料豆衣

北沙參

霍石斛

山藥

藕

丸方

鰻鯉丸加

獺肝

人中白

熟地

川貝

全鼈

側柏葉

女貞子旱蓮草汁蒸晒

用十大功勞六觔。淡菜八兩。紅棗四兩。煎膏丸。

診脈。右部虛軟無力。左足內踝腫漸大。此是三陰經脈所行之處。藏真虧損何疑。議用峻補方。

六味丸加

河車

杜仲

菟絲子

川續斷

五味子

麥冬

牛筋

鹿筋

黃柏

用黃牛骨髓、羊骨髓、猪脊髓、精羊肉煎湯。入淡菜同熬膏丸。

休息痢已久。但其爲痢也。與尋常之痢有異。其始先下濁水。後則下燥糞。所謂濁水燥糞。皆微帶紅色。水與糞各行。全不混入。故其燥愈甚。而水竟獨行其事也。夫渣滓之下。由於大腸。先從小腸而下。小腸屬火府爲丙。大腸屬津液。屬金爲燥。火性急速。故水速於下。金性燥。故糞結且艱也。治宜益脾陰以潤大腸之燥。并緩火

性。使勿速下。庶與病機有裨。

生甘草

紅麴

料豆衣

鴨血

茯苓

琥珀屑

猪大腸煮爛和丸。夜服威喜丸。

脈左弦。右關上半主胃。亦見弦象。合之於左部。則血之下也。因乎肝火。而胃脘之病。亦因之而起。治在肝胃。

生白芍

炙草

沉香汁

藕節灰

蘇梗汁

金柑皮

荊芥炭

查炭

炒黑石耳子

炒黑荷蒂

脈右尺舉按少力。左關弦。肝火易動。動則主疏泄。精泄不固。有自來矣。右尺主腎中之陽。脈象不鼓。一由真陽不足。一由心火不降。不降則不交。少陰之樞窒矣。從

兩經論治。方合病機。

製於朮

菟絲餅

麥冬

川斛

遠志炭

沙蒺藜

杜仲

巴戟肉

黃甘菊

丹皮炭

米仁

蓮蕊

久欬鼻衄。內熱口渴。

炒熟地

麥冬

料豆衣

丹皮

犀角

花粉

青蒿子

淡菜

山藥

蓮肉

藕汁和丸。

夢洩先傷其陰。故足跟腫痛。更兼下痢口渴。是真陰再竭矣。據述微惡寒。仲聖以此屬少陰病。則從厥少治。又何疑。

燒黑鹿角霜

生菟絲子

炒黑骨碎補

炒鬆牛筋

金毛狗脊

沒石子

木瓜

據述。吐血在二月至六月方止。血止發熱。如火後漸止。今又發熱。推測病情。尙是伏暑。失血後。邪乘虛入營分。久而復發。竟有熱入血室之意。仲聖陽明篇。原有此條。正可援其例而變通之。

鮮地骨皮

桑根白皮

青蒿汁

水梨汁

蟬衣

蘆根

生甘草

加三甲煎。

瘧已四月。傳入三陰。纏綿不已。用搜絡法。

三甲煎加

蒸於朮

黨參

青蒿

歸身

足冷肢麻。面有風塊。又惡風脈沈細。前方滯而少通。宜與當歸四逆湯。

本方去棗加

附子

生薑

三瘧四載。寒輕熱重。嘔逆腰痛。此腰痛瘧係少陰也。宜治少陰兼理少陽。

鹿角霜

杜仲

續斷

半夏

生龍甲

生薑

衝脈爲病。治宜鎮逆。

炒熟地

紫石英

坎炁

鹿角膠

杞子

金鈴子

肉桂

小茴香

生杜仲粉

菟餅

沉香屑

木火旺令。肝木乘陽氣之浮。直衝清道。血遂上溢。脈左部弦急。宜從肝治。

炒熟地

生左牡蠣

沙參

料豆衣

側柏葉

山藥

鴨肝

經閉半年。腹腫未消。脾虛肝乘中焦。營氣失職。經何由而至。今又客邪侵肺。欬嗽間作。宜兼理之。

當歸

白薇

丹參

丹皮

川貝

桔梗

查炭

生麥芽

食隨痰出。噎時頗痛。用鎮降方。

靈磁石

代赭石

海浮石

月石

研細。

旋覆花

夜合花

枇杷葉

蜜

煎成調入前藥末。

覆診。

鷄穀袋

戎腹糧漂炒

月石

加油和蜜調服。

疝氣時作痛脹。

六味丸加

柴胡梢

獨活

肉桂

吳茱萸

脈數。肌肉消爍。痰咯不和。有虛損之象。先進清補之劑。

北沙參

淡菜

甜杏仁

川貝

白扁豆

青鹽陳皮

水梨汁

心腎不交。無寐。陰不制陽。陽強易動。與坎離交媾法。

熟地

龜版

牡蠣

建蓮肉

酸棗仁

茯神

遠志

黃柏

痰哮有年。

六味加

杏仁霜

川貝

橘紅

蛤蚧

素患精虛遺洩。今春始發潮熱。半夜方止。初則捫之而熱。後則熱及骨髓矣。此係腎虛。復感冬寒。以感輕。故發亦不甚耳。

炒熟地

桂枝

生牡蠣

龍骨

茯神

白芍

煨薑

炙草

淮小麥

南棗肉

左脇掣痛。筋脈不舒。絡虛氣攻所致。

旋覆花湯加

當歸

蘇梗汁

沉香汁

額上脹。鼻息不通。牙關頰車開闔不利。此乃足陽明交會之地。據述喉腫之後起。宜從陽明治。而開闔不利。是挾風使然。

葛根

犀角

生地

丹皮

杏仁

桔梗

連翹

山梔

白芷

蒼耳

食之吐。因於不運。非盡由肝也。姑與消補方。

焦朮

枳實皮

木香汁

砂仁

鷄內金

炒歸身

沉香汁

紅麴

陳皮

茯苓

炒芝麻

麥芽

食不足。則氣滯而支。兩脇脹斯作矣。議兩調之。

旋覆花湯加

鷄穀袋末

沉香末

紅麴末

麥芽末

焦滯

橘絡

藕粉研

查炭

湯泛丸。

交夏至後腹脹。一陰生而肝邪爲患也。當與當歸四逆湯。

本方加

杞子炭

小茴香

去棗

額額著寒。則噤。清涕隨流。欬甚。五心灼熱。此衛陽虛而肝火熾也。倣東垣法應之。

生耆

防風

桂枝

炙草

石決明

細生地

小川連

元參

川石斛

南花粉

地骨皮

丹皮

蘇梗汁

陰寒凝聚成瘕。上攻爲痛。右脈虛軟。卽真陽式微之徵。非辛溫通陽弗效也。

淡附子

吳茱萸

歸身炭

炮薑

大茴香

法半夏

炙草

茯苓

素有飲邪。陽不交陰。故目不瞑。

法半夏

秫米

生朮

茯苓

棗仁

寒熱脇痛。腹結瘕形。肝脾同治。

六味加

柴胡梢

蒸於朮

炙鼈甲

查炭

白芍

濕勝則腫。如何服五味。腫而熱痛。奈何以鹿膠助熱。

大豆卷

海桐皮

川草薢

宣木瓜

川通草

白麻骨

米仁

茯神

腕中常痛。病起於勞倦傷中。用建中法極合。當卽以此加減。

桂枝

當歸

肉桂

橘餅

炙草

煨薑

南棗

手足指癢。肝乘脾虛而風動。以脾主四肢故也。

於朮

茯苓

半夏

橘紅

石決明

丹皮

川斛

料豆衣

木瓜

甘菊

桑葉

氣升嘔逆。此屬下焦根本不固。急宜填補。

貞元飲加

柴石英

肉桂

杞子

炒焦菟餅

淡吳萸

牛膝

腸中攻動則痛。下痢更甚。明係肝邪爲患。曾服補中益氣升陽之劑而反劇。則升之無益可知矣。宜從風動澹泄一條。比例治之。

製白朮

炒黑秦皮

炒焦菟絲餅

斬艾葉

煨牡蠣

炒黑骨碎補

陽虛挾濕。左足時木。治宜養陰通陽。佐以疏肝活絡。可收全功。

貞元飲加

痢漸減。口乾夜熱。

製附子

肉桂

杞子

白芍

鹿筋

新絳

生於朮

茯苓

遠志炭

橘紅

沉香汁

鮮荷葉

生菟絲

炒枯砂糖

鮮稻葉

黃蠟

懷山藥

先用炒枯熟地四錢。泡湯煎藥。俟藥冷。蠟浮水面去之。再溫服。足筋不舒。為濕邪所阻。以致絡脈壅滯。今發瘡。即是濕邪疏泄處。

熟地

阿膠

桑葉

黑芝麻

當歸

真血餘

石決明

甘菊

木瓜

絲瓜絡

新絳

牛筋

人乳粉

牛酥

白朮骨

用猪脊髓、阿膠烱化和丸。

食入窒塞且響。少腹微痛。切脈肝部不和。用溫通厥陰治。

九香蟲

戎腹糧

查炭

炒紅麴

蘇梗

炒穀芽

沉香

炒麥芽

生山藥煮漿和丸。飯後服二錢。

喉癢痛未愈。下體有漏。時夢泄。

炒熟地

麥冬

線膠

黃明膠

地骨皮

人中白

山藥

湘蓮

鼈一個。泥塗煨存性研末。生雞子清和丸。

每至新涼。陽微飲逆。氣喘不得臥。宜攝陰通陽。

附桂八味加

蛤蚧

杏仁

橘紅

煉蜜丸。

脾腎虛損。肝陽擾動。調停二者之間。治肝爲要。

生地

龜版

知母

黃柏

白朮

雄猪肚

牡蠣

川連

苦參

吐血後。痰時帶紅。是肺病。姑肅清手經。再議填補。用伸醇法。

生地

地骨皮

枇杷葉

川斛

川貝

巴杏

扁豆

桑葉

梨汁

由不得汗。腫從面起。其爲風水顯然。水不得泄。由肺氣鬱遏。不得外達。并不得下行而爲小便。故遂直走腸間而便澹。所謂不得橫。徧轉爲豎竅。正合盧氏之說也。不從此參究病情。再以寒滑之品。欲從前陰驅之。不顧其利。斯亦左矣。

桂枝

白朮

羌活

防風

川芎

獨活

桔梗

薑皮

椒目

赤豆

脈左關弦。全是肝火爲患。倣喻氏清燥救肺法。

枇杷葉

桑葉

生地

丹皮

霍斛

料豆衣

地骨皮

青蔗汁

心中饒雜如饑。此肝火上炎所致。

炒熟地

淡天冬

川連

牡蠣

料豆衣 淮小麥 炙草 南棗肉
診脈。三五不調。短而微數。按之不鼓。真陽式微。氣不下潛。虛里振動。宜於溫補中佐以鎮攝。

熟地

杞子

萸肉

杜仲

紫石英

河車

坎炁

鹿角膠

菟絲餅

鹿茸

棗仁

茯神

山藥

建蓮

遠志

補骨脂

肝邪偶有所觸則發。遇寒遇鬱。或饑飽不時。尤易擾動。見於兩脇肝部也。口湧甜水。脾滯也。木乘土。用建中法。

桂枝木

當歸

橘餅皮

煨薑

炙草

香附

橘絡

南棗

先天稟賦不充。故填補未能。即應南翁輔以益胃運脾之法。先後天同治。亦周密矣。當仍其方。略為增損。以消息之。

人參

菟絲子

煨砂仁

於朮

陳皮

鍋巴

山藥漿和丸。

筋脈攣急。治宜養營。

熟地

阿膠

當歸

人乳

木瓜

牛膝炭

丸方

全當歸豆一觔料

牛筋八兩

牛膝二兩

木瓜二兩

桂圓肉十二觔

馬匣四兩

牛乳六觔

桂元膏丸。

目乾則濇。目潤則開。其開闔之機。卽少陰之樞也。開闔不利。其水虧乎。

熟地

生地

玉竹

霍斛

石決明

明月砂

桑葉

黑芝蔴

面目浮腫。不及股足。三瘧未除。宜運脾胃之陽。兼益命門真火。以祛寒濕。斯不治瘧而瘧自止。

桂枝木

生白朮

茯苓

法半夏

淡附子

生薑

太陽氣化不行。亦因天一之源不足。徒用滲泄無功。

炒熟地

西黨參

麥冬

丹皮

棗仁

山藥

茯苓

澤瀉

食物易噎。噎則喜嘔。昔張雞峰謂之神思閒病。宜以怡情適志為主。

蘇梗汁

雞穀袋

橘紅

橄核汁

牛嘔草

茯苓

食噎有痰。

枇杷葉不拘多少。拭去毛。煎膏加白蜜梨汁同收。

右脈細而急。細屬木體之虛。急則肝火之動也。鼻衄氣逆。則噎甚。是其明徵。六味加靈磁、犀角、血餘、川柏、牡蠣、人中白、藕汁拌。晒乾。阿膠、龜膠丸。飲食少思。大便溏泄。夜臥口燥殊甚。腎陰既虧。脾陽復陷。治法極不易。

西黨參

百蒸於朮

麥冬

北五味

葛根

桔梗

茯苓

炙甘草

用熟地二錢。泡湯煎藥。

三瘧已止。而薄暮猶甚惡寒。此邪尙未盡也。宜和營衛。

桂枝木

當歸

炙草

蟬衣

薑棗煎。

夜不得寐。

濟生歸脾湯加

川連

龍齒

辰砂

咯血後。左乳傍脹。噯氣始寬。是左升太過。右降無權。肝絡阻塞。氣爲之痺也。

旋覆花湯加

炒枯熟地

阿膠

牡蠣

枇杷葉

治目之法。不惟陰精宜補。而陽光尤爲最要。不可偏。偏則畸重畸輕矣。用瑞竹堂四神丸。

久欬音嘶。痰中帶紅。脈右數。

淡人中白

廉珠

生雞子清丸。

目光猶陽火也。其在天爲日月。日爲陽精。月爲陰精。目皆應之。故目之病。不盡得之陰虧。亦有得之陽弱。如寒水翳膜。與雲霧陰霾何異。今診脈遲滯。陽虛可知。陰藥不可用。須變法治之。

炒熟地

枸杞子

肉桂

生菟絲

白蒺藜

甘菊炭

明月砂

鳳凰衣

穀精

羊肝

用介類潛陽。而以參、耆、苓、朮建中。治法密矣。而風邪尙未寂靜。脈弦數。閃爍無定。究竟陽動而陰不能制。仍用前方增損。以消息病機。

炒熟地

西黨參

製於朮

黃耆

龜板

靈磁石

牡蠣

石決明

淡菜

人中白

白芍

丹皮

夏枯草

懷牛膝

川柏

脈弦。爲肝木有餘之象。未免侵克脾胃。胃腑以通爲補。且肝主疎泄。議兩和之。

生益智仁

半夏麴

沉香

陳皮

長鬚穀芽

金柑皮

砂仁

茯苓

氣脹上噯。下泄始寬。兼有痰飲。噎逆。議達鬱疎肝。佐以滌飲。

川貝

青鹽半夏

橘紅

研末。用梨汁浸晒乾丸。

胃脘作痛。腸風下血。悉屬痰飲爲患。故嘔出始快。其下血。亦濕傷脾絡所致。

熟地

金鈴子

炒黑防風

法半夏

茅朮

沉香汁

炒黑木耳

茯苓

心陽過耗。肝膽之火。翕然從之。以致神氣浮越不寐。汗多。治宜收攝心陰以寂神志。

硃砂拌茯神

棗仁

牡蠣

五味

炙黑甘草

淮小麥

麥冬

南棗

瘧發時作時止。亦無定期。歷秋冬而不愈。邪已深伏三陰。必得搜剔經絡。以發伏祛邪。庶可漸瘳。

六味三甲加

當歸

白芍

牡蠣

蠱蟲

三瘧既久。項痠腰似折。督脈備矣。宜治少陰。

鹿角尖

生菟絲

當歸

焦朮

補骨脂

杜仲

脈微瀋。三五不調。此由先天稟賦不充。故當壯盛之年。而腎陽衰憊。水乘上泛。飲邪充斥。宜崔氏八味。加味以祛飲。

崔氏八味丸加

蛤蚧

胡桃肉

瘧久不止。邪擾營分。汗多。用建中法。佐以升陽祛邪之品。

黃耆五物湯加

鹿角霜

炙鼈甲

當歸

小茴香

橘餅

左關弦急。酸水上衝。腕中不爽。悉是木鬱土中。陽微滯運。議與宣通之法。

冬蟲夏草

玫瑰花

於朮

砂仁

黑沉香汁

神麴

半麴

陳皮

金柑皮

瘧後失調。耳鳴氣喘。是勞倦傷中。宜用歸脾加味。

濟生歸脾加

半夏

茯苓

丹皮

桑葉

脈數而細。喘急咽乾。此屬金枯水虧之象。

炒熟地

淡天冬

女貞子

北沙參

烏飯子

淮山藥

坎炁

地骨皮

十大功勞

又 人中白

廉珠

研細。開水調服。

瘧發。腹中猶脹。肝邪未平。

歸耆建中湯加

鹿角霜

焦白朮

小茴香

橘餅

當臍有瘕。不可攻也。食入不運。宜以宣通為主。但不可礙肝。

炒鬆黃蘗

小茴香

砂仁

紅麴

廣木香汁

新會皮

茯苓

麥芽

三瘕變為間日。伏邪有轉出之機。

黃耆五物湯去白芍加

西黨參

當歸

鼈甲

桑蟲

焦朮

脈數。欬嗽不止。帶血。濕熱下注。成漏。便澹泄。所賴胃氣尙強耳。壯水清金。固屬至要。但不得有礙脾陽。以資生之本在是也。

北沙參

鮮地骨皮

料豆衣

米仁

烏飯子

生蛤蜊殼

淡菜

扁豆

梨汁

缺盆右痛。肺絡受傷。宜清補兼施。

生地

阿膠

沙參

麥冬

牡蠣

川斛

蘇梗

瓜蒌藤

側柏葉

藕節灰

川貝

白芨末

用梨汁拌藥三次。柿餅搗丸。

炳類偏枯。由夢泄太過。得之陰精既傷。筋脈亦失所養。治宜填補固攝。以滋榮澆。

之源。

炒熟地

枸杞子

龍骨

金櫻子

乾河車

當歸

牡蠣

白蓮蕊

魚膠

牛筋

診脈按之不鼓。陽虛濕聚。舌白腹滿。漉少臍平。急與通陽泄濕。

桂枝木

淡乾薑

舶上茴香

淡附子

茯苓

炒米仁

食噎嘔逆痰多。

旋覆花

陳膽星

乾薑

淡附子

代赭石

法半夏

杏仁

檳榔

再診。

原方去檳榔。加瓦罐末一分。

三瘧後。寒熱屢發。持重則心悸。宜和營衛。

桂枝湯加

當歸

鼈甲

淮小麥

茯神

血虛故便燥。氣虛故脫肛。須兩治之。

補中益氣加

桔梗

細生地

北五味

芝蔴

靈磁石

三瘧頭痛心悸。病在厥陰。

桂枝湯加

石決明

當歸

茯神

龍齒

淮小麥

脚氣行痺。左右更代而痛。宜溫通方。

桂枝

獨活

秦艽

貝齒

晚蠶沙

茯苓

防風

附子

木瓜

萆薢

海桐皮

米仁

氣升不降。胸中熱而辣痛。痰色黑。此肝腎病也。非滋降不可。

炒熟地

當歸

沉香汁

法半夏

紫石英

炙草

茯苓

橘紅

瘧後。日輕日重相間。此名子母瘧。嘔惡。邪在少陽居多。體虛難用小柴胡。倣其意爲之。

鮮荷葉邊

法半夏

橘紅

草果仁

茯苓塊

生薑

脾弱。不能散津上輪。故咽乾口渴。用東垣法。

葛根

麥冬

於朮

升麻

生甘草

陳皮

人參

五味

川連

桔梗

炙草

澤瀉

穀芽

覆診。加木香、查肉。

痛在右脇。是肝木鬱而不宣。以逍遙法。

當歸

柴胡梢

旋覆花

青蔥

白芍

茯苓

新絳

沉香汁

穀芽

蘇梗汁

炙草

診脈短而濇。短爲氣弱。濇爲營虛。陰不戀陽。陽動而升。爲頭疼心痛。先宜清火育陰。徐議峻補。

熟地

天冬

石斛

石決明

磁石

牡蠣

丹皮

黃菊炭

陽虛。寒濕襲入厥少二陰。下注成疝。治宜溫通。

細辛

附子

杞子

胡蘆巴

小茴香

吳萸

肉桂

歸身

穿山甲

乾地龍

獨活

茯苓

韭根

癰瘰之生。膽汁不足也。而木火因之上升。失血、欬嗽、驚瘧。所謂上傳及肺。未傳寒中也。滋則礙脾。燥則礙肺。兼顧方穩。

人參

霞天麴

蓮肉

穀芽

淡菜

沙參

米仁

藕

喉痛原屬少陰。今痛止而猶腫。左關弦滑。陰虛有火。并挾熱痰。須滋其化源。佐以清熱之品。

熟地

山藥

茯苓

澤瀉

琥珀

廉珠

辰砂

燈心

人中白

石決明

阿膠二兩化丸。

此非伏暑症也。暑既兼濕。無陽以化。則少陰之樞不轉。而太陽之開反闔矣。但熱居濕下。溫通又非所宜。宗河間法。

河間桂苓甘露飲

胃脘痛。右關弱而不鼓。中陽式微。故肝邪乘之。用建中法。

當歸

炙草

香附

煨薑

官桂

炒大茴

橘餅

南棗

久欬痰穢。膿血交作。並非肺癰。此褚氏所謂難名之疾也。病涉少陰而陰火甚熾。以飲食消息之。

豬膚

蛤殼

海參

川貝母

米仁根

梨汁

陰虛挾濕。風陽易動。故痺症時發。濕邪宜去。卻不可燥。以燥藥易致劫陰也。

生地

杜仲

料豆衣

茯苓

炒黑防風

木瓜

蕲骨

澤瀉

木防己

萆薢

桐皮

五加皮

黑芝蔴

炒獨活

桑葉

鴨血

鮮山藥藤

爲末。牛乳拌晒二次。苡薏仁一觔。霍斛四兩。煎濃汁丸。

肝脈弦搏。火有餘也。痰中帶紅。以前曾墜馬跌傷。瘀血留絡所致。當於育陰中。佐行瘀之品。

炒熟地

參三七

查炭

麥冬

阿膠

白花百合

藕節汁

柿餅

病濕挾風。身發紅癰。服搜風之劑。外燥裏濕。外燥故風愈烈。內濕故水益聚。膚裂水潰。始覺微癢。豈非濕泄而衛氣得行之據乎。此症以治濕爲本。而禁風燥之品。

乾首烏

桑葉

石決明

川斛

生朮

黑芝蔴

細生地

梨汁

胃脘痛發。必寒熱得汗則解。厥陰病。從少陰而泄也。平素陰虛內熱。卻不可用滋補。從交感朱雀兩方出入以消息之。

硃砂

香附

人乳拌茯苓

蓮蕊

人乳藕汁泛丸。

診脈小而弱。經阻四月。脈不見滑象。未可卽以妊斷。但體質素虛之人。往往脈形有不見滑利者。以氣血不充故也。治法不妨爲子莫執中之說。則於本體有益無損。可無畸重畸輕之弊。

蘇梗汁

陳皮

金柑皮

藕

歸身

砂仁

炒鍋巴

經不至者。兩月有餘。此營不足也。惟氣能生血。法當大補。

製於朮

白芍

茯神

熟地炭

歸身炭

遠志炭

查炭

沙參

炒黑棗仁

湘蓮

炙草

淮麥

氣衝則噫。氣病自下焦來也。姑用鎮逆法。

炒熟地

山藥

茯苓

紫石英

萸肉

丹皮

澤瀉

五味子

杞子炭

紋銀一件。

氣從脇下。上升走絡。其至於顛。則爲頭痛。壯陰和陽。佐以鎮攝。自是一定之法。

炒熟地

淡菜

石決明

天冬

西參

蛤殼

牡蠣

川石斛

病在少陽之絡。宜滋養而佐以宣通之品。

歸身

枸杞子

續斷

陳酒

新絳

人乳

木瓜

右臂痠楚痺而不行也。宜調營分。

桂枝

紅花

川斷酒炒

當歸

仙鶴草雞右翅血拌炙

絡石

補脾而兼補其先天之不足處則可。若云益命門之火。則沖氣無陽虛之理。正可不必也。

製於朮

橘紅

神麴

查炭

雞內金

法半夏

砂仁

川連

茯苓

全牛膏

紫河車丸

眩暈。用王氏妙香散。

焦於朮

棗仁炭

龍骨

遠志炭

茯神

生智仁

茯苓

炙草

藕

診得右關。其來頗疾。此肝邪擾中之象。脈形不長。是肝木之鬱。左關弦長。幸其全局。猶在左部。若併於右胃。必病矣。

炒熟地

石決明

天冬

西黨參

阿膠

生牡蠣

川石斛

淡菜

猪項骨

用木瓜一錢。煎湯和入鴨血。瓦上炙黃。煎湯去油代水。

腎水上泛。連肺液而上出。故一欬而連欬不已。昔立齋云。氣虛有痰。用腎氣丸補而逐之。其自註云。腎氣丸。即今之六味也。今倣此意爲之。

六味加

麥冬

猪內腎

五味

蓮類

尾間骨痛。卽以異類有情者補之。

猪尾骨

歸身

木瓜

新絳

脈象已和。惟小便時莖中痛。連及上。若小便長。則不病也。此是陰中有火。病在小腸丙火。宜以養營合導赤。用東垣法。

熟地

炙耆

白芍

炙草

生草梢

於朮

歸身

陳皮

茯苓

小木通

加淡竹葉。

痛止而經事猶行。應止不止。衝脈不攝。宜兼調之。

炒熟地

杞子炭

牛角鯢

螵蛸黑

蛤粉炒阿膠

杜仲

白薇

丹皮炭

左關獨弦。春脈如弦。或以將交春令使然。但弦而帶急。是屬肝陰不足。凡心悸腰痛。悉由此。

細生地

棗仁炭

川石斛

石決明

辰砂茯神

杜仲

經行速而爲日多。衝不攝也。寒熱發而腹中痛。營氣虛也。病關入脈。陽惟督脈衝任皆及也。法以調奇經爲主。使河津漸充。流於經脈。病可漸愈矣。

熟地炭

羊尾骨炙

艾炭

阿膠

杞子炭

沙蒺藜

杜仲

炙螵蛸

絲吐灰

白薇

下多。陰氣大虧。近兼渴飲溺少。三消有二。身仍微熱。乃因嬰幼。陰常不足。適當溽暑鬱蒸。熱傷津液。最虞肉削。

參 鬚

麥 冬

五 味

鮮蓮子

炙 草

炒山藥

的係溫邪。壅閉肺絡。欬喘氣粗。聲音不揚。甚則擡肩鼻煽。舌白不渴。裏熱不盛。可知。是以苦泄淡滲。效而不效者。必佐辛宣通泄達邪。冀望奏績焉。

紫 苑

川貝母

竹 葉

蘆 根

杏 仁

鬱 金

連 翹

蔻 仁

再診。

桑 葉

鬱 金

連 翹

通 草

杏 仁

竹 葉

蘆 根

川 貝

薏仁

疝本肝腎爲病。又挾濕熱下注。以致舉丸腫癢。昔子和分導溼熱。丹溪利氣辛芳。以二者兼治之。

萆薢

白萆薢皮

茯苓

米仁

通草

生草梢

肝陰素虧。伏邪內發。始先不寐。繼則往來。腹中絆痛。泛惡乾欬。寒熱得汗。熱未退盡。脈左弦。右濡數。治以和陽益陰。少佐清熱。

桑葉

歲時

料豆衣

茯神

丹皮

巴杏仁

炒白芍

橘紅

痺痛雖緩。營液頗燥。氣機上阻。此屬肝胃營艱於宣佈。餘邪猶羈留腸腑。未盡化也。

暑病槁熱下利。昏狂譏語。至旬日而陡然口瘡目閉。手足顫掉。是邪熱內陷心胞。肝陰告絕矣。危險何辭。原翁芳香開絡。亦背城借一之計。佐以清滋熄風。以冀弋獲。

歸身

廣皮

赤苓

金毛狗脊

柏子仁

油松節

草薢

生麥芽

枳殼

鮮蓮子

羚羊角

川貝

麥冬

鈎藤

稻葉

化至寶丹一粒。

病情如昨。勢不可援。勉擬以冀萬一。

淡芩

黑山梔

甘草

元明粉

連翹 薄荷 大黃
今日病情更幻。用藥更難。議從手經開達。

枇杷葉

杏仁

荷梗

青蒿梗

桑白皮

桔梗

佛手

連翹

川貝

鬱金

前病。暑去濕存。今又濕復招暑。煩熱一候。神煩寐少。脈數右大。舌紅口乾。陽明不和。濕轉化熱矣。

大竹葉

法半夏

甘草

麥冬

生石膏

粳米

仿仲聖復病法。

淡豆豉

黑山梔

枳實

更衣後。勢猶不退。表未解也。舌紅苔黃。小溲短赤。裏熱亦不清泄。議從三焦分洩。

大竹葉

豆卷

杏仁

連翹

大麥芽

桑皮

赤苓

滑石

氣痺化熱。機竅不宣。專開上焦。使其氣化熱泄。

黃芩

山梔

桔梗

枇杷葉

紫苑

淡豆豉

枳殼

議旋降辛開。宣氣熱以通絡。

旋覆花

黑山梔

枇杷葉

青葱

鉤藤

新絳

生麥芽

紫香附

寒熱欬嗽。外感新涼。經水適至。止而復來。邪熱內傷營分。雖有肝氣內著爲痛。仍宜宣手太陰。使痺鬱得開爲要。

淡 芩

黑山梔

枇杷葉

青 葱

枳 殼

炒豆豉

杏 仁

新 絳

脈弦帶數。偶吸暑濁。致身熱不解。而宿病肝氣隨發。腹中塊壘。痛劇。噎欬心嘈。皆屬木火升擾。姑以宣降開達。佐以輕苦和陽。

枇杷葉

黑山梔

金石斛

桑 葉

杏 仁

炒豆豉

生麥芽

半 麴

三家醫案合刻

卷二

清薛雪生白著

吳金壽子音纂

骨小肉脆。定非松柏之姿。脈數經停。已現虛勞之候。先天既弱而水虧。壯火復熾而金燥。歲氣一週一損。豈容再損。秋風乍薦已傷。難免重傷。證具如前。藥惟補北。非敢說夢。聊以解嘲。

生地

沙參

地骨皮

麥冬

金石斛

生龍甲

蘇祿國貢使契苾丹。副使阿石丹。久欬不能臥案。

辨八方之風。測五土之性。大率貴邦。偏在中華之巽上。箕尾之前。翼軫之外。陽氣偏泄。卽有風寒。易感易散。來此華夏。已屬三焦。況不得臥下。肺氣大傷。止宜潤降而已。

蜜炙枇杷葉

麥門冬

川貝母

甜杏仁

經霜桑葉

米仁

內經謂。骨肉柔脆之人。其質本弱。然以脈症較之。其欬原屬手太陰得之。聞先一人補之。後一人瀉之。邪則從補而升。元則由瀉而虛。竟成廟兵出而岸兵入也。亦參末議。共博一笑。

北沙參

燕窩

桑葉

冰糖

川貝母

紫苑

少腹有形隆起如阜。上至心下則厥逆。來疾去駛。雖大力人拒之不能卻。上則人身爲之上竄。下則人身爲之下墜。不能強掙。一翕一闕。一上一下。迺至人身上下如春杵。口鼻兩陰之血。隨其上下溢出。羣醫不能治。余思此症載在難經。特未曾縷晰示人耳。且云。此物伏在臍旁。上下則少楚。伏入臍中則少安。可見臍旁兩穴。亦與此條相合。且弗揭明其義。一任羣公思而得之可也。

用薄荷湯送下神秘丸。以病人自思此湯飲之。其物倏伏而不動。故亦用之。素來擾虧根本。不特病者自嫌。卽操醫師之術者。亦跋前疐後之時也。值風木適旺之令。病目且黃。已而遺精淋濁。少間。則又膝脛腫痛不能行。及來診時。脈象左弦數。右搏而長。面沈紫而時時作嘔。靜思其故。從前紛紛之病。同一邪也。均爲三病。次第纏綿耳。由上而下。由下而至極下。因根本久撥之體。復蒸而上爲胃病。是腎胃相關之故也。倘不稍爲戡除一二。但取回陽返本。竊恐劍關苦拒。而陰平非

復漢有也。謹擬一法。略效丹溪。未識何如。

羚羊角

木瓜

酒炒黃柏

伏龍肝

生米仁

橘紅

馬料豆

癰勞得愈。如麟毛兔角。或叩之瓊臺丹局間。求金光一葉。庶幾脫然。

小建中湯

脈象右三部。洪數弦急並現。左上數中緊。先患陽精不升。次及於陽絡不固。蓋至陰生陽。不屯失精爲先天。至陽出陰。失蒙吐紅爲後天。是有形始兆之後。復現先後天俱病。卽稟至真有餘之軀。亦不足以供其漸耗。今將投味厚入陰者乎。抑投味薄清陽者耶。竊恐山川草木。皆不足以還返金品。莫妙夫大藥金丹。週天火候耳。然又不可不以服食之方佐之。擬候尊師同訂。終慙布鼓。希諒之。

建蓮肉一斤帶心撲如麻子大飯上蒸曬九次爲末

麥冬肉 一斤

嫩荷葉 半斤

頂生地四兩

金櫻子半斤

以前四味熬膏。同蓮肉粉杵爲丸。秋石湯送五錢。

抑鬱頓挫。佗僚無聊。心乃偏倚。十二官皆無主。則陰氣并於陽也。投以重鎮之劑。

生鐵落

鬱金

半夏

苦參

橘紅

槐花

陽極升而不入。陰鬱沈而不附。是以有晝無夜。離明當午而睡。水漸衰矣。治以交陰陽。引衛入營。毋云血家忌半夏也。

半夏

酸棗仁

生地

生甘草

糯米

茯苓

米仁

去油乳香

暑熱時邪。病經二十日。諸法具備。何必問途於寒足。既承觸暑相招。勉爾揮汗撰方。

川連

半夏

生甘草

淡芩

茯苓

生薑

此症原屬胃乏冲和之氣而起。要之冲和之氣。即太和元氣。位天地。育萬物。無非此氣。少有不足。已非所宜。況大有所損乎。拙見宜謝絕一切。高養山齋。餌以藥石。廓然世外。庶幾霍然。若在操觚蓮幕。非所宜也。吾聞君子贈人以言。愛人以德。故瑣屑及此。

旋覆花

木瓜

生穀芽

炙草

代赭石

白芍

糯米汁

病更節後。醫歷多人。朝張言熱。暮李論寒。藏府各有受盛。運氣各有翕闢。眇爾一軀。遍嘗補瀉。不病亦病矣。宜守正持法。幸勿好大喜功。

當歸建中湯

脈弦勁如循刀刃。全無冲和之氣。木炁太過。金令不及。從後來者。謂之賊尅。苟非致太和之氣。以消乖戾。必至陰失潛藏。陽無所倚。履霜堅冰至。豈可不未雨而綢繆乎。老子云。齒剛則折。殆其是也。切囑切囑。此方存之於左券。

炙甘草

北沙參

料豆皮

冬桑葉

生白芍

麥冬肉

中土以嵩高而定八方之位。是蜀在坤矣。毓斯境者。脈宜緩而流利。今洪搏太過。面黃氣重。幸在浙已久。若處故鄉。是脈象當血溢。卽日回蜀。宜早服丸以滋之。

六味地黃丸

清貴之脈。類多六陽。次則六陰。是皆純淳之象。今體稟六陽。是一徵也。息分九候。位分三部。雖一部之中。均察藏府。而左部顯然者。心肝腎三藏。今寸來空大。是心不藏神也。關脈滑數。木無水養也。尺來浮大。水氣不衡也。火以木爲體。木以水爲

母。先天一炁。由是通明。故知離中耦畫生陰。心氣日欲下交。坎中奇畫生陽。腎氣日欲上承。是即心腎一交也。丹訣云。水火交永不老者。此也。無非尋常日用之間。心欲寧。肝欲和。腎欲實。庶無恍惚悸動。以及肢末不利。而四體泰然矣。謹疏一方。先滋營衛。頤養之法。再圖疏呈。

人參

棗仁

遠志

當歸

炙草

熟地

茯神

元參

白芍

木香

脈象較前稍和。兩手平均。俱就六陽本體。可卜無外來之氣。惟營衛少虛耳。但觀簿書旁午。是心陰不得不養。腎陽不得不藏。以供日用之精神。以副臨民之至意。先配湯藥。帶往省中。日進一劑培補。隨配膏丸相繼。憲體精神。自當日臻康泰矣。

人參

棗仁

歸身

炙草

茯神

元參

白芍

杞子

熟地

胡桃

桂圓肉

內經稱三陽結乃成膈者。單指太陽陽明少陽也。今從脈色較之。少陰與厥陰亦病。若以填補下焦爲首務。固所當然。但胃關一部。從何飛渡。且有一團鬱火。挾木邪橫亢於中州。得熱爲伍。愈肆猖狂。苦寒勢所不容。甘寒勢不容緩。倘令肺不生津。大腸不生津。津液愈虧。爲病愈繁矣。且逆上者。肝邪也。水不生之耳。不納者。胃病也。肺氣不降耳。一身之中。津液真精。皆爲切要。愚見專事於此。未識如何。先進五汁飲。次商投藥可也。

蘆根汁

甘蔗汁

茅根汁

鮮藕汁

水梨汁各一盃

生薑汁

沉香汁各一匙

診得脈象。惟有虛細無力。弦象俱退。手足顫振。此元炁虧弱之徵。前此投藥。俱無

少效者。蓋爲元炁不克載藥行令耳。今元氣一日不復。則病機一日不退。病機與元氣本不竝峙。此長彼消。理之常也。據愚見湯藥在乎其次。必以直走先天之品劑爲膏丸。朝斯夕斯。久久自足。元氣元精。一朝而復。後天飲食。不強自強矣。因此症非暴感內傷。不必數數更方。以苦陽明胃口。且經不云乎。適於胃者爲補。煎藥久服。適於胃者否耶。愚自吳中承給諫公之命。來斯一診色脈。固知不出此理。勉爲鎮臺留三日者。一則感鎮臺下士之隆。一則爲給諫公篤親之愛。而欲浙中諸醫。一批卻導窾。以報鎮臺。今參脈症。毋事更張。直補先天可也。議呈煎膏丸三方。煎則暫用。膏則時時頻服。丸則清晨爲定。俟填補二十日外。便有消息。尙當叩堦復診何如。

方未見

尊體本陰虛。陽氣并邪獨發。熱廿餘日不解。蓋陰液枯。不能作汗。邪亦不解也。連

劑養陰之後邪少鬆則大汗泄是雲行雨施品物咸亨之候何疑其脫耶但弱體久病不解元炁愈虧此邪稍出大汗作亦屬接補關頭不容少懈耳心靜則氣定而神住切不可憂擾神氣致陽上升至囑至囑。

人參四錢

熟地一兩

抱木茯神二錢

天冬三錢

製首烏五錢

左顧牡蠣六錢

脈空弦腹中急痛肝病也治肝不應治脾亦良法也。

粗桂枝一錢

沒藥五分

白芍二錢
炒黃

甘草一錢
炒黑

琥珀一錢

飴糖錢半

骨小肉脆本非松柏之質補瀉溫涼雜投豈是濟生之術幸能食便實秋令尙可扶持然破腠脫肉側眠經阻醫者猶然夢夢何也僕老不談醫聊書數語并擬一方。

熟地

炙草

當歸

生左牡蠣

十二經皆有效。胃病安得不效。況此土病於金藏。而府亦病。於此而求其痛與瀉。一在於胃之上脘。一在於肺之府。所以無從踪跡也。仰屋圖維。必須分兵合剿。乃得擬一法。請諸道長。以此而益精之。或芻蕘可采。為蝦力於行舟何如。

江西赤石脂

六兩

炒黑乾薑一兩

二味為末。黃米飯為丸。

人參一錢

炙黑甘草一錢

大棗五錢

飴糖五錢

桂木一錢

酒炒白芍二錢

煨熟生薑一錢

水煎一次。去渣。送前桃花丸三錢。

病本濕溫。元氣不能載邪外出。有直犯中焦之勢矣。擬以梔、豉上下分開之。薤、苓左右升降之。芳香之草橫解之。以冀廓清諸邪。未識得奏膚功否。

黑山梔 淡 芩 川鬱金 生香附
炒香豉 生 薑 鮮石菖蒲 生甘草
病久緒紊。終不離乎厥陰一藏。今商佐金氣以暗制之。滋營氣以撫綏之。實太陰以堵禦之。亦子貢存魯。霸越滅吳之意。

羚羊角

人 參

製首烏

清阿膠

麥 冬

雲茯神

診得真氣久不週於四肢。又暴受暑邪類中。遺溺目瞑。脈弦數而上承魚際。肝風爲足厥陰。暑風爲手厥陰。手足兩經得病。瘖而不能言者不治。且移至近地涼處爲病室。外解暑邪。內用對證之藥以救其逆。

羚羊角

竹 茹

連翹仁

鮮桑枝

半 夏

鮮石菖蒲根

人生五十一藏衰。況向六乎。所患聚訟者。皆主腎藏。蓋以所述。大旨在扼定脾藏。則樞機得。而四運成矣。

獨朮膏先用十觔可也。

真氣已漓。病何能愈。有愈之方者。其仙乎。

歸芍六君去甘草。鮮桑枝煎湯代水。

此太陰被濕氣熏蒸。無清肅之權。木無畏。右肩臂漸顯不仁之象。麴蘖傷生。而尙甘之。我不解也。

生米仁

鮮蘆根

生地

嫩桑枝

白歸身

赤芍

人身之脈。胸走手。腹走足。八十丈週於一身。未有沈寒傷筋之損而不及於下者。先後異時。爲患則一。非鮑姑之艾。文伯之鍼。不能愈。內服八味湯可也。

桂附八味丸

佞佈之人多嗜。積鬱之人多火。久而久之。佛鬱之性。颺發波掀。若狂若魅。藥石既不能與。先與丹藥焚於室中。以辟易其狂悖可也。

如意丹七丸

鬚眉自落。皮毛淖澤。脈來浮瀦。此風也。非衰白也。三十六種。同出異名。非淺可之疾。夏月宜食香風蛇。卽俗名黑風蛇也。與雞煮食之。

白歸身

白麻

赤芍

生地

旱蓮草

殭蠶

銀花

羌蔚子

夏枯花

頭痛。宵不見人爲一忌。肝風嘔吐膽汁爲一忌。相與有年。知己惟此一人。豈宜坐視。務得挽回爲妙。然固有數存焉者矣。

溫膽湯去枳實。加天麻、鈎藤、桑葉。

是證究屬肝風。則厥陰一經。未易制也。在古法。有鎮攝一法。有培土禦之一法。所以東垣有半夏天麻湯。而景岳又撰左歸以補其闕略。今二法皆不能純用之矣。擬出入一方備采。

人參

焦朮

茯苓

柏子仁

半夏

陳皮

熟地

白歸身

炙草

龍甲

久咳移邪犯胃。因咳而肺肅無權。故氣升逆。勿用瀉損肺氣之藥。

水梨去心帶皮搗爛。絲綿濾清。慢火熬成膏。收入磁餅內。蠟封口。每日開水送五錢。

陽明脈實。氣急而喘。壯火食氣。消燦真陰。夏氣開張而劇。剝棗時坦境也。此刻不

能他圖。姑與溫膽湯。少衰其熱。以保傷金。

溫膽湯

體盛之人氣必弱。寒熱乍起。卽現小便短數。頭項暈動。舌乾齒燥。氣促。脈左弦右弱。渴不欲飲。皆元不勝邪之象。恐其乘津液之衰。遽爾內陷。宜謹慎斟酌。緣此時正當燥令故耳。

天花粉

卷竹葉

厚橘紅

青蒿梗

麥冬

六一散

脈數。五六日不更衣。舌黃脣焦。胃熱熾矣。況前服之藥。皆辛溫耗陰之品。今非寒涼不可。然宜小心保護爲主。因熱邪深入陰中。而陽氣獨亢故耳。

川黃連

枳實

瓜蒌

赤芍

生甘草

陳皮

杏仁

木通

病之原。由食柿過多。得寒而起。於茲二十餘年矣。要知柿爲西方之木。其實稟秋金之氣而成。其與肺金爲同氣相求。可知其邪入肺。發爲氣哮。久則腎水無本。虛而上泛爲痰。胃爲貯痰之器。所以降氣湯六君子。由肺及胃。皆得小效。而不除要莒。與卽墨不拔。齊地終非燕有。況脈象尙悍。當深入病所爲是。擬仲景方法。

甜葶藶

苦葶藶

大棗

嗽而失血。已逾三載。纏綿不已。色黯脈弦。嗽益甚。環口色黃。由於肝脾。及於腎。上藏爲其所取。給而不能應矣。飲亦從而爲患。逐之不得。滋之無功。遷延日損。莫可彌縫。當取其中以冀流布。庶幾近之。擬宗建中法。加以滌飲之品。俟陽明升而繼以大補太陰。然後漸入純陰之法。否則非治也。

小建中湯去薑。加茯苓、薑皮。

古人造字。兩火著力爲勞。故爲君相二火而說。溫補中州。以靜痰之源。補下焦以

益水之源。但病勢已深。恐非一擊可破也。

熟地

枸杞子

元參

牛膝

茯苓

紫石英

橫則爲三坎。豎則爲川水。中間一點真陽。水虧則露。爲龍火。三爲震。震下之陽。與之同源。升爲雷火。所以雷爲木屬。皆陰中之火也。純陰之藥。愈潑愈熾。一切草木。無能制之。當用一元丹。久服愈矣。

澹秋石五六觔。紅棗漿爲丸。早服五六錢。晚服二三錢。以陽秋石少許點湯送下。

脈弦數。尺獨大。咳而喉痛失音。乃數載失紅之後。其陰虧火炎。不言可喻矣。唯有至靜之品。引陽潛入陰中。庶近內經之旨。然須作靜攝工夫。使陰秘陽密。得坎離相交之力爲妙。

熟地海石粉

金石斛

北沙參

茯苓

麥門冬

生白芍

龜腹板

山藥

形忽漸瘦。脈虛極。氣怯偶咳。目黑微眩。忽忽不樂。補氣補血。人所知也。宜將陰獸。引入陰中。藥猶得力。早晚捕獺一頭。取肝陰乾用鹿角膠。各於木器杵碎。早服鹿角膠末一錢。晚服獺肝末一錢。皆開水送下。此常用百日之法。今擬煎方先服。

人參

茯苓

兔絲餅

南棗

焦冬朮

炙草

枸杞子

左關搏指急疾。右關弦大。無胃氣不歸元。充海無根。右關如是。當劇於春。左關如是。當折於秋。恐左關為應。勉擬古人乙癸同源之治。

大生地

女貞子

枸杞子

茯神

元參

懷山藥

紫石英

此病起於費心勞碌。風寒不節。遂致咳嗽吐痰。久則內傷。內傷者。內中之藏氣傷也。卽古人所謂虛勞證。總不得愈。必須絕去費心勞碌之事。一毫凡念不起。助之以藥。或可延年。

麥冬

阿膠

桔梗

炙草

沙參

米仁

茯苓

此痧勞也。由於太陰傷損。日傳至足少陰。脾氣少。塘則入下藏也。百無一治。速宜返棹。閉關靜養。方一首奉贈。日飲可也。

熟地

阿膠

百合

枸杞子

花甲之人。兩尺獨大。二藏已衰之際。豈宜如此。急進乙癸同源之法可矣。

熟地

女貞子

兔絲餅

茯苓

元參

旱蓮草

枸杞子

蜜丸。

此真陰虧證。俗名百日勞也。稍有伏暑。所以寒熱愈甚。惜乎治之不早爾。

熟地

茜草

青蒿

元參

滑石

丹皮

坎中一畫。真陽孤飛於上。一交巳午之月。神水金丹。亦奈之何。

老生薑

天冬

懷牛膝

甘草

川石斛

元參

女貞子

稟性好食辛。醫書云。多食辛。令暴卒。今診得色脈。形骸俱備。不須暴卒。亦不長生。自宜持其病。今先服三生飲。

生地黃

赤茯苓

麥冬

粉甘草

生米仁

紅棗

此一損證也。從上損之下者。一損肺。肺再傳心。傳肝。傳脾。脾損便瀉。傳至腎。則骨痿不能於牀。斷不可再投理肺藥。以速其損。惟猪肚丸可服。

猪肚丸

未過五旬。形脈色俱衰。叩之連喪三子。得不如是耶。況復傷其孫乎。此非藥餌所能療者也。

川貝母

生地

茯苓

麥冬

脈得數而且弦。此陰虧症也。並非外感。今以虛火升而頭痛。漸有金水兩傷之勢。靜攝乃得。藥餌其次也。

熟地

女貞子

麥冬

龜板

元參

澹秋石

棗漿爲丸。開水送下。

肺爲水主。熱淫則融。融則水源竭矣。土爲金母。不承則金無生。土金水三藏日漸。苟無玉液。神精安能返。既僊之有形。雖擬禁方。亦據古人之常談耳。

葦莖湯

心陰虛則易汗。肺陰虛則多嗽。肝陰虛則火升。腎陰虛則發熱。脾陰虛則便溏。非一真陰乎。怯症之漸也。但知頭痛醫頭之爲良醫。不知履霜堅冰至。君子其爲憂危之心也。

炒白芍

小生地

麥冬

棗

桂枝木

炙甘草

青蒿梗

雲苓

診得脈細數而微。舌乾黃。下利。身焦燥而不潤。此爲下多傷陰。熱邪因之而內陷。大可慮也。治法輕以清其邪。苦以洩其熱。未識應否。

川連

小生地

人中黃

淡豆豉

木通 金銀花

飲食不和者。太陰虧也。葛稚川肘後方。有一味治虛勞之法。少陰厥陰虧者。鹿角散。太陰虧者。神麴散。今用神麴散。

真陳六神麴研細炒香四兩。每食後。用開水調服二錢。

中焦爲氣血津液朝會之所。今診得胃氣不能脈中流布。其亦元氣中餒也。酸以攝洩。辛以流動。惟甘以培養。因增腫患而卻之。擬方備閱。

橘白 灼艾 醒頭草 麥冬

木瓜 五味子

厥有十四。洩爲一法。鎮爲一法。蓋因曲直太過。不特下侮土。并其上不畏金。鎮法恐其格不相入。宜因其勢而利導之。然後潤之。滋之。尠有不濟者。

羚羊角 金鈴肉 生甘草 淡吳萸

黑穠豆

生白芍

雲茯苓

川鬱金汁

仲景書云。瘧脈自弦一句。開盡人天眼目。今三部九候之中。並無一毫弦象可見。與正氣相戰者。非比春之風夏之暑。南方之瘴也。於此推之。思過半矣。

草果仁

炒厚樸

陳皮

白茯苓

製蒼朮

炙草

脈愈按愈大。可知陰氣不足。瘧邪得以深入。漏蘆、鼈甲。補陰太過。非花甲勞心之體所宜。汗洩過多。陽氣亦虛。胃間伏邪。水飲不入。種種皆所不勝也。豈宜再從汗解耶。病者小心。醫者慎之。

人參

薏仁

淡黃芩

生牡蠣

生地

陳皮

小青皮

生首烏

新穀

薑汁

明係肝風上冒。左尺脈碎亂搏指。此乙癸同源。腎肝同病也。但少陰之脈。不至於顛。惟厥陰能至。以肝爲重。腎次之。

羚羊角

生地

半夏

白芍

當歸身

陳皮

茯苓

菊花

女貞子

此由金水不相承挹。故欬久不愈。切勿理肺。肺爲嬌藏。愈理愈虛。證不可泛然滋陰。

北沙參

整玉竹

雲茯苓

川石斛

甜杏仁

生扁豆

短氣失音。喉中時作水雞聲。右脈如革。面浮色痿。肺胃應之。心下痞鞭。補瀉紛更。動無一效。甚於水令。劇於春候。擬進葦莖越婢成湯。進飲三劑。

石膏

桂枝木

白芍

杏仁

冬瓜子

生米仁

本屬濕溫。犯在三焦。充斥腠理。誤傷手太陰足太陽之氣。必致漸入虛損一途。非病之過。治之過也。必移入高明靜虛之室。治以百日之遙。庶幾得之。擬方開太陽。益太陰。

淡乾薑同五味

茯苓

地骨皮

桑葉

生扁豆

生甘草

弦動無情之脈。即名胃少。雖非難經所謂。但弦無胃。而久病有此不宜。莫因失血而久進純陰之藥。陽氣抑而陰無所恃也。拙見且進甘溫。

建中湯加人參、炙綿耆、歸身。

病在奇經。治他經不應。要知血行清道。便知清氣不肅。所以鼻紅昏暈二者皆出。

腎脈。好異無用。以古法之法治之。自效。

生地

犀角

廣圓核

側柏葉

右蜜丸。早服五錢。晚服三錢。開水下。

暑者。熱中之陰邪也。心先受之。侵入胞絡。怠惰不語。神昏肢冷。爲不治。今脈遲軟。漸有是機。四末漸冷。竟有內閉外脫之虞。急用通陽救逆之法。倣右大順散之義。未識何如。

桂枝

半夏

焦白芍

炙甘草

右脈芤搏。耳聾。血下溢。寒熱不已。陰絡所傷。而厥陰不攝。當從至陰中宣出熱邪。是存陰第一義也。

青蒿

白知母

生白芍

炒黃柏

鼈甲

鮮荷葉

元米一合。泡湯爲水。

右脈一息七至弦。左脈一息六至緊。咳而不得息。陰氣已弱。金水同受病。且議景岳六君煎投之。

金水六君煎

素有喘症。形氣怯弱。咽痛不腫。時咳。此新感風溫在肺。氣不下肅。尙宜清降。

桑葉

白沙參

塊茯苓

杏仁

川貝母

南棗肉

稟質既薄。咳紅。極易傷陰。不可理肺。緣水出高原。肺主氣母。藉以生津補液。周環百脈故耳。

生地

清阿膠

枸杞子

料豆皮

麥冬

百合

昨所同議之方。以兩關按之。脈弦。特借仲景旋覆代赭法。同四磨飲投之。旋覆有轉旋之功。代赭爲鎮墜之品。鹹寒可降。酸可入肝。四磨則漸摩運化。使手太陰得行清肅之令。足厥陰無尅侮之暴。今診得兩關弦象已減。面浮少退。是藥已應。而暴渴欲飲。則仍然如故。是則陽明之府。中垢不去。煎熬津液。下流一日不通。上流一日上泛。雖有補虛之策。孰敢泛投。且其虛脈虛象。顯然彰著。勢不容緩。前既借仲景之法。以退兩關之弦。此獨不可借仲景急去宿垢以存津液。然未可以子和霸法投之。擬以緩法。推陳致新。仍候昨日兩道長印可何如。

旋覆花

代赭石

人參

煎送沉香化氣丸二錢五分。

滋營養液膏

女貞子

廣皮

乾桑葉

熟地

旱蓮草

白芍

黑芝蔴

枸杞子

鮮菊花

歸身

黑穠豆

玉竹

南燭葉

白茯苓

沙蒺藜

炙草

右前十四味。各四兩。後二味各二兩。天泉水。桑枝火熬成膏。收入真阿膠三兩。煉淨白蜜三兩。磁鉗貯好。每日卯時挑服五六錢。開水送下。

此方爲林下服食之大藥。肝氣不和之妙品。貞蓮二味。法二至以暗轉陰陽。佐以桑、蔴。爲調風氣應候。播植生機。助以杞、菊。爲升降之春秋。亦承流以宣化。歸、芍辛酸。一通一泄。使無壅滯之情。地黃、蒺藜。一填一養。不致肌虛之困。穠豆滋水息肝。南燭培元益氣。茯苓、玉竹。爲營衛報使。橘紅、甘草。爲喉舌真司。阿膠濟水造成。激濁揚清之凜冽。蜂蜜百花釀就。和風甘雨之仁慈。服之不特調元卻老。且以見天地之生生有如是也。

心脾雙補丸

人參

元參

五味子

遠志肉

麥冬

茯神

酸棗仁

柏子仁

於朮

川貝

生甘草

苦桔梗

丹參

生地

川黃連

金華香附

硃砂

右爲末。用桂圓肉熬膏代蜜。搗丸如彈子大。每晨嚼服一丸。開水送下。

經云。女子以心脾爲立命之根。凡心脾氣鬱。鬱則從火。久久不解。漸耗五陰。特製此方。有通有補。允與丹溪立齋諸公相頡頏者。方義蓋取人參養心氣。麥冬益心津。生地、丹參、元參益心陰。茯神、柏子、遠志安心神。五味、棗仁收心液。川連、甘草瀉心陽。桔梗利心氣。硃砂鎮心怯。白朮健脾陽。香附暢脾陰。川貝療脾鬱。特重其數。

以對待心脾二藏。龍眼代蜜。大補心血。甘草和脾。丸如彈大。細嚼吞下。不致直趨下焦。其功倍著矣。名曰心脾雙補法。

治產後少腹結瘕

人參

雲母粉

當歸

金鈴子

生地

吳茱萸

炒白芍

炒白川芎

乾漆

製香附

藕粉生用

老白韭根

右爲末。真神麴糊丸。菴豆大。每日百丸。空心開水服下。

附刊書札

其一

平湖陸 增秋山

自親雅範。若飲醇醪。別來時憶清芬。不啻東野雲龍之感。緬想足下遠溯靈蘭。近搜雜著。特開生民之壽域。實爲濟世之慈航。弟於斯道交情頗廣。未嘗有究心如足下者。欽佩之至。茲於夢琴仁弟處接奉朶雲。極承綺注。垂愛殷拳。深銘五內。並荷惠及瑤章。過獎太甚。益覺汗顏。鄙人自愧才疎。碌碌奔走。三十年來。愁長鬢絲。皮寬腰帶。身如蕉而破碎。肘生柳以支離。燕影萍蹤。依然故我。不免爲時光所笑人也。拙著瘟疫一書。成於倉猝。筆墨荒蕪。豈堪行世。因承不棄。故敢布鼓于雷門。倘足下必欲付之梓人。務求深加斧政。去其瑕疵。集中尙有紕繆及字畫未真處。另呈裁正。承錄校刻姓氏。得叨附驥。不勝欣幸。夢琴亦囑謝謝。

其二

同里陳希恕夢琴

執別逾歲。牋繪曠焉。離遯之感。驅役魂夢。朗月照膽。清風吹懷。欽嚮靡涖。伏維足下業隆伯休。幼學著書。蓄之有素。救弊補偏。一歸於正。方今耳塞豆者。何足語此。每與秋山兄言而嘆息。足下尋墜緒之茫茫。獨旁搜而遠紹。作中流之砥柱。迴旣倒之狂瀾。是以觸處生春。頌聲遍地。所謂無一夫不被其澤者也。昨承託致秋山尺素。領悉靈蘭秘冊。盡付剞劂。活人壽世。流澤何窮。恕輩指南有鍼。實堪領教。惟蒙以校刻之中。叨廁賤名。慚慙實甚。拳拳盛心。何以克當。感謝奚似。倘刷印後。乞早賜讀是幸。景星慶雲。先睹爲快。

跋

銘奉吾師命。校訂三家醫案一書。師於是書。幾經歲月。隨在搜羅。輯往哲之良方。備臨時之寶鑑。案取揣摩。方留繩墨。斟今不致泥古。酌古即可通今。於以公諸同好。不吝青囊。授之吾徒。遙傳丹竈。此濟世之盛心。指迷之寶筏也。師近日又取徐靈胎所批臨證指南。重爲刪訂。因華氏所刻。門類雖分。精粗交雜。爰復掃除繁蕪。務歸的當。庶使妙義顯呈。金針暗度。繼往開來。未始非吾師茲選啓其端也。今於醫案告成。附識數語。以續請劄云。

道光壬辰夏四月門人凌銘誌於暖翠樓

三家醫案合刻

〔清〕

張畹香

原著

張畹香醫案

中國醫學大成

張畹香醫案提要

清張畹香著。畹香先生古越名醫也。世居紹興洗馬池。嘉道咸同時人也。於醫學頗有經驗。學名卓著。據先輩云。同治庚午尙健在。年近八十。鬚髮似雪。髯長尺餘。大面紅顏。聲如洪鐘。可稱童顏鶴髮。陸地仙人。旋歸道山。其文孫樸山深得家學。雖不及迺祖之有聲。多謂其對於病後調理最爲得法。畹香先生著作散失。多未刊行流傳。炳章旅紹四十餘年。蒐集前哲遺著。偶得張書兩種。其一種溫暑醫旨。乃先生治溫暑心得實驗。已刊入第六溫暑叢刊中。其實驗醫案。乃山陰陳吉庭鈔錄珍藏。皆得設法假錄。爲之釐訂。校勘印行。藉以表揚潛德。以作後學之楷模。

張畹香醫案

清 山陰 張畹香先生原著

山陰 吉庭陳立謙手錄

鄞縣 赤電曹炳章圈校

卷上

冬溫十四日。身似涼。脈仍大有數意。而久按無力。是屬邪減退。舌亦滑潤。尙灰。兩邊黃。面紅。目白紅色。口舌自覺燥。仍屬肝肺之餘熱未淨也。查溫病。古有葳蕤湯。其意首存津液也。此症病中經。至未經通走。故致肝熱而作驚多怒。湯中有白薇。能定驚涼血。擬以治此。

生玉竹三錢

北沙參三錢

炒麥冬三錢

白薇三錢

炒丹皮三錢

象貝母三錢

陳皮一錢

焦山梔三錢

茯苓四錢

連翹三錢

冬桑葉二錢

金銀花二錢

竹肉一丸

如時昏時清。當去白薇。加砂殼一錢以運溼舒肝。以素體有溼多鬱也。大便以增液而解。可知其沸陰之熱。精液得滋潤。必不以苦寒而燥之也。診脈左手已細軟。右關已大去而尙有數象。舌苔尙黑燥。然有脫象。喉舌尙燥。再當遵條辨法。養其肺陰。用清燥湯。

北沙參八錢

麥冬五錢

根生地六錢

生白芍三錢

陳皮一錢

知母三錢

天花粉三錢

象貝母五錢

生穀芽五錢

羚羊角三錢先煎

元參三錢

冬桑葉一錢

溫邪先裏解。而後出表。故能出汗且多。瘧是夾溼之體。肌膚尙蒸蒸然。舌苔仍黑。惟較前減。再當增液托邪。加以開肺。助之出表而全解。

地骨皮四錢

茯苓皮五錢

黃芩酒炒三錢

北沙參六錢

麥冬連心三錢

元參三錢

根生地五錢

桔梗二錢

連翹四錢

羚羊角包二錢另先煎

象貝母五錢

金銀花三錢

蟬退半一錢

兩太陽與腰痛。稍有咳嗽喉啞痛。脈左關反大。而舌苔燥。當用從症不從脈法。

杏仁三錢

蘇薄荷淨葉二錢半

冬桑葉半二錢

象貝母三錢

桔梗二錢

生甘草半一錢

射干半一錢

麥冬三錢

連翹三錢

酒黃芩半一錢

枳殼半一錢

竹葉廿四

厥陰瘧已止。停藥又起。左手虛。再以何人法。

製首烏六錢

文黨參三錢

炙鼈甲五錢

青蒿梗三錢

炮薑炭一錢

冬桑葉半一錢

煨牡蠣五錢

當歸三錢

桂枝一錢

炙甘草半一錢

炒白芍三錢

諸筋骨痛。欬嗽。無味。脈瀋。當滋血息風。

大生地六錢

當歸三錢

丹參四錢

川續斷三錢

甘杞子三錢

冬桑葉半一錢

炒白芍二錢

生牡蠣五錢

陽春砂八分同煎

陳皮八分

痛瘥而作瀉。胃不開。舌尚黃。脈左手關尚弦。再以肝法建中湯法。

當歸三錢

川棟子三錢

桂枝半一錢

酒元胡半一錢

炒白芍四錢

清炙甘草半一錢

川續斷三錢

製香附三錢

川石斛三錢

陳皮八分

礬半夏三錢

荷葉一角

寒熱往來。出汗已有四個月。脈弦細。此屬肝虛。當用清骨散。

青蒿梗三錢

炙鼈甲五錢

生地六錢

當歸三錢

地骨皮四錢

銀胡半錢

秦艽半錢

生牡蠣五錢

川石斛三錢

新會皮八分

氣急是老病。今傷風半箇月。自然氣愈急。欬嗽無痰。脈左手大。右手弱。尙身熱頭

痛。擬清金平木法。

蘇薄荷半錢

杏仁三錢

連翹三錢

生甘草半錢

桔梗三錢

象貝三錢

冬桑葉半錢

生牡蠣五錢

陽春砂八分

麥冬三錢

陳皮八分

竹葉卅片

外感後。諸恙皆去。胃亦開。再益其陰。

大生地六錢

歸身三錢

續斷三錢

川石斛三錢

甘杞子三錢

新會皮八分

炒白芍三錢

丹參三錢

茯苓三錢

製狗脊三錢

風木乘脾。口燥背冷腹痛。氣急欬嗽。總屬肝風。

當歸三錢

生白芍五錢

桂枝半錢

清炙甘草半錢

冬桑葉半錢

生牡蠣五錢

澤瀉三錢

陽春砂同煎

生茅朮半錢

製香附三錢

陳皮八分

乾荷葉一角

書以傷風。不忌油膩。每致耳聾。又年未四旬。從無虛致耳聾之事。耳病有四條。彼動云虛者。不知醫也。

滾痰丸同煎

滑石三錢

冬桑葉半錢

杏仁三錢

象貝三錢

橘紅八分

桔梗二錢

刺蒺藜炒三錢

薄荷梗三錢

川石菖蒲八分

竹葉卅片

外感夾肝身已涼胃不開甘寒法。

杏 仁三錢

麥 冬三錢

生甘草半錢

桔 梗二錢

生穀芽四錢

陽春砂同煎

生牡蠣五錢

象 貝三錢

陳 皮八分

冬桑葉半錢

乾荷葉一角

痛瘥。大便已解。診右寸起徐弱。再以前法。

熟 地

當 歸三錢

甘杞子三錢

淡附子半錢

桂 枝半錢

生白芍三錢

續 斷三錢

製香附三錢

陽春砂沖分

懷牛膝三錢

桂圓肉十四枚

身涼後。尚舌黃。口渴。小溲短。氣急。是餘邪化火。惟諸筋作痛。是屬辛勞之業。病後血虛。故而致作痛。

羚羊角二錢
先煎

杏 仁三錢

象 貝三錢

桔 梗三錢

續斷三錢

根生地五錢

陳皮八分

冬桑葉半錢

生甘草半錢

瓜蒌皮三錢

生穀芽四錢

竹肉一九

身涼後。尚舌黃厚。大便不解。口渴欬痰。再當洩其風熱。

羚羊角二錢
先煎

杏仁三錢

枳殼半錢

瓜蒌仁八錢

象貝三錢

陳皮八分

桔梗二錢

川鬱金半錢

冬桑葉半錢

焦山梔三錢

竹肉一九

背冷氣急。腰痛舌黃。口燥。有汗。脈浮弦大。當屬少陽經感風。

蘇薄荷一錢半
淨葉

羌活半錢

黃酒芩二錢

杏仁三錢

桂枝一錢

清炙甘一錢

薑半夏二錢

陳皮八分

連翹三錢

焦山梔三錢

荷葉一角

少陽症。身已涼。舌黃。口渴。欬嗽。痰厚。諸筋尚痛。脈平。當祛餘風熱。

羚羊角一錢半
先煎

天花粉三錢

生白芍三錢

生穀芽四錢

陳皮八分

象貝三錢

冬桑葉一錢

續斷三錢

杏仁三錢

陽春砂八分
同煎

荷葉一角

胸中痛兼及腰間。作嘔黃水作苦。已有一月。診脈弦細。欬嗽寒熱。此屬少陽厥陰之合病。

當歸三錢

川棟子三錢

酒元胡一錢

桂枝一錢

炒川連八分

半夏三錢

陳皮八分

真降香一錢

生香附一錢

杏仁三錢

冬桑葉一錢

生薑二片

丁家沿之病。業將就痊。是知其病中走經。故用逍遙散法。而發疹出汗而解矣。若不從此着眼。勢必發狂。否則身熱至百餘日。而變幻叢生。為不治矣。所以學醫。總須多讀書。多看各家書籍。自然腹中淵博。胸有準繩。今將現在滋肺托邪。為前後

調治之的方。特從尊處一轉。祈閱後仍付原人寄去爲望。專此字達。並候在茲賢弟日安不一。

兄畹香頓首

暑溼入肝。用藥胸痛作嘔皆去。而今日上午作冷作熱。出汗口渴。氣急舌黃。左手弦細。右手弦數。又以兩尺空大。因詢經事。再三詢問。始知已至五日。今日已止。則似瘧非瘧。夢多昏話。口苦。皆熱入血室之症矣。是怕爲纏綿之兆。爲多變幻之症矣。茲姑用逍遙散。複以暑法。爲內外雙解之法程。

柴胡半錢

薄荷半錢

當歸三錢

炒白芍三錢

川棟子三錢

酒元胡半錢

益元散三錢

杏仁三錢

麥冬三錢

連翹三錢

金銀花三錢

竹肉一丸

診脈已大起。惟全瀉。瀉屬血虛。惟舌稍黃。且有肝氣。擬滋補肝陰。氣分複入舒肝。

大生地一兩

當歸三錢

續斷三錢

製狗脊三錢

真龜膠三錢 烱沖

甘杞子三錢

炒杜仲三錢

建石斛三錢

陽春砂八分 研煎

懷山藥四錢

新會皮八分

桂圓肉十枚

產後又溫邪後。脈左手小且調。是屬吉象。惟有數意。寐回冷汗。耳響。皆虛也。

生地八錢

地骨皮四錢

當歸三錢

炒白芍三錢

川石斛三錢

新會皮八分

黑穠豆皮四錢

生牡蠣四錢

炙龜板三錢

生穀芽四錢

荷葉一角

產後病外感。愈後迄今。五個月期未至。述飲食起居均好。脈亦右手好。左手沉小。

虛是屬肝血之虛。當調其肝。

熟地八錢

當歸三錢

烏鰂骨三錢

酒炒白薇三錢

茜草半錢

續斷三錢

甘杞子三錢 炒

煨牡蠣五錢

炮薑炭五分

炒杜仲三錢

外感後。左手已靜。右手尚大。舌黃未去。面頭上有熱細瘰。肺主皮毛。頭爲諸陽之首。當資肺分之溼熱。再擬清養肺陰法。

北沙參六錢

麥冬三錢

生地五錢

生苡仁六錢

象貝三錢

炒丹皮三錢

茯苓三錢

百合三錢

陳皮八分

地骨皮三錢

連翹三錢

竹葉廿片

日發熱出汗。稍覺有冷。而病者不覺。總當以肺熱論。至發作有時。熱後出汗身涼。是寒熱分明。當從瘧治。第日發舌薄。卽瘧亦在肺分。不必用柴胡少陽法也。惟純熱無寒。謂之瘧瘧。當用白虎湯。若稍有寒。則桂枝白虎。茲姑減一等法。仍擬肺法。以蔻殼白芥子易桂枝可耳。

杏仁三錢

連翹三錢

生薏仁五錢

知母三錢

六一散三錢

白芥子半錢

白蔻殼一錢

象貝三錢

通草半錢

焦山梔三錢

竹葉卅片

初起身熱。至今八日。面紅頭痛。口渴。舌黃滑。小便赤短。解時大便如水隨出。診脈左手數大。右亦然。而脾尤覺大。當屬冬溫。冬溫用三焦法。至左脅與背筋掣。與左邊頭尤痛。是素有肝氣。此時由外感帶起。又溫病往往有大便作瀉。乃肺移熱於大腸。由溼體之故。並非挾熱下利。

薄荷半錢

杏仁三錢

白蔻仁八分

象貝五錢

瓜蘞皮三錢

桔梗半錢

酒黃芩三錢

厚朴一錢

連翹三錢

茯苓四錢

陳皮八分

桑葉半錢

暑溼從無大便攻瀉之理。此症患經二十餘日。歷服枳殼蘞仁多劑。昨日又以製軍。致舌苔雪花呃逆。昨用益陰固脾。瀉瘥呃減。惟舌尚雪花。若胃口日開無礙。脈仍弦。再擬復脈加減。

生地炭六錢

炒白芍三錢

炒麥冬三錢

清炙甘勿三錢

懷山藥五錢

陽春砂八分同煎

旋覆花三錢包煎

陳皮一錢

炙龜版四錢

廣木香一錢

生苡仁六錢

紅棗七枚

暑溼誤下。致舌雪花。口燥甚。大便已止。呃已去。出冷汗。脈左手已小。右手尙大。再以前法。

真大生地六錢

生白芍五錢

麥冬五錢

清炙甘勿三錢

地骨皮四錢

陳皮半錢

陽春砂八分同煎

炙龜版四錢

黑穠豆皮五錢

生牡蠣五錢

澤瀉三錢

瘧後或間日。或日日。已兩個月。熱轉輕有汗。汗後又冷。汗後嗜臥。轉側身重。舌白苔滑。或有時黃滑。口燥不能飲。飲後嘔黃水。噯風。腹痛。口味淡且滯。胃久不開。診脈皆滯緩。熱時之數不作憑。此屬太陰經瘧。爲日已久。且在秋中。擬溫劫溼邪。

葉氏方。

焦茅朮三錢 草果仁六分 檳榔一錢 製半夏五錢
藿香二錢 炒乾薑八分 白芥子半錢 厚樸半錢
陳皮八分 桂枝八分 鮮老薑二片
患肚癰後致弱。所以脈虛小之至。嗣後逢喫力。必欬嗽失血。又腰足骨痠。是可知
肝腎陰分至虛。

熟地六錢 炙龜版四錢 當歸三錢 續斷三錢
北五味一錢 炒杜仲三錢 炮薑炭一錢 建石斛三錢
新會皮八分 製狗脊三錢

肝病脹均差。而如崩亦減而帶甚。脈仍弦數。再以調肝。

大生地六錢 當歸三錢 生白芍三錢 川棟子三錢

酒元胡半一錢

生牡蠣六錢

炒丹皮三錢

澤瀉三錢

陽春砂同煎

石葦五錢

久咳痰臭氣急。口味甜。小溲紅。診脈弦大。當屬肺分風熱。

羚羊角先煎二錢

苦杏仁三錢

象貝三錢

桔梗半一錢

橘紅八分

冬桑葉半一錢

連翹三錢

焦山梔三錢

瓜蒌皮三錢

蘇薄荷葉半一錢

竹葉卅片

久嗽。用藥臭痰已瘥。口味尚甜。脈尚弦而已小。再以甘寒。

羚羊角先煎二錢

元參五錢

根生地六錢

桔梗三錢

麥冬三錢

生甘草半一錢

冬桑葉半一錢

象貝三錢

枳殼一錢半

焦山梔三錢

竹肉一丸

久嗽夾有肝氣。今又外感。舌黃胃不開。怕冷。氣塞。再以金木法。

杏仁三錢

麥冬三錢

生甘草半錢

桔梗二錢

白蔻殼一錢

冬桑葉一錢

生牡蠣五錢

羚羊角一錢半
先煎

陽春砂同煎

生穀芽四錢

半夏麴二錢

陳皮八分

上焦肺脹。已有一年。欬嗽痰少。口渴。舌黃。大便痛瀉。小溲少。脈弦細。當治上焦。

瓜蒌皮八錢

枳殼半錢

桔梗三錢

象貝三錢

陳皮八分

冬桑葉半錢

生苡仁六錢

茯苓皮六錢

連翹三錢

淡黃芩三錢

薄荷葉半錢

竹葉卅片

去年三月間。忽然失紅。至今則有欬嗽。昨日寒熱。欬嗽而不失血。右脅痛。當用清

金平木法。

杏仁三錢

象貝三錢

白蔻殼一錢

桔梗二錢

冬桑葉半錢

生牡蠣五錢

陽春砂同煎

麥冬三錢

生玉竹三錢

陳皮八分

竹葉廿四

產甫滿月。即發乾欬。至今半載。欬嗽未去。喉啞盜汗。氣急。小溲熱。少寐。胃不開。舌黃。診右手甚虛。左手弦數。當屬肝風之妨肺。

大生地六錢

生白芍三錢

歸身三錢

生牡蠣五錢

陽春砂冲八分

半夏麴二錢

陳皮八分

澤瀉二錢

甘杞子三錢

冬桑葉一錢半

動則氣喘。屬腎虛。烟氣亦欬喘。屬肺分氣冲。脈弦細是肝冲。大抵肝腎之氣冲肺。而肺氣亦虛。

文元黨四錢

焦冬朮三錢

礬半夏三錢

陳皮八分

酒炒熟地六錢

紫石英三錢

當歸三錢

煅牡蠣四錢

炮薑八分

五北味搗碎一錢

所云刀譜中一方。其用玉竹黃耆龍眼肉熬膏。代蜜爲丸。爲壯筋骨補氣血之用。觀藥品和平。大抵黃耆補表氣。龍眼肉補肝血。以玉竹爲君者。玉竹有黃老之名。久服可仙。本草稱其益氣生津。功能不減人參。惟須多多益善耳。於足下體質。洵屬有益之至。惟鄙見欲其速效。若再加入熟地一觔。當歸一觔。川續斷一觔。於筋骨更有裨益。合否乞酌之。

肝痛已瘥。左脈尙弦數。述患經一年。曾經期至如崩。現尙早而如崩。腹中痛而脹。口渴。是可知其血之熱而不攝。

當歸三錢

川棟子三錢

酒元胡半錢

生牡蠣六錢

炒丹皮三錢

生白芍三錢

陽春砂八分同煎

澤瀉三錢

羌蔚子五錢

焦梔子三錢

烏鰂骨三錢

欬嗽背冷。身上覺脹。脈弦浮。舌淨。當屬肺脹。用上焦法。

薄荷葉半一錢

杏仁三錢

瓜蒌皮五錢

白蔻殼一錢

枳殼二錢

桔梗三錢

象貝三錢

冬桑葉一錢半

連翹三錢

陳皮一錢

竹葉卅片

久嗽舌黃。脈弦數。氣急發熱。當屬傷風帶起肝氣。又有重感。

薄荷葉半一錢

白蔻殼一錢

杏仁三錢

瓜皮三錢

連翹三錢

象貝三錢

生甘草一錢

桔梗三錢

冬桑葉半一錢

刺蒺藜炒三錢

陳皮八分

竹肉一九

肝鬱氣急。曾經音啞。吐紫血而愈。茲又氣急。先天癸至。周身又有風餅。是病屬肝氣風之升。據書當先通經水。

丹參五錢

當歸三錢

羌蔚子五錢

赤芍二錢

川棟子三錢

酒元胡半一錢

降真香半一錢

冬桑葉半一錢

刺蒺藜三錢

炒丹皮三錢

外感後用下法。大便已解。雖舌黃未去。而知味不渴。是內邪亦去其大半。乃耳脹。脚手不能動。動則痛不可忍。是固產後血分之虛。帶起肝風。

根生地六錢

當歸三錢

續斷三錢

丹參四錢

羚羊角二錢
先煎

桂枝一錢
半

刺蒺藜三錢
炒

片薑黃三錢

生白芍三錢

宣木瓜三錢

嫩桑枝一尺

大流鼻衄。甚至成桶。今已止而面色痿白。耳響。兩太陽痛。腰痠。舌黃。脈弦細。當用甘寒肺金。

根生地八錢

元參五錢

麥冬三錢

象貝三錢

炒丹皮三錢

山茶花三錢

生甘草一錢
半

桔梗二錢

北沙參五錢

生穀芽四錢

竹葉廿片

又外感。脈弦細。仍屬少陽症。已有三日。

柴胡半錢

酒黃芩三錢

杏仁三錢

半夏麴二錢

陳皮八分

冬桑葉半錢

炒川連八分

川鬱金半錢

生香附半錢

枳殼半錢

連翹三錢

荷葉一角

兩耳停痛且聾。而又痛響作瀉。以肝膽法。耳痛已去。惟尚流膿。即腹痛亦去。而口渴作響。改為水瀉。脈尚弦。再以風木法。

當歸三錢

生白芍三錢

桂枝一錢

清炙甘草二錢

廣木香一錢

焦茅朮半錢

冬桑葉半錢

宣木瓜三錢

澤瀉三錢

生牡蠣五錢

生苡仁五錢

十八齡。欬嗽失紅。已有兩年。寒熱已有十月。舌黃。咽中曾經艾灸。脅痛。腹中痛瀉。診脈浮弦小數。大抵五月間起病。初時由於暑風溼熱。久則傳入厥陰。清金平木。

法。

杏仁三錢

桔梗三錢

象貝三錢

生牡蠣五錢

陽春砂冲八分

青蒿梗三錢

炙鱉甲五錢

六一散四錢

冬桑葉半一錢

生苡仁五錢

通草半一錢

竹葉卅片

氣衝欬嗽吐痰。逢酒烟則甚。總屬肝腎之虛氣上衝也。

熟地炭八錢

當歸三錢

淡附片半一錢

炮薑炭一錢

紫石英三錢

五味子搗碎二錢

清炙草半一錢

煅磁石三錢

甘杞子三錢

炒補骨脂三錢

核桃肉二枚

胃中痛先流涎。嘔清水味酸。每發如此。現尙不發。惟噯氣。舌白燥。胃不開。診脈沉

瀼。法當滋肝舒氣。

生地炭六錢

當歸三錢

製香附三錢

廣木香一錢

炮薑炭一錢 清炙甘草半錢 懷牛膝三錢 炒半夏麴三錢

陳皮八分 甘杞子炭三錢 生薑二片 紅棗七枚

作瀉已有四箇月。舌黃。口微渴。腹響。診脈平。小溲如常。是當調其脾胃。

生冬朮三錢 茯苓三錢 廣木香一錢 半夏麴三錢

陳皮八分 清炙甘草半錢 澤瀉三錢 陽春砂沖八分

焦梔子三錢 生苡仁五錢 荷葉一角

傷風後帶起陰虛。當用甘寒。兼息肝風。

杏仁三錢 根生地六錢 麥冬三錢 生牡蠣五錢

陽春砂同煎 續斷三錢 象貝三錢 桔梗二錢

冬桑葉半錢 生甘草半錢 羚羊角先煎一錢半 竹肉一丸

冬溫十二日。舌中間灰色。兩邊白滑。是歷體。大便作瀉。喉痛。述口舌燥。是仍在肺。

陰。怕熱而不寒。可用甘寒法。手牽動。足筋痛。易於發怒。是仍屬肝風之動。舌尖紅。是心經之虛熱。最怕作蒙。查清金可以制木。而肺與心同爲上焦。再擬生津去熱。複入利水之藥。小溲清長。其病自愈矣。又脈沉大而滯。是涇體之象。數屬化熱。而大屬陽脈。於病不悖。若小溲一長。其從無汗洩者。即可得汗而解。

北沙參六錢

麥冬三錢

羚羊角二錢
先煎

連翹三錢

炒丹皮三錢

焦梔子三錢

茯苓四錢

生苡仁四錢

象貝五錢

陳皮八分

冬桑葉一錢

燈心一丸

寒熱出冷汗。欬嗽痰紅。腹痛響瀉。兩腕腰痛。自正月至今。當屬肝風之射肺失紅。

青蒿梗三錢

炙鱉甲五錢

當歸三錢

炒白芍三錢

地骨皮四錢

炙甘草一錢

桂枝八分

生牡蠣六錢

冬桑葉一錢

生地五錢

續斷三錢

正月廿六日起。寒熱欬嗽痰紅。脈弦細。舌白。口渴。氣急。此屬風溫失紅。三月初

元 參五錢

根生地六錢

麥冬三錢

羚羊角先煎一錢半

山茶花三錢

象貝三錢

桔梗三錢

冬桑葉半一錢

橘紅八分

連翹三錢

薄荷半一錢

竹葉卅片

風溫十天。欬嗽作瀉。腹痛。舌黃口渴。脈弦數。是已化火。尚冷作熱。當表裏均解。

薄荷葉半一錢

杏仁三錢

淡黃芩三錢

生白芍三錢

生甘草半一錢

生苡仁六錢

象貝三錢

桔梗二錢

連翹三錢

枳殼半一錢

羚羊角先煎一錢半

竹肉一九

初時喉痛。作冷作熱。已有十日。欲嘔胸脅痛。欬嗽。尚無汗出。脈弦細。舌黃。是少陽經感風熱。當用逍遙散。

薄荷葉半一錢

柴胡半一錢

歸類三錢

赤芍二錢

桂枝八分 冬桑葉半一錢 杏仁三錢 川鬱金半一錢

生香附半一錢 降香一錢 荷葉一角

風溫後又感風邪。致作冷出汗。舌白。脈弦。再當甘寒。

杏仁三錢 象貝三錢 冬桑葉半一錢 麥冬三錢

桔梗二錢 生甘一錢 陽春砂同煎分 白蔻殼一錢

根生地五錢 陳皮八分 竹葉廿四

外感後帶起肝風。虛頭暈。

生地六錢 當歸三錢 炒白芍三錢 懷山藥三錢

生石決明五錢 煨麻天半一錢 冬桑葉半一錢 半夏麴半一錢

陳皮八分 續斷三錢 荷葉一角

風溫後邪已淨。惟胃不開。稍有欬痰。兩脈甚虛。

北沙參五錢

麥冬三錢

生地五錢

生白芍三錢

象貝三錢

新會皮八分

生穀芽四錢

茯神三錢

冬桑葉半錢

清炙甘草一錢

乾荷葉一角

巔腰作痛。期早而多如崩狀。脈弦大。當調其肝。

大生地六錢

當歸三錢

川棟子三錢

炒小茴香半錢

酒元胡半錢

烏鰂骨三錢

白薇三錢

羌蔚子五錢

續斷三錢

製香附三錢

身已涼。大便已解而不暢。惟欬嗽與痰氣急。欬時脅尙痛。舌苔尙黃厚。口燥而不渴。六脈弦小數。多夢話。再當涼肝息風。

根生地五錢

生白芍三錢

羚羊角二錢
先煎

冬桑葉半錢

生牡蠣五錢

炙鼈甲五錢

當歸三錢

象貝三錢

陳皮八分

陽春砂八分

柏子仁四錢

竹肉一九

身熱三日。出冷汗。欬嗽有痰。胃不開。口燥頭眩。診脈弦。當用甘寒。

根生地六錢

麥冬三錢

地骨皮四錢

生穀芽四錢

象貝三錢

桔梗二錢

生甘草一錢

生石決明五錢

冬桑葉半一錢

新會皮八分

續斷三錢

竹葉廿四

胃痛大差且能食。而痛在右脅。診左手尙弦。右手已虛。厥陰大瘰後致此。是當再以清肝法。

當歸三錢

川棟子三錢

酒元胡半一錢

炙鼈甲五錢

青蒿梗三錢

軟柴胡半一錢

炒白芍三錢

茯神三錢

礬半夏三錢

陳皮八分

製香附三錢

荷葉一角

久經失紅。欬嗽右脅痛。總怕失紅復起。少寐卽血分之虛。脈弦細。再當清金潤肺。

大抵勞力持重之體。未有不虛者。

生玉竹五錢

大生地八錢

生白芍三錢

冬桑葉半一錢

象貝三錢

陳皮八分

炒丹皮三錢

麥冬三錢

生牡蠣五錢

軟柴胡梢半一錢

欬嗽失紅。雖從去年發作。然昨診六脈弦數。決其出於肺藏。今日述胃不開。逢食即吐。不能起床。勢必夾有風溫。擬再用風溫失紅例治。

元參五錢

根生地六錢

麥冬三錢

山茶花三錢

冬桑葉三錢

炙甘草半一錢

絲瓜絡三錢

自七月間起病。初時間日。今成兩發。小溲赤。足痠。腹中痛。脅痛。診脈弦細。當屬厥陰大瘧。

青蒿根三錢

炙鼈甲五錢

當歸三錢

製首烏六錢

煅牡蠣五錢
 青皮一錢半
 半夏麴三錢
 陳皮八分
 桂枝一錢
 炒白芍三錢
 清炙甘草半錢
 夜多盜汗。舌黃滑。大便溏。胃亦不開。診脈弦小數。當益陰調土。

地骨皮三錢
 炙鼈甲四錢
 當歸三錢
 炒白芍二錢
 礬半夏三錢
 陳皮八分
 廣木香錢
 黑穠豆衣四錢

生牡蠣五錢
 清炙甘草八分
 荷葉一角

兩脅與肋及腰背。皆脹滿塞悶。胃亦不開。每至午則痛。診右手弱。是素屬六陰。而左關獨起。是必屬肝氣之走絡。擬通其絡。

當歸四錢
 炒白芍三錢
 生牡蠣五錢
 澤瀉三錢
 陽春砂同煎
 炙鼈甲五錢
 旋覆花包煎
 片子薑黃三錢
 半夏麴三錢
 陳皮八分
 青葱管兩支

寒熱十三日。胸胃塞痛。脈弦細。當用逍遙散。

軟柴胡半錢

薄荷半錢

當歸三錢

川棟子三錢

酒元胡半錢

炒白芍二錢

川鬱金半錢

半夏麴二錢

陳皮八分

生香附半錢

荷葉一角

二月上旬身熱。今已涼。欬嗽多痰。冷汗。舌黃口燥。大便溏。氣急。診脈弦數。當屬風溫。久則化火之候。

根生地六錢

麥冬三錢

瓜蒌皮三錢

生苡仁五錢

枳殼半錢

冬桑葉半錢

象貝三錢

生甘草半錢

橘紅八分

桔梗三錢

焦山梔三錢

竹肉一九

鼻紅止。尚耳響。稍有欬嗽頭痛。當再治肺陰。

蘇薄荷葉半錢

冬桑葉半錢

麥冬三錢

生甘草半錢

象貝母三錢 根生地六錢 桔梗二錢 陳皮八分
焦梔子三錢 炒刺蒺藜三錢 荷葉一角
喉癢燥則嘔。間有稀水。味不酸。頭筋脹痛。腹脹。脈右手調。左手有數意。舌黃。大抵
溼熱爲病。

滑石三錢

半夏麴三錢

陳皮八分

茯苓四錢

生苡仁五錢

連翹三錢

焦山梔三錢

通草一錢

陽春砂沖入分

淡豆豉三錢

絲瓜葉二片

竹葉廿片

風邪解後。尙有餘熱。診脈稍弦滯。舌黃。乾欬作空嘔。出汗。擬用甘寒以解餘邪。

北沙參六錢

麥冬三錢

根生地六錢

生甘草半錢

桔梗一錢半

象貝三錢

地骨皮三錢

橘紅八分

生穀芽四錢

元參三錢

竹肉一丸

溼瘧用溫燥脾經已效。第瘧症雖口渴。亦當用溫。况舌黃而滑。脈未滑利。據理仍當溫燥中焦。兼以通陽。

東洋參半錢

焦冬朮三錢

當歸三錢

陳皮八分

厚樸一錢

礬半夏三錢

桂枝一錢

炮薑炭一錢

炒穀芽五錢

陽春砂同煎八分

廣木香八分

生薑二片

紅棗五枚

脾。舌白體肥。胃不甚開。大便易溏。或時作嘔。診脈短澹。大抵脾胃多溼痰。擬祛痰益

焦冬朮三錢

茯苓三錢

製半夏三錢

陳皮八分

生益智仁半錢

炒穀芽五錢

炒苡仁六錢

廣木香一錢

焦梔子三錢

連翹三錢

乾荷葉一角

今日診兩手。皆較前大而有力。右滑利。惟左手尙濇。左手屬血。濇屬血虛。再擬肝腎血分藥。

大生地八錢

當歸三錢

甘杞子三錢

炒棗仁三錢

茯神三錢

炒杜仲三錢

川續斷三錢

製狗脊三錢

懷山藥五錢

茯苓三錢

陳皮半錢

傷風日久。痰粘喉中有聲。脈弦。當用甘寒法。

杏仁三錢

馬兜鈴三錢

象貝三錢

桔梗二錢

生甘草半錢

麥冬三錢

陳皮八分

冬桑葉半錢

連翹三錢

根生地六錢

竹葉丹片

婦女以肝藏爲先天。肝血若足。自無胎產之病。或易於小產者。非氣不能包。卽屬肝虛生熱。致胎元不穩。此症小產後。右手已起。左手稍小。惟似有微數意。可知是

肝虛生熱之體。再擬柔益肝藏。

炒白芍三錢

大生地六錢

歸身三錢

甘杞子炭三錢

真驢膠三錢
烊沖

川續斷三錢

懷山藥四錢

新會皮八分

建石斛三錢

荷葉一角

暑邪二十二日。舌上已有雪花。六脈弦大。是屬病久陰虧。斷無下攻之理。乃以製軍傷其脾分。據書速須救陰。今且呃逆。是肝氣亦起。病屬棘手之至。姑擬救法。合否乞高明裁之。

生地炭六錢

炒白芍三錢

生苡仁五錢

清炙甘草三錢

炒麥冬一錢
半

炒懷藥五錢

陽春砂八分
同煎

陳皮八分

地骨皮四錢

旋覆花三錢
包煎

此復脈加減是救法。

診脈惟右關已起。各脈欠有精長之象。大抵病後不復元。雖冬令脈宜靜小。第總

由血不應脈。再擬兩益肝脾。

人參八分

茯苓三錢

炒棗仁三錢

生地炭六錢

當歸三錢

陳皮八分

廣木香一錢

清炙甘草半錢

遠志炭八分

焦冬朮三錢

桂圓肉十四

生薑二片

紅棗七枚

表寒已解。欬嗽愈多。痰不易出。當用甘寒。

杏仁三錢

麥冬三錢

生甘草半錢

象貝三錢

桔梗二錢

羚羊角一錢半
先煎

陳皮八分

冬桑葉半錢

枳殼半錢

梔子三錢

竹葉卅片

瘧愈後仍自間日之寒熱分明。而自汗甚輕。胃開不甚旺。舌淨稍黃。口微渴。腹中知嘈。是元虛邪輕之候。想體肥固多溼痰。而久瘧陰虛。擬溫經法以截。

製首烏六錢

炙鼈甲四錢

炮薑炭八分

製半夏麴三錢

當歸三錢

炒穀芽四錢

新會皮八分

青蒿梗半錢

茯神三錢

焦丹參三錢

生薑二片

紅棗七枚

怕冷去。欬嗽亦差。痰有。舌淨。惟胃不開。診脈弦小。當用甘寒法。

苦杏仁三錢

麥冬三錢

根生地五錢

炒白芍二錢

冬桑葉半錢

象貝三錢

桔梗二錢

生穀芽四錢

新會皮八分

川石斛三錢

乾荷葉一角

身已涼。而右脅尙痛。欬嗽痰紅。今日當治肺陰。

根生地六錢

元參五錢

麥冬三錢

山茶花三錢

象貝三錢

炒丹皮三錢

冬桑葉半錢

羚羊角二錢
先煎

桔梗二錢

側柏葉三錢

陳皮八分

竹葉四十

診右手調。左手浮大。關尺虛。解大便時心腹痛。大便難。少寐。氣急。是屬肝熱。當用更衣丸法。

丹 參 四錢

當 歸 三錢

柏子仁 四錢

蘆 薈 三錢

漂辰砂 八分

生 地 五錢

丹 皮 三錢

梔 子 三錢

生白芍 三錢

燈 心 卅寸

上焦肺脹。用藥已效。再以上焦法。第患經一年。爲最難愈之事。必忌口爲要。

瓜蒌皮 八錢

枳 殼 三錢

桔 梗 三錢

象 貝 三錢

冬桑葉 半一錢

生苡仁 六錢

茯苓皮 五錢

羚羊角 三錢
先煎

淡黃芩 三錢

焦梔子 三錢

陳 皮 半一錢

竹 葉 四十

頭脹。背間怕冷。腰脅欬時作痛。胸膈塞悶作嘔。診脈浮微。右手中部稍數而滑。舌淨。當屬肺邪。

蘇薄荷葉半錢

白蔻仁五分

冬桑葉半錢

象貝三錢

杏仁三錢

桔梗二錢

枳殼半錢

瓜蒌皮三錢

連翹三錢

陳皮八分

竹葉廿四

純熱出汗口渴舌黃燥腰痛足重頭眩診左手浮虛小數右手浮部亦然中沉兩
候滯大當屬痺瘧是暑溼熱痰之在肺者白虎湯

生石膏八錢

知母三錢

生甘草八分

生苡仁八錢

礬半夏三錢

陳皮八分

茯苓三錢

六一散三錢

連翹三錢

苦杏仁三錢

桂枝八分

白粳米三錢

用白虎湯痺瘧已減舌黃退而未淨頭眩腰足重滯皆去脈浮虛小皆去而尙數
中沉之滯大已除大便溏小溲長口渴去而燥再擬涼肺通溲法

根生地五錢

連翹三錢

生苡仁八錢

茯苓三錢

六一散三錢
 焦梔子三錢
 通草一錢
 陳皮八分
 象貝三錢
 羚羊角先煎一錢半
 竹葉卅片
 中年每患齒痛。是欲脫之象。總由肝血之虛。虛則生風。耳下筋痛。是肝風也。茲瘥止已久。胃口亦好。味苦舌黃。且素屬多溼多痰之體。擬涼血息風。兼以消痰。

生地六錢	當歸三錢	炒刺蒺藜三錢	冬桑葉一錢
生牡蠣六錢	炒丹皮三錢	礬半夏二錢	陳皮八分
炒白芍三錢	川石斛三錢	荷葉一角	

張曉香醫案 卷上

張畹香醫案

清 山陰 張畹香先生原著

山陰 陳吉庭立謙手錄

鄞縣 曹赤電炳章圈點

卷下

風溫身熱退。昏語去。瀉止。惟尙欬嗽有痰。脈尙弦。胃口不開。當用甘寒。

根生地六錢

麥冬三錢

生甘草半錢

桔梗二錢

象貝三錢

橘紅八分

生穀芽四錢

冬桑葉半錢

地骨皮三錢

川石斛三錢

竹葉卅片

身熱七八日。欬嗽有痰。水瀉腹痛。有昏語。口大渴。舌鮮紅。診脈弦小數。是邪在心肺之間。當用上焦法。其瀉在肺。與大腸相表裏也。上焦以邪入心包為重症

羚羊角二錢 先煎

根生地六錢

麥冬三錢 不去心

連翹三錢 不去心

生苡仁六錢

茯苓三錢

象貝三錢

橘紅八分

川鬱金一錢

川石菖蒲一錢

冬桑葉一錢

竹葉四十片

病久屬虛。逢勞則發。謂之勞復。古用補法。今脈雖數。而沉虛作冷。因乎坐久。責之陽虛。第筋骨作痠。總屬血事。再擬歸脾湯加減。

東洋參一錢

焦冬朮三錢

清炙綿耆三錢

炒棗仁三錢

茯神三錢

廣木香一錢

當歸三錢

陳皮八分

清炙甘草一錢

遠志炭八分

熟地炭五錢

生薑二片

紅棗七枚

桂圓肉十四枚

上焦肺脹。已有一年。是爲最難愈之症。今已治有效驗。而復然如前。必有誤食油膩之故。

瓜蒌皮八錢

枳殼二錢

桔梗三錢

象貝三錢

淡黃芩三錢

冬桑葉半錢

杏仁三錢

蘇薄荷葉半錢

陳皮八分

連翹三錢

竹葉卅片

肝痛在心絡。痛發則牽及背脅。用柔補絡分。稍差而不能除根。

大熟地六錢

當歸三錢

桂枝半錢

柏子仁三錢

生白芍三錢

清炙甘草半錢

炒甘杞子三錢

遠志炭一錢

製香附三錢

淡附子半錢

十三齡室女。去冬患下焦肝痛。六脈弦數。當用張石頑先生法。

當歸三錢

川棟子三錢

炒小茴半錢

酒延胡半錢

生白芍三錢

生牡蠣五錢

降真香一錢

生香附半錢

冬桑葉半錢

地骨皮三錢

肝痛在胃。已有月餘。舌苔脈弦數。怕冷。當用河間法。

當歸三錢

川棟子三錢

桂枝一錢

酒炒延胡半錢

陽春砂冲入分

炒白芍二錢

薑半夏二錢

陳皮八分

枳殼半錢

川鬱金半錢

作瀉已久。用運脾已效。再當香砂法。

文黨參三錢

焦冬朮三錢

茯苓三錢

清炙甘草半錢

半夏麴二錢

陳皮八分

廣木香一錢

陽春砂同煎

煨益智仁半錢

炮薑炭八分

紅棗七枚

休息痢已有四年。用藥痛尙在而已少解。脈尙弦。舌尙黃。再當前法。

當歸三錢

炒白芍三錢

淡黃芩三錢

清炙甘草半錢

廣木香半錢

炒川連一錢

青皮一錢

川棟子三錢

酒延胡半錢

製香附三錢

腹痛響瀉或嘔。胃不開。舌黃。頭面腫。當屬肝分之風熱。

大生地五錢

當歸三錢

生白芍三錢

桂枝一錢

炙甘草半錢

炒半夏三錢

生牡蠣五錢

陳皮八分

澤瀉三錢

少年耳聾。皆由膽分之風熱。誤服補劑。每致久聾。現在少陽司令。故耳痛流水。又發寒熱。腹痛作瀉不爽。皆肝膽病也。

軟柴胡半錢

薄荷半錢

桂枝一錢

清炙甘草半錢

防風一錢

連翹三錢

滑石三錢

龍膽草酒炒半錢

苦丁茶三錢

當歸三錢

炒白芍三錢

胸腹痛響。作瀉如痢。舌黃。背冷。兩手皆弦細小數。當屬風木之乘脾。

當歸三錢

生白芍五錢

桂枝半錢

清炙甘草半錢

川棟子三錢

酒延胡半錢

廣木香一錢

炒丹皮三錢

陽春砂入煎

陳皮八分

欬嗽已去。惟右乳曾經作突。嗣後則成小瘡。今則延走乳上近腋下。診脈弦小。此屬肝風鬱熱。

生地五錢

炙鼈甲四錢

生牡蠣五錢

炒丹皮三錢

冬桑葉半錢

晚蠶沙三錢

赤芍二錢

夏枯草花三錢

連翹三錢

生甘草節二錢

寒熱往來。已有半年。頭痛。冷汗。欬嗽。腹作痛瀉。六脈弦小細數。無汗者用逍遙散。

有汗者當以清骨散。

青蒿梗三錢

炙鼈甲五錢

當歸三錢

炒白芍三錢

茯苓三錢

焦冬朮半錢

清炙甘草半錢

陽春砂同煎

冬桑葉半錢

生牡蠣五錢

新會皮八分

荷葉一角

五月先肝氣作痛。後即欬嗽失紅。且腹痛作瀉。或如痢。或水瀉。舌黃脈弦。少有寒熱。鄙見總當用清肝法。

當歸三錢

生白芍五錢

桂枝半錢

清炙甘草半錢

冬桑葉半錢

生牡蠣六錢

廣木香一錢

炒川連一錢

澤瀉三錢

陳皮半錢

期早而多又延。色淡。仍諸筋骨痛。少寐多淋。是當益涼兼澀。

大生地八錢

歸身三錢

炒丹皮三錢

生牡蠣五錢

炒懷藥四錢

炒沙苑子四錢

川續斷三錢

茯神三錢

石葦四錢

炒棗仁三錢

陳皮八分

休息痢已有四年。尚腹痛。胸腹與足皆腫。解出如墨水。脈弦細。當屬痢在厥陰。劑

已效

當歸三錢

炒白芍三錢

淡黃芩三錢

清炙甘草一錢

廣木香一錢

炒川連一錢

小青皮一錢

陳皮八分

陽春砂

製香附三錢

因跌胸痛。業經嘔出瘀血多多。乃不當心泛作嘔。或痰或飲。診脈弦細。是當調其肝胃。

礬半夏三錢

陳皮八分

炒川連八分

炮薑炭八分

當歸三錢

炒白芍三錢

廣鬱金一錢

杏仁三錢

陽春砂同煎

製香附三錢

汗不止。仍當益陰以收汗。有汗者。以無汗而愈也。至經至。無論何病。當從經治。胸中滿。仍當舒木。胃不知飢。再擬肝胃法。兼以收汗。

地骨皮四錢

根生地六錢

當歸三錢

陽春砂同煎

天花粉三錢

炒丹皮三錢

丹參三錢

新會皮八分

川石斛四錢

宣木瓜三錢

荷葉一角

肝痛已用補劑。其胸中塊在。須久藥可平。至現在食稍減。舌苔。右手滯。當進通胃。

大生地八錢

歸身三錢

甘杞子三錢

柏子仁四錢

生牡蠣五錢

炙鼈甲五錢

冬桑葉半錢

炒丹皮三錢

製香附三錢

製半夏二錢

陳皮八分

病經月餘。舌白。腹痛作瘡。氣急。欬嗽痰多。夜汗。此屬冬溫失治致此。診脈弦小。當

用外寒內熱之法。

蘇薄荷葉半一錢

杏仁三錢

象貝三錢

桔梗半一錢

冬桑葉一錢

生甘草半一錢

連翹三錢

生苡仁五錢

茯苓三錢

白蔻殼一錢

酒黃芩三錢

竹葉廿片

腹痛響作瀉。以風木法。瀉已止而痛尚未去。舌淨。診脈左關當起。是肝氣之未淨也。

當歸三錢

炒白芍三錢

川棟子三錢

酒元胡半一錢

製香附三錢

陽春砂八分

澤瀉二錢

焦山梔三錢

丹參四錢

炒丹皮三錢

冬桑葉一錢

久嗽聲啞。痰臭脈大。當用甘寒。

羚羊角二錢

杏仁三錢

麥冬三錢

生甘草半一錢

桔 梗二錢 象 貝三錢 冬桑葉半一錢 陳 皮八分
 金銀花三錢 連 翹三錢 竹 葉卅片
 乾欬五十餘日。連少腹右有塊震痛。氣急。欬時有汗。胃不開。口燥。診左手弦大。右手弦數。舌右邊黃。是屬肺燥之夾肝風者。

杏 仁三錢 象 貝三錢 桔 梗二錢 生甘草半一錢
 陳 皮八分 麥 冬三錢 冬桑葉半一錢 生牡蠣五錢
 陽春砂同八分 根生地五錢 竹 葉卅片
 久有欬嗽。已五六年。現在又傷風帶起。是夾有外感。當先祛之。

蘇薄荷葉半一錢 杏 仁三錢 瓜蒌皮三錢 桔 梗二錢
 象 貝三錢 冬桑葉二錢 酒黃芩三錢 白蔻殼一錢
 連 翹三錢 生甘草半一錢 陳 皮八分 竹 葉卅片

重風溫已有六日。欬嗽氣急。口渴舌黃。背冷自汗。診脈弦大。當用辛涼。

蘇薄荷葉半一錢

酒黃芩三錢

羚羊角二錢
先煎

桔梗三錢

生甘草半一錢

瓜蒌皮三錢

苦杏仁三錢

象貝三錢

冬桑葉一錢

橘紅八分

連翹三錢

竹葉四十

曾經失經至年餘。現在寒熱往來。口苦胸脹欲嘔。欬嗽。診脈弦細。舌淨。是屬肝病。當用清骨散法。

青蒿梗半一錢

炙鼈甲五錢

生地五錢

當歸三錢

冬桑葉一錢

生牡蠣五錢

降真香一錢

川鬱金半一錢

炒丹皮三錢

生白芍三錢

陳皮八分

荷葉一角

肝風射肺。既經嗽血。又復痛瀉。脈弦細。再當用土中拔木法。

生地炭六錢

當歸三錢

生白芍四錢

桂枝半一錢

清炙甘草半一錢

冬桑葉半一錢

川斷續三錢

宣木瓜三錢

生牡蠣五錢

茯苓三錢

胸中痛。胃不開。脈弦數。當用河間法。

當歸三錢

川棟子三錢

桂枝尖一錢

酒延胡半一錢

炒白芍二錢

柏子仁三錢

遠志炭八分

白蔻殼一錢

礬半夏二錢

陳皮八分

荷葉一角

屢此崩後。致變化不已。今已失紅。復歷用肝法。乃頭眩不差。而兩太陽與齒作痛。又且腹作澹。舌黃。左手尤弦數。此皆肝血虛。風熱上升之象。

大生地一兩

歸身四錢

炒刺蒺藜三錢

冬桑葉半一錢

生牡蠣八錢

生白芍三錢

清炙甘草半一錢

甘菊炭半一錢

骨碎補三錢

炒丹皮三錢

薄荷半一錢

乾荷葉一角

八月間初發瘧。屬間日至今。仍間日。盜汗。診脈左手弦大。右手弦。是久瘧必虛。又汗多者。求無汗而愈。當遵柯氏法。

製首烏六錢

炙鼈甲五錢

文元黨三錢

炮薑炭一錢

蜜炙桂枝半一錢

炒白芍三錢

清炙甘草半一錢

當歸三錢

礬半夏二錢

陳皮八分

杏仁三錢

紅棗七枚

高年素有欬血。茲又發作。脅背抽痛。痰中帶血。脈弦細。舌白。有寒熱。當用肝風射肺法。

青蒿梗三錢

炙鱉甲五錢

生地五錢

當歸三錢

川續斷三錢

冬桑葉半一錢

生牡蠣五錢

橘紅八分

生白芍三錢

象貝三錢

產後左手脈應細虛。而右手弦大。喉燥。肌熱。動則有汗。肌膚作腫。當屬血虛。肝風

爲病。產已彌月。身子尙未乾淨。服藥後經多且旺。其色紅。間有黑塊。恐日久致成崩漏也。

大生地六錢

當歸三錢

炙鼈甲五錢

地骨皮五錢

炒白芍三錢

生牡蠣五錢

澤瀉半錢

川石斛三錢

陳皮八分

麥冬三錢

目科分五輪八廓。若現物不清。是腎輪之事。方書以目力之衰。以石決明五味子同用。可使目視得力。用之頗效。惟脈弦細。藥不宜過重。

熟地炭六錢

炙龜版四錢

北五味子二錢
搗碎

煅石決明五錢

當歸三錢

炒白芍三錢

製香附三錢

炒懷山藥四錢

合歡三錢

蜜蒙花三錢

廣木香八分

炒甘杞子三錢

大瘰後。欬嗽。舌黃。盜汗。腹痛響瀉。脈弦大。當屬出於厥陰。

青蒿梗三錢

炙鼈甲五錢

蜜炙桂枝半錢

清炙甘草半錢

冬桑葉半錢

生牡蠣五錢

生白芍五錢

半夏麴三錢

陳皮八分

當歸三錢

乾荷葉一角

肺瘧無補法。久則必邪不淨。茲身上有汗已透。而頭上尙不至流。診脈右手尙弦大。左關獨數。胃口兩便均好。鄙見總屬肺瘧。

蘇薄荷葉半錢

淡豆豉三錢

滑石三錢

白芥子半錢

白蔻殼半錢

象貝三錢

酒黃芩三錢

桔梗半錢

炙甘草八分

冬桑葉一錢

絲瓜葉三片

六脈滯大。大便作糖。掌心作熱。當屬肺分有濕熱。嗜臥者。即其徵也。

生茅朮三錢

六一散三錢

淡黃芩三錢

焦梔子三錢

生薏苡仁六錢

半夏麴三錢
醋水炒

陳皮八分

廣木香八分

通 草半一錢

大豆卷五錢

荷 葉一角

肺瘧寒熱已去。而大便響瀉。初時痛。今已不痛。今日舌苔尚黃。脈弦數去。而右手滯大。左手已有滑利之象。大抵暑淨而溼熱未除。再從肺治。

生苡仁六錢

茯 苓三錢

大豆卷五錢

象 貝三錢

通 草半一錢

六一散三錢

根生地四錢

陳 皮八分

焦梔子三錢

苦杏仁三錢

竹 葉廿四

冬溫後。尚有餘熱作躁。脈細數。右關少帶滯象。舌黑苔已浮起。兩邊黃去而微白滑。喉燥喜飲。面色紅。左太陽與目牽痛。耳孔痛。吳氏以溫邪治肺。餘熱由於肺陰之虛。故曰根生地。可以除血中之熱。此症由於病中經至。血分更虛。所以從無汗出。法當滋其肺陰。陰分一滋。則表裏皆輟矣。至目牽耳痛。總屬夾有肝風與火。再擬滋肺陰。息肝風火。

北沙參五錢

根生地三錢

麥冬六錢

生白芍三錢

羚羊角一錢半
先煎

丹皮三錢

元參三錢

焦梔子三錢

冬桑葉二錢

象貝五錢

陳皮八分

砂殼半錢

感風在肝。業經出汗。且有冷汗。然六脈弦數。舌黃燥。是肺分之熱邪未淨也。小溲

有時黃。大便亦有時澇。今年秋暑太酷。未必不夾有溼邪也。

羚羊角二錢
先煎

六一散三錢

生苡仁五錢

大豆卷五錢

桔梗二錢

連翹三錢

通草半錢

陳皮八分

茯苓三錢

麥冬三錢

竹葉卅片

出瘡已有三日。舌黃無嗽與瀉。惟身熱大汗。背上已見。脈弦滯。當托風熱。

羚羊角一錢
半

連翹三錢

桔梗二錢

生甘草一錢

象貝三錢

蟬退二錢

苦杏仁三錢

冬桑葉一錢

金銀花二錢

大力子五錢

竹肉一九

二三月出瘡。總當以風溫法。至嗜臥者。風也。內經風溫之爲病。身灼熱。汗自出身。重欬嗽嗜臥。則嗜臥者。風也。口渴者。溫而化火也。喉痛者。肺火也。大小便不解。喉痛。當治肺且托瘡。舌尖紅。有昏語。當兼及心。再擬心肺上焦法。

炒大力子三錢

桔梗二錢

羚羊角二錢先煎

根生地四錢

麥冬三錢不去心

元參五錢

苦杏仁三錢

冬桑葉一錢

川鬱金半錢

石菖蒲一錢

象貝三錢

竹葉卅片

瘡後已無餘嗽。惟素瀉仍有。乃又有寒熱。無物不嘔。舌黃薄。診脈弦數。較前已大。當屬肝陽之犯胃。卽作嘔。亦當責之風木乘脾。脾胃兩受。是木邪之盛。當先除其嘔。與喉梗胸痛。進退法。

川連八分

薑製半夏三錢

陳皮八分

苦杏仁三錢

當歸三錢

炒白芍一錢

烏鰂骨三錢

陽春砂八分

澤瀉一錢

宣木瓜一錢

茯苓三錢

鮮生薑二片

間日發瘧。總在少陽。止後復發。總屬復未經調養。總屬勞復。今又止。而右手已小。左手尚弦且濡。法當溫養肝膽。

製首烏六錢

炙龜甲五錢

當歸三錢

製半夏二錢

陳皮八分

炒白芍二錢

懷山藥四錢

清炙甘草一錢

蜜炙桂枝八分

黑穠豆衣六錢

瘡後身初涼。大便溏。欬嗽痰少。舌苔少。胃不開。脈已緩。再從肺治。甘寒法。

根生地六錢

生白芍三錢

生甘草一錢

桔梗一錢

象貝三錢

麥冬三錢

冬桑葉一錢

生苡仁五錢

茯苓八錢

生穀芽四錢

竹葉廿四

身熱已有四日。昨日已三天。有汗。是逢年經得洩。即瘡輕。今日診脈尙數。當未淨。面色紅。喉痛。舌上無苔。當用肺風熱法。

蘇薄荷葉半錢

苦杏仁三錢

羚羊角先煎半錢

桔梗二錢

生甘草八分

酒炒黃芩三錢

冬桑葉一錢

象貝三錢

連翹三錢

元參四錢

麥冬半錢

竹葉卅斤

久瀉舌淨。腹中響。間有作痛之時。診脈弦數。是必在肝脾。然響較多痛少。瀉如水。是脾虛甚。再擬舒肝扶土法。

當歸三錢

生白芍三錢

清炙甘草三錢

炒懷山藥六錢

草決明三錢

焦茅朮二錢

生地炭五錢

北五味子十四粒

冬桑葉一錢

茯苓三錢

製香附二錢

出瘡已滿月。而又受風。身熱有汗。頭脹舌燥。口夜間渴。小溲熱。診脈弦數。已有四

日。舌微黃而燥。腹中有時痛。擬辛涼合甘寒法。

蘇薄荷葉半錢

冬桑葉一錢

酒炒黃芩三錢

生甘草一錢

桔梗半錢

生白芍三錢

象貝三錢

連翹三錢

羚羊角半錢

焦山梔三錢

陳皮八分

竹葉三錢

肝風齒痛後。右手乳。左手濇。再益肝血。血足風滅也。舌苔尚滑。胃有脛痰。須消之。

大生地八錢

當歸三錢

甘杞子炭三錢

茶菊炭五錢

礞半夏三錢

陳皮八分

懷山藥四錢

煅石決明五錢

川續斷三錢

茯苓三錢

乾荷葉一角

瘡後脈虛。舌尚黃。大便素有瀉病。是腎虛。當先祛外感之風熱下移。

北沙參四錢

麥冬三錢

根生地六錢

象貝母三錢

生苡仁五錢

茯苓三錢

生白芍半錢

生穀芽四錢

新會皮八分 生玉竹四錢 荷葉一角
經停三個月。曾經患暑邪十五日。今邪淨胃開。而六脈弦大。稍有數意。是素屬陰虛有熱之體。若以孕論。脈欠靜緩。大凡孕脈。初時喜靜小也。過於有力。每致不穩。茲尙未確。宜以涼滋肝分。

大生地六錢

歸身三錢

川續斷三錢

陽春砂八分

川石斛三錢

新會皮八分

生白芍三錢

麥冬三錢

女貞子三錢

懷山藥四錢

荷葉一角

暑溼已。餘熱去。小溲長。胃漸開。是邪當淨。述左手沉部有力且數。大凡左手屬血。是血分之熱矣。第初時夾有肝痛。大抵素屬肝熱耳。

生地五錢

歸身一錢

生白芍三錢

川續斷三錢

川石斛三錢

新會皮八分

生穀芽四錢

川鬱金一錢

柏子仁三錢

炒丹皮半錢

乾荷葉一角

舌黃。胃不開。脈滯。因食麵而作瀉。南麵善助溼熱。且動肝氣。擬除麵積。兼以調胃。

炒麥芽五錢

建 麵二錢

半夏麴二錢

陳 皮八分

廣木香八分

澤 瀉二錢

焦梔子三錢

生白芍三錢

茯 苓三錢

陽春砂沖六分

荷 葉一角

今日右手頗有收斂之象。而關脈頗滑利有神。左關較前亦當收小。是屬震象矣。茲惟有時腹中痛。且胃脹。再擬調肝保元法。

大生地六錢

當 歸三錢

陽春砂沖八分

生牡蠣八錢

川續斷五錢

炒白芍三錢

製香附二錢

新會皮一錢

建石斛三錢

鹽水炒條芩二錢

乾荷葉一角

凡出瘡。葉氏曰。須按時令治之。春令用風溫法。風溫淨。則風瘡自已。茲已六日。身

熱五日後出瘡。以背上有爲齊。大便瀉。舌燥白。診脈弦數。當用辛涼合甘寒法。

蘇薄荷葉半一錢

連翹三錢

冬桑葉一錢

桔梗二錢

象貝三錢

生甘草八分

蟬衣半一錢

苦杏仁三錢

酒黃芩二錢

麥冬三錢

羚羊角先煎一錢半

竹葉卅片

診脈濇且大。左手尤濇。濇屬血虛。當益血分。

大生地八錢

當歸三錢

炒白芍二錢

川續斷三錢

炒杜仲三錢

懷山藥四錢

製狗脊三錢

甘杞子三錢

炙龜版四錢

麥冬三錢

外感後。餘邪總當涼解。况肺熱怕反傷也。身涼後尙欬痰。左脅素有塊。今自覺痰從此起。查左脅下是肝位。此塊當屬向來做工夫之故。然無形狀。非真有瘀也。不過絡中之氣鬱耳。古人云。清金可以平木。則但清其肺。而肝自可耳。

生玉竹 四錢

桔 梗 二錢

象 貝 三錢

麥 冬 三錢

地骨皮 三錢

根生地 六錢

橘 紅 八分

冬桑葉 半錢

炒丹皮 半錢

煨牡蠣 五錢

陽春砂 八分

凡病之起於產後。總屬虛症。以去血過也。轉側則淋如注。而大便之難。古人每以益血潤腸如攻下。殆今之產科每不知也。至腸上下有塊。按之不痛。屬肝氣之不舒。自覺氣悶。不能消遣。即此再擬前法加減。脈弦是肝病之象。蛔蟲屬肝。蟲由於溼熱。

大生地 六錢

歸 身 三錢

懷山藥 五錢

炒沙苑子 五錢

生牡蠣 六錢

陽春砂 八分

炙龜版 四錢

川續斷 三錢

生龍骨 三錢

陳 皮 半錢

生白芍 三錢

胃口稍減。由於飯時淘氣。且致左脅下作脹。轉矢。氣不暢。診脈稍數。舌苔右黃。當

以香砂法加減。

半夏麴三錢

陳皮八分

陽春砂冲八分

廣木香八分

當歸三錢

炒白芍二錢

生牡蠣五錢

澤瀉三錢

柏子霜三錢

炒丹皮三錢

焦梔子三錢

荷葉一角

暑邪五天。舌已黃。晚間作熱有汗。熱甚則言。脈左手尚數。右手已緩。適逢期至。當用熱從血洩法。

益元散四錢

連翹三錢
不去心

川鬱金半錢

石菖蒲九分
節

丹參五錢

當歸三錢

炒丹皮三錢

赤芍二錢

羌蔚子三錢

麥冬三錢
不心去

陳皮八分

竹葉廿四

氣急欬嗽無痰。汗甚多。諸筋抽痛。飯不得下。診脈浮弦。口渴。小便熱。是屬肝喘。

降真香半錢

炒蘇子二錢
後煎

杏仁三錢

當歸三錢

川續斷三錢

半夏麴三錢

陳皮八分

生香附半錢

川棟子三錢

酒元胡半錢

生牡蠣五錢

欬嗽舌黃。已有十日。下午作熱。脈弦細。兩脅痛。當屬肝風之妨肺。

青蒿梗三錢

炙鼈甲五錢

當歸三錢

生白芍三錢

地骨皮四錢

冬桑葉半錢

生牡蠣五錢

軟柴胡梢半錢

半夏麴二錢

陳皮八分

竹葉卅片

石頑曰。凡痛自上至下。須用溫劑。閱病原。病在肝腎。肝主筋。筋病治肝。二便屬腎。便病治腎。皆有古訓。擬溫通與補益兼施。

熟地炭六錢

當歸三錢

柏子仁四錢

甘杞子三錢

製香附三錢

桂枝半錢

炒懷山藥六錢

炒菟絲餅三錢

煨牡蠣五錢

川續斷三錢

真桑寄生三錢

大流鼻衄。止後而有涕赤色。耳響頭痛。

北沙參五錢

麥冬三錢

根生地六錢

山茶花三錢

冬桑葉半一錢

蘇薄荷葉半一錢

杏仁三錢

炒丹皮三錢

桔梗二錢

羚羊角先煎半一錢

生甘草半一錢

竹葉卅片

痛瀉已去。寒熱亦減。舌淨。脈仍弦。再當調肝。述腹中有塊梗痛。胃不開。

當歸三錢

炒白芍三錢

生牡蠣五錢

陽春砂同煎八分

半夏三錢

新會皮八分

澤瀉半一錢

青蒿梗半一錢

炙鼈甲四錢

川石斛三錢

乾荷葉一角

寒熱往來。頭痛胸脅痛。欬嗽氣急。舌黃。已有五日。脈弦細。口苦欲嘔。當屬少陽受風之症。

軟柴胡半一錢

蘇薄荷葉半一錢

酒炒黃芩三錢

冬桑葉半一錢

礬半夏二錢

陳皮八分

川鬱金半錢

瓜蒌皮三錢

苦杏仁三錢

生牡蠣五錢

竹肉一九

六脈全乾。婦人崩漏。茲小產後。血分大虛。故有此脈。冷氣上冲。丹溪曰。凡自覺冷者。非真冷也。此屬肝氣之逆。

大生地六錢

當歸三錢

炙鱉甲四錢

炙龜版四錢

懷山藥四錢

煅牡蠣四錢

陽春砂入分

川續斷三錢

新會皮八分

建石斛三錢

六脈已起。胃口亦開。是病已淨盡。若論補法。則惟涼滋肺胃。是熱病之後路。

大生地八錢

炒白芍三錢

麥冬三錢

北沙參五錢

懷山藥四錢

茯苓三錢

象貝三錢

新會皮八分

建石斛三錢

生苡仁四錢

乾荷葉一角

肺氣感冒。三日是半經。業經大汗。據理應涼淨。若未淨。當再三。日。然亦無大苦。有汗者。不應再汗。况頭眩足滯痛皆瘥。脈數已流利。擬再清肺。

苦杏仁三錢 連翹三錢 桔梗半錢 生苡仁八錢

礬半夏二錢 陳皮八分 茯苓三錢 生甘草八分

冬桑葉一錢 焦梔子三錢 竹葉卅片 荷葉一角

右脈已滑。有力有神。左寸亦然。惟左關尙濇。是總由肝血之虛。再當補其肝血。兼以養絡。

熟地八錢 當歸三錢 陳龜膠三錢 真驢膠三錢

懷山藥四錢 川續斷三錢 炒杜仲三錢 柏子仁三錢

製狗脊三錢 建石斛三錢 新會皮八分

經年或瀉或燥。今已肝陽犯胃作嘔。用喻氏進退法而愈。惟瀉仍有不痛而響。以

肝症合觀。當屬風木乘脾。第又有別。以其風勝也。

當歸三錢

生白芍五錢

桂枝半錢

清炙甘草一錢半
要焦

懷山藥五錢

澤瀉三錢

炒刺蒺藜三錢

冬桑葉一錢

宣木瓜三錢

新會皮八分

診脈甚流利而緩。緩即屬脾脈之本象。所謂脈貴有神者即此。非可進熱。再用益陰健骨法。

熟地八錢

炒杜仲三錢

柏子仁三錢

懷山藥四錢

當歸三錢

製狗脊二錢
去毛

真桑寄生三錢

炒白芍二錢

川續斷三錢

懷牛膝三錢
炒

建石斛三錢

發時純熱。口大渴有汗。總屬痺瘧。今日移早。瘧本將愈。惟不令出汗。明日須再至。飲後胸微脹。是水不速下。舌胎較昨厚。仍微黃色。口喉燥甚。是熱傷肺津。白虎湯

本生津去熱之藥。祛熱生津。於病本合。先有頭眩肢重。本有溼熱痰。脈數不滯。斷非伏暑。再擬白虎湯複入祛溼消痰。兼以生津。

生石膏一兩

知母三錢

生甘草半錢

連翹三錢

苦杏仁三錢

赤茯苓五錢

陳皮八分

生苡仁六錢

象貝三錢

枳殼半錢

白粳米三錢

用白虎湯後。大熱大汗已止。舌苔前半已去。而根尚有黃色。口苦且膩。掌心尚熱。小洩赤。診脈左手已小。右手稍有滯象。惟皆數。數屬邪未淨。想瘧瘧由於暑邪之在肺。再擬肺入法。惟素有溼邪。複入祛溼。

羚羊角_{先煎}二錢

象貝三錢

通草一錢

陳皮八分

連翹三錢

麥冬三錢

赤茯苓三錢

生苡仁八錢

六一散三錢

焦梔子三錢

竹肉一九

昨日又勞。今日又有寒熱。舌黃口渴脈數。凡寒熱有出於肺與少陽膽者。有出於肝者。有出於募原者。有出營衛之和者。今逢勞則發。當責營之衛不和。出汗大便溏。衛病也。乾嘔或有清水。肝病也。今日先擬調和營衛法。

東洋參半一錢

陳皮八分

炒白藥三錢

陽春砂六分

生冬朮三錢

礬半夏三錢

炮薑炭八分

生薑二片

當歸三錢

桂枝一錢

茯苓三錢

紅棗七枚

舌淨脈平。惟鼻間尚有紅色。當益其陰。

大生地八錢

北五味十四粒

川石斛三錢

丹皮三錢

炙龜版五錢
先煎

懷山藥四錢

新會皮八分

山茶花三錢

麥冬三錢

茯苓三錢

伏邪論每至下午。或純熱。或純寒。或寒熱相間。日日如是。今身熱三日。涼後第六

日又熱。第七日出汗身涼。診脈已緩。舌白燥。小溲赤短。是汗後。書以汗多者禁利小便。口味淡。胃火未淨。口氣亦然。鄙見仍屬肺分受風化火之候。頭不脹。胸不悶。脈雖滯。腰腿雖痠。總非伏邪。再擬清涼肺胃法。

羚羊角二錢 煎

連翹三錢 去心

焦梔子三錢

苦杏仁三錢

鮮生地八錢

麥冬三錢 不去心

陳皮八分

茯苓三錢

桔梗半錢

象貝三錢

竹葉卅片

肺風感冒。身已涼。舌已淨。脈小數。口渴少寐。頭眩痛癢。指木腰痛。呼吸腰間痛。是筋中病。大便不解已有四日。是夾有勞乏。

北沙參六錢

麥冬三錢

根生地五錢

象貝三錢

生石決明三錢

生穀芽五錢

新會皮八分

川石斛三錢

茯苓三錢

生玉竹四錢

竹葉卅片

前日寒熱頭脹。今日又冷且戰後熱。熱時無汗。頭上與身尙覺木。腰背穿痛。舌黃滑。診脈兩手皆滯。書以木屬溼痰。合脈怕作伏邪。第冷時作戰是瘧象。而瘧屬肝分。擬用肺分法。勿用小柴胡引賊也。

蘇薄荷葉半一錢

礬半夏三錢

杏仁三錢

厚朴一錢

白芥子一錢

陳皮八分

滑石三錢

酒黃芩半一錢

白蔻殼一錢

桔梗二錢

蘇梗二錢

荷葉一角

肝風齒痛月餘。右腫去而左又腫。頭額痛。診脈尙弦。總由血虛生風。

炒刺蒺藜三錢

生地八錢

炒茶菊炭半一錢

炒半夏麴三錢

蔓荊子三錢

當歸三錢

甘杞子炭三錢

陳皮八分

明天麻半一錢

生牡蠣六錢

生石決明三錢

荷葉一角

由瘧瘧後。帶起胃溼熱邪。現在舌黃已減。而根未除。目筋尙紅。鼻柱色亮。臥不安。

口已燥。而食後不運。診脈稍有滑象。是溼熱未能之候。祛疾務盡。再用前法。

生苡仁八錢

生蒼朮二錢

礬半夏五錢

陳皮八分

羚羊角二錢
先煎

連翹三錢

澤瀉半錢

陽春砂八分
沖

茯苓三錢

綿茵陳三錢

竹肉一九

失紅右脅下痛。舌黃。大小溲均熱。診脈右手弦。左關獨起。是必由於熱傷肝絡。

降真香半錢
半

製香附三錢

根生地三錢

生白芍半錢

川鬱金三錢

炒丹皮三錢

生牡蠣五錢

焦梔子三錢

炒蘇子三錢
後煎

冬桑葉一錢

軟柴胡半錢

竹肉一九

身熱出汗。小溲赤短。頭痛且眩。兩足滯。診脈浮弦數。已有三日。尚渴。身上不怕冷。而熱。舌上無苔微白。晝以無苔者邪在肺。身熱有汗者屬風。頭尚痛者邪未淨。頭眩者溼痰。兩足滯兩手木者亦屬溼痰。擬祛肺分之風熱溼痰。

蘇薄荷葉半錢

冬桑葉一錢

生米仁八錢

酒黃芩五錢

炒大力子三錢

礬半夏三錢

連翹三錢

苦杏仁三錢

陳皮八分

桔梗半錢

絲瓜葉三片

荷葉一角

今日診脈皆起。惟欠長。且有數意。總屬血分之虛。張氏書。以脈洪大者。可重用地黃。惟脈小者。不能以脈小爲不能載重藥也。再擬前法。

大熟地六錢

當歸三錢

真驢皮膠三錢
烊沖

甘杞子三錢

炒杜仲三錢

川續斷三錢

斬艾絨一錢

建石斛三錢

陳皮八分

炮薑炭三分

紅棗七枚

診兩手脈皆滯。舌苔根黃厚。頭脹雖瘥而未除。胃開氣沖。至喉作痒而乾嘔。所患者是肝胃不和。頭脹是陽氣不達顛頂。故有起落。而據脈與苔。恐有瘕病之起。故以越鞠丸加減。

焦茅朮三錢

半夏麴三錢

煨葛根半錢

製香附三錢

炒建麴二錢

炮薑炭六錢

陳皮八分

陽春砂冲八分

茯苓三錢

鮮荷葉一角

暑溼七日。尙未通陽。頭痛汗不得出。尙有寒。舌苔甚薄。當在上焦。惟胸悶稍加中焦藥。至腹中流走作痛。必夾有肝氣。嗜臥是溼邪。擬上中焦法。兼以舒肝。

蘇薄荷葉半錢

連翹三錢

桔梗半錢

川鬱金半錢

白蔻殼半錢

六一散四錢

半夏麴二錢

杏仁三錢

厚樸一錢

陳皮八分

絲瓜葉二片

竹葉卅片

間日瘧後。胃開脈弦數。舌黃。想間日瘧後。仍當溫肝。惟夾有外風在肺。打嚏欬嗽。有痰。喉中覺熱。複入清肺可耳。

製首烏六錢

當歸半錢

象貝三錢

生玉竹四錢

炙鱉甲 四錢

冬桑葉 一錢

桔梗 半錢

炒白芍 二錢

杏仁 三錢

生甘草 八分

荷葉 一角

右邊脅間穿痛。且痛時作嘔。必欲食之。診脈弦細。舌中黃。是屬絡中肝痛。而夾有胃熱與痰。

生地炭

炙鼈甲

製半夏

冬桑葉

當歸

煨牡蠣

陳皮

川續斷

柏子仁 三錢

軟柴胡梢 一錢

炒丹皮 三錢

齒痛已有月餘。今大痛亦三四日。兩太陽痛。診脈數。舌白燥。當用肝分法。

炒刺蒺藜 三錢

蔓荊子 三錢

薄荷 半錢

生地 六錢

羚羊角 一錢半
先煎

冬桑葉 一錢

當歸 三錢

炒白芍 二錢

生牡蠣 五錢

陳皮 八分

荷葉 一角

感風出瘡。已有五日。業經有汗。無須辛散。舌黃。口渴。脈數。當用涼劑。且素屬火體。是氣有餘。血不足。茲姑先祛外邪。

羚羊角先煎一錢半

桔梗三錢

蟬退半一錢

連翹三錢

炒大力子半一錢

酒黃芩三錢

象貝三錢

陳皮八分

苦杏仁三錢

冬桑葉一錢

竹肉一丸

身熱七日。涼後舌苔微黃。胃不開。鼻間有紅。小溲黃。診右手尤弦。有數意。是餘邪化熱之候。當清涼肺胃。

北沙參五錢

天花粉三錢

連翹三錢

陳皮八分

麥冬三錢

山茶花三錢

象貝三錢

炒丹皮三錢

焦梔子四錢

茯苓三錢

竹葉卅片

嗽血已止。而口不知味。必有外感。舌黃。午後胸前塞。兩腿痠痛。手顫不寐。大約受

有暑溼熱。當用甘寒。

六一散四錢

桔梗三錢

象貝三錢

焦梔子三錢

知母三錢

枳殼半錢

通草半錢

木防己三錢

生石膏六錢

冬桑葉一錢

茯苓三錢

竹葉卅片

伏邪十日。冷顫雖去。汗雖有。而小溲未長。口中尚膩。脈弦滯。當清其肺溼。

杏仁三錢

半夏麴三錢

陳皮八分

六一散四錢

通草半錢

連翹三錢

枳殼半錢

焦梔子三錢

酒炒黃芩三錢

桔梗二錢

竹葉卅片

寒熱已有三四日。頭脹欬嗽。小溲赤。脈右寸弦浮數。當屬上焦暑風。因新感風寒引起。

薄荷半錢

白蔻殼一錢

杏仁三錢

連翹三錢

枳殼半一錢
桔梗二錢
冬桑葉半一錢
象貝三錢

陳皮八分
竹葉廿四

先瀉十餘日。止後反腹痛。且有寒熱。脈滯大。是皆溼熱不得開廓之故。

厚樸半一錢
杏仁三錢
川鬱金半一錢
枳殼半一錢

六一散四錢
茯苓三錢
通草半一錢
桔梗二錢

半夏麴二錢
陳皮八分
荷葉一角

頭痛身熱十餘日。大便瀉。舌黃。口渴欬嗽。是上焦暑溼夾風。

薄荷半一錢
生苡仁五錢
象貝三錢
茯苓三錢

杏仁三錢
連翹三錢
桔梗三錢
陳皮一錢

六一散四錢
川鬱金半一錢
冬桑葉半一錢
竹葉卅片

前日受寒。昨日先冷作顫。熱轉神昏。至今早始涼。此刻診兩手脈弦細。舌白口苦。

胃不開。是邪尙未化火。怕成瘧疾。

蘇薄荷半錢

苦杏仁三錢

乾薑一錢

桂枝半錢

蘇梗二錢

薑半夏三錢

枳殼半錢

桔梗半錢

白蔻仁五分

陳皮八分

生薑二片

下午發熱。不作冷。汗不透澈。脈數弦。舌黃。口不渴。小溲赤。已有兩三天。當屬伏邪之輕者。當用上中焦法。五日可望解。十天可已。

蘇薄荷葉半錢

連翹三錢

通草半錢

半夏二錢

杏仁三錢

厚朴一錢

焦梔子三錢

酒炒黃芩半錢

滑石三錢

陳皮八分

荷葉一角

胃中梗塞。或酸或苦。無物不嘔。已有三月。舌黃厚。脈弦細。當屬肝陽犯胃。

炒川連一錢

杏仁二錢

陳皮八分

降真香一錢

炒乾薑三錢

薑半夏二錢

當歸三錢

川鬱金半錢

枳殼半錢

廣木香一錢

生白芍三錢

荷葉一角

產後左關本虛。以嗣育皆肝藏事。產後去血過多。故須百日後始復。今况又外感風熱。出汗太多。今均已愈。惟胃口尙不如前。左關尙小。再擬益血壯筋。

大生地八錢

炒白芍三錢

炒杜仲三錢

地骨皮三錢

歸身三錢

製狗脊三錢

建石斛三錢

陳皮八分

甘杞子三錢

川續斷三錢

炒丹皮三錢

傷風。脈弦滯去而稍數。舌仍黃。耳響聾。欬嗽與痰尙有。再當前法。

北沙參六錢

麥冬三錢

象貝五錢

冬桑葉半錢

石菖蒲一錢

桔梗二錢

生甘草半錢

滑石三錢

薄荷梗二錢

生苡仁六錢

竹肉一丸

諸筋抽痛。足底作痒。頭風作痛。右寸大。餘均虛。當屬肝血虛風。

大生地 六錢

歸身 三錢

川續斷 三錢

炒刺蒺藜 三錢

冬桑葉 半一錢

炒旱蓮草 半一錢

茯苓 三錢

懷山藥 三錢

炒白芍 二錢

麥冬 三錢

生牡蠣 五錢

伏邪八日已有汗。舌黃口渴唇焦。今日有昏語。胸中痛。動則欲嘔。是屬上焦心肺。現在走心。兼有肝氣。須防嘔虺與瘧。

羚羊角 先煎二錢

鮮生地 八錢

麥冬 三錢

連翹 三錢

金銀花 三錢

石菖蒲 半一錢

川連薑汁炒 八分

歸尾 三錢

益元散 三錢

川棟子 三錢

酒元胡 半一錢

陳皮 八分

竹肉 一丸

冬溫惡寒去。皮膚有涼時。而仍有熱時。口能渴。舌漸化燥。大便瀉。小便有。是移熱

已解。而肺陰餘熱未除。再當遵葉氏甘寒法矣。惟太陽經與兩手腕牽掣。且嘔酸綠水。是仍屬夾有肝氣。法當複入肝藥。而避去甘味。以嘔家忌甘也。

苦杏仁三錢

象貝五錢

生白芍二錢

焦梔子三錢

瓜蒌皮三錢

陳皮八分

冬桑葉二錢

天花粉三錢

苦桔梗半錢

黃芩三錢

連翹三錢

生薑二片

此薑所以除嘔也。平肝也。丹溪有生薑梔子湯。用以通肝熱。祈勿泥。感風肌熱已久。今已有汗。而舌黃口燥。欬嗽痰如水。喉痒。診脈弦數。據書風溫日久。表裏均熱。當用甘寒。

苦杏仁三錢

生甘草一錢

桔梗二錢

羚羊角二錢先煎

根生地六錢

地骨皮三錢

冬桑葉半錢

橘紅八分

麥冬三錢

生玉竹三錢

象貝五錢

竹肉一九

溼瘧以溫脾得止。述胃開。大便已燥。小溲亦長。舌苔黃去而尚厚。仍滑。尚非過燥之候。擬再祛溼溫中。

東洋參三錢

陳皮八分

茯苓三錢

生苡仁六錢

焦冬朮三錢

炮薑炭半錢

清炙甘草八分

廣木香一錢

礬半夏三錢

桂枝半錢

炒穀芽五錢

生薑二片

紅棗七枚

少腹痛。氣升作嘔。診脈兩關尺獨大。欬嗽多痰。患經四載。此屬奔豚。當用石頑先生法。

當歸三錢

川棟子三錢

小茴香炒三錢

酒元胡半錢

生牡蠣六錢

烏鰂骨三錢

降真香半錢

生香附半錢

炒白芍三錢

澤瀉三錢

四帖痛去。而欬嗽多痰。再以前法。複以息風。

外感去後。帶起肝痛作嘔。口渴。脈弦數。

歸 鬚三錢

炒川連一錢

杏 仁三錢

炒白芍三錢

川棟子三錢

半夏麴三錢

降真香一錢

鮮生地二片

酒元胡半一錢

陳 皮八分

生香附半一錢

兩劑痛嘔皆去。

診脈沉弦。五更腹痛作瀉。當用建中加減。

當 歸三錢

清炙甘草半一錢

生牡蠣五錢

製香附三錢

生白芍五錢

南天燭六錢

陽春砂冲八分

川續斷三錢

桂 枝半一錢

炒丹皮三錢

陳 皮一錢

厥陰大瘧自愈後。左脅生有瘰母且多。欬嗽痰少。診脈右手已調。左關弦數。大凡

瘰癧。久則必失紅。且塊形日增痛。今已患有欬嗽。豈已愈之事。故用薛氏法入劑未效。鄙見仍須進之。藥足其瘰癧自消。

炙鼈甲 六錢

當歸 三錢

小青皮 半錢

旋覆花 三錢
包煎

炙龜版 四錢

生牡蠣 六錢

柏子仁 四錢

青蔥管 二支

生地 五錢

軟柴胡 梢半錢

冬桑葉 一錢

後記

《孫文垣醫案》五卷。明代醫家孫一奎撰。一奎字文垣（曹炳章原提要稱「一奎爲文垣之子」，誤），號東宿，別號生生子，安徽休寧人，生活於明嘉靖、萬歷年間。孫氏冲年機穎好《易》，後由儒業醫，博學勤求，重視醫學理論研究，嘗謂：「脫非生平融通《素》、《難》、《本草》，仲景、潔古、守真、東垣、丹溪諸書，不可以語此秘密，醫何容易哉也。」故他學兼衆長，而多卓識。立論命門動氣、三焦相火，影響深遠，後人輒以溫補派目之。著有《赤水玄珠》、《醫旨緒餘》、《孫氏醫案》等。

本書爲孫氏臨證驗案之輯集，較客觀地反映了一奎的學術經驗和治病特點。他治療雜病，重視脾胃，善用參耆等甘溫之味，以起諸沉痾痼病，用藥酷肖汪石山，可謂得師門心傳而延續家法者。然孫氏又精攻

擊之術，就本書所見，如治吳九宜晨泄半年，凡灸關元、服補脾腎藥皆無效，斷爲食積痰泄，逕投備急丸、保和丸。倪五娘子案，中風火盛，與涼膈散加味；春寰公長君患痘症稠密，勢篤，衆醫束手，擬予保元湯，孫力排衆議，投寒涼清熱之劑；大宗伯郎君董龍山夫人便血，用桃仁承氣湯攻下；馬二尹迪庵公患心腹脹痛，先投香砂六君醒脾，繼以催吐法；痰火、咳血諸症，又慣用當歸龍薈丸瀉火去積。凡此等等，皆能力挽險勢而取得顯著的療效，足證孫氏治痛，兼收博采，獨運匠心，未嘗囿守於汪氏藩籬也。昔錢小松評曰：「人多用攻，孫君獨補；人多用下，孫君獨用吐」，洵稱允當。又卷二金達泉瘡痢案，用人參敗毒散而瘳，開後人喻西昌治痢名法——急流掩舟法之先河。

此次重刊，以上海中醫學院圖書館藏清·康熙間歙邑黃鼎刊《赤水玄珠全集》爲參校本，訂正了不少《大成》本手民排印之誤，既存《大成》之特色，又復孫氏學術之原貌。

《三家醫案合刻》 凡三卷，由吳子音哀輯。卷一葉桂醫案，卷二

繆遵義醫案，卷三薛雪醫案。子音字金壽，笠澤人，生於清。道光年間。吳氏儒雅博學，工詩善書，兼通於醫，爲吳醫張容庭之人室弟子，精心搜羅吳郡前賢方案有年，纂爲三家醫案，名刻傳世，澤被杏林，實賴其功。卷一葉桂醫案，桂字天士，號香岩，生於清代康熙、乾隆間。治學廣博，兼貫各家，論證議理，每具精思，而多發揮。論治外感溫熱，創言衛、氣、營、血說，羽翼仲景，垂範後世。論治雜病、內傷，亦每自出機杼，發前人所未發。醫學聲名，盛譽於世，《清史稿》稱：「大江南北言醫，輒以桂爲宗，百餘年來，私淑者衆，最著者吳瑭、章楠、王士雄。」惜其生平診務繁忙，無暇著述，惟相傳之《溫證論治》一卷，及由門人、後學輯集之《臨證指南》、《三家醫案合刻》、《未刻本葉氏醫案》等傳世。本刻所見諸案，析理深邃，用藥精當，足堪後人師法，如救胃以涵肺之用甘寒，溫通陽氣以祛水濕，宣通上焦以開氣郁單脹，聚精固攝約束奇經，脾腎雙補之藉黑地黃丸，蟲蟻疏通逐邪以治頭面清陽痹阻，杜牛膝、麝香通精竅瘀結，琥珀、丹參、回生丹上清心竅，下調奇脈，血肉

有情以治虛怯乾咳等等，皆是淵源有自，別開生面。且諸案大抵爲《指南》不載，故彌足珍貴，兩書參閱，有珠聯璧合之美，其要旨雖一，而天士學術由此而又增輝色焉。卷二繆遵義醫案，繆氏生平不詳，該案由吳子音業師張友樵先生手錄，諸案每重於調補，尤擅用「異類有情」之味，如鱉、蛤、鹿、鯽、鰻、鯉、獺、牛、養、猪、鴨等皆入藥爲用，變遙承晉唐風範，而自成一家本色。又於濁藥輕投頗具靈思，治腎陰既虧、脾陽復陷之證，用參、朮扶中，又佐熟地二錢泡湯煎藥，可謂別具標格，用心良苦，補景岳治虛之不逮。案中有通絡用旋覆花湯，則與天士學術相合。卷三薛雪醫案，薛雪字生白，號一瓢，與葉桂同時齊稱，爲吳中當時名家。薛氏學識淵博，工詩善畫，亦精於醫，性孤高，不求聞達，曾舉鴻博，不就，與袁枚友善。對濕熱病證頗多闡發，有《濕熱條辨》傳爲薛作存世。本刻所見諸案，立論恢宏，用藥周匝，文詞典雅，堪稱歷來醫案之佳作。案中如建中湯合琥珀治腹中急痛，五汁飲治三陽結爲膈，秋石、紅棗治龍雷火熾，三生飲沃焦潤枯，滋營養液膏調元却老，

心脾雙補丸療婦科諸疾，皆靈思巧構，寓意良深，可資後學參考。

這次校勘，以上海中醫學院圖書館藏清·道光間刊刻本爲參校本，手民排版之誤，及句讀明顯錯處，略事訂正，以存《大成》之本色也。是爲後記。

《張畹香醫案》凡二卷。張畹香，清代醫家，世居浙江紹興，約生活于嘉慶至同治間，擅治傷寒、暑溫，著稱一時，生平不詳，著有《溫暑醫旨》、《醫病簡要》及《張畹香醫案》傳世。

張氏業醫主張「多讀書，多看各家書籍，自然腹中淵博，胸有准繩。」觀其治驗，皆貫穿仲景、河間、景岳、石頑、嘉言、天士等學術，而尤得力於葉氏，凡案中所見辛涼、甘寒、通絡諸法，俱天士餘緒而稍變化焉。

本書無其他版本可參，惟就案中句讀及手民排版顯誤者校正之。